

Clélie, histoire romaine... par
Mr de Scudéry,...

Clélie, histoire romaine... par Mr de Scudéry,.... 1656-1660.

1/ Les contenus accessibles sur le site Gallica sont pour la plupart des reproductions numériques d'oeuvres tombées dans le domaine public provenant des collections de la BnF. Leur réutilisation s'inscrit dans le cadre de la loi n°78-753 du 17 juillet 1978 :

- La réutilisation non commerciale de ces contenus est libre et gratuite dans le respect de la législation en vigueur et notamment du maintien de la mention de source.

- La réutilisation commerciale de ces contenus est payante et fait l'objet d'une licence. Est entendue par réutilisation commerciale la revente de contenus sous forme de produits élaborés ou de fourniture de service.

[CLIQUER ICI POUR ACCÉDER AUX TARIFS ET À LA LICENCE](#)

2/ Les contenus de Gallica sont la propriété de la BnF au sens de l'article L.2112-1 du code général de la propriété des personnes publiques.

3/ Quelques contenus sont soumis à un régime de réutilisation particulier. Il s'agit :

- des reproductions de documents protégés par un droit d'auteur appartenant à un tiers. Ces documents ne peuvent être réutilisés, sauf dans le cadre de la copie privée, sans l'autorisation préalable du titulaire des droits.


- des reproductions de documents conservés dans les bibliothèques ou autres institutions partenaires. Ceux-ci sont signalés par la mention Source gallica.BnF.fr / Bibliothèque municipale de ... (ou autre partenaire). L'utilisateur est invité à s'informer auprès de ces bibliothèques de leurs conditions de réutilisation.

4/ Gallica constitue une base de données, dont la BnF est le producteur, protégée au sens des articles L341-1 et suivants du code de la propriété intellectuelle.


5/ Les présentes conditions d'utilisation des contenus de Gallica sont régies par la loi française. En cas de réutilisation prévue dans un autre pays, il appartient à chaque utilisateur de vérifier la conformité de son projet avec le droit de ce pays.


6/ L'utilisateur s'engage à respecter les présentes conditions d'utilisation ainsi que la législation en vigueur, notamment en matière de propriété intellectuelle. En cas de non respect de ces dispositions, il est notamment passible d'une amende prévue par la loi du 17 juillet 1978.


7/ Pour obtenir un document de Gallica en haute définition, contacter utilisationcommerciale@bnf.fr.











1092


Y² 274.

A.9.

Reserve

1820






C
F
A M
PA
CIN
Cuz A

CLELIE,
HISTOIRE
ROMAINE.

DEDIEE
A MADAME LA DUCHESSE
DE NEMOURS.

PAR M^R DE SCVDERY,
Gouverneur de Nostre Dame
de la Garde.

CINQUIESME ET DERNIERE
PARTIE.



A PARIS,

Chez AUGUSTIN COURBE', au Palais, en la
Gallerie des Merciers, à la Palme.

ET

JEAN BLAEV, à Amsterdam.

M. DC. LX.

AVEC PRIVILEGE DV ROY.

COLLEGE

THE

ROMAN

DEPT

ADAM BAKER

DEPARTMENT

ARMS DE SCARLET

Government of the State

of the State

THE

STATE

OF

A. BAKER

THE

STATE

OF


THE

STATE

OF

THE

STATE





REDUCTION
IMPRIMERIE



CLELIE,
HISTOIRE
ROMAINE.

CINQUIESME ET DERNIERE
PARTIE.

LIVRE PREMIER.

PENDANT qu'Aronce
s'estimoit le plus mal-
heureux de tous les hom-
mes, il y auoit des mo-
mens où Horace iouÿssoit de tou-
te la douceur que la gloire peut
s. Partie. A

2 CLELIE,

donner, & mesme de toute celle que donne l'esperance à vn cœur veritablement amoureux. Il auoit la ioye d'estre satisfait de luy, qui est le plus sensible plaisir qu'une personne raisonnable puisse auoir; il auoit rendu vn seruice signalé à sa Patrie, & quoy qu'Aronce l'eust desarmé, sa derniere action le consoloit de ce malheur; & Clelius luy estant si fauorable, il pouuoit raisonnablement penser que la fin de la guerre seroit le commencement de sa felicité. Car il voyoit alors tous les Romains si fortement resolu de se bien defendre, qu'il ne vouloit pas se persuader qu'il fust possible à Porfenna de prendre Rome. En quelque lieu qu'il allast, il auoit sujet d'estre content, excepté auprès de Clelie, qu'il trouuoit tousiours avec vne égale insensibilité pour luy.

S'il alloit dans les ruës, le Peuple faisoit mille acclamations à sa gloire; s'il alloit au Temple, il trouuoit qu'on y faisoit des Sacrifices pour remercier les Dieux de la grande action qu'il auoit faite; s'il alloit au Senat, il aprenoit qu'on auoit ordonné qu'on luy eleuaft vne statuë, & il n'y auoit enfin que les beaux yeux de Clelie qui luy ostassent l'esperance, que par tout ailleurs la fortune luy donnoit. Il est vray que cela suffisoit souuent pour troubler toute la douceur que l'esperance luy pouuoit donner. En effet le lendemain de cette grande action qui l'auoit rendu si considerable dans Rome, Clelius l'ayant mené chez luy, & l'ayant présenté à Clelie, il eut sujet de croire que ce qu'il auoit fait n'auoit pas changé le cœur de cette belle Fille. D'abord Clelius la

regardant, & la voyant avec vn air assez froid, s'emporta contre elle, par vn excez d'amour pour sa Patrie. Quoy (luy dit-il à demy bas, avec beaucoup de chagrin) vous osez paroistre triste lors que ie vous amene le Libérateur de Rome, & vous avez l'audace de me faire voir dans vos yeux des marques de l'opiniastre & iniuste passion que vous avez dans l'ame. Clelie entendant parler son Pere de cette sorte, rougit & baissa les yeux; si bien qu'Horace ne doutant pas que ce que Clelius luy auoit dit bas ne luy eust déplu, il en fut presque marry, quoy qu'il iugeast bien que ce qu'il n'auoit pas entendu deuoit estre à son auantage. C'est pourquoy s'auançant vers elle, il rompit cét entretien secret. Souffrez, Madame, luy dit-il voyant que Clelius se retiroit, que ie vous demande si

la frayeur vniuerselle ne fut point hier iusques à vous, & si vous eustes assez de force pour regarder de vos fenestres cette multitude d'ennemis qui eussent surpris la Ville, si l'on n'eust rompu le pont par où ils vouloient entrer. Vous parlez bien modestement d'une des plus belles actions du monde, repliqua-t-elle; mais pour vous monstrier que ie ne suis iamais iniuste, adiousta cette sage Personne, sçachez que quoy que vous sembliez estre destiné à faire les plus grands malheurs de ma vie, ie ne laissay pas de faire des vœux pour vous, lors que ie vous vy seul au milieu du pont à soustenir tout l'effort des ennemis. Car enfin ie vy tout ce qui se passa en cette grande occasion; & ie vy mesme Aronce defendre aux siens de tirer sur vous, lors que vous estiez dans le Tibre.

C L E L I E,

Quand vous n'aurez pas veu cette generosité de mon Riual, Madame, reprit Horace, ie vous l'aurois aprise ; car enfin ie vous ay desia dit plusieurs fois que ie cede à son merite, & à sa vertu, & que ce n'est qu'en amour que ie luy dispute l'auantage. Et pour vous tesmoigner du moins, Madame, que ie fais tout ce que ie puis, sçachez que ie n'ay presentement interrompu Clelius, que parce que i'ay bien connu qu'il vous parloit aigrement pour l'amour de moy. Ie l'auouë, repliqua Clelie, & ie veux bien auoüer encore que vous meritez mon estime, & mon amitié. Mais auourd'huy que ie voy que l'esperance s'augmente dans vostre cœur, ie veux bien vous dire encore vne fois genereux Horace que vous ne deuez pas vous y laisser tromper, parce que plus

Aronce sera malheureux, plus ie seray obligée de luy estre fidele; & que plus mon pere me persecutera, plus i'auray de fermeté à luy resister. Car enfin il m'a donnée à Aronce, & ie m'y suis donnée moy mesme; ainsi il n'y a plus que la mort qui puisse m'empescher d'estre à luy. Et quand mesme il ne seroit plus à moy, ie vous l'ay dit cent fois, ie ne serois iamais à vous, ni à nul autre. Contentez vous donc d'estre aimé de tous les Romains; iouïssiez en repos de la gloire que vous avez acquise, & ne vous rendez pas miserable pour vne personne qui ne peut iamais vous rendre heureux. Après cela estant arriué du monde, Horace fut contraint de se retirer, parce qu'il auoit le cœur si pressé, qu'il n'eust pû s'empescher de monstrier vne partie de sa douleur. Il fit donc

8 CLELIE,

vne profonde reuerēce sans pouuoir
 rien dire à Clelie, que par quel-
 ques regards tristes & amoureux
 tout ensemble. Au sortir de là il
 trouua Emile, qui estant malheu-
 reux aussi bien que luy, luy sem-
 bla assez propre à estre le confident
 de sa douleur. En effet s'en estant
 allez ensemble, & Emile ayant re-
 marqué qu'il estoit fort triste; d'où
 vient, luy dit-il, que vous me sem-
 blez si melancolique, en vn iour
 où vous ne deuriez auoir que de la
 ioye. Helas Emile! s'escria Hora-
 ce, c'est en vain que i'ay repoussé
 les ennemis, car Aronce n'est pas
 si absolument maistre du Ianicule
 dont il s'est emparé, qu'il l'est tou-
 jours du cœur de Clelie; & quand
 la fortune m'auroit fait faire des
 miracles pour le salut de Rome, ie
 n'en serois pas moins malheureux.
 Ainsi ie puis vous assurer qu'Aron-

ce n'est pas presentement si miserable que moy, n'y ayant sans doute point de malheur si insupportable que celuy qui nous fait voir que ce qui deuroit faire nostre felicité, fait nostre infortune. Mais encore, reprit Emile, vostre malheur n'est il pas aussi extraordinaire que le mien; Clelie aimoit Aronce deuant que de vous connoistre; elle l'a tousiours aimé depuis; & vous n'avez iamais pû vous en faire aimer. Mais pour moy, infortuné que ie suis, i'ay veu la cruelle Valerie ne me haïr pas, durant qu'elle a creu qu'Herminius estoit infidele, & mort. Cependant, dès qu'elle a sceu qu'il estoit viuant & innocent, elle a cessé de m'aimer, & elle m'a osté l'esperance pour tousiours. Ha Emile! reprit Horace, ce que vous dites qui fait vostre chagrin, est ce qui deuroit fai-

re vostre consolation. Car pour moy dans les transports d'amour où ie suis presentement, ie croy que si Clelie m'auoit aimé vn iour seulement en toute ma vie, le seul souuenir d'vn si grand plaisir, suffiroit à m'empescher d'estre malheureux le reste de mes iours. Mais lors que ie songe que mon Riual est aimé, que selon les apparences il le fera tousiours, que ie ne l'ay iamais esté vn seul moment, & que ie ne le seray peut-estre de ma vie, la patience m'abandonne, le desespoir me prend, & ie souhaite la mort à chaque instant. Si i'estois encore dans les sentimens où i'estois autrefois, poursuiuit Horace, lors que i'enleuay Clelie, ie pourrois aisément porter Clelius à la contraindre de m'épouser. Le Peuple après ce que i'ay fait aproueroit cette violence, & le Senat en

l'estat où sont les choses n'oseroit s'opposer à mon bonheur ; mais Emile ie connois pour mon malheur que si Clelie ne se donne elle mesme, ie ne puis vouloir la posseder ; car enfin c'est le cœur de cette cruelle personne qui peut seul faire ma felicité. Mais pour mon infortune il est au pouuoir d'un Rival que j'admire malgré moy ; pour qui j'ay autant d'estime que de haine ; à qui j'ay tant d'obligation que ie ne puis luy nuire sans estre ingrat ; & qui me donne de si grands exemples de generosité, qu'il faut estre Heros pour le surpasser. Cessez donc de vous plaindre, ou du moins ne vous plaignez pas autant que moy. Encore vne fois genereux Horace, reprit Emile, si vous scauiez ce que c'est que d'auoir esté aimé, & ne l'estre plus, vous changeriez de sentimens ; car enfin on

n'a iamais obtenu vn favorable regard, qui ne fasse naistre mille supplices; on n'a iamais entendu vne parole auantageuse, qui ne cause alors mille tourmens; & l'opposition du malheur à la felicité, fait vn si estrange bouleuersement dans vn cœur amoureux, que l'insensibilité d'une Maistresse n'approche pas de ce que ie dis. Si i'aymois vne personne insensible, reprit Horace, vous auriez raison; mais i'ayme vne personne qui a le cœur tendre, qui sçait aimer avec ardeur & avec constance; & qui par consequent sçait resister à tout ce qui s'oppose à l'affection qu'elle a dans l'ame. Quand i'ay parle d'une personne insensible, reprit Emile, i'ay entendu à vostre égard seulement, car encore vne fois il est plus cruel de n'estre plus aimé, que de ne l'auoir iamais esté. Je croy qu'il seroit plus

fâcheux, reprit Horace, de devenir pauvre après avoir esté riche, que d'avoir toujours esté pauvre; mais il n'en est pas de mesme en amour, car à mon gré la pensée de n'avoir jamais esté aimé, de ne l'estre point, & de croire qu'on ne le sera jamais, est la plus cruelle & la plus insupportable de toutes celles que l'amour malheureuse peut inspirer. Emile respondit encore à Horace, & Horace ne ceda pas à Emile, ainsi ils se separerent sans s'estre persuadez. Mais pendant que ces deux Amants se plaignoient ensemble, il y en avoit bien d'autres qui se plaignoient aussi bien qu'eux. Tous les Amants de Plotine regardant également Amilcar, comme celuy de tous qui leur nuisoit le plus, ne se haïssoient presque point entr'eux, & le haïssoient estrange-
ment, quoy qu'ils n'osassent pres-

que le tesmoigner. Themiste estant
toufiours absent, & toufiours in-
quiet, se plaignoit avec ses Amis,
Artemidore estant toufiours aimé
de deux personnes fort aimables,
n'estoit pas peu occupé, Spurius
estoit irrité contre luy-mesme de
n'auoir pû faire plus qu'Herminius,
qui après Horace s'estoit le plus si-
gnalé, & Mutius ayant autant d'am-
bition que d'amour, estoit au de-
sespoir de n'auoir pû garder le Ia-
nicule, & d'auoir esté blessé; car
encore que la blessure qu'il auoit
receuë ne fust pas dangereuse, elle
l'obligeoit alors de garder la cham-
bre. De forte que s'abandonnant
au chagrin, il pensa tout ce qu'un
grand cœur irrité contre l'amour,
& contre la fortune, peut faire de
plus difficile pour essayer de vain-
cre son malheur. Mais comme il
auoit l'ame trop noble, pour cher-

cher des voyes qui ne fussent pas honnestes, il n'imagina rien que de grand & d'heroïque. Herminius est aimé, disoit-il en luy mesme, & il merite de l'estre; Emile est aimable, & il n'a pas esté hai durant que Valerie a creu qu'Herminius l'auoit trahie & qu'il estoit mort; & Spurius est artificieux, entreprenant, adroit, & fort amoureux. Que feray-ie donc, poursuiuoit-il, pour vaincre de si redoutables Riuaux? il faut faire quelque action encore plus extraordinaire que celle d'Horace, adioustoit cét Amant affligé, & se signaler si hautement, que mes Riuaux n'osent après cela auoir l'audace de me disputer Valerie. Il faut sauuer Rome tout d'un coup s'il est possible, aussi bien est-il trop hôteux de la voir captiue, lors qu'elle se vante d'estre libre, & de la voir mesme plus miserable lors qu'elle

n'a plus de Tirans, que lors qu'elle estoit sous la tyrannie des Tarquins. Après cela Mutius ayant imaginé ce qu'il vouloit entreprendre, ne pensa plus qu'à guerir promptement, afin d'exécuter le grand dessein qu'il auoit dans l'esprit. Cependant Aronce gardant sa conquête, & prenant grand soin de faire encore fortifier le Janicule du costé de Rome, souffroit plus qu'on ne peut s'imaginer; car il voyoit bien que puis qu'on n'auoit pû d'abord surprendre cette fameuse Ville, il seroit tres-difficile d'en venir à bout par la force, si ce n'estoit dans vn temps si long, qu'Horace auroit peut-estre loisir de faire changer de sentimens à Clelie. Ce n'est pas qu'il pust la croire infidele, mais s'il ne le pouuoit croire, il le pouuoit craindre, & la gloire d'Horace, l'autorité de
 Clelius,

Clelius, l'amour du Peuple pour son Riual, le peu d'apparence qu'il y auoit que Porfenna consentist à son mariage, tout cela ioint à son absence, fortifioit sa crainte, & diminuoit son esperance. Il se confioit pourtant assez aux illustres Amis qu'il auoit dans Rome, & il se faisoit quelquefois des consolations secretes qui luy redonnoient la force de pouuoir suporter tous ses malheurs. Et puis vn sentiment de gloire, se meslant à vn sentiment d'amour, le soin du siege l'occupoit presque tout entier. Ce qui le rendoit encore plus malheureux, estoit qu'il falloit qu'il vist Tarquin & Sextus. Il scauoit bien que le premier aimoit tousiours Clelie, & regardant Sextus comme l'ayant aymée, comme la pouuant encore aimer, & comme ayant causé la mort de Lucrece, il le haïssoit &

le méprisoit, quoy qu'il connust bien que c'estoit vn Prince qui tout voluptueux & tout iniuste qu'il estoit, auoit quelque chose d'agréable dans l'esprit pour ceux qui ne le connoissoient pas bien. Aronce sceut mesme encore par vn espion, que pour tesmoigner plus de reconnaissance à Horace, le Senat luy auoit donné vne aussi grande estenduë de terre que deux Taureaux en pourroient enfermer en vn iour dans des fillons; que tous les habitans de Rome luy auoient fait chacun vn present de quelque chose, afin qu'il ne pust souffrir nulle incommodité pendant le siege, & qu'Horace en vsant genereusement, auoit redonné aux pauvres non seulement tout ce qu'ils luy auoient offert, mais encore tout ce qu'il auoit receu des riches. Si bien que le bonheur & la vertu

d'Horace luy estant également redoutables, ce Prince estoit tres-malheureux, & ne trouuoit nulle consolation que lors qu'il pouuoit aller entretenir vn moment la Princesse des Leontins de ses malheurs. Il ne le pouuoit pourtant pas souvent au commencement du siege, parce que sa presence estoit necessaire en tant de lieux, qu'il n'auoit presque pas le temps d'aller voir la Reine de Clusium. Cependant ayant esté resolu au conseil de guerre de ne songer plus à prendre Rome par force, on pensa à l'affamer. Pour cét effet Porsenna fit construire de petits forts de distance en distance, & fit fermer le Tibre au dessus & au dessous de Rome, avec des bateaux attachez les vns aux autres par des chaines; tous ces bateaux estant deffendus par des Tours qu'on esleua pour cela aux deux co-

stez du fleuve; ioint qu'il y auoit aussi des Soldats en plusieurs endroits, qu'on releuoit de garde de temps en temps. Ces bateaux seruant alors de pont à l'armée de Porfenna, les Tarquiniens passerent de l'autre costé du Tibre, & estendirent leur Camp dans la plaine, après s'estre postez en vn lieu tresauantageux, d'où ils pouuoient facilement empescher qu'on ne portast rien dans Rome de ce costé là, & d'où ils enuoyoit faire le degast dans tous les enuiron de la Ville. De sorte que Rome estoit alors enceinte de toutes parts, mais plus elle estoit pressée, plus les Romains en deuenoient courageux. En effet Herminius voulant se signaler, & trouuant qu'il estoit honteux de se laisser enfermer, entreprit de faire entrer des viures dans Rome. Ce n'est pas qu'il creust que

ce qu'il pourroit y en amener, püst estre capable de la faire subsister fort long-temps, mais c'est qu'ayant vn grand esprit, il connut bien qu'il falloit amuser le Peuple. Et il auoit raison d'en vser ainsi, car dès que les passages de Rome furent entierement fermez, le Peuple commença de craindre la faim. Mais bien que cette crainte semblast ne faire qu'augmenter sa haine pour Tarquin, il y auoit pourtant suiet d'apprehender que cela ne caufast à la fin vne sedition, parce qu'il est assez naturel aux pauvres, de murmurer contre les riches, & mesme assez ordinaire aux riches, de n'auoir pas grand' pitié des pauvres. Herminius voulant donc preuenir vn si grand malheur, dit à Valerius qu'il falloit enuoyer vers les peuples voisins, pour obtenir d'eux les choses dont ils

auoient le plus de besoin, & que pour luy il s'engageoit à faire entrer les conuois dans Rome. On fit donc vne sortie de nuit, afin de pouuoir enuoyer vers les peuples du Latium, pour les obliger à les secourir. On enuoya aussi à Cumès de Campanie, & à Pometie, mais les Latins ne voulurent point prendre party entre Rome & les Tarquiniens. Ceux de Cumès respondirent ambigument, & il n'y eut que ceux de Pometie qui promirent des prouisions, pourueu qu'on ne les obligeast à rien dauantage qu'à fournir les chariots qui les deuoient porter. De sorte qu'Herminius pour s'aquiter de sa parole, sortit de Rome avec des Troupes vne nuit que la Lune n'esclairoit point, & par vn chemin destourné que les ennemis ne s'estoient pas auisez de garder, il executa heureusement son

dessein, & fit entrer vn assez grand nombre de munitions de bouche dans Rome. Il est vray que les ennemis s'en estant apperceus, il y eut vn assez aspre combat entr'eux & les Troupes qui escortoient le conuoy, mais la valeur d'Herminius les arresta si long-temps, que les chariots entrerent tous dans la Ville, sans qu'il en manquast vn seul. Ainsi cét illustre Romain après auoir soustenu l'effort des ennemis, aussi long-temps qu'il falloit pour executer son dessein, rentra dans Rome à la pointe du iour, à la veuë de tout le Peuple qui le regarda comme vn second Protecteur après Horace. Et afin que cela fist plus d'effet dans l'esprit de la multitude, on fit passer tous ces chariots dans les grandes ruës, deuant que d'aller aux magazins publics. De sorte que durant quelques

iours le Peuple murmura moins qu'à l'ordinaire. Mais comme il y auoit alors plus de trois cens mille personnes dans la Ville, ce secours fut bien tost dissipé, & la cherté des viures augmentant de iour en iour, les murmures recommencerent. C'estoit en vain que Valerius, Clelius, Horace, Herminius, & tous les autres taschoient d'appaiser le Peuple, car la peur de la faim, & la souffrance presente, l'auoient rendu si chagrin, que tout ce que l'on résoluoit l'irritoit. Quand on faisoit des sorties, il disoit que ce n'estoit qu'afin de faire tuer des gents, & qu'il y en eust moins à nourrir; si l'on n'en faisoit point, il publioit qu'il y auoit de la lascheté à se laisser enfermer par vn si petit nombre de gents; si l'on ouuroit les magazins publics, il disoit que toutes les mu-

ditions seroient bien tost consumées, & que c'estoient des creatures de Tarquin qui donnoient ce conseil là, qui estoit bien plus dangereux qu'il ne paroissoit. Si on parloit de les fermer, & de garder les munitions publiques pour l'extrémité, il parloit d'aller porter le feu dans ces magasins, & l'on ne scauoit enfin quelles mesures prendre pour restablir quelque calme dans la Ville. Porfenna & Tarquin estant auertis de ce desordre, enuoyerent des Herauts demander à parler au Peuple. Ce fut alors que tous les gents sages qui estoient dans Rome, apprehenderent, car ils iugerent bien que c'estoit pour faire quelque proposition de paix, avec l'intention de faire souleuer le peuple si on ne la receuoit pas. Si bien que le Senat eut intention de renuoyer ces Herauts sans les enten-

dre. Mais la multitude s'esmut de telle sorte, qu'il falut les escouter, & tout ce que l'on put obtenir de ce peuple irrité, fut que ces Heraults n'entreroient point dans la Ville, & qu'ils feroient leurs propositions à la porte. En effet ils furent obligez de parler en ce lieu là. Ils dirent donc tout haut que Porfenna mandoit aux Romains, que s'ils vouloient estre deliurez de la guerre, & de la faim, & éviter vne ruine indubitable, ils le pouuoient encore, & qu'ils n'auoient qu'à receuoir Tarquin pour estre en paix; Porfenna s'engageant à luy faire oublier tout ce qui s'estoit passé, & à les proteger mesme contre luy s'il manquoit à sa parole. Les Consuls tremblerent à cette proposition, apprehendant que la misere presente, n'obligeast le peuple à preferer vne honteuse

paix, à vne glorieuse guerre; mais la chose reussit bien mieux qu'ils n'auoient creu. En effet le nom de Tarquin estoit si odieux dans Rome, que ce que Porfenna fit dire au peuple pour causer vne sedition, y restablit le calme, car à peine ces Herauts eurent-ils parlé, que cette multitude dont les ramparts estoient bordez, s'entredisant confuse-ment la proposition que luy faisoit Porfenna, cria tout d'une voix, non, non, il vaut mieux mourir, & nous mettrons plustost le feu dans nostre Ville, que d'y receuoir le Tiran; & la fureur les transporta de telle sorte, qu'ils eussent tiré leurs fleches sur ces Herauts, & violé le droit des gents, si les Consuls ne les eussent retenus. Si bien que ces enuoyez de Porfenna furent contraints de se retirer, & depuis cela le peuple ne voyant rien

à choisir que la guerre, ou la tyrannie de Tarquin, se resolut genereusement à la souffrance, & endura avec vne patience admirable toutes les incommoditez du siege. On tint alors vn conseil de guerre secret afin de tascher de faire vne entreprise pour rompre ces deux ponts de bateaux qui fermoient le fleuve, car si la riuere eust esté libre d'vn costé seulement, l'entreprise de Porfenna eust esté destruite, & ce Prince se fust veu contraint d'abandonner le siege. On auoit assez éprouué que les sorties ne seruoient qu'à affoiblir la Caualerie qui estoit dans la Ville, car n'y ayant point d'armée en campagne, qui eust dessein de la secourir, toutes les sorties estoient inutiles, & ne facilitoient pas assez le passage des viures pour la faire subsister. Si bien qu'il n'y auoit

qu'à rendre le fleuve libre pour la deliurer. On resolut donc de faire vn effort de ce costé là, & de faire cette tentatiue au dessus de Rome, & non pas au dessous, car par ce moyen les bateaux eussent pû venir commodement en descendant, apporter les choses dont la Ville auoit besoin, au lieu que de l'autre costé il eust falu remonter le fleuve. Il est vray que l'attaque en estoit aussi plus difficile, mais ayant dessein de mettre de bons rameurs à tous les bateaux destinez à l'attaque, cela n'estoit pas vn obstacle. Themiste qui fut appellé à ce conseil secret, quoy qu'il fust estrangier, proposa de mettre le feu aux bateaux ennemis, si on ne pouuoit les forcer, & en effet on se disposa à cette attaque. On fit donc remplir deux bateaux de diuerses choses combu-

stibles, c'est à dire de poix, de soufre, de bitume, & de gommes différentes, & on en choisit cent autres qui furent remplis de Soldats determinez. Chaque bateau auoit vn homme de commandement, & outre les Soldats & les rameurs, il y auoit encore des hommes avec des haches, pour rompre & detacher les chaines qui tenoient les bateaux les vns aux autres. Comme cette entreprise estoit dangereuse & difficile, tous les Braues s'empresferent pour en estre. Mutius qui estoit presque guery de sa blessure, demanda la conduite d'un des bateaux; Themiste, Herminius, Emile, & Spurius en firent chacun autant; Artemidore & Merigene furent en mesme bateau, Amilcar fut dans celuy d'Herminius, Zenocrate en commanda vn en son particulier, où

Octaue voulut estre. Horace eut la conduite d'un des bateaux enflammez, qui estoit attaché au sien, & Herminius eut soin de conduire l'autre, quoy que Mutius eust fait toutes choses possibles pour auoir cet employ. Damon, Sicinius, Acrise, & plusieurs autres Braues furent dispersez dans tous les bateaux. Cependant quoy que l'on eust apporté vn grand secret à cette entreprise, les ennemis la sceurent, & se preparerent à estre attaquez. Mais comme ils ne purent decouurer si on les attaqueroit au dessus ou au dessous de Rome, ils furent obligez de partager leurs forces; & en effet, pour les mieux tromper, on fit vne fausse attaque du costé qu'on ne les vouloit pas forcer. Comme les Thoscans & les Tarquiniens auoient construit de petits forts aux deux bouts de ce pont de bateaux qui

fermoit le fleuve, & qui seruoit à la communication des quartiers de leur armée, cela rendoit sans doute l'attaque des Romains plus difficile: mais quelque difficile qu'elle fust, elle fut resoluë, & toutes choses estant prestes pour cela précisément à minuit, tous les bateaux destinez aux deux attaques commencerent de voguer. Ceux qui deuoient faire la fausse attaque, s'auancerent pourtant les premiers, afin d'attirer les forces ennemies de ce costé là; & vn quart d'heure après les autres voguant avec ordre, & occupant presque toute la largeur du fleuve à diuers rangs, furent affronter les ennemis avec d'autant plus d'esperance de vaincre qu'ils scauoient qu'Aronce n'estoit pas de ce costé là, se reseruans à se seruir de leurs brulots, selon le besoin qu'ils en auroient. Mais
comme

comme on voit toujourn vn peu plus clair la nuit sur les riuieres que sur la terre, les Toscans apperceurent confusément ceux qui les venoient attaquer, & se preparerent à se bien deffendre. De sorte que le pont de bateaux, & les deux petits forts qui le deffendoient se trouuerent bordez de gents de guerre, & principalement des gens de trait qui voyant les Romains à la portée de leurs fleches, tirerent avec tant d'impetuosité, que la multitude des traits fit en cét endroit vne obscurité plus grande que celle de la nuit. Mais comme ils tiroient au hazard, cette premiere décharge n'eut pas grand-effet, & n'empescha pas les Romains d'aborder le pont avec des cris si fiers qu'il sembloient estre vn presage de la victoire. Tous les bateaux en

5. Partie.

C

approchant de ceux qui soustenoient le pont des Tarquiniens, s'y accrocherent, & après s'y estre accrochez, planterent de petites escheles par où les Soldats essayoient de monter sur le pont, durant que les traualleurs faisoient ce qu'ils pouuoient pour rompre à coups de haches ce qui faisoit la liaison des bateaux du pont ennemy. D'autre part Horace & Herminius qui estoient les principaux chefs de cette entreprise, furent attacher leurs brulots au milieu du pont, malgré la resistance des ennemis, & après auoir laissé vn feu caché dans ces bateaux qui deuoit esclater tout d'vn coup dés qu'ils se seroient retirez, l'vn prit à la droite & l'autre à la gauche, pour encourager les leur à se rendre; Maistres du pont, & pour essayer eux mesmes d'y monter, ce qui n'estoit pas ai-

fé, car le pont estant tout bordé d'ennemis l'espée à la main, ils les repoussioient avec impetuosité, ou dans leurs bateaux, ou dans le fleuve. Mutius, Artemidore, & Merigene monterent deux fois sur le pont, & deux fois furent repoussez dans leur bateau. Acrise tenant vne planche du pont, & estant prest d'y monter, fut blessé à la main droite, Zenocrate y monta aussi courageusement, mais comme ceux qui le suiuoient furent iettez dans le fleuve, il se trouua seul parmy plusieurs ennemis, qui le saisissant le ietterent de l'autre costé du pont, après qu'il en eut blessé deux ou trois. Mais comme il ne perdit ni le cœur, ni le iugement, il repassa en nageant l'espée à la main par dessous le pont des ennemis, & fut se reietter dans vn des bateaux pour retourner à l'at-

taque. Amilcar estant monté sur le pont, & se voyant seul des siens en cét endroit, contrefit le Thoscan, & fut assez heureux pour se pouvoir reietter dans le bateau d'Herminius, sans estre pris par les ennemis. Horace fut repoussé iusques à quatre fois, Spurius pensa estre noyé, Emile pensa l'estre aussi, & Herminius fut si heureux qu'il fit rompre vn des bateaux ennemis, dans le mesme temps que les brulots faisant leur effet, embraserent tout d'vn coup le milieu du pont, qui n'estant que de planches & de fascines, fut bien tost en estat d'estre consumé. Ce fut alors qu'on entendit vn bruit effroyable, car les Romains ietterent mille cris de ioye, & les Thoscans au contraire mille cris tumultueux, qui firent connoistre leur estonnement, car ce feu ayant pris au milieu du

pont, leur ostoit la communication d'un costé à l'autre, & ouuroit le passage à vn grand conuoy qu'ils sçauoient qui estoit préparé dans des bateaux sous les murs d'une petite ville tres-forte, où les Romains sçauoient qu'estoit le secours qu'ils attendoient. Et en effet les choses auoient esté executées si iustes, que ce conuoy estoit desia assez proche, lors que le milieu du pont fut embrasé. De sorte que dès que ce feu qui estoit melle de soufre & de bitume, eut commencé de destruire le milieu de ce pont, Horace & Herminius firent aisément acheuer de rompre autant de bateaux qu'il falloit pour faire passer aisément ceux qui portoient les munitions; car ceux qui estoient destinez à cela, escarterent avec de grands crochets ces bateaux embrasés, qui se separerent les vns des

autres, & qui fuiuant alors le cours de l'eau, s'en allerent vers Rome se destruisant peu à peu, & courant tout le fleuve d'un debrisenflammé, qui auoit quelque chose de terrible. Cependant dès que le passage fut ouuert par la flamme, on cessa l'attaque du pont, n'y ayant nulle apparence de songer à attaquer les deux forts, & ne s'agissant alors que de faire entrer le conuoy. En effet dès que le fleuve fut libre, au premier signal qui en fut donné, tous les bateaux se rassemblerent, & la moitié fuiuant Herminius, fut au deuant du conuoy, & l'autre moitié commandée par Horace, demeura à garder le passage. Ce fut alors que les ennemis firent pleuuoir vne gresle de dards, & sur ceux qui estoient demeurez à le garder, & sur ceux qui escortoient le conuoy.

A mesure qu'ils approcherent, comme il y auoit encore quelques bateaux au pied des petits forts qui estoient aux deux bouts du pont, les plus braues d'entre ceux qui estoient à cette occasion se ietterent dedans, & furent pour chasser les Romains de cét endroit. Et en effet comme ils estoient fauorisez des leurs, qui estoient encore l'espée à la main sur les deux bouts de ce pont rompu, dont ils auoient à la fin arresté le feu, Horace n'estant pas maistre de ceux qui conduisoient les bateaux, fut contraint d'abord de laisser occuper le passage du fleuve aux bateaux ennemis. Si bien que quand Herminius reuint avec le conuoy, il trouua qu'il y auoit encore à combattre pour passer. La pointe du iour commençoit de paroistre alors, & precisément en ce temps là, le Prince de

Messene estant venu pour soustenir Titus, qui conduisoit ceux qui combattoient, parut l'espée à la main sur le bout de ce pont. Mais comme il reconnut Themiste dans vn des bateaux qui estoient avec Horace, il se ietta dans vn de ceux qui occupoient le passage, cherchant en cette occasion son ennemy particulier, au milieu des ennemis du party qu'il auoit choisi. Themiste de son costé l'ayant reconnu, fit auancer son bateau plus près qu'il n'estoit, & par vne action menaçante, luy tesmoigna qu'il estoit bien aise de le voir en vn lieu où il pouuoit luy tesmoigner qu'il estoit plus digne de Lindamire que luy. Les choses estant en cét estat, Herminius à la teste de l'escorte du conuoy, parut, car Horace auoit esté contraint, par l'auis de tous les Chefs, d'attendre à fai-

re le grand effort contre ceux qui deffendoient ce passage, qu'ils pussent estre attaquez des deux costez. Et en effet, Horace & Herminius s'auançans esgalemment suiuis d'autant de bateaux qu'il en falloit pour occuper ce passage, furent les aborder l'espée à la main. Ce fut alors qu'il se fit vn combat terrible, car des forts, & des deux costez du pont rompu, il y auoit vne gresse de traits qui tomboit & sur Herminius & sur Horace. Mais sans songer inutilement à se garantir d'vn peril qu'ils ne pouuoient éuiter, qu'en abandonnant leur entreprise, ils penserent seulement à vaincre ceux qui leur faisoient obstacle. Horace sauta dans vn bateau que Telane deffendoit, Herminius dans vn autre, & Themiste, & le Prince de Messene ayant vn esgal dessein l'exécuterent si iuste, que dans le mesme

temps que Themiste fauta l'espée à la main dans le bateau du Prince de Messene, le Prince de Messene passa dans celuy de Themiste. Comme ils s'apperceurent de leur erreur, ils voulurent retourner chacun dans leur bateau, mais en voulant y repasser ils se saisirent l'un l'autre, & tomberent tous deux dans l'eau. En tombant ils se separerent par leur propre poids, & comme ils sçauoient tous deux nager, dés qu'ils eurent la teste hors de l'eau, ils se virent, se chercherent, & se porterent mesme quelques coups, & cét estrange combat eust apparemment esté funeste à tous les deux, si vn bateau Romain ne se fust approché de ces deux Riuaux. Dés que le Prince de Messene le vit, il voulut songer à s'empescher d'estre pris, & commença de nager vers vn des forts,


mais il se trouua alors qu'ayant receu vne legere blessure à la main droite, son espée luy eschapa; de sorte que Themiste le voyant sans armes, & voyant couler le sang de son ennemy, ne voulut pas le tuer en cét estat, & estant rentré dans le bateau qui venoit à son secours, le laissa aller au bord du fleuve, où il fut receu par ceux de son party. Cependant Horace & Herminius secondez de tous les autres braues, malgré l'effort des Tarquiniens, coulerent deux bateaux à fonds, tuerent presque tout ce qui estoit dans les autres, & furent enfin alors si absolument maistres du passage, qu'ils firent passer tout le conuoy. Ils eussent bien voulu pouuoir le garder tousiours, mais il n'y auoit pas moyen, car les ennemis occupant encore les forts, & les deux bouts de ce pont, ne les eussent pas souf-

ferts en cét endroit. De sorte qu'il fallut qu'ils se contentassent de mener ce conuoy à Rome, qui estoit encore plus considerable par la ioye, & par l'esperance que cela donnoit au peuple, que par le secours effectif qu'il apportoit à la necessité publique, car en ces occasions, la multitude agrandit toujours les choses, & ne porte pas la preuoyance iusques à destruire le plaisir que luy donne vn secours present. Cette flotte victorieuse reuint donc à Rome, & y fut receuë avec mille acclamations. Il en auoit cousté la vie à quelques Soldats, & il y auoit mesme eu quelques gents de qualité blesez. Spurius auoit eu vn coup de trait qui luy auoit effleuré l'espaule; Damon auoit eu vn coup d'espée au costé; Horace auoit receu vne legere blessure au dessous de l'œil droit, & Meleage-

ne à vn bras. Mais après tout cette victoire n'auoit pas esté sanglante, & cette action estoit d'vn grand esclat. Pour la faire mieux valoir au peuple, on en rendit graces aux Dieux dans tous les Temples, on diminua le prix des viures, on luy distribua vne partie des prouisions qui estoient entrées dans la Ville, & on luy fit esperer qu'il viendrait encore bien tost d'autres conuoys par terre. Cependant ceux qui auoient fait la fausse attaque, n'auoient pas esté aussi heureux que les autres, & s'estoient mesme trouuez forcez à combattre plus qu'ils n'auoient pensé, car Aronce s'estant trouué de ce costé là, parce qu'on auoit creu que ce seroit le plus dangereux, auoit esté avec des bateaux armez au deuant d'eux, & les auoit repoussez si vigoureuusement, qu'ils auoient esté contraints

de retourner vers Rome. Il auoit
mesme pris deux de leurs barques,
mais comme il sceut par les pri-
sonniers qu'il fit, que la veritable
attaque ne seroit pas de son costé,
vn sentiment de gloire luy fit re-
gretter de n'estre pas à l'endroit le
plus dangereux. Vn moment après
pourtant vn sentiment d'amour fit
qu'il ne fut pas trop marry de ne
pouuoir estre accusé par Clelie, d'a-
uoir contribué par sa valeur, à au-
gmenter vne necessité qui pouuoit
aller iusques à elle, en empeschant
les viures d'entrer à Rome. Mais
comme il ne cherchoit qu'à luy
donner de ses nouvelles, & qu'il
ne pouuoit pas aller où le combat
se faisoit, puis que Rome estoit
entre luy & le lieu où cette occa-
sion se pouuoit trouuer, il escriuit
vn billet dans ses tablettes, &
donna la liberté à celuy qui

commandoit vn des bateaux, qu'il reconnut pour estre parent de Clelius, à condition qu'il les donneroit à Clelie. Et en effet à son retour à Rome, il tint sa parole à Aronce, & fut porter la lettre de ce Prince à cette illustre Romaine, qui y trouua ces paroles.





ARONCE

A

CLELIE.

D Vis que la fortune n'a pas voulu que j'aye eu aujour- d'huy nulle part au danger de cette iournée, sçachez du moins que c'est tousiours avec regret que ie combats contre Rome, & que vous estes cause que ie me console plus aisement de perdre une occasion d'honneur, parce que ie songe bien plus à vous donner des marques d'amour, qu'à donner des marques de courage à toute la terre. Les prisonniers que ie vous ren- uoye vous diront combien ie respecte
tout

tout ce qui appartient à Clelius, c'est tout ce que vous peut dire un Prince qui a le malheur d'estre dans vne armée ennemie de Rome, & qui est assez fidele pour vous adorer au milieu de vos ennemis.

Cette lettre donna de la ioye à Clelie, mais elle augmenta sa persecution, car Clelius l'ayant sceu, luy dit qu'elle auoit eu tort de la receuoir, qu'il ne pouuoit plus y auoir d'intelligence innocente entre elle & Aronce, puis qu'il le luy deffendoit, & que Rome ayant tous les iours plus d'obligation à Horace, il falloit qu'elle le regardast comme deuant infailliblement l'espouser à la fin de la guerre. Clelie respondit à ce que Clelius luy dit avec sa constance accoustumée, & sans rien dire qui choquast le respect qu'elle deuoit à son pe-

re, elle ne dit pourtant rien qui püst blesser la fidelité qu'elle auoit promise à Aronce. Cependant pour entretenir l'esperance dans l'esprit du peuple, qui s'affligea de sçauoir que les ennemis auoient rebouché le passage du fleuve, on faisoit fort souuent quelque sortie sur les ennemis, on mena aussi vn iour les troupeaux hors de la Ville, pour faire voir aux assiegeans qu'on ne manquoit de rien, & pour faire voir aussi au peuple que la Ville n'estoit pas si reserrée. Ioint que Publicola eut encore intention d'attirer par cette ruse les ennemis au combat, s'imaginant qu'ils sçauoient bien tost que les troupeaux deuoient sortir de Rome, car il y auoit tous les iours quelques esclaves infideles qui fortoient de la Ville, & s'alloient rendre au Camp des ennemis. Publicola commanda

L I V R E I.

si

donc Herminius avec vn petit nombre de gens déterminez, pour s'aller mettre en embuscade le long du grand chemin des Gabinien, dans vn petit bois qui n'estoit qu'à deux mille de la Ville, & ordonna à Spurius qui estoit accompagné d'une troupe de ieunes gens armez legere-ment, de demeurer à la porte Col-line, iusques à ce que les ennemis l'eussent passée, afin de pouuoir leur couper chemin. D'autre part le second Consul sortit par vne au-tre porte, & gagnant le mont Ce-lium avec de l'infanterie seulement, il parut le premier aux ennemis, avec les Enseignes Romaines, afin de les attirer au combat. Et en ef-fet Tarquin qui auoit son quartier de ce costé là, ayant desia enuoyé ses fourrageurs pour tascher d'enle-uer ces troupeaux, commanda d'au-tres troupes pour les soustenir, qui

furent où on les enuoyoit avec toute l'impetuofité de gens qui efpèrent faire vn grand butin. Mais Herminius ne les vit pas pluftoft auancez, que les chargeant viuement, il les pouffa vers le fecond Consul. Les Tarquiniens fe reffererent alors, & s'animant à bien combattre, firent teste des deux costez; mais au mefme instant s'eleuant vn grand bruit vers la porte Colline, & vers la porte Neuie, ils connurent qu'ils eftoient enuelopez de toutes parts, fi bien que perdant cœur tout d'vn coup, ils fe débanderent, & furent tous pris ou taillez en pieces. De forte que le peuple voyant rentrer les prisonniers, & en fuite reuenir les troupeaux, s'en reioüyt avec excez, fans confiderer que la Ville n'en eftoit pas mieux munie qu'auparauant. Mais les Consuls, Clelius, Horace,

Herminius, & tous les autres Romains, voyoient bien que ce petit avantage n'auoit rien de decisif, & qu'à moins que de prendre les forts qui gardoient le pont qu'ils auoient rompu, & que les ennemis auoient refait, il estoit impossible de rendre le fleuve libre de ce costé là, & que par consequent Rome ne pourroit subsister long-temps. Ils prirent donc la resolution de faire vn grand effort pour cela, mais ils la prirent avec beaucoup de secret, afin de pouuoir s'il estoit possible surprendre les ennemis. Ils iugerent mesme à propos de differer de quelques iours l'execution de ce dessein, pendant lesquels il ne se passa rien de fort considerable ni dans le Camp de Porsenna, ni dans Rome. Cependant Aronce faisoit toutes les choses où l'honneur l'obligeoit, & n'auoit nulle consola-

tion que celle que luy donnoit la conuersation de la Princesse des Leontins, & de la genereuse Melinthe. Le Prince Titus estoit aussi tousiours fort dans ses interests, & Telane s'aquitant bien de la promesse qu'il auoit faite à Octaue, luy rendoit tous les offices qu'il pouuoit. Pour Tarquin le soin de remonter sur le Throsne l'occupoit tout entier, Sextus viuoit à son accoustumée, c'est à dire aussi voluptueusement au Camp, que pendant la paix, la fiere Tullie agissoit continuellement à Tarquinies pour auancer le dessein de Porfenna, qui pretendoit auoir la gloire de forcer les Romains à receuoir vn Roy de sa main. Mais quoy que la guerre soit vne grande affaire qui occupe tout le monde, iusques à ceux mesmes qui n'y vont pas, on ne laissoit pourtant pas de voir

encore à Rome des gens qui se diuertissoient; & la guerre & l'amour ont vne telle simpathie, qu'ils nais- sent quelquesfois l'vne par l'autre, & souuent subsistent ensemble sans se destruire. On ne laissoit donc pas de voir bonne compagnie & chez Domitia, mere de Valerie, & chez Sulpicie, & chez Berelise, & chez Cesonie, & en plusieurs autres maisons de qualité; & tous les Amants quelques braues qu'ils fussent, trouuoient tousiours lieu d'aller faire quelques visites à leurs maistresses. Ceux mesme qui n'auoient point d'amour, & qui auoient de l'esprit, & de l'esprit enioüé, se diuertissoient assez souuent des malheurs d'autruy. En effet Amilcar trouuoit son plaisir à cent choses, qui auoient pourtant quelque tristesse en elles mesmes. Damon luy en fournit vn suiet assez ample, car

encore qu'il haït fort Amilcar, depuis qu'il s'estoit apperceu qu'il s'estoit moqué de luy, lors qu'il auoit fait semblant de se souuenir de ce qu'il disoit auoir esté, il ne laissoit pas de croire qu'Amilcar estoit de la secte de Pythagore, & que c'estoit qu'il n'auoit pas la force d'auoüer publiquement vne opinion qui n'estoit pas la plus generale. De sorte qu'estant fort mal de la blessure qu'il auoit receuë à l'attaque du pont des Tarquiniens, & croyant mourir, quoy que ceux qui le pensoient ne le creussent pas, poussé par vn zele de la secte dont il estoit, il enuoya prier Amilcar de l'aller voir, car vn des principaux preceptes de Pythagore estoit de ne dormir iamais avec la haine dans le cœur. De sorte que comme Damon auoit passé plusieurs iours & plusieurs


nuits sans pouuoir cesser de haïr Amilcar, il voulut le voir deuant que de mourir, pour se reconcilier avec luy, & pour le prier, puis qu'il croyoit qu'ils estoient de mesme secte, de n'en faire point vn secret, & de soustenir cette importante verité, souhaitant passionnement de se pouuoir souuenir de luy quand son ame seroit passée dans vn autre corps, comme il croyoit qu'elle y passeroit bien-tost. Amilcar eut d'abord pitié de la preoccupation d'vn homme qu'il voyoit en effet estre fort malade. Mais n'ayant aucune esperance de l'en guerir, il luy respondit comme il le vouloit. Cependant lors qu'il fut hors de sa chambre, que cét obiet de compassion ne fut plus deuant ses yeux, & qu'il sceut par ceux qui traitoient Damon, que quoy qu'il en creust il ne mourroit pas, son hu-

meur enioüée ne pouuant pas laisser eschaper vn si ample suiet de se diuertir; il composa la nuit vn Dialogue entre luy & Damon, qu'il enuoya à Plotine le lendemain par vne personne inconnuë. Lors que Plotine receut ce paquet, Valerie, Berelise, Clidamire, Herminius & Anacreon, estoient dans sa chambre. Comme elle n'en connut pas l'escriture, car Amilcar auoit fait escrire ce qu'il auoit fait par vn des siens, elle s'imagina que c'estoit peut-estre quelque chose qui deuoit seruir à sa reconnoissance, & luy apprendre qui elle estoit. De sorte que se leuant pour l'ouuir, & se retirant vers les fenestres, elle fut bien surprise de lire d'abord ces paroles



*Dialogue de Damon ma-
lade & d'Amilcar qui
se porte bien.*

Ce bizarre tiltre fit rire Plotine de telle sorte, qu'Anacreon luy dit qu'elle seroit fort iniuste, si elle priuoit la compagnie d'une lecture qui luy donnoit tant de loye. Je vous assure, reprit-elle, que ce n'est pas mon dessein, car à mon auis le plaisir qu'aura la compagnie à voir ce que l'on m'enuoye, augmentera celuy que i'en receuray. Et en effet, Plotine s'estant remise à sa place, après auoir prié ceux qui la deuoient escouter, de ne l'interrompre point, commença de lire ce qui suit avec cét air fin & agreable qui l'accompagnoit tousiours.



*Dialogue de Damon ma-
lade & d'Amilcar qui
se porte bien.*

AMILCAR.

D'Où vient que tu m'as enuoyé
querir? ne suis-je pas ton Rival,
& par consequent ton ennemy?

DAMON.

Helas! quand on est sur le point de
mourir, & peut-estre de deuenir grüé
dans un moment, on n'a plus la force
de hair personne, car enfin Amilcar, ie
puis esprouuer ce destin, si les Dieux le
veulent, & si Pythagore ne s'est point
trompé.

AMILCAR.

Comme ie croy que les gruës sont fort saines, car à mon aduis ce sont des oyseaux qui ne se tourmentent guere des affaires de ce monde, i'aimerois bien autant estre gruë en santé, que d'estre Damon malade; mais quoy qu'il en soit, pourquoy m'as tu fait venir icy?

DAMON.

Pour te coniuurer de vouloir cesser de railler de la doctrine du plus grand Philosophe qui sera iamais, puis qu'aussi bien suis-je persuadé que tu es de son opinion, & que ce n'est que par une fausse honte que tu n'oses l'auoüer serieusement.

AMILCAR.

Mais que t'importe que ie croye ce que tu croy, ou que ie ne le croye pas?

C'est que ie voudrois bien estre assuré de laisser un Amant Pythagoricien à Plotine, afin qu'il pust luy persuader une verité aussi importante qu'est celle de la Metempsicose.

AMILCAR.

Eh ! comment voudrois tu que ie luy persuadasse qu'elle a peut-estre esté cigogne, & qu'elle peut deuenir biche, qui sont des choses difficiles à croire, quand on n'y est pas accoustumé, moy qui ne puis luy persuader que ie l'aime éperduëment, quoy qu'il soit assez vray-semblable qu'un homme qui a les yeux bons, l'esprit delicat, & le cœur sensible, aime la plus charmante personne du monde ?

D A M O N.

Sois du moins assez genereux pour persuader à Plotine, que si les Dieux escoutent mes prieres, mon esprit passera dans le corps de quelque ioly petit chien, qui puisse la diuertir, quand mesme elle deuroit le receuoir de ta main.

A M I L C A R.

Si ie pouuois te reconnoistre en cét estat là, ie me garderois bien de te donner à ma Maistresse, car tu aurois bien la mine de conseruer la haine d'un riuai, sous la figure d'un chien, et de me mordre comme un enragé, si ie voulois seulement baiser le bord de sa robe.

D A M O N.

Helas que puis ie donc souhaiter de de-

uenir pour estre encore une fois auprès de Plotine?

A MILCAR.

En effet ie t'y trouue assez empesché, tu ne peux selon les apparences te reuoir une autre fois son Amant, quand mesme le moment qui suiuroit ta mort, seroit le premier de ta seconde vie, car dans cinq ou six lustres d'icy tu serois un Amant tout neuf qu'elle mépriseroit fort, & puis elle fait aujourdhuy si peu de cas de sa beauté, qu'il est croyable qu'elle l'estimeroit encore moins alors. Mais si tu m'en crois, desire de deuenir souris, & d'estre caché dans son cabinet. I'ay fait autrefois une metamorphose de souris en femme, fais en une a' Amant en souris.

DAMON.

Mais tu ne songes pas qu'elle ne m'aimeroit point, & qu'elle feroit mesme

tout ce qu'elle pourroit pour me faire
prendre.

A M I L C A R.

Tu as raison, & j'ay tort; ce n'est
pas qu'à l'exemple d'une souris dont ie t'ay
déjà parlé, & qui rongeoit autrefois les pou-
lets de Mars, tu ne pusses auoir assez de
plaisir à ronger tous les billets doux qu'on
luy escriroit & principalement les miens.

D A M O N.

Ie l'auouë, mais après tout ie ne trou-
ue point mon conte à estre souris.

A M I L C A R.

Il est assez difficile de trouuer son con-
te à estre beste aupres de Plotine.

D A M O N.

J'aimerois pourtant mieux estre un
s. Partie. E

*pauvre petit animal caressé, que d'estre
un Amant maltraité.*

AMILCAR.

*Chacun a son goust, mais enfin à
quoy te resouds tu?*

DAMON.

*A mourir sans sçavoir ce que ie vou-
drois deuenir, pour seruir encore de quel-
que chose à Plotine.*

AMILCAR.

*Ne te mets pas dauantage en peine de
cela, car ie te iure avec toute la sincerité
d'un Rival, que quoy que tu puisses de-
uenir, ie te feray seruir au diuertissement
de Plotine, toutes les fois que ie luy par-
leray de tes opinions Pythagoriques, a-
pres cela meurs avec ioye, puis qu'il ne*

peut y auoir rien de plus agreable pour
 toy, apres l'auoir importunée pendant ta
 vie, que de seruir après ta mort, au plaisir
 de la plus belle & de la plus aimable
 personne qui fut iamais.

Il faut auoüer, dit Plotine en
 riant, qu'Amilcar n'est pas trop sa-
 ge, car c'est assurément luy qui a
 fait cette folie. Dites plustost qu'il
 est agreable, reprit Valerie, & qu'il
 a l'esprit ingenieux, & diuertissant.
 Car enfin si Damon n'a pas dit ce
 qui est dans ce Dialogue, il l'a pû
 dire, de l'humeur dont ie le con-
 nois. Il est vray, repliqua Hermi-
 nius, qu'un homme qui a pû croi-
 re qu'Amilcar se souuenoit d'auoir
 esté Phenix, pourroit auoir dit tout
 ce qu'on luy fait dire. Et de grace,
 dit Berelise à Plotine, donnez moy
 vne copie de ce Dialogue. Ie de-
 mande la mesme chose, adiousta

Clidamire, & ie m'offre de l'escrire à l'heure mesme. Il faut demander à Amilcar s'il y consent, repliqua-t'elle en le voyant entrer, car il a sans doute plus de droit que moy à ce que vous me demandez. Je ne pense pas que cela puisse estre, reprit il, quoy que ie ne sçache pas de quoy vous parlez. Nous parlons, repliqua-t'elle, du plaisant Dialogue de *Damon malade, & d'Amilcar qui se porte bien.* Ha! pour cét Amilcar dont vous parlez, reprit-il, ie vous assure que ie ne le connois point, & que graces à vos beaux yeux, celuy qui vous parle, est plus malade que Damon. Comme vostre mal ne paroist pas, repliqua Plotine, il n'est pas aisé de vous croire; souffrez donc s'il vous plaist que ie vous prenne pour Amilcar qui se porte bien, qui a fait dire mille folies à Damon, & qui seul peut m'accorder

la permission de donner vne copie à Berelise du Dialogue qu'il a fait. Amilcar dit alors qu'il estoit vray qu'il auoit eu vn entretien avec Damon, qui meritoit d'estre escrit, mais il voulut nier d'auoir rien enuoyé à Plotine. Il eut vray que ce fut en vain, car toute la compagnie luy soustint si hardiment que c'estoit luy, qu'il ne put plus se deffendre; & bien donc, Madame, dit il à Plotine, puis que vous voulez que i'aye fait le Dialogue dont il s'agit, i'y consens, car ie suis le plus complaisant de tous les hommes. Puis que cela est, dit Berelise, vous me donnerez vne copie de ce que vous auez fait; si Damon meurt, reprit Plotine, i'y consentiray, mais s'il ne meurt pas, ie croy qu'il sera bon que cette folie ne coure point par le monde, de peur qu'à la fin il ne se fasche tout

de bon. Au contraire, reprit Amilcar, s'il meurt il faut qu'elle meure avec luy, mais s'il eschappe comme ceux qui le traitent le croyent, ie ne m'en soucie pas qu'on la voye, car puis que Damon est d'une secte où il n'est pas permis de dormir avec de la haine dans le cœur, il ne me fera pas grand mal. En verité, dit Valerie, ie pense qu'il est bon soit que Damon meure ou ne meure pas, de ne donner point de copie du Dialogue d'Amilcar, quoy qu'il soit fort agreable. Ha Valerie! reprit Berelise, vostre bonté va trop loin, & c'est bien assez de dire seulement qu'il ne faut pas faire courir cette agreable bagatelle; mais ce seroit trop de dire qu'il ne la faut donner à qui que ce soit, puis que les iolies choses ne se font point pour n'estre pas veuës. Non, repliqua Amilcar, mais les folles choses com-

me celle dont il s'agit, ne doiuent pas estre publiques. Mais quand on en donne vne copie à vne personne discrete, qui promet de ne la prester point, & qui iure d'estre fidele, reprit Berelise, ce n'est pas publier ce qu'on luy confie. Tout le monde est plein, repliqua Plotine, de ces discrettes personnes qui promettent tout, & qui ne tiennent rien de ce qu'elles ont promis. Ha pour moy, dit Berelise, ie ne suis pas de ce nombre, & l'on ne peut pas estre plus exacte que ie le suis. En mon particulier, dit Clidamire, quand il ne s'agit que de vers, de chansons, & de semblables choses, ie me laisse quelquesfois persuader de les montrer, quoy que i'aye promis de ne les montrer pas, parce que la pluspart du temps ie croy que ceux qui font vn si grand secret de ces sortes de

bagatelles, ne le font que pour les faire trouver meilleures. Toutes ces petites infidelitez là, reprit malicieusement Berelise, sont vne forte disposition à de plus grandes. Je suis de l'aduis de Berelise, repliqua Herminius, & c'est pour cela que ie trouue qu'il faut s'accoustumer à estre exact, lors mesme qu'il ne s'agit que de petites choses. Tout de bon, dit Amilcar, il y a plus de peine qu'on ne pense à garder vn secret de bagatelles; car pour ces gros secrets serieux, adiousta-t'il, tous les gens qui ont vn peu d'honneur, ou seulement vn peu de prudence les gardent. Mais pour des secrets de vers, de chansons, de dialogues ou de plaisantes nouuelles, on a bien de la peine à ne les reueler pas à quelqu'un. Je confesse pourtant que c'est vne assez dangereuse chose que de donner des

copies de vers ou de lettres, lors
 qu'on ne veut pas qu'elles courent.
 Car moins vous auez d'enuie qu'on
 les voye, & plus on les montre, &
 ce qu'il y a de plus facheux, c'est
 que ces copies passent par des mains
 ignorantes, qui changent & qui
 gastent le sens des copies qu'elles
 font. Je me souuiens d'un iour que
 j'auois fait vne chanson que ie ne
 voulois pas qui courust alors; ie la
 donnay pourtant à vne Dame qui
 me promet de ne la montrer à qui
 que ce soit, le premier couplet
 estoit comme ie m'en vay vous le
 dire si ma memoire ne me trompe,

*La raison & l'amour sont tousiours en
 querelle*

Lors que l'on est bien avec luy

L'on est tousiours mal avec elle,

*Mais qui vit sans amour n'est iamais
 sans ennuy.*

Cependant cette fidelle Amie qui deuoit ne montrer ma chanfon à personne, la donna en secret à vne Amie qu'elle auoit; cette Amie à vn Amant; cét Amant à vne autre Maistresse (car ie ne suis pas seul au monde qui ay plus d'vne Maistresse à la fois) cette Maistresse à vne parente qui chantoit bien, & cette parente au Maistre qui luy monstroit la Musique, qui y fit vn air à l'heure mesme. Mais comme ce miserable couplet auoit passé par plusieurs mains, il estoit si defiguré que ie ne pensay iamais le reconnoistre; voicy comme vne belle stupide le chantoit.

Le destin & l'amour sont tousiours en querelle

*Lors que l'un est bien avec luy
L'autre est tousiours mal avec elle,
Mais qui rit sans sujet est tousiours sans ennuy.*

Tout de bon, dit Plotine en riant, ie pense que i'aime bien autant le couplet galimathias que l'autre, car ce dernier vers me semble tout à fait plaisant. Puis que cela est, dit Amilcar, ie consens que l'on donne le Dialogue, car peut-estre le changera-t'on aussi à propos pour vous diuertir, que le couplet de ma chanson, qui me surprit pourtant fort lors que ie vy cette belle ignorante qui le chantoit, & qui le trouuoit le plus ioly du monde. Il est vray, repliqua Anacreon, que cette auanture est cruelle. En mon particulier ie me souuiens que i'auois vn iour fait vne Ode, où ie parlois d'abord à vne Hironnelle, & comme cét ouurage eut le bonheur de plaire, on en parla assez à la Cour de Polycrate où i'estois alors, & l'on en parla à la fin tant, & il en fut tant fait de copies, que

i'en trouuay vne, où au lieu des
deux premiers vers que l'on pour-
roit traduire ainsi,

*Tu reuiens tous les ans en la saison nou-
uelle,*

Trop heureuse Hironnelle.

on auoit mis,

*Tu reuiens tous les ans comme vne Sau-
terelle,*

Heureuse Tourterelle,

De sorte qu'ayant fait cette belle
Metamorphose d'une Hironnelle,
en Sauterelle, ma pauvre Ode estoit
vn galimathias estrange. Mais les
gens qui ont vn peu de sens, repli-
qua Berelise, voyent bien que cela
n'a pas esté fait ainsi. Ils le voyent
sans doute, repliqua Herminius,
mais il y a quelquesfois des choses

qu'on ne peut deuiner, & tout ce qu'on en sçait, c'est qu'on n'y entend rien. De sorte que le moins qu'on peut s'exposer à ces auantures là c'est le mieux; on les éuiteroit pourtant si tout le mōde estoit exact. Mais il couste tant à estre tousiours exact, reprit Clidamire, que ie ne sçache rien de plus penible. Toutes les autres choses ont des bornes, mais l'exactitude n'en a point; elle se mesle par tout, & il n'y a presque rien où elle ne puisse se trouuer. Quand l'exactitude est excessiue, repliqua Plotine, ie vous aduouē qu'elle a quelque chose d'incommode, & si vous y prenez garde, les exacts de profession, ont l'air contraint, leurs complimens sentent la ceremonie, leur amitié est si delicate que la moindre chose la blesse, & l'on n'a iamais fait avec eux. Quand on a de la vraye rai-

son, reprit Herminius, on ne prend
iamais rien avec excez, & l'on se
fait vne certaine habitude d'estre
exact, qui bien loin de donner de
la peine donne du plaisir, car ie
soustiens que ceux qui sont exacts
de la maniere dont les honnestes
gens doiuent l'estre, ne peuuent
s'empescher de l'estre tousiours.
Mais ils le font sans embarras, sans
contrainte, sans ceremonie; ils le
font parce qu'ils sçauent que l'exa-
ctitude fait vne partie de la politesse,
qu'elle est necessaire à la societé, &
que sans elle on n'ose se promettre
rien de personne. Car lors que ie dis
vn petit secret à vn de mes Amis
qui me promet de ne le dire point,
si ie connois qu'il n'est pas exact,
ie suis tousiours en crainte. Cepen-
dant pour estre tout à fait raison-
nable en amitié, il faut non seu-
lement ne dire pas ce que l'on vous

prie de ne dire point, mais il faut
mesme quelquefois celer des choses
qu'on ne vous prie pas de cacher,
parce que la generosité veut qu'on
ait d'une certaine discretion chari-
table, mesme pour ceux qui ne
sont pas assez sages pour estre tout
à fait discrets dans leurs propres
interests. Car enfin il n'est iamais
beau de perdre vne occasion de se
tesmoigner la foy mesme, qu'on a
plus de prudence, plus de bonté,
& plus de vertu qu'un autre. Au
contraire il faut se faire vn plaisir
secret, d'agir mieux que les autres
n'agissent, & trouver de la gloire
à supleer à la raison d'autruy par la
sienne, & à n'estre pas de ses gens
qui disent bien plus souuent ce
qu'ils ne deuroient mesme iamais
penser, que ce qu'il feroit à propos
de dire. l'aduouë, dit Amilcar, que
ceux qui n'ont nulle exactitude

font quelquefois incommodés aux autres, car ie me souuiens d'auoir veu vn homme à Carthage, qui manque d'en auoir, faisoit les choses du monde les plus bizarres. En effet ie me souuiens qu'vn iour il me pria de manger chez luy, mais comme on le pria vne heure après de manger ailleurs, il ne fit point de difficulté d'y aller, sans mesme m'en enuoyer aduertir. Pour moy, dit Plotine, ie ne pardonneray iamais à vn homme qui m'auoit promis vne corbeille pleine de fleur d'orange, & qui ne me l'enuoya point, & ie me souuiendray toute ma vie d'vn autre, qui enuoya sçauoir deux fois si ie garderois la chambre pour me venir voir. Ses messages furent faits avec tant d'empressement que m'imaginant qu'il auoit à me parler de l'affaire d'vne de mes Amies dont il sçauoit

uoit

uoit quelque chose, ie rompis vne partie que i'auois faite, & ie luy manday que ie l'attendrois. Et en effet ie l'attendis inutilement, avec vn ennuy estrange. Car comme c'estoit vn de ces beaux iours, où tout le monde se promene, il ne vint personne me voir, & ie fus l'apresdinée toute entiere à tourner la teste quand on ouuroit la porte de ma chambre, pensant tousiours que c'estoit celuy que i'attendois. Et ce qu'il y eut de rare, fut que ie sceus le soir que eét Amy éuaporé, auoit esté à la promenade avec des Dames qui l'auoient rencontré comme il venoit me chercher. Iugez donc, dit Herminius, si le peu d'exactitude qui vous a faschée dans des choses peu considerables, vous fascheroit dans des occasions plus importantes. Cependant il est certain que

quand on se fait vne habitude de n'estre point exact dans les petites choses, il est fort aisé de ne l'estre pas dans les grandes, & par consequent de s'exposer à déplaire souuent à ses meilleurs Amis. C'est pourquoy le plus seur est d'auoir de l'exactitude. En verité, dit Amilcar, ie croy que toutes choses sont douteuses, qu'il n'y a point de party que l'on ne puisse soustenir, & si i'auois à establir vne secte ie voudrois (excepté aux choses de la Religion) qu'il fust permis de douter de tout. En effet il n'y a rien d'assuré, on ignore bien souuent ce qu'on croit sçauoir, on sçait ce qu'on pense ignorer. Il y a des Nations entieres qui ont des opinions, qui passent pour erreurs parmy d'autres; & comme tous les hommes ont vn temperament qui leur

est particulier, chaque Royaume, chaque Pays, chaque Ville a ses mœurs, ses coustumes, ses inclinations, & mesme ses opinions, tant il est vray que la raison se varie selon les climats, & les peuples. La pluspart du temps nous croyons ce que nos peres ont creu, sans approfondir la raison qui nous fait croire; & il n'y a que les esprits eleuez, qui regardent les choses dans leur origine; qui cherchent à faire vn iuste discernement de leurs opinions, & qui en le cherchant connoissent qu'il est presque impossible de le bien faire. Car enfin nostre raison naist obsedee des sentimens d'autruy, & ne peut sans violence se déueloper de tout ce qui l'embarresse. Aussi suis-ie persuadé qu'on se trompe presque tousiours, mesme dans les choses où l'on croit le moins estre trompé, & que le

plus seur seroit, comme ie l'ay déjà dit, de douter presque de tout. Et pour prouuer ce que ie dis, n'est-il pas vray, que iusques à Pythagore, les plus sçauans hommes auoient tousiours creu que l'Estoile du soir, & l'Estoile du matin, estoient deux Estoiles. Et cependant ce sçauant Philosophe, nous a fait connoistre que la mesme Estoile que nous voyons si brillante à l'entrée de la nuit, est celle que nous voyons si belle au poinct du iour. Tous les hommes iusques alors l'auoient regardée de cette sorte; on luy auoit donné deux noms qu'elle porte encore, & nous voyons pourtant clairement que tous les hommes s'estoient trompez. Ce que vous dites est vray, reprit Anacreon, mais ce mesme homme qui a sceu connoistre vne verité qui auoit esté ignorée auant luy, enseigne vn

mensonge ridicule par sa Metem-
psicose. C'est ce qui fait, repliqua
Amilcar, que j'ay raison de dire
que le mieux est de douter presque
de tout, puis que les plus grands
hommes se peuuent tromper en
quelque chose. Pour moy, dit Her-
minius, ie ne puis conceuoir que
cét excellent homme ait positifue-
ment creu ce que ses Disciples en-
seignent, car sa Morale est si bel-
le, qu'il est malaisé de penser que sa
doctrine puisse auoir esté aussi fo-
le. En mon particulier, dit Bereli-
se, ie vous aduouë que ie ne puis
pas encore trop bien croire que ce-
luy qui a creu se souuenir qu'il auoit
esté coq & Euphorbe à la guerre de
Troye, puisse auoir eu du bon sens.
Il est pourtant certain, reprit Her-
minius, que Pythagore a esté vn
des plus sages hommes du monde.
Mais encore, repliqua Plotine, qu'a-

r'il enseigné de si beau? Mille choses, Madame, reprit Herminius, & pour vous en dire quelques-vnes, il a commandé à ses Disciples de louer les Dieux, & de ne leur demander iamais rien en particulier; soustenant qu'il n'y a point d'homme qui sçache précisément ce qui luy est propre, & qu'il y a bien plus de respect à se soumettre aveuglement à l'ordre du Ciel, que de vouloir changer les arrests du destin selon son caprice. Ce que vous dites a sans doute quelque chose de fort beau, repliqua Valerie, car ie croy en effet que tous les hommes ne sçauent pas ce qui leur est propre, & que ce qui fait le desordre du monde, la diuision & les guerres, c'est qu'en general tous les hommes desirent le bien, & ne le connoissent pas. Mais pour en reuenir à l'excellent homme dont vous par-

lez, ie me souuiens d'auoir auffi autrefois entendu dire à l'illustre Brutus qui auoit esté Amy particulier de la sage Damo, fille de Pythagore, que ce grand homme auoit donné mille beaux preceptes de l'amitié heroïque. Vous auez raison, reprit Herminius, & c'est pour cela qu'il auoit estably la communauté entre ses Disciples, car il disoit hardiment qu'il ne deuoit point y auoir d'interest separé entre les vrays Amis; que dés qu'il y en auoit ce n'estoit plus amitié, mais simple société; & l'on peut assurer que iamais nul autre auant luy, n'auoit si bien connu tous les devoirs de la veritable amitié. Mais ce qui me le fait encore plus aimer, c'est qu'il estoit ennemy déclaré du mensonge, que ie hais plus qu'on ne peut s'imaginer. Le mensonge est sans doute vne mauuaise chose,

reprit Amilcar, mais à n'en mentir pas il est assez difficile de s'en passer absolument, & si l'on y vouloit bien prendre garde, on verroit que ceux mesme qui le haïssent le plus, s'en seruent quelquefois malgré qu'ils en ayent. Du moins sçay-ie bien que ie m'en suis seruy en quelques occasions, & que ie m'en seruiray encore plusieurs fois en ma vie. Ce n'est pas que i'aime à mentir, mais il y a de certains petits accommodemens fort necessaires. Par exemple, est-il possible de faire vn recit agreablement sans mentir, & sans y adiouster quelque circonstance qui le rend plus plaisant? Peut-on louer vne femme sans en dire vn peu plus de bien qu'il n'y en a? Peut-on dire mal de son ennemy sans exagerer ses defauts? Peut-on se pleindre en amour sans faire son mal vn peu plus grand qu'il n'est?

Et pour pousser la sincerité iusques au bout, eussay-ie pû faire le Dialogue de Damon malade, si ie n'eusse voulu dire que la verité? Toute la compagnie rit de ce que disoit Amilcar, & comme Plotine alloit luy repondre, Emile entra, qui demanda si on auoit oüy parler d'une grande nouvelle qu'il venoit d'apprendre. Je vous assure, reprit Plotine, que de tout le iour nous n'auons rien appris. Je vous apprens donc, reprit-il, qu'on vient de m'assurer qu'il y a vne grande diuision entre Tarquin & Porfenna, & que cela pourroit bien faire leuer le siege, & deliurer Rome. Comme on croit aisément les choses que l'on desire, on écouta cette nouvelle avec plaisir, & quoy qu'Herminius eust peine à croire que Tarquin se broüillast avec vn Prince de la protection duquel il ne se pouuoit pas-

fer, il ceda à la fin, & raisonna comme le reste de la compagnie sur cette surprenante nouvelle. Un moment après Flauie entra, qui après auoir pris sa place, demanda si on n'auoit point oüy parler de l'apparition du Dieu du Tibre, qu'on disoit auoir menacé le Camp de Porfenna, faisant en suite la description de ce Dieu, redisant les propres paroles qu'on luy attribuoit, & parlant enfin comme vne personne bien persuadée que ce qu'elle disoit estoit vray. Pour moy, dit Amilcar en souriant, ie me suis promené sur les bords des plus beaux fleuves du monde, & mesme sur ceux du fleuve-Alphée, si celebre par son amour pour la belle Aréthuse, mais pas vne des Diuinitez qui y president, ne m'a encore voulu faire l'honneur de m'apparoistre, c'est pourquoy, Madame, adiou-

sta-t'il en regardant Flauie, vous me permettez d'attendre que la nouvelle que vous dites soit bien confirmée pour la croire. Flauie alloit répondre, mais Merigene estant entré, l'en empescha, car voyant Amilcar dans la compagnie, il en parut si surpris, que dès que la premiere ciuilité fut passée, il ne put s'empescher de tesmoigner son estonnement. Je pensois, dit-il à Amilcar, que vous estiez allé déguisé dans le Camp ennemy, pour entretenir la diuision qu'on dit qui est entre Tarquin & Porsenna, car ie viens de voir vn homme qui m'a assuré hardiment vous auoir veu partir. Et bien, dit alors Emile, vous apprenez par Merigsne que ie ne suis pas le seul qui ay entendu dire qu'il y a de la diuision entre les ennemis. Mais s'il n'est pas plus vray qu'ils soient diuisez, repliqua

Herminius, qu'il est vray qu'Amilcar est allé déguisé au Camp de Porfenna, il n'y a pas grand suiet de se reioüyr de cette grande nouvelle. Mais encore, dit Plotine, de qui l'avez vous apprise? Je l'ay sceuë, repliqua Emile, d'un homme que ie ne voy guere qu'aux places publiques, où l'on s'entretient des affaires generales. Il paroist auoir de l'esprit, il parle beaucoup, & bien; il ne cherche point ce qu'il veut dire, & assure les choses si affirmatiuement, qu'on n'oseroit douter de ce qu'il dit. C'est assurément le mesme, dit Merigene, qui m'a dit que vous estiez allé déguisé au Camp des ennemis. Ne seroit-ce point aussi ce mesme homme, adiousta Plotine en riant, qui auroit appris à Flauië, cette merueilleuse apparition dont elle nous a parlé. A n'en mentir pas, répondit Fla-


uie, ie croy que toutes nos nouvelles viennent d'un mesme lieu, car Mutius qui m'a appris ce que ie vous ay dit, m'a assuré l'auoir entendu dire à vn homme d'esprit, dans la grande place d'Hostilius. C'est la où l'on m'a dit la diuision des ennemis, reprit Emile; & c'est la que l'on m'a assuré, adiousta Merigene, qu'Amilcar estoit forty de Rome déguisé, mais avec des circonstances si precises, que tout autre que moy y auroit esté aussi trompé que ie l'ay esté. Est-ce vn Romain, dit alors Berelise en souriant, qui vous a dit toutes ces nouvelles? Nullement, répondit Emile, & ie luy trouue l'accent assez estrangier. Assurement, dit alors Clidamire à Berelise, c'est vn homme que nous connoissons, & qui fit le traict de Sicile à Ostie avec nous. Je n'en doute non plus que vous, adiousta Anacreon,

& en effet se mettant à décrire cét homme à Merigene & à Emile, ils connurent que c'estoit celuy dont il parloit. Mais qui est cét imposteur vniuersel, dit Plotine? C'est vn homme d'assez honneste naissance, reprit Berelise, qui est de Lylibée, il a passé sa ieunesse en Afrique, & il y a si bien appris à mentir, qu'il luy est impossible de s'en empescher. En effet ie croy pouuoir assurer sans mensonge, qu'il n'a iamais dit nulle verité, si ce n'est qu'il ait creu mentir. Cependant comme on vous l'a dit, il a de l'esprit, il parle facilement, & diuertit assez ceux qui ne le connoissent pas pour menteur; car il dit tousiours choses nouvelles, son esprit ne s'épuise iamais, & se faisant tousiours vne matiere de parler, il parle toute sa vie, & a mesme l'art de se contredire moins que tous

les autres grands menteurs. Mais comme i'aime la verité, & que ie hais fort le mensonge, ie ne le puis souffrir, & il ne me vient plus voir. Pour vne heure ou deux, reprit Anacreon, on s'en diuertit, mais i'aduouë qu'à continuer, sa conuersation est insupportable, car quelque soin qu'on y prenne, & quelque resolution qu'on ait faite de ne le croire point, on y est toujours attrapé, & il dit les choses d'un air si franc, & si ingenieux, qu'il peut tromper toute sa vie. Ce qu'il y a de rare, dit Clidamire, c'est qu'on luy a fait vne guerre si horrible de son mensonge à Lylibée, qu'il n'ose plus y demeurer, & comme il est persuadé qu'il est impossible de dire tousiours la verité, il est venu icy avec l'intention d'aller à Preneste, demander s'il est possible qu'il y ait vn homme qui soit

veritable. S'il veut, reprit Amilcar, i'accourciray son voyage, car ie luy assureray sans mensonge que tous les hommes ne disent pas toujours la verité, & que mesme il y en a bien autant de grands menteurs, que de fort veritables. Pour moy, dit Herminius, qui fais vne profession particuliere d'aimer la verité, & de haïr le mensonge, ie voudrois bien qu'on déterminast absolument qu'il ne faut iamais mentir. Ha! pour iamais, s'escria Plotine, ie ne le croy pas possible. Car enfin il y a de petits mensonges de ciuilité, qu'on ne peut s'empescher de faire, & dont la bien-seance ne veut pas mesme qu'on s'empesche. Il y a aussi des mensonges de generosité, adiousta Amilcar, dont il est quelquefois fort à propos de se pouuoir seruir. Pour les mensonges plaisans, reprit Anacreon,

creon, ie demande grace pour eux. Pour moy, adiousta Clidamire, ie consents qu'on mente pour s'excuser. Comme ie crains fort la mort, reprit Flauie, ie me contente qu'on mente quand ie suis bien malade, & qu'on me die tousiours que ie gueriray, quoy qu'on ne le croye pas. Pour ce qui me regarde, dit Valerie, ie ne veux iamais de mensonge, si ce n'est qu'il serue à sauuer la vie à quelqu'un. Pour mon interest, reprit Merigene, i'aurois bien de la peine à dire le plus petit mensonge du monde, mais par le commandement d'une Maistresse, i'aduouë que ie pourrois peutestre mentir. Tout de bon, dit Berlise, il y a plus de menteurs que ie ne croyois. Il y en a mesme, reprit Emile, qui le sont sans le penser estre: mais puis que nous sommes en humeur de dire la verité,



reprit Plotine, de grace establissons des loix qui puissent bien nous instruire iusques où il est permis de mentir. Le vous aduouë, dit Herminius, que ie croy qu'il faut toujours auoir vn dessein general de ne mentir iamais, & qu'il ne faut point se faire vne habitude de ces petits mensonges qui ne font peur à personne, & où l'on s'accoustume insensiblement. Car enfin comme il n'y a point de crime si facile à commettre que le mensonge, ni qui puisse estre plus souuent trescommode, il faut s'en empescher le plus qu'on peut, & il faut toujours regarder le mensonge comme vne chose lasche, basse, foible & infame, qui fait voir qu'on craind moins les Dieux que les hommes. Mais il faut au contraire regarder la verité comme l'ame de la probité s'il faut ainsi dire. Et comme il

n'y a presque que la parole qui distingue les hommes d'avec les animaux, puis que c'est l'image de leur raison, si on la falsifie on se rend indigne d'estre homme. Les bestes à la reserve de ces redoutables animaux qui naissent sur les bords du Nil, n'ont point de cris trompeurs, il n'y a que l'homme dont la malignité peruertisse l'usage de sa voix. Cependant la verité est le lien universel qui maintient l'ordre dans le monde, c'est sur elle que se fondent la foy publique, le droit des gens, & la iustice. Elle preside à l'amour, à l'amitié, sans elle le monde ne seroit que confusion, tous les hommes seroient des fourbes, des lasches & des imposteurs, & il n'y auroit ni honneur ni plaisir au monde, si la verité en estoit bannie. Y a-t'il rien plus incommode qu'un esclave menteur, qui

vous assure qu'il a fait ce que vous luy avez dit, lors qu'il n'y a pas pensé. Pour moy ie le confesse à la honte de ma raison, ie dois en partie la haine que i'ay pour le mensonge à vn esclauve menteur que i'ay eu, qui m'a cent fois pensé faire perdre patience, & troublé l'ordre de mes affaires par ses mensonges continuels. Car il portoit la chose si loin, qu'il aimoit quelquefois autant s'accuser en mentant, que de se iustifier en disant la verité. Mais pour en reuenir où i'en estois, y a-t'il rien de plus insupportable qu'un Artisan, qui vous promet ce que vous luy avez commandé, & qui vous trompe continuellement? Y a-t'il rien de plus fascheux que ces grands, qui par des paroles fauorables font esperer mille graces qu'ils ont resolu de ne faire point? Y a-t'il rien plus

cruel, que de découvrir qu'un Amy que vous aimez, ne vous a pas dit la verité, lors qu'il vous a dit qu'il vous aimoit plus que tout le reste du monde? Et y a-t'il quelque chose de plus insupportable, que d'avoir vne Maistresse qui vous iure de n'aimer que vous, & qui cependant en aime plusieurs, ou pour mieux dire n'en aime aucun, car vne amour partagée n'est point amour. Le mensonge sert à la dissimulation, à la fourbe, à la perfidie, à la lascheté, & presque à tous les crimes; il y a mesme de la foiblesse, ou de l'imprudence à s'en servir. En effet on s'expose à commettre continuellement vn crime, qu'on ne peut iamais commettre qu'en public, & qu'en s'exposant à en pouvoir estre conuaincu. Enfin mentir pour rien, est vne follie, & mentir par interest, est vn grand

crime, puis qu'il n'y a assurément rien de si opposé aux Dieux que le mensonge. Eux, dis-je, qui sont si véritables dans les Oracles qu'ils rendent. Et puis ne voit-on pas que la recherche de la vérité est l'objet vniuersel de tous les hommes, & particulièrement des sages. Ce que ie trouue encore de plus dangereux au mensonge, reprit Merigene, c'est que c'est vn poison qui se communique promptement, & dont on ne peut presque plus arrester l'effet. Car lors que l'on a dit vn mensonge en vne compagnie, tous ceux qui l'ont entendu, mentent après de bonne foy, & font mentir tous les autres à qui ils disent ce qu'ils ont entendu dire; de sorte que ie trouue qu'Herminius a raison de condamner le mensonge autant qu'il fait. Pour tous les grands mensonges, reprit Amilcar, ie croy

qu'il n'y a personne qui puisse soutenir qu'il en faille iamais faire. Je condamne mesme les mediocres, adiousta Plotine, mais pour ces petits qui sont en vſage par le monde, ie pense qu'il est bien difficile de s'en pouuoir passer. Pour moy, dit Herminius, ie les condamne tous; i'en puis pourtant peut-estre pardonner quelques-vns, mais si i'estois creu on n'en permettroit point. Encore faut-il, dit Plotine, que ie m'instruise pleinement sur cét article là, & que ie fasse des questions à la compagnie, qui m'enseignent & me corrigent pour l'auenir; premierement, dit Herminius, il ne faut assurément iamais faire ni grand ni petit mensonge, qui puisse nuire à qui que ce soit, car puis que la iustice & la generosité ne veulent pas que l'on puisse dire les veritez nuisibles, el-

les n'ont garde de permettre les mensonges defauantageux. Ce que vous dites me semble si équitable & si genereux, que ie ne le veux pas contredire, repliqua Plotine, mais du moins permettez vous ces mensonges officieux qui vont à l'utilité de nos Amis, ou qui seruent à cacher leurs deffauts. I'aime fort mes Amis, reprit Herminius, & i'ay beaucoup de ioye lors que ie leur puis rendre office, mais si ie ne les pouuois seruir qu'en mentant, ie serois fort embarrassé. Vous me laisseriez donc mourir pour vn mensonge, reprit Valerie en souriant, ie sents bien que ie ne le pourrois pas, reprit Herminius, mais i'aduouë que i'aurois beaucoup de despit de vous sauuer la vie par vne voye si peu glorieuse, car enfin tout mensonge est vn mal, & tout ce que ie puis faire en

faueur des mensonges officieux, est de les trouuer excusables en de certaines occasions. Mais quand le mensonge ne nuit à personne, & sert à quelqu'un, reprit Amilcar, n'est-il pas innocent? Le mensonge, repliqua Herminius, ne peut iamais manquer de nuire à celuy qui ment, quand mesme il ne nuirait à nul autre, & qu'il seroit seul à sçauoir son mensonge, puis qu'il le rend moins vertueux; & tout ce qu'on peut dire, est que pour empescher vn Amy de tomber en vn grand malheur, l'amitié pourroit l'emporter sur la verité. Mais pour ce qui me regarde, ie vous aduouë que i'aurois peine à me garantir d'un fort grand mal par vn mensonge. A n'en mentir pas, reprit Plotine, ma generosité ne va pas si loin que la vostre, car si ie mentois pour autruy, ie mentirois aussi

pour moy-mesme. l'en dis autant que vous, reprit Amilcar; ce qu'Herminius dit est pourtant fort beau & fort genereux, repliqua Merigene, car ie trouue qu'il est honteux de mentir pour soy-mesme en vne semblable occasion, & qu'il vaudroit mieux souffrir le mal dont on seroit menacé, que de l'éuiter par vne semblable voye; ainsi ie conclus qu'on pourroit mentir pour sauuer la vie, ou la liberté à vn Amy, mais qu'il ne faut iamais mentir pour ses propres interests. Je soustiens mesme, reprit Herminius, que le mensonge est tousiours vn mal, & que lors mesme qu'on mentiroit pour sauuer la vie à son Amy, il faudroit mentir avec repugnance, & avec douleur, parce qu'enfin tout mensonge est indigne d'un homme d'honneur. Au reste il ne faut pas qu'on s'imagine qu'il n'y

ait que d'une espece de menteurs, puis qu'il y en a de cent especes differentes. En effet c'est souuent faire vn mensonge que de taire vne verité qu'il seroit à propos de dire, & la dissimulation est vne suite si dangereuse du mensonge, qu'on les peut confondre l'un avec l'autre. l'aduouë, dit Plotine, que quelques-fois i'eusse pû iustifier certaines personnes si i'eusse voulu dire ce que ie sçauois, mais le moyen de s'aller opposer directement à ce que des gens disent affirmatiuement, principalement quand ce qu'ils disent ne regarde que des personnes indifferentes, & qu'on ne les accuse pas de grands crimes. Mais pourquoy voulez vous par vostre silence, repliqua Valerie, vous charger du mensonge que vous ne dites pas? Cependant si vous le pouuez destruire, vous en estes coupable, &

ie conçois fort bien qu'Herminius a raison lors qu'il dit qu'il y a de plusieurs especes de mengeries, car il y a des mensonges d'action, aussi bien que de paroles, des regards menteurs, des signes trompeurs, des souris dissimulez, & vn silence mensonger. Valerie a raison, dit Anacreon, & ie pense mesme qu'il y a des ciuilités mensongeres, & mesme de bons offices menteurs; car on sert quelquefois des personnes que l'on hait, parce que l'on en a besoin en quelque chose, on en sert par crainte & par foiblesse, & l'on fait quelquefois semblant d'estre bien aise de voir des gens qui importunent estrangelement. Je vous assure, reprit Berelise, que Clidamire est la personne du monde qui a le plus de cette ciuilité mensongere dont vous parlez, car il n'y a pas trois iours qu'une ieu-

ne esclave luy vint dire qu'il y auoit vn homme qui demandoit à la voir; à peine l'eut-elle nommé, que Clidamire rougit de colere, de ce qu'elle ne luy auoit pas dit qu'elle n'y estoit point. Elle chercha alors toutes les voyes possibles pour faire qu'il ne fist pas sa visite longue; elle donna ordre qu'un quart d'heure après qu'il seroit entré, on luy vint dire qu'on l'attendoit; après quoy changeant de visage, d'action & de discours, on peut dire qu'elle mentit de toutes les manieres dont on peut mentir en receuant cét homme, car elle le receut avec vn souris obligeant, elle le fit assoir avec toute la civilité imaginable, & elle commença de l'entretenir d'un certain air, que ie suis assurée que ce pauvre homme creut qu'il passeroit toute l'apresdinée auprès d'elle, & qu'il luy

faisoit le plus grand plaisir du monde de la voir. Cependant il est certain qu'il l'importunoit extrêmement. Je l'aduouë, dit Clidamire, mais comment pourroit-on dire aux importuns qu'ils importunent? Il y auroit de l'inhumanité à le leur dire, repliqua Berelise, mais il ne faudroit pas du moins leur faire vne mine si menteuse, & il faudroit se contenter d'auoir d'vne certaine ciuilité froide qui n'offen- ce point, qui ne trahit pas, & qui n'attire pas les gens qui incommodent. Mais tout le monde n'en vse- t'il pas ainsi, répondit Clidamire? En mon particulier, dit Valerie, ie ne le pourrois pas: Pour moy, dit Plotine, ie confesse ingenuement que ie puis quelquefois mentir de cette sorte, mais non pas tout à fait tant que Clidamite, car ceux qui connoissent bien mes regards,

& mes souris, voyent bien quand ils sont menteurs ou sinceres. Tout de bon, dit Amilcar, vous ne m'y tromperiez pas; mais encore voudrois-je bien sçauoir, dit Plotine, si Herminius qui aime tant la verité, ne fait pas des complimens comme vn autre. Cependant à parler sincerement, tous les complimens sont des mensonges. I'entombe d'accord, reprit Herminius, mais comme ils sont connus pour tels, & qu'il n'y a personne qui fasse nul fondement solide sur des complimens, ce sont des mensonges sans malignité. On sçait bien qu'on ne fera point creu positiuement, on les rend comme on les reçoit, & ie m'accommode à l'usage sans scrupule, avec cette moderation toutefois, que i'en fais le moins que ie puis. Mais pour les mensonges plaisants, reprit Anacreon, vous

ne les condamnez pas non plus, & quand ie voudray faire vn conte agreable, vous me permettrez d'adiouster quelque chose à l'histoire, car pour l'ordinaire la verité a tousiours ie ne sçey quoy de serieux, qui ne diuertit pas tant que le mensonge. Ha pour cela! dit Herminius, ie croy qu'il peut estre permis, car comme on ne croit non plus les contes que les complimens, ie laisse la liberté à vostre imagination d'inuenter ce qu'il luy plaira, aussi bien est ce proprement à vous à iouyr du priuilege de mentir innocemment. En effet à parler avec sincerité il n'y a point de mensonges innocens, que ceux que l'on donne pour mensonges, c'est à dire toutes ces ingenieuses fables des Poëtes, encore faut-il qu'elles ayent l'apparence de la verité, tant il est vray que le mensonge est
laid

laid de luy mesme. Il y a pourtant d'une espece de menterie, reprit Amilcar, qui est compagne inseparable de la vanité, dont ie serois bien marri qu'il n'y eust point par le monde, car les menteurs qui s'en seruent me diuertissent quelquefois assez. Et de quels menteurs voulez vous parler, reprit Plotine? ce sont de ceux, repliqua Amilcar, qui se loüent eux-mesme, chacun selon son inclination, car il y a des gens qui ont la foiblesse de vouloir qu'on croye qu'ils ont plus de credit qu'ils n'en ont, & qui disent cent mensonges pour le faire croire. Il y a de faux braues, qui font de longs recits d'occasions dangereuses où ils ne se sont iamais trouuez; il y a de ces galants qui font les gens à bonne fortune, qui passent les nuits à inuenter des auantures amoureuses, & les iournées entieres à les racon-

s. Partie.

H

ter comme leur estant arriuées. Je connois de ces gens là aussi bien que vous, reprit Plotine, & i'en connois encore d'autres aussi fous, car ie connois vn homme qui a l'audace de dire qu'il vient en droite ligne de Danaé, & cependant on sçait qu'il est de tres-basse naissance. Il a pourtant fait vne longue Genealogie dont il importune ceux qui le veulent escouter. Ha! pour les menteurs de genealogie, reprit Anacreon, ils m'incommo- dent assez, aussi bien que ces gens qui veulent faire les riches, & qui croyent s'empescher d'estre pauvres en mentant. Je vous assure, reprit Emile, que ie connois des gens fort riches qui mentent aussi ridiculement que ceux là; qui ont dans la fantaisie de faire croire que tout ce qui est à eux est plus cher qu'il n'est, & qui font cent men-

songes extrauagants pour publier leur fausse magnificence. Il y a aussi, dit Merigene, des gens qui ont la hardiesse de dire qu'ils ont donné des choses qu'il ne seroit pas bien souuent en leur puissance de donner. Je connois encore d'autres menteurs qui sont assez bizarres, adiousta Anacreon, ce sont de ces gens qui après auoir esté poussez par quelqu'un sans trouuer rien à leur dire, font les plus belles réponses du monde quand ils sont chez eux; & ce qu'il y a de rare, c'est qu'ils les redisent après comme les ayant faites sur le champ. Il y en a aussi adiousta Clidamire, qui ont la folie de dire que des gens de qualité leur escriuent, & les vont voir, quoy qu'ils n'y ayent point pensé. Cela veut dire enfin, reprit Herminius, qu'il y a bien des fous & des menteurs par le monde, & que

i'ay raison de hair fort le men-
ge. Ceux qui mentent pour nuire
à autruy, adiousta Anacreon, sont
plus méchants que ceux qui disent
des mensonges pour se louer; mais
ie trouue si ridicule de dire des
menteries de vanité, que ie sens
bien que mon inclination me por-
teroit plustost à dire quelque men-
songe vñ peu malicieux, qu'à me
louer moy mesme, comme ceux
dont on vient de parler. Il y a pour-
tant des gens qui mentent en se
louant, reprit Amilcar, qui me
font quelque pitié, parce qu'ils le
font de bonne foy, & que croyant
plus de bien d'eux qu'il n'y en a,
ils mentent innocemment; mais le
mal est pour eux qu'encore qu'on
die que pour bien tromper les au-
tres, il faut estre trompé soy mes-
me, ils ne persuadent pas leur opi-
nion. Mais de grace, dit Plotine,

dités moy encore ce que vous pensez de ceux qui escriuent des billets doux & menteurs tout ensemble. I'en pense, reprit Herminius, la mesme chose que de ceux qui disent des ciuilités mensongeres. Tout de bon, reprit-elle après auoir resué vn moment, si on establiroit bien la verité dans le monde, on ne diroit presque rien de ce que l'on y dit. Cela veut dire, reprit Amilcar, que l'on ne doit pas trop se fier en vos paroles. Pour l'aduenir, reprit-elle, ie vous promets d'estre la plus veritable personne du monde, car à parler sincerement, tout ce qu'Herminius a dit pour la verité, & contre le mensonge, m'a si fort touchée, que ie ne veux plus du tout mentir. Et pour vous montrer que i'ay bien profité de ce qu'il a dit, ie conclus aussi bien que luy, que tout mensonge est vn mal, que

s'il estoit possible il faudroit ne mentir iamais, qu'il seroit bon de n'employer iamais le menfonge à faire vn bien, qu'il est moins criminel de mentir pour sauuer la vie de son Amy, que la sienne propre. Que les bons offices menteurs ont de la foiblesse, que la dissimulation est vne lascheté, que les ciuilitéz menfongeres sont blasrables, que mentir pour se louer est vne chose ridicule, & que les complimens sont des menfonges si connus qu'ils ne font mal à personne. Qu'il y a vn silence menteur qu'il faut éviter, que l'habitude des plus petits menfonges est vn grand deffaut, & que les Poëtes sont les seuls menteurs qui meritent d'estre louez. Vous auez sans doute bien profité de la conuersation, dit Valerie, mais il me semble que l'on pourroit encore demander si le menfonge n'est

point plus criminel en escritures qu'en paroles. N'en doutez nullement, dit Herminius, & ie m'estonne que toute la compagnie ait laissé cela à remarquer à Valerie. En effet, adiousta Anacreon, ie trouue que de toutes les manieres dont le mensonge peut paroistre, il n'y en a point de plus criminelle, ni de plus lasche que celle de certains esprits mediocres, qui n'ayant pour toute force & pour tout genie, que leur propre malignité, ne s'occupent qu'à inuenter, ou qu'à ramasser des faussetez pour en composer des satires. On peut sans doute faire des satires innocentes, poursuit Herminius, mais il faut que ce soit contre les vices en general; & celles là ne se seruent point dumensonge, & n'employét que la verité. Mais pour celles qu'on fait contre des personnes particulieres, le mésonge & la calomnie

en sont inseparables, elles sont toutes filles de la haine ou de l'enuie, & ceux qui les font ne pouuant iamais s'empescher de mentir, sont les plus criminels de tous les menteurs. Car enfin ils entreprennent de fixer le mensonge, s'il est permis de parler ainsi, de le rendre immortel s'ils pouuoient, d'imposer à la posterité, & d'accuser des gens lors mesme qu'ils ne seront plus en estat de se deffendre. Mais comme les Dieux sont iustes, ceux qui ont le cœur assez mal fait pour aimer à faire des satires, sont tousiours haïs & méprisez, mesme de ceux qui rient le plus de leurs mensonges medifans. Ils sont parmy les hommes, ce que sont les Tigres & les Pantheres, on les veut voir par curiosité, mais on ne les veut point auoir chez soy. On les craint mesme lors qu'ils se ioüent, & on ne peut iamais se fier à eux. Et à n'en mentir pas on a raison de ne vou-

loir point d'Amis, qui soient ennemis declarez de la iustice, de l'humanité, de la vertu, & de la verité. Je voy bien, dit Valerie, que toute la compagnie approuue ce que vient de dire Herminius, mais ie ne scay si le mensonge ne peut pas estre excusable en guerre, & en amour, & si les réponces equivoques & ambiguës, qui semblent tenir le milieu entre la verité & le mensonge peuuent estre permises. Pour les réponces equivoques, reprit Herminius, comme elles sont filles de l'artifice & de la finesse, i'ay grande inclination à les condamner toutes absolument, si ce n'est en certaines occasions, où par bonté l'on veut s'empescher de dire des veritez defauantageuses à quelqu'un. Encore n'aimerois-ie pas à me trouuer contrainr de m'en seruir, & à parler sincerement, il faut tousiours respondre à l'inten-

tion de celuy à qui on parle, & non pas songer à le tromper. Pour les mensonges qu'on fait à la guerre, dit Anacreon, ie ne les trouue pas criminels, parce que dès que la guerre est ouuerte, la defiance est dans les deux partis. Ie l'aduouë, dit Herminius, mais ie suis pourtant assuré qu'il n'y a point de Heros qui voulust faire le personnage d'espion, & qui par vn discours menteur voulust faire vaincre son party sans y prendre autre part que celle du mensonge. Ainsi sans me mesler de iuger, si en general le mensonge est permis à la guerre, ie dis tousiours hardiment, que ie ne prendrois iamais la commission d'y mentir; & que i'aimerois tousiours mieux combattre les ennemis, que les tromper. Mais pour les Amants, dit Amilcar, si vous leur ostez absolument le mensonge, vous leur ostez toute leur force. Pour les vray

Amanss, reprit Herminius, ie croy que tout au plus ie leur permettray de mentir en vers, pourueu qu'ils disent tousiours vray en prose. Il n'en est pas de mesme des Amants coquets, car ie leur permets de dire tout ce qu'il leur plaira, car comme ils ne sont pas trop exposez à estre creus, si ce n'est par des coquetes qui meritent d'estre trompées, il ne faut pas leur oster des soupirs trompeurs, des larmes trompeuses, des mensonges flateurs, des desespoirs menteurs, & mille autres semblables bagatelles mensongeres. Quand vous auriez esté toute vostre vie aussi coquet que moy, reprit Amilcar, vous ne scauriez pas mieux ce que font les Amants coquets. S'il ne l'a esté, reprit Valerie en riant, il le pourroit estre, & ie ne scay s'il suiuiroit son inclination s'il ne le feroit point

vn peu. Je hais tant le mensonge, reprit Herminius, qu'il me semble que ie ne deurois pas estre soupçonné de pouuoir estre Amant coquet, principalement par l'aimable Valerie, qui est la personne du monde la plus propre à guerir ceux qui l'honnorent particulièrement, d'une semblable maladie. A peine Herminius eut-il acheué ces paroles, qu'on vint l'aduertir que Publicola le demandoit, si bien que s'en allant à l'heure mesme, la conuersation changea, & la compagnie se separa bien tost après. Plotine fit pourtant vne remarque qui luy fit iuger qu'il estoit plus difficile de dire tousiours vray qu'il ne sembloit, car toutes les ciuilitiez que se firent toutes ces diuerses personnes furent pour la plus part plus flateuses que sinceres. Cependant Herminius ne fut pas plustost

arriué chez Publicola qu'il sceut qu'il falloit precipiter le dessein d'attaquer les deux forts des ennemis, parce qu'on auoit sceu qu'ils y faisoient faire de nouveaux retranchemens, qui en rendroient la prise impossible, si on en differoit dauantage l'attaque. Vne heure après vn conseil secret ayant esté tenu, où le second Consul estoit, & où se trouua Clelius, Horace, Artemidore, Themiste, Mutius, Octaue, Herminius, Emile, & quelques autres. Il fut resolu qu'on n'entreprendroit pas de prendre tous les deux forts à la fois, parce que les troupes Romaines seroient trop foibles, si elles estoient partagées. Qu'ainsi il faudroit seulement faire vne fausse attaque du costé du fort le plus difficile à emporter, & que cependant toutes les troupes iroient droit à l'autre fort. Pour cét effet

on prepara des gabions, des mantelets, des fascines, des plates-formes, des beliers, & autres machines necessaires en semblables occasions; & comme les Romains ne vouloient estre commandez que par vn Romain, Horace eut le commandement general, & sous luy Artemidore, Themiste, Octaue, Herminius, Emile, Mutius, & Spurius eurent les premiers emplois. Merigene, Amilcar, Meleagene, Acrise, Damon, Sicinius, & tous les autres braues se meslerent dans les bandes, ou se rangerent auprès d'Horace. Pour les Consuls ils demeurèrent dans Rome pour la seureté de la Ville, & pour enuoyer du secours à Horace s'il en auoit besoin, ou pour le soustenir & le receuoir s'il estoit repoussé. Mais comme le secret est la chose du monde la plus difficile à garder,

lors qu'il s'agit de quelque entre-
prise de cette nature, Porfenna &
Tarquin scachant les preparatifs se-
crets qu'on faisoit à Rome, ne dou-
tetent pas que ce ne fust pour at-
taquer quelqu'un des deux forts;
de sorte que comme leur armée
estoit fort nombreuse, ils se pre-
parerent esgalemment à soustenir ces
deux attaques Aronce commanda
d'un costé & Titus de l'autre; le
Prince de Messene quoy qu'il fust
encore un peu incommodé de la
legere blessure qu'il auoit receuë à
l'attaque du pont, ne laissa pas de
se tenir auprès d'Aronce. Le braue
Lucilius frere de la genereuse Me-
linthe, se trouua aussi de ce costé
là, aussi bien que Mamilius gen-
dre de Tarquin, Telane, Emilius,
Theanor & plusieurs autres. Sex-
tus n'osant prendre nul comman-
dement par politique, de peur d'ir-

riter trop les Romains, & de les rendre encore plus vaillants, par la haine qu'ils auoient pour luy, demeura auprès de Tarquin, qui commandoit le gros de reserve, pour pouuoir secourir ceux qui en auroient besoin. Mais enfin le iour destiné à cette grande action estant arriué, les vns se preparerent à bien attaquer, & les autres à bien soutenir l'effort des attaquants. Ce fut alors que Clelie eut vne agitation d'esprit tout à fait grande, car elle ne douta point que cette occasion ne fust tres-dangereuse, & qu'Aronce ne s'exposast aux plus grands perils de cette iournée. En effet ce vaillant Prince pour se consoler de n'auoir pas combattu au lieu le plus dangereux le iour de l'attaque du pont, se resolut de signaler son courage ce iour là; principalement ayant sceu qu'Horace auoit

auoit le commandement des trou-
pes Romaines, pour l'execution de
cette entreprise. Ce n'est pas que
lors qu'il pensoit qu'il seruoit Tar-
quin qui estoit vn Tiran, qui auoit
mal-traité Clelie, & qui estoit en-
core amoureux d'elle; & qu'il pensoit
encore qu'il combattoit pour Sextus,
qui estoit cause de la mort de Lu-
crece, & ensuite de celle de l'illustre
Brutus, il n'eust vne douleur estran-
ge, & qu'il ne trouuaist qu'il auoit vne
cruauté insupportable d'empescher
les viures d'entrer dans vne Ville
où sa Maistresse estoit enfermée. Il
luy estoit mesme fort dur de se
voir l'espée à la main contre ses plus
chers Amis; mais après tout l'hon-
neur & la nature l'attachant dans
le party du Roy son pere, & la hai-
ne qu'il auoit pour Horace, l'ani-
mant à vn nouveau desir de gloi-
re, il se disposa à combattre avec

ie ne ſçay quelle audace qui luy mettant de la fierté dans les yeux, fit qu'il parut auoir encore la mine plus haute, lors qu'il fut à la teſte des troupes. L'aduis de Tarquin auoit eſté de ſe contenter de ſouſtenir l'effort des Romains dans le fort, mais celuy d'Aronce fut d'aller au deuant d'eux, & de leur preſenter la bataille; de forte que ſon opinion eſtant ſuiuie, il s'alla poſter entre Rome & le fort qu'on deuoit attaquer, & diſpoſa ſi bien les troupes qu'il auoit, qu'on euſt dit que toute l'armée de Porſenna eſtoit en cét endroit. De forte que lors que l'armée Romaine qui marchoit en ordre parut, ces deux armées ſe trouuerent en eſtat d'en venir aux mains. Horace voyant Aronce à la teſte des troupes, eut vne extreme ioye de voir qu'il pouoit ſans ingratitude tirer l'eſpée

contre luy, & Aronce le reconnoissant, sentit tout ce que la haine, l'amour, & la gloire peuuent inspirer en vne pareille rencontre. Comme les Romains estoient les attaquants, Horace marcha le premier aux ennemis, après auoir encouragé ceux qui le deuoient suivre, & par sa voix, & par son action. Presques en mesme temps, Aronce s'auança suiuy de tous les siens, & soustint de telle sorte l'effort des ennemis, qu'au lieu d'en estre rompu, il les rompit. C'est auiourd'huy, s'escria Aronce en parlant à Horace, qu'il faut terminer tous nos differens. A ces mots ce vaillant Prince redoublant sa valeur ordinaire, s'eslança sur son Riual avec vne impetuosité qui ne luy permit pas de deliberer sur ce qu'il auoit à faire, parce qu'il se vit contraint de se deffendre. Il ne

se dementit pourtant pas en cette rencontre, & prenant la parole en parant les premiers coups d'Aronce, puis que mon libérateur, répondit-il, veut m'oster la vie qu'il m'a conseruée plus d'une fois, il faut luy monstrier du moins que ie la sçay bien deffendre. Après cela il se fit vn combat furieux entre ces deux redoutables Riuaux, & Horace se trouua plus en danger d'auoir à soustenir la seule valeur d'Aronce, qu'il ne l'auoit esté lors qu'il auoit soustenu tout seul tout l'effort des ennemis en deffendant le pont Sublicien. En effet Aronce après l'auoir blessé legerement en deux endroits, luy arracha son espée, le prit, & le donna en garde à quelques-vns des siens, pendant qu'il poursuiuit son auantage; mais comme les Romains s'apperceurent de la prise d'Horace, ils firent vn

si grand effort pour le desgager, qu'ils le desgagerent en effet, durant qu'Aronce combattoit contre plusieurs, qui après s'estre raliez l'auoient enuironné. A l'autre pointe, le Prince de Messene, qui commandoit la Caualerie, voyant qu'il auoit en teste Themiste son Riual, & son plus fier ennemy, se preparant à le bien receuoir, poussa son cheual dans le mesme temps que Themiste poussa le sien; si bien que se rencontrant avec vne égale impetuosité, le Prince de Messene fut dangereusement blessé à la poitrine, & Themiste eut le bras droit percé. Le premier chancelant du coup qu'il auoit receu, fut secouru par les siens qui le mirent en lieu de seureté; & Themiste ne pouuant plus soustenir son espée du bras qu'il auoit blessé, la prit de la main gauche, & passant au second

rang, ne laissa pas de donner ses ordres iusques à la fin du combat. Cependant Aronce voyant qu'on luy disputoit trop long-temps la victoire, fit auancer Titus qui combattant avec diuers interests, qui redoubloient son courage, seconda si bien Aronce, que malgré la valeur des Romains, ils commencerent de reculer de ce costé là. Artemidore voyant ce desordre, & remarquant Titus à la teste des Romains qui estoient du party de Tarquin, fut droit à luy l'espée à la main; mais comme celle de Titus se rompit en parant le coup qu'il luy porta, il se retira parmy les siens. Mais par malheur Artemidore s'estant laissé emporter à sa valeur, en poussant les ennemis, il receut vn coup de fleche à trauers le flanc, qui luy fut tiré par vn simple Soldat, caché derriere vn buis-

son ; si bien que tombant du coup qu'il auoit receu, les ennemis l'eussent pris prisonnier, si Mutius fuiuy du braue Merigene, ne fust arriué en cét endroit pour le sauuer. Ce fut alors que le vaillant Aronce eut besoin de son courage, & de sa prudence, car il vit que malgré tous ses efforts, les Romains ayant repris cœur tout d'un coup, auoient remis l'ordre dans leurs troupes; qu'Octaue, Mutius & Herminius s'auançoient, & que ses gens estoient prests à tourner le dos aux ennemis. Ce Prince prenant alors vne hardie, & genereuse resolution, commanda à ses gardes qui le suiuoient, de passer au fil de l'espée tous ceux de son party qui voudroient lascher le pied, & refuser de le suiure. Ainsi ioignant vn grand exemple de valeur à ce commandement, le combat re-

commença avec plus de chaleur qu'auparavant. Horace de son costé ayant repris sa place malgré ses blessures, fit ce qu'il put pour vaincre ou pour mourir. De sorte qu'en cét instant, toutes les troupes se meslant, tout ce qu'il y auoit de gens considerables combattirent de leur main & se signalerent. Mutius fit des choses admirables, Octaue n'en fit pas moins, Lucilius dans le party d'Aronce, se signala hautement; Emile combattit comme vn Amant braue & malheureux, qui n'esperoit rien, & qui ne craignoit point la mort; & tous firent enfin leur deuoir dans l'vn & dans l'autre party. Mais comme Aronce auoit trop peu d'Infanterie, & que pour aller vers vn bataillon des ennemis qui luy tiroit en flanc, il y auoit vn petit rideau à passer où la Caualerie estoit inutile; & que

d'ailleurs son Infanterie estoit estrañgement fatiguée, il se tourna vers vne partie de ses gens de cheual, & leur proposant de quitter leurs cheuaux, & de le suiure, ils luy obeïrent, & furent teste baissée vers ceux qu'il falloit combattre. l'Infanterie d'Aronce reprenant alors courage, & voyant que les gens de la premiere qualité luy deuenoient égaux au peril qu'il falloit essuyer, fit des choses incroyables. En effet malgré toute la valeur d'Horace, & de tant de braues qui l'accompagnoient, Aronce les défit, & les força de songer à la retraite. De sorte que cette Caualerie, qui estoit deuenüe Infanterie en vn moment, reprenant alors ses cheuaux, poursuivit les Romains iusques assez près de leur Ville. Cette retraite se fit pourtant avec quelque ordre, mais elle ne laissa pas de mettre l'é-

pouente & la confusion dans Rome; & si les Consuls n'eussent agy avec prudence, & avec autorité, ce peuple effrayé eust fermé les portes aux troupes Romaines, de peur que les vainqueurs n'entras- sent avec les vaincus. Le grand nombre de blesez qu'on rappor- toit tout sanglants, redoubloit en- core la crainte parmy le peuple; & si l'amour de la liberté n'eust pas esté fortement imprimée dans son cœur, il eust assurément parlé de se rendre. Cependant au milieu de ce grand tumulte, on n'entendit au- cun Romain proposer de receuoir Tarquin pour auoir la paix. Au contraire leur premiere crainte se changeant en fureur, on n'entendit qu'imprecations contre Tarquin & contre la fiere Tullie; & les plus desesperez d'entr'eux disoient tout haut qu'il falloit se resoudre à met-

tre bien tost le feu dans leur Ville, pluſtoſt que de ſe rendre; qu'il valoit mieux perir promptement & genereuſement par la flamme, que lentement & honteuſement par la faim. Enfin le deſordre eſtoit ſi grand qu'on n'a iamais rien veu de ſemblable. Il y auoit vne oyſiueté vniuerſelle dans toute la Ville, qui faiſoit que tout le peuple eſtoit dans les ruës, & dans les places publiques à ſe pleindre & à murmurer. Artemidore eſtant rapporté comme les autres bleſſez, excita encore plus de rumeur, parce qu'il eſtoit d'un rang tres-considerable, & d'une valeur extraordinaire. La bleſſure qu'il auoit receuë eſtoit ſi dangereuſe, que les Chirurgiens ne voulurent pas répondre de ſa vie. Si bien que tous ſes Amis en furent en peine, & Bereliſe & Clidamire, ſans ſonger

à rien qu'à la conseruation de ce Prince, ne penserent qu'à luy rendre tous les seruices dont il pouuoit auoir besoin en cét estat là. Pour Themiste, & pour Horace leurs blessures furent si peu dangereuses, qu'ils n'eurent pas besoin de garder la chambre. Clelie dans vn si grand desordre, auoit des sentimens bien differens, car elle aimoit sa Patrie, elle auoit pitié de tous ses malheurs, elle haïssoit Tarquin; mais comme elle n'aimoit pas Horace, & qu'elle aimoit Aronce, elle auoit quelque peine à ne se réjouïr pas que ce dernier eust vaincu l'autre. Ainsi trouuant cette secreete ioye criminelle, elle se changeoit bien tost en vne douleur legitime. Iustes Dieux! disoit-elle en elle mesme en soupirant, pourquoy ne me permettez vous pas l'vsage de la haine, & de l'amitié? En effet ma fortune est

disposée de telle sorte, que ie ne puis ni aimer, ni haïr sans crime, ni m'affliger, ni me réjouïr innocemment. Si ie hais Horace ie suis indigne d'estre Romaine, puis que c'est vn Romain qui a sauué Rome, qui hazarde tous les iours sa vie pour la deffendre, & qui vient de répandre son sang pour le salut de ma Patrie. D'autre part si i'aime Aronce, i'aime vn Prince qui assiege Rome, dont la valeur la va assuiettir au Tiran, ou la reduire à perir. Mais d'ailleurs si i'aime Horace, ie suis vne perfide, & vne infidele, indigne de voir le iour; & si ie hais Aronce, ie suis pariure, & la plus ingrate personne qui fut iamais. Que feray-ie donc malheureuse que ie suis, reprenoit-elle? Ie me soumettray à la volonté des Dieux, adioustoit cette admirable fille, & sans raisonner tant sur les

choses, & sans vouloir preuoir l'a-
uenir, i'auray du respect pour mon
pere, de la pitié pour ma Patrie, de
l'estime pour Horace, de la ten-
dresse & de la fidelité pour Aron-
ce, & de l'innocence en toutes mes
actions. Cependant les Consuls &
le Senat estoient dans vn fort grand
embarras, car quelque ordre qu'ils
y pussent apporter, toutes les cho-
ses necessaires à la subsistence du
peuple deuenoient si cheres, que
cela augmentoit encore les mur-
mures de la multitude. Les enne-
mis qui estoient auertis de ce de-
fordre, voulant en profiter presse-
rent la Ville plus qu'auparauant; si
bien qu'il n'y entroit plus rien du
tout. On n'osoit mesme plus me-
ner paistre le peu de troupeaux qui
estoient encore dans Rome hors
des murailles de la Ville; &
Rome estoit en vne consterna-

tion estrange. Toutes sortes de diuertissemens en estoient bannis, les Amants mesme ne parloient presque plus d'amour à leurs Maistresses, la conuersation estoit égale par tout, & Amilcar & Anacreon qui ne pouuoient viure sans ioye, disoient qu'ils estoient plus exposez à mourir d'ennuy que de faim, si les choses ne changeoient bien tost de face. On ne voyoit tous les iours que des funerailles, ou de ceux qui auoient esté blesez au combat, ou de ceux que la necessité faisoit mourir. Il y auoit vne passeur mortelle sur la pluspart des visages, & la crainte de la faim en preuenant les funestes effets, faisoit que le peuple croyoit desia souffrir le mal qu'il ne faisoit encore qu'aprehender. Les choses estant en cét estat, ce qui aigrit encore l'esprit du peuple, fut qu'il aprit que la fiere &

cruelle Tullie, estoit arriüée au Camp de Porfenna, & qu'elle demandoit à demeurer à vn Chasteau qui estoit proche de celuy où estoit Galerite, iusques à la fin du siege. Cependant Mutius qui depuis long-temps cherchoit à se signaler, afin de seruir sa Patrie, & de forcer Valerie à l'estimer plus que ses Riuaux, fut la trouuer vn matin, & l'abordant avec le visage d'un homme qui a vn grand dessein dans l'esprit; souffrez, Madame, luy dit-il, que ie prenne congé de vous seule, & que ie vous reuele vn secret qui est de la derniere importance. Le sçay bien il y a long-temps, que la passion que i'ay pour vous, vous importune, & que des quatre Amants qui vous seruent presentement, Herminius est le seul aimé, Emile vous donne de la pitié, vous auez de la haine pour Spurius, & de l'indifference

ference pour moy ; Mais enfin, Madame, malgré mon malheur, ie me suis mis dans la fantaisie d'auoir part à vostre compassion, puis que ie n'en puis auoir à vostre tendresse. Preparez vous donc, Madame, à me donner quelques larmes, quand vous apprendrez ma mort, car enfin i'ay à vous assurer que vous auez plus de part que ma Patrie au dessein que i'ay de la deliurer. Je ne puis vous parler plus clairement, le temps vous en apprendra dauantage, & vous fera sçauoir qu'en vous disant adieu au iourd'huy, ie croy vous le dire pour la derniere fois, mais de peur que vostre réponce ne m'abatte le cœur, adiousta-t'il, i'aime mieux partir sans l'attendre. Et en effet, Mutius sans donner loisir à Valerie de luy repliquer vne parole, s'en alla droit au Senat, après auoir fait auertir

les Consuls qu'il auoit quelque chose d'important à dire. Dès qu'il fut deuant l'assemblée, prenant la parole avec vne fermeté heroïque, Seigneurs, dit-il d'vne voix assurée, ie viens vous demander deux graces, l'vne de pouuoir sortir de la Ville déguisé en Thoscan, & l'autre de ne m'obliger point à vous dire par quelle voye ie pretends entreprendre de deliurer Rome. Le secret est si absolument necessaire à l'execution de mon dessein, que ie ne dois pas le confier à vne grande assemblée, & cependant i'ay vne si haute estime de vostre vertu en general, que ie croyrois vous faire tort si i'entreprenois de choisir quelqu'vn de la compagnie en particulier pour luy confier mon dessein. Qu'il vous suffise que ie vous assure qu'il est grand, & qu'il peut-estre heureux, & que ie vous

assure en suite que si ie meurs ie
tiendray ma vie tres-glorieusement
employée, puis que ie l'auray per-
due pour redonner la liberté à ma
Patrie. Mutius ayant cessé de parler,
on delibera sur ce qu'il auoit dit,
mais quoy qu'il y eust peu d'appa-
rence de penser qu'un homme seul
pust faire leuer le siege, neant-
moins les choses estoient en si mau-
uais termes, que connoissant Mu-
tius pour vn homme de haute nais-
sance, de grand cœur, fort zelé
pour la liberté, & d'un esprit fer-
me & fort touché d'un puissant
desir de gloire, le Senat luy accor-
da ce qu'il demandoit. Après quoy
sans perdre temps dès le soir mes-
me, il se déguisa en simple Soldat
Thoscan, & se seruant de l'obscu-
rité des tenebres, pour passer de la
Ville dans le Camp ennemy, il sor-
tit de Rome avec vn poignard ca-

ché, sans que nul autre que luy sceust ce grand dessein que l'amour de la Patrie, & l'amour qu'il auoit pour la vertueuse fille de Publicola, luy auoient également inspiré. Comme la Nourrice de Mutius estoit de Thoscane, il parloit assez bien Thoscan pour ne craindre pas d'estre reconnu au langage. Il passa donc le Tibre pendant la nuit, & fut assez heureux pour arriuer au quartier de Porfenna sans estre arresté. Lors qu'il y fut il se mesla parmy vn grand nombre de Soldats qu'il vit assemblez deuant vne Tribune releuée de deux marches seulement, sur laquelle estoit vn homme de bonne mine, qui donnoit les ordres necessaires pour la paye des Soldats, & qui paroissoit auoir toutes les marques de la Royauté; car il auoit vne robe de Pourpre, & des gardes auprès de luy.

Mutius en approcha aussi près qu'il voulut, car comme il ne paroissoit pas auoir d'armes, & qu'il auoit l'habillement d'un Thoscan, on ne se defioit pas de luy. Il s'approcha donc de cette Tribune, & s'estant persuadé que celuy qui l'occupoit estoit Porfenna, n'osant s'en informer de peur de se decouurer, & craignant de ne pouuoir retrouver vne occasion aussi fauorable pour son dessein, tout d'un coup regardant cet homme comme l'ennemy de Rome, le Protecteur de Tarquin, & comme vn Prince enfin de qui la mort estoit necessaire pour deliurer sa Patrie, en vn moment il fend la presse, tire le poignard qu'il auoit, s'eslance sur luy, & luy enfonce ce poignard dans le cœur avec tant de promptitude, qu'on ne le vit que lors qu'il l'eut retiré tout sanglant du corps de celuy

que Mutius auoit pris pour Porsenna. Cette hardie action surprit de telle sorte tous ceux qui la virent, que celuy qui l'auoit faite eust peut-estre pû se sauuer malgré ceux qui l'environnoient, si le Roy d'Etrurie sortant alors de sa Tente qui estoit fort proche, & apprenant la chose, n'eust commandé à ses gardes de luy amener cét homme vif ou mort. Et en effet Mutius après s'estre assez facilement demeslé le poignard à la main de cette foule de Soldats épouuentez qui auoient veu son action, fut contraint de se laisser conduire deuant Porsenna, par les gardes qu'il auoit enuoyez pour le prendre. Ce Prince estoit alors deuant sa Tente, où l'on voyoit les aprests d'un Sacrifice qu'il faisoit offrir aux Dieux tous les matins, & auoit alors à l'entour de luy Aronce, Telane,

Lucilius, Teanor, Emilius, & plusieurs autres personnes de qualité. Comme on auoit arraché à Mutius le poignard dont il auoit fait cette hardie action, il parut sans armes deuant Porsenna, avec vn visage plein de fierté, où on voyoit du chagrin d'auoir manqué son entreprise, mais nulle frayeur de la mort qu'il deuoit croire qui luy estoit préparée. Dés qu'il fut deuant le Roy, ce Prince irrité prenant la parole, qui es tu? luy dit il, d'où viens tu? dis moy qui t'enuoye, qui te fait agir, qui sont tes complices; & si tu n'en voulois qu'à celuy que tu as tué, ou si tu pretendois m'oster la vie. Je suis Citoyen Romain, repliqua t'il fierement, ma naissance est noble, on m'appelle Mutius, & l'action que ie viens de faire, doit te prouuer que ie ne manque pas de cœur. De sorte que

te regardant comme le plus dangereux ennemy de Rome, i'ay voulu la deliurer en t'ostant la vie, mais afin que tu ne croyes pas estre en seureté, quand tu m'auras fait mourir, sçache que ie ne suis pas seul qui ay formé ce dessein, & que nous sommes trois cens qui auons iuré ta perte, dont ie suis le moindre en grandeur de courage. Le sort est tombé sur moy le premier, mais i'espere que quelqu'un des autres sera plus heurcux que ie ne l'ay esté, & que ta mort vangera tous les Romains du tort que tu as de proteger vn infame Tiran. Mais pourquoy, reprit Porfenna, les trois cens coniurez dont tu parle n'ont-ils pas plustost songé à attaquer Tarquin que moy. C'est, répondit Mutius, parce que si le Tiran estoit mort, ton party au lieu d'en estre plus foible, en seroit plus

puissant, & que si tu auois perdu la vie, le party de Tarquin seroit destruit. Porfenna estant alors encore dauantage irrité contre Mutius, & voulant sçauoir les noms de ceux qu'il disoit auoir coniuéré contre sa vie, commanda à ses gardes de luy faire dire par force ce qu'il vouloit sçauoir. Mais Mutius pour les empescher d'exécuter ses ordres, s'auança promptement vers le feu qui estoit préparé pour le Sacrifice, & mettant sa main au milieu des flames, voy, luy dit-il, sans changer de visage, par la fermeté que i'ay à souffrir la rigueur du feu, combien peu craignent la douleur ceux qui aiment ardemment la gloire; & iuge par ce que ie fais, si ie suis capable de dire par la force des tourmens ce que tu veux sçauoir de moy. Mutius dit cela d'un air si ferme & si hardy, & il regar-

da bruler sa main d'un visage si tranquille, que Porfenna & tous ceux qui l'environnoient furent si épouventez de cette action, qu'ils en ietterent des cris d'estonnement qu'ils ne purent retenir. Porfenna luy mesme s'avança vers Mutius, & commanda à ses gardes de retirer sa main du feu. Ce que tu fais contre toy-mesme, luy dit alors ce Prince en le regardant avec admiration, est bien plus grand que ce que tu as voulu faire contre moy, & si i'auois vn suiet qui en eust fait autant pour mon seruice, il n'y a point de recompense si grande que la grandeur de son courage ne dust attendre de moy. Il seroit encore plus beau, Seigneur, reprit Aronce, d'estimer la grandeur de courage en la personne d'un ennemy, qu'en celle d'un suiet. l'en tombe d'accord, reprit Porfenna, &

pour vous tesmoigner que i'en suis persuadé, ie donne la vie à Mutius. Le vous en remercie pour luy, Seigneur, repliqua generousement Aronce, car il est à mon auis assez fier, pour ne se foucier pas qu'on luy rende vn bien qu'il a voulu perdre, & ie vous remercie pour moy mesme, de m'auoir donné vn si grand exemple à suiure. Il est vray, Seigneur, reprit Mutius, que la vie m'est fort indifferente; mais comme il suffit pour m'obliger que le Roy ait dessein de me rendre vne chose, qu'il croit qui me doit estre agreable, ie veux bien luy tesmoigner ma reconnoissance, en luy disant encore vne fois que sa vie ne peut plus estre en seureté, s'il ne donne la paix à Rome, & s'il n'abandonne le party de Tarquin, qui est trop iniuste pour prosperer long-temps. Car enfin ie suis le

moins braue des trois cens qui ont
coniuré sa perte. Ha ! Mutius, s'es-
cria Porfenna, si ie suis assez hai
de trois cens hommes aussi braues
que toy, pour me vouloir donner
la mort, vne armée de cent mille
hommes ne pourroit conferuer ma
vie, & pour te tesmoigner com-
bien i'estime ton courage, ie veux
adiouster la liberté à la vie que ie
t'ay desia accordée. Comme ce bien
là m'est mille fois plus cher que la
vie, repliqua-t'il, ie vous en rends
graces, Seigneur, mais ie ne puis
dissimuler mes sentimens, sçachez
que tout grand qu'est ce bien là,
ie ne puis l'accepter si c'est à con-
dition de cesser d'estre vostre enne-
my, si vous continuez d'estre en-
nemy de Rome. Car comme ie
ne puis iamais cesser d'estre Ro-
main, ie ne puis aussi iamais estre
dispensé de haïr ceux qui voudront

assuiettir ma Patrie; c'est pourquoy ne m'accordez pas la liberté, si vous pretendez m'engager par là dans vos interests. Car enfin, adioustant'il fierement, ie ne puis iamais estre dispensé du serment que i'ay fait avec ces trois cens Romains qui ont iuré vostre perte. Porfenna tousiours plus surpris de la hardiesse de Mutius, commanda qu'on le menast dans vne Tente, qu'on fist penser sa main, qu'on le traitast fort bien, & qu'on le gardast iusques à nouuel ordre. Après quoy Tarquin estant arriué, tesmoigna à Porfenna auoir beaucoup d'animosité contre Mutius, & luy demanda à quels suplices il l'auoit destiné. Vous deuriez plustost demander, reprit Porfenna, par quelle voye ie puis me garantir de ces trois cens déterminez, qui pour vos interests en veulent à ma vie seule-

ment. Ce que ie vous dis, Seigneur, repliqua Tarquin, conuient à ce que vous dites, car enfin il n'y a point d'autre moyen pour éuiter l'effet de cette coniuration, que de faire trembler tous les coniurateurs, par les effroyables suplices que vous ferez souffrir à Mutius. Mais que peut-on faire souffrir à vn homme, repliqua Porsenna, qui vient presque chercher vne mort assurée, qui vient avec vn poignard seulement, au milieu d'vne armée ennemie pour me tuer; qui souffre le feu sans changer de visage, & qui ne veut point de la vie, ni de la liberté, à condition de cesser d'estre mon ennemy. Les suplices volontaires, reprit Tarquin, ne sont pas suplices, mais si vous forcez Mutius à souffrir, vous luy verrez changer de langage; principalement si les tourmens qu'on luy fe-

ra endurer sont longs, & redou-
blez. Car après tout, adiousta le
cruel Tarquin, la crainte est la plus
seure garde des Roys en de pareil-
les rencontres. Pour moy (inter-
rompit Aronce, qui ne pouuoit
souffrir que Porfenna écoutast les
conseils du Tiran) ie trouue
qu'au lieu de chercher par quelle
voye le Roy peut se garder de tant
de genereux ennemis, il seroit bien
plus beau, & bien plus seur de cher-
cher les moyens de n'auoir nul su-
iet de se garder d'eux. Mais com-
ment cela pourroit-il estre, reprit
brusquement Tarquin, la chose se-
roit fort aisée, répondit genereu-
sément Aronce, si le Roy faisoit
ses Amis de ses ennemis. Il faut en-
core porter le conseil plus loin, ré-
pondit fierement le Tiran, & ad-
iouster qu'il faut mesme que le
Roy d'Etrurie fasse ses ennemis de

ses Amis. Le conseil d'Aronce (reprit Porfenna, sans permettre à Tarquin de continuer son discours) est digne de luy & digne de moy, & quand mes Amis se mettront en estat de ne considerer que leurs interests, sans considerer les miens, il m'importera peu qu'ils deuiennent mes ennemis; & ie seray alors plus fort d'auoir attaché de genereux ennemis à mes interests, que de perdre des Amis preocupez, qui ne considerent que les leurs. Aronce, Lucilius, Telane, Emilius, Teanor, & tous les autres Chefs qui estoient presents, ayans tesmoigné par vn murmure confus qu'ils louïoient ce que Porfenna disoit, Tarquin se trouua surpris & embarrassé. Mais comme c'estoit vn Prince que la politique auoit rendu capable de s'accommoder promptement aux euenemens les plus inopinez,

inopinez, il ne hesita pas vn moment, & prenant la parole, Seigneur, dit-il à Porfenna, pour vous tesmoigner que ie n'ay regardé que la seule conseruation de vostre vie, ie veux bien receuoir sans aigreur ce que vous venez de dire, & vous conseiller mesme la clemence, quoy que selon mon sens cette vertu ne doiue estre employée que rarement lors qu'on veut se faire craindre & respecter. Pardonnez donc à Mutius puis que vous en auez enuie, mais n'allez pas laisser eschapper l'occasion de prendre Rome, qui ne peut manquer d'estre prise pour peu que vous veüilliez attendre. Il n'en coustera pas la vie à vn de vos Soldats, la faim va destruire trois cens mille hommes tout d'vn coup, & les forcer de se rendre sans conditions, ou de faire vn grand bucher de leur Ville, pour éuiter de

tomber sous vostre puissance. Chacun a ses maximes & ses raisons, reprit Porfenna, & la chose est d'assez grande importance pour la considerer avec plus de loisir. Cependant, adiousta ce Prince, il sera bon de faire offrir aux Dieux le Sacrifice qui est preparé, pour les remercier du peril que i'ay éuité, & pour leur demander vn conseil qu'eux seuls me peuuent donner. Tarquin n'osa contredire Porfenna, mais au lieu d'assister au Sacrifice, il se retira, & fut consulter avec la cruelle Tullie, sur ce qu'il auoit à faire. Dés qu'il fut party Aronce faisant agir tous ses Amis, entretint le Roy son pere dans les sentimens genereux qu'il luy auoit inspirez, mais comme ce Prince auoit de la peine à se déterminer absolument, il demanda deux iours à se resoudre. Cepen-

dant à cause de ces trois cens Romains dont Mutius auoit parlé, on redoubla la garde du Roy, on ne laissa plus approcher personne de luy, sans sçauoir qui c'estoit, on visita tous ceux qui en approchèrent, de peur qu'ils n'eussent des poignards cachez comme Mutius, & l'on prit tant de soin de garder ce Prince, qu'il comprit que cette inquietude estoit pire que la mort. Le soir il fut au Chasteau où estoient Galerite & la Princesse des Leontins, qui ayant sceu ce qui estoit arriué, & voulant le porter à la paix, le louierent fort d'auoir donné la vie à Mutius, & luy firent conseiller par ses principaux Ministres, d'enuoyer offrir la paix à Rome. D'abord il y resista, disant que l'honneur ne vouloit pas qu'il abandonnast Tarquin après l'auoir protégé; adioustant qu'on pour-

roit penser que la peur d'estre assassiné l'auroit porté à prendre cette resolution, quoy que ce fust principalement parce que l'action de Mutius, rappelant dans sa memoire toutes les grandes choses qu'auoient faites depuis la guerre, Brutus, Publicola, Horace, Herminius, & tous les autres Romains, il commençoit de connoistre que Rome deuoit estre protegée des Dieux, & que Tarquin en deuoit estre abandonné. Si bien qu'ayant quelques remords de proteger vn Prince si iniuste contre des gens si pleins de vertu, il eust volontiers voulu donner la paix à Rome, s'il eust creu le pouuoir faire avec honneur. Son esprit estant en cét estat, il aprit que l'action de Mutius rendoit la valeur des Romains si redoutable à ses Soldats, qu'oubliant le dernier auantage qu'ils auoient rem-

porté, vne terreur panique s'em-
 paroît de telle sorte de leur esprit,
 qu'au moindre bruit qu'entendoient
 les sentinelles, ils croyoient voir
 les trois cens compagnons de Mu-
 tius venir fondre sur eux: Porfen-
 na sceut en mesme temps que Tar-
 quin auoit rappellé tous les siens
 en son quartier, qui estoit de l'au-
 tre costé du fleuve, qu'il auoit te-
 nu conseil avec la fiere Tullie, qu'il
 auoit enuoyé secretement à Ceres,
 à Cumes, & à Tarquinie; & que
 Tullie alloit arriuer à ce Chasteau.
 De sorte que le procedé de Tarquin
 l'irritant encore, le porta plus fa-
 cilement dans les sentimens où A-
 ronce desiroit qu'il fust. Mais com-
 me Galerite craignit l'adresse de
 Tullie, elle se chargea de la rece-
 uoir, pendant que le Roy s'en al-
 lant par vn autre costé, s'en re-
 tourneroit au Camp. Et en effet

cette cruelle Reine estant arriuée, fut receuë par Galerite avec la ciuilité qui estoit deuë à sa condition. Elle parut surprise de n'y trouuer plus le Roy, à qui elle vouloit parler; mais comme elle auoit vn esprit hardy, qui ne s'estonnoit pas aisément, elle parla à Galerite comme vne personne qui eust esté dans ses interests luy eust pû parler. Elle la coniura d'empescher Porsenna d'abandonner le siege de Rome, car enfin, luy disoit-elle, quand Porsenna voudroit garder sa conqueste i'y consentirois, & ie m'engagerois mesme à faire que Tarquin y consentist, n'y ayant rien que ie ne choississe plustost que de voir Rome en liberté. Mais comme il pourroit estre, adioustoit-elle, que le Roy d'Etrurie ne voudroit pas vsurper l'Estat d'un Prince dont il s'est déclaré protecteur; quand

on aura pris Rome, i'offre d'oster
ma fille à Mamilius pour la donner
à Aronce, & de porter en suite
Sextus à se contenter de regner à
Tarquinie. Pour moy, Madame,
repliqua Galerite, ie n'ay rien à ré-
pondre aux propositions que vous
me faites, si ce n'est qu'il vous est
aisé de iuger que iamais les Ro-
mains ne souffriront que Tarquin
soit Roy de Rome, qu'il est abso-
lument impossible de le pouuoir
retablir à cause de l'effroyable hai-
ne qu'on a contre luy; & qu'ainsi
Porfenna ne pouuant faire la guer-
re vtilement pour Tarquin, peut
faire la paix glorieusement pour luy.
Ie sçay bien pourtant, adiousta cet-
te sage Princesse, que le Roy fera
autant d'instance qu'il pourra pour
vos interests; mais après tout ie
suis persuadée qu'il n'est pas iuste
de faire perir vne grande Ville, &

vne grande armée, pour vne chose qu'on sçait bien qui ne peut iamais estre, principalement, poursuivit cette Princesse, quand on agit pour vn Prince qui ne considere que sa propre grandeur, & qui ne songe point aux interests de ceux qui hazardent tout pour les siens. Tullie eut vne peine extreme à s'empescher de répondre fierement à Galerite, mais comme elle ne vouloit point rompre entierement afin d'auoir plus d'occasion de nuire à Aronce & à Clelie, elle dissimula son ressentiment, & dit à Galerite qu'il falloit qu'elle allast dire au Roy d'Etrurie qu'il ne trouuast point estrange si Tarquin demeu- roit à son quartier, iusques à ce qu'il eust pris ses resolutions, de peur que ses ennemis ne voulussent le porter aussi bien à le liurer aux Romains, qu'à abandonner le siege

de Rome. Et en effet quittant Galerite, elle fut vn moment chez la Princesse des Leontins, à qui elle dit adroitement que si elle pouuoit faire en sorte que Porfenna prist Rome, & restablit Tarquin, elle luy feroit épouser le Prince Titus, après quoy elle remonta dans son chariot. Mais à peine y fut-elle, qu'elle aprit que les Soldats qui l'auoient veuë passer, murmuroient tout haut dans le Camp, de ce qu'on employoit leur courage à remettre sur le Throsne vne femme qui auoit passé sur le corps de son pere, & qui deuoit plustost songer à aller rendre conte aux Dieux de tous ses crimes, qu'à regner dans vne Ville où il y auoit tant de braves gens. Cét auis sincere qu'elle receut par le Capitaine de ses gardes, luy fit changer de resolution. Si bien qu'au lieu d'aller trouuer

Porfenna, elle retourna au quartier de Tarquin, à qui elle voulut persuader de surprendre la nuit le Camp du Roy d'Etrurie ou bien puis qu'il ne pouuoit prendre Rome, d'employer quelque intelligence qu'elle auoit dans la Ville à y mettre le feu. Cependant le procedé de Tarquin ayant irrité Porfenna, le siege ne pouuant plus bien aller entre deux Camps diuisez, & le courage de Mutius, & le conseil d'Aronce, ayant touché le cœur du Roy d'Etrurie, il renuoya Mutius à Rome par Lucilius, qui eut ordre d'offrir la paix aux Romains, à des conditions raisonnables. Telane accompagna aussi Lucilius pour negocier cette grande affaire. Leurs instructions portoient qu'ils demandassent encore vne fois le re-stablissement de Tarquin, sans insister pourtant fort sur vn article

qu'on ſçauoit bien qui ne pouuoit
iamais eſtre accordé. Qu'ils obtin-
ſent du moins qu'on luy rendiſt
tout ce qu'il auoit eu de la ſucceſ-
ſion du premier Tarquin, & tout
ce qu'il auoit acquis depuis, & qu'on
rendiſt à Porſenna vn petit pays du
coſté des Veientins, que les Ro-
mains auoient vſurpé ſur luy à la
derniere guerre; offrant moyen-
nant cela de rendre le Ianicule, &
de retirer ſon armée des terres de
Rome. Et afin que tous actes d'ho-
ſtilité puffent pluſtoſt ceſſer, il vou-
lut que ces Ambaſſadeurs deman-
daſſent vingt filles de qualité pour
oſtages, & vingt ieunes enfans de
condition, iuſques à l'entiere con-
cluſion de la paix; ne voulant point
abſolument ni rendre le Ianicule,
ni retirer ſon armée ſans cette con-
dition là. Lucilius & Telane eſtant
bien inſtruits de ce qu'ils auoient

à faire, partirent avec Mutius, qui dans son cœur auoit vne ioye tout à fait grande de voir que son dessein auoit si heureusement reussi, & de ce que son mensonge auoit autant seruy à deliurer Rome, que sa valeur; car il n'estoit pas vray qu'il y eust trois cens Romains qui eussent iuré la perte de Porsenna, & il n'auoit parlé de cette sorte que pour obliger ce Prince à leuer le siege. Pour Aronce il auoit tant de ioye de pouuoir esperer de voir la paix, qu'il ne pouuoit s'empescher de s'en aller entretenir avec la Princesse des Leontins, & la genereuse Melinthe. Il eut mesme la satisfaction de pouuoir renuoyer à Rome ce vieillard que Galerite luy auoit promis de faire deliurer, & que Plotine souhaitoit si ardemment de voir, afin d'apprendre sa naissance, qu'elle ignoroit alors.

De sorte qu'Aronce afin de se servir de cette favorable occasion pour donner de ses nouvelles à Clelie, luy escriuit par Telane, & à Artemidore, à Herminius, à Octave, & à plusieurs de ses Amis, pour les obliger à trauailler à la paix. Lors que Lucilius & Telane s'approcherent des murailles, & que le peuple vit qu'ils venoient avec des palmes à la main, pour tesmoigner qu'ils apportoit des propositions de paix, il ietta des cris de ioye, il fut à la porte par où ils deuoient entrer avec precipitation, & témoigna tant d'empressement de sçauoir ce qu'ils auoient à dire, qu'il fut aisé de iuger qu'ils seroient favorablement écoutez. Aussi furent-ils conduits à l'instant mesme deuant le Senat à qui Lucilius presenta Mutius, en suite de quoy racontant en peu de paroles ce qui s'estoit

passé, & exagerant avec adresse la generosité de Porfenna, qui estoit capable non seulement de donner la vie & la liberté à vn homme qui auoit voulu luy donner la mort, mais encore d'enuoyer offrir la paix lors qu'il pouuoit esperer vn heureux succez de la guerre, il disposa adroitement l'esprit des Senateurs à écouter les propositions qu'il auoit à faire. Il fut pourtant arresté dès le premier article, qui parloit du reestablissement de Tarquin, & le Senat tout d'une voix dit que la mort estant preferable à la seruitude, il n'y auoit point de paix à esperer si elle ne se pouuoit faire sans cela. Comme Lucilius auoit vn ordre de n'insister pas sur cet article, il dit suiuant ses instructions, que du moins il falloit rendre aux Tarquins ce qui leur appartenoit, comme à de simples ci-

royens; de sorte que cette modification leur ayant adoucy l'esprit, ils accorderent qu'on leur rendroit ce qui se pourroit encore trouuer qui leur eust appartenu, non pas comme la iustice le voulant ainsi, mais seulement en consideration de ce que Porsenna leur rendoit Mutius. En suite Lucilius demanda qu'on restituast à Porsenna vne petite estenduë de Pays qu'on auoit vsurpée sur son Estat, qu'on luy donnast vingt filles de qualité en ostage, & vingt ieunes garçons de condition, & qu'aussi tost il retireroit ses troupes du Ianicule, ouueroit les passages, rendroit le fleuue libre, & feroit cesser tous actes d'hostilité, sans se mesler plus des affaires de Tarquin. A peine Lucilius se fut-il retiré, après auoir acheué d'expliquer les pretentions de son Maistre, que tous ceux

qui composoient le Senat n'ayant qu'un avis, dirent qu'ils ne trouvoient point de difficulté à accorder à Porfenna ce qu'il demandoit. Il y en eut pourtant quelques-uns qui voulurent insister sur l'article des ostages, mais comme Publicola voyoit de quelle importance estoit la paix, & qu'il connoissoit bien que ceux qui parloient ainsi, deuoient auoir quelque inclination secreete pour Tarquin, parce que n'ayant point d'enfans, ils n'auoient nul interest à cét article, il s'opposa à leur sentiment; de sorte que prenant la parole, non, non, dit-il avec precipitation, il ne faut pas insister sur vne chose iuste, car enfin il est equitable que Porfenna rendant le Ianicule deuant l'entiere execution du traité qu'on doit faire, ait des ostages pour sa seureté; & il ne faut pas craindre qu'un Prince

Prince qui renuoye vn ennemy qu'il pouuoit garder avec iustice, retienne des ostages qu'il ne pourroit garder sans violer la foy publique. Mais comment pretend-on, reprit brusquement vn de ces Senateurs qui estoient de contraire aduis, qu'on choisisse ces vingt filles de qualité? Pour tesmoigner au public, reprit Publicola, que ie ne pretens pas excepter ma fille de la regle generale, & que tout ce qui est à moy est à la Republique, mon auis est qu'on fasse ce choix par l'ordre du fort sans aucun artifice, & que generalement tous les noms des ieunes garçons de qualité soient dans vn vase, & ceux de toutes les filles de condition dans vn autre; & qu'au milieu du Temple de Ianus, qui doit estre fermé dés que ces ostages auront esté liurez, vn ieune enfant tire vingt de ces bil-

lets, que l'on aura bien meslez auparavant, & qu'après cela sans contestation aucune, celles dont les noms se trouueront dans ces vingt billets, soient enuoyées à Porsenna. L'avis de Publicola ayant esté trouué iuste, & genereux tout ensemble, ceux qui auoient voulu apporter quelque obstacle à la paix, n'oserent plus resister. Mais avant que de se separer, le Senat resolut de donner à Mutius, la mesme Prairie dans laquelle il auoit fait cette grande action de souffrir le feu avec tant de constance. Et en effet on nomma depuis ce coin de terre les prez Mutiens, & on l'appella Mutius Sceuola, à cause de sa main brulée. Après que cette deliberation eut esté prise, on la fit sçauoir à Lucilius & à Telane, qui ne purent pourtant s'en retourner que le iour suiuant, parce que

le Senat ne voulut pas absolument conclure la chose sans les suffrages du peuple. Il est vray qu'il estoit aisé de iuger qu'il approuveroit la deliberation qu'on auoit faite, car il souffroit encore beaucoup davantage que les gens de qualité. Au sortir du Senat Telane rendit les lettres d'Aronce à Clelie, & à tous ceux à qui il escriuoit; il voulut aussi mener ce vieillard qui l'auoit accompagné à Plotine, mais il le pria de le laisser chez Clelius. Cependant Telane voulut du moins faire sçauoir à cette belle fille, dont il estoit tousiours amoureux, qu'Aronce auoit tenu la parole qu'il auoit donnée; c'est pourquoy il fut chez elle, où il trouua bonne compagnie, car Valerie, Berelise, Clidamire, Anacreon, Amilcar, Herminius, Acrise, & Spurius y estoient. Octaue & Horace y estoient aussi,

& comme l'action de Mutius & la paix estoient deux choses fort nouvelles, & fort importantes, on ne parloit que de cela dans toutes les compagnies, chacun exagerant ou affoiblissant, le merite de l'action de Mutius selon son sens, ou selon son inclination. Comme Telane estoit estimé de tout le monde, on le receut avec ioye, on luy demanda des nouvelles d'Aronce, on le remercia de la paix comme s'il l'eust faite, & on luy fit mille caresses. Pour moy, dit agreablement Plotine, ie croy que Berelise, Clidamire & moy, voyons encore Telane avec plus de ioye que Valerie, car comme elles ne sont pas de Rome, & que ie ne croy pas estre Romaine, quoy que ie ne sçache pas encore precisément qui ie suis, nous n'apprehendons pas comme elle d'aller en ostage au Camp de Por-

fenna. Ce que vous ne craignez pas, reprit Telane, est ce qui m'afflige, car i'aurois assez de ioye que vous pussiez estre en vn lieu où ie pourrois vous rendre quelque seruice. Il est vray, dit Valerie, d'un air assez melancolique, que la ioye que i'ay de la paix n'est pas tout à fait pure, & que la crainte que le sort ne tombe sur moy m'inquiete assez. Aduoüez le vray, luy dit Berelise tout bas, ce n'est pas cela seulement qui cause la tristesse qui paroist dans vos yeux, & confessez moy que la peur que vous auez que l'action de Mutius, qui donne la paix à Rome, ne fasse changer de sentimens à Publicola, & ne nuise à Herminius, vous donne de l'inquietude. Il est vray, repliqua Valerie en rougissant, que mon pere est si accoustumé de sacrifier toutes choses au bien public, que ie ne puis m'em-

pescher de craindre d'estre vne des victimes de la paix. Cependant que Berelise & Valerie parloient bas, Plotine ne pouuant s'empescher de parler en raillant, des choses les plus serieuses; pour moy, disoit-elle, ie vous aduoüe que i'ay presentement la plus grande inquietude du monde de sçauoir qui estoit de ces trois cens qu'on dit que Mutius a assuré qui auoient coniuré de tuer Porfenna. Ie sçay bien du moins que ie n'en suis pas, reprit Herminius, ie serois mesme bien marry d'en estre soupçonné, adiousta Horace. Ie suis de vostre sentiment, poursuuiuit Octaue. Comme Anacreon & moy, dit alors Amilcar, ne sommes pas nez à Rome, nous n'auons nulle part à cela, puis que Mutius a dit qu'il y auoit trois cens ieunes Romains qui auoient conspiré contre la vie de Porfenna.

Pour ce qui me regarde, dit Spurius, comme Mutius & moy ne sommes plus dans la mesme confiance que nous auons esté autrefois, on ne peut pas croire qu'il m'ait communiqué son dessein, & pour moy, adiousta Acrise, i'ay plusieurs raisons qui font qu'on ne m'en peut accuser, car premiere-ment ie ne suis pas né dans Rome, secondement.... Eh de grace! (interrompit Plotine en riant, sçachant cōbien Acrise aimoit à parler) arrêtez vous là, car ie ne hais rien davantage que ces gens qui dans vne grande compagnie, où tout le monde a droit de dire quelque chose, commencent de parler par premiere-ment, & qui continuent par secondement & troisiemement, & ie meurs tousiours de peur qu'ils n'ail- lent iusques à pouuoir dire centies- mement. Toute la compagnie ayant

ry de la maniere dont Plotine auoit interrompu Acrise, il en fut vn peu interdit, & fut pourtant contraint d'entendre raillerie malgré luy, de peur de facher Plotine, dont il estoit tousiours amoureux. Cependant cette belle fille pour ne luy donner pas loisir de se facher, changea de discours, & regardant tous ceux qui auoient parlé; mais de la façon dont vous parlez tous, reprit-elle, on diroit qu'on vous feroit vne iniure de vous accuser d'estre de ces trois cens coniurateurs. Pour vous épargner la peine d'en chercher vn si grand nombre, dit alors Telane, ie vous assureray que ie croy que Mutius estoit seul, & qu'il s'est seruy de ce menfonge pour porter Porfenna à ce qu'il desiroit. car en venant icy il a dit certaines choses qui ne me permettent point du tout d'en douter. Si cela est ainsi,

reprit Plotine, ie croy que cette heureuse auanture doit reconcilier le menfonge avec Herminius. Au contraire, repliqua-t'il, ie le haïray encore dauantage; car bien que ie fois fort zelé pour ma Patrie, ie vous confesse que ie n'aimerois pas à la deliurer par vn menfongé, ni par vn assassinat, & si i'auois à choisir de l'action d'Horace ou de celle de Mutius, ie ne hesiterois pas vn moment, quoy que le succez de la derniere soit encore plus considerable que celuy de l'autre. Mais afin qu'on ne pense pas que ie parle comme vn Riual ou comme vn enuieux, ie loüeray Mutius de la constance avec laquelle il a suporté l'ardeur de ce brasier qui luy a brulé la main, & du courage qu'il a eu d'entreprendre vne chose où vray-semblablement il deuoit perir, mais pour le menfonge, & pour l'assassinat, ie

vous confesse ingenuement, que ie ne puis y trouuer rien qui ne choque mon inclination. Car selon moy pour faire qu'une action soit toute heroïque, il faut non seulement que le motif en soit iuste, mais encore que les moyens en soient nobles & innocens. En effet, adiousta Valerie, donnez à l'action de Mutius vne cause indifferente, il fera le plus criminel de tous les hommes, & le plus inconsideré; & on ne pourra le louer que d'une temerité heureuse. Si vous parliez presentement comme cela dans la place du Capitole, reprit Plotine, le peuple vous regarderoit comme vne ennemie de Rome. Valerie a pourtant raison, reprit Octaue, mais après tout, dit Amilcar, il est bon qu'il y ait des Heros de toutes sortes, c'est à dire de peu scrupuleux, de temeraires, & de

menteurs ; car enfin sans Mutius vous n'aurez point la paix ; ainsi ie conclus qu'on mette le mensonge dont il s'est seruy, au rang de ces mensonges innocens dont nous auons tant parlé icy vn iour. Ce fera bien assez de le mettre au rang des mensonges heureux, repliqua Herminius En verité, dit alors Plotine, ie n'apperçoy bien qu'il n'y a presque point de plaisirs quelques grands qu'ils soient, qui ne soient meslez de quelque douleur. En effet la paix qui est vn si grand bien, me va peut-estre causer plusieurs deplaisirs, car à mon aduis Berelise, Clidamire, & Anacreon, s'en iront bien tost, & puis à n'en mentir pas, ie crains estrangement que le sort qui doit choisir ces vingt filles de qualité qui doiuent estre données en ostage, ne m'aille oster cruellement toutes celles que i'aime

le mieux. Comme Plotine acheuoit de parler, Clelie entra, qui alloit chercher Valerie chez Plotine. Vn moment après Cefonie amena Clelius dans la chambre de Plotine, avec ce mesme vieillard qu'elle auoit desia veu vne fois, & qui luy deuoit apprendre sa veritable naissance. Dés qu'elle le vit elle changea de couleur, par la crainte qu'elle eut d'estre moins qu'elle n'auoit pensé. Il est vray qu'elle ne fut pas long-temps dans cette incertitude, car Clelius au milieu de cette compagnie l'embrassa fort tendrement, & prenant la parole, en la presentant à Horace. Vous sçauiez genereux Horace, luy dit-il, que ie vous ay parlé comme vn homme qui a resolu de vour donner sa fille à la fin de la guerre, mais en attendant que ie vous tienne ma parole, il faut que ie vous donne vne sœur,

qui assurément est digne de cette qualité. Receuez donc Plotine comme vn frere genereux la doit recevoir ; mais après cela , adiousta-t'il en se tournant vers Clelie , il faut que ie donne encore vne sœur à ma fille aussi bien qu'à Horace, c'est pourquoy , poursuiuit il en adressant la parole à Clelie, embrassez Plotine comme vne personne qui vous est vnue par le sang ; & vous Octaue, adiousta-t'il , faites la mesme chose que Clelie. Le discours de Clelius surprit d'une telle sorte toute la compagnie, & principalement Clelie, Horace, Octaue, & Plotine, qu'ils se regardoient sans se pouuoir parler, & sans mesme se faire l'vn à l'autre les ciuilités que cette reconnoissance demandoit d'eux. Mais à la fin Plotine prenant la parole, en parlant à Clelius, il vous est si peu

auantageux, Seigneur, luy dit-elle, de donner vne sœur à Clelie telle que moy, que ie ne doute point que vous ne foyez mon pere puis que vous le dites; mais ie vous aduoüe que ie ne comprend pas comment ie puis estre sœur d'Horace & de Clelie tout ensemble. Puis que c'est vne chose qui doit estre publique, reprit Clelius, il vaut autant commencer de la publier deuant vne compagnie comme celle cy. Pour moy, dit Horace, i'ay vne si grande impatience de sçauoir de quelle façon i'ay l'auantage d'estre frere de Plotine, & frere d'vne fille de Clelius, & d'vne sœur de Clelie, que vous ne pouuez m'obliger plus sensiblement qu'en me disant ce que ie meurs d'enuie d'apprendre. Sçachez donc, reprit Clelius, que vous estes fils d'vne femme d'un tres-grand esprit, & d'vne

tres-grande vertu, pour qui i'ay eu presque dès l'enfance, la plus respectueuse affection qui fut iamais, & de qui ie conserue la memoire avec beaucoup de tendresse. Vous sçauiez qu'elle perdit son mary pendant son exil, que i'estois exilé aussi bien qu'elle, car ie l'ay esté trois fois en ma vie par le cruel Tarquin. Pendant cét exil ie fus encore plus charmé de sa constance, que ie ne l'auois esté de sa beauté; & comme la melancolie auoit rendu sa fanté aîsez foible, elle auoit peur de vous laisser sans appuy. De sorte que cette consideration plustost que celle de l'affection que i'auois pour elle, l'obligea de m'épouser secretement, comme vous le pouuez sçauoir d'un vieux Sacrificateur qui vit encore, qui est presentement icy parmy les Saliens, car vous n'estiez pas alors aupres d'elle. Ce qui nous obligea à ca-

cher nostre mariage, fut que si Tarquin l'eust sceu, il nous eust esté impossible d'esperer iamais de reuenir à Rome, parce que nous haïssant separement, il nous eust encore hais dauantage s'il eust sceu que nos interests estoient vnis. Pendant ce mariage secret, & pendant que nous estions à Ardée; Plotine vint au monde, & nous cachasmes sa naissance. Cependant sa mere & la vostre mourut huit iours après, & ce sage vieillard que vous voyez estant nostre Amy particulier, prit soin de Plotine, qu'il fit quelque temps après passer pour sa fille, avec assez de facilité, parce qu'en ayant vne à peu près de mesme âge, qui mourut aux champs, il en cacha la mort, & supposa Plotine à sa place, sans que i'en sceusse rien, parce que ie n'estois plus en ce lieu là. Vostre mere en mourrant escri-

uit de sa main qu'elle laissoit vne fille, & m'obligea de donner cét escrit à la grande Vestale, qui mourut il y a quelques iours, dont elle estoit Amie particuliere, afin qu'il demeurast entre ses mains vne preuue indubitable de la naissance de Plotine. Aussi tost après ie fus obligé de partir d'Ardée, ie reuins à Rome, où pour l'interest de mes affaires i'espousay Sulpicie; depuis cela vous sçauiez que ie fus obligé de m'enfuir, & d'aller chercher vn azile à Carthage. En partant i'escruius à cét Amy que i'auois à Ardée, mais ie n'en eus point de réponce, à mon retour ie m'informay de luy, & l'on m'apprit que l'on ne sçauoit ce qu'il estoit deuenu depuis la guerre que Tarquin auoit eüe contre les Thoscans. Je sceus bien qu'il auoit laissé vne fille, mais comme ç'auoit esté despuis mon dé

part que la sienne estoit morte, ie ne pensay pas que ce fust la mienne. Cependant les Dieux ont voulu que ce sage vieillard que vous voyez, après auoir esté d'abord prisonnier de guerre, ait esté depuis prisonnier d'estat, durant vn tres-grand nombre d'années, sans qu'on sceust où il estoit, & ces memes Dieux ont aussi permis que par le moyen d'Aronce il ait sceu de mes nouvelles, qu'il soit venu icy la premiere fois avec ce Prince, & qu'il ait à la fin esté deliuré par luy, pour venir obliger la sage Octaue qui est aujourd'huy la premiere des Vestales, de faire chercher cét escrit qui auoit esté confié à celle qui l'a precedée, & qui en mourant vouloit assurement parler de Plotine, lors qu'elle commença de dire vne chose qu'elle n'acheua point, comme tout le monde l'a sceu. Ainsi il est hors de doute que Plotine

est vostre sœur ; vous connoissez
l'écriture de vostre mere , car
vous devez auoir beaucoup de cho-
ses escrites de sa main. Personne
n'ignore la condition & la vertu
de celuy qui a esleué Plotine , &
vous estes à mon auis assez persua-
dé de ma probité , pour ne douter
pas de ce que ie dis. Cependant ie
vous declare que ie ne pretens pas
que Plotine diminuë vostre bien,
ie me charge de son establissement,
& ce sage vieillard que vous voyez,
ne voulant pas absolument cesser
d'estre son pere , m'a dit qu'il luy
donne tout ce qu'il a. Clelius dit
cela d'un air qui ne permet à per-
sonne de douter de ce qu'il disoit,
& puis Horace estoit si satisfait de
voir qu'il auoit vne sœur qui pou-
uoit le seruir auprès de Clelie, qu'il
estoit tout disposé à croire qu'il e-
stoit son frere. Plotine estoit aussi

fort aise de voir qu'elle estoit Romaine, fille de Clelius, & sœur d'Octaue & de Clelie. Ce n'est pas dit-elle en souriant, que ie n'eusse bien voulu ne sçauoir cela que dans quatre iours, afin que mon nom n'eust pas esté mis parmy ceux qu'on doit tirer au sort, pour donner des ostages à Porfenna. La chose n'est plus en cét estat, ma fille, reprit Clelius, & il vous importe au contraire qu'il y soit; mais i'espere que les Dieux vous exempteront de cette peine, aussi bien que Clelie, que ie souhaite fort qui ne soit pas du nombre des ostages. Après cela Octaue fit vn compliment à Plotine, Clelie fit la mesme chose, & toute la compagnie enfin se réjouïit avec elle de sa reconnoissance. Amilcar en particulier luy dit mille choses agreables, pendant que Clelius & ce vieillard d'Ardée

tirant Horace à part , luy firent voir la lettre de sa mere à la grande Vestale , & luy éclaircirent si bien la chose , qu'il ne pouuoit pas douter d'une verité qui luy estoit si auantageuse. En effet il ne douta plus du tout alors qu'il n'eust sujet de redoubler ses esperances. La fin de la guerre estoit proche, il scauoit bien que Porfenna n'auoit pas changé de sentimens pour l'amour d'Aronce ; il apprenoit que Clelius estoit desia son beau-pere , qu'il auoit vne sœur qui estoit Amie particuliere de Clelie , & qui deuenoit sœur de cette belle fille aussi bien que de luy. Horace abandonnant donc son cœur à la ioye , la témoigna & par ses actions , & par ses paroles Pour Clelie quoy qu'elle aimast fort Plotine , elle eut vne secreete douleur de cette auanture ; parce qu'elle vit Horace auoir encore

plus de puissance dans l'esprit de Clelius, & qu'elle apprehenda que scachant qu'elle estoit sœur d'Horace, elle ne se rangeast de son party. Cette aimable fille n'en vfa pourtant pas ainsi, au contraire ayant remarqué dans les yeux de Clelie, vne partie de ses sentimens, elle la separa adroitement du reste de la compagnie, & l'embrassant avec tendresse, de grace ma chere sœur, luy dit-elle tout bas, n'allez pas me regarder froidement comme vne sœur d'Horace, qui voudroit prendre ses interets contre vous, car ie vous declare qu'en deuenant sa sœur, ie ne cesse pas d'estre Amie d'Aronce, & que ie ne me feruiray du droit que la nature me donne de luy parler librement, que pour luy dire que puis qu'il ne peut estre aimé de vous, il ne doit pas chercher son bonheur au preiudice du

vostre ; & ie m'engage mesme à dire à mon pere tout ce que vous n'oseriez luy dire. Mais après cela aimez moy comme auparauant, & mesme s'il se peut vn peu dauantage. I'auois desia tant d'amitié pour vous, repliqua Clelie, qu'il me seroit difficile de l'augmenter, mais après ce que vous venez de me dire, ie vous assure ma chere sœur, que si ie ne puis augmenter mon affection, i'augmenteray mon estime, & que ie vous seruiray auprès de Sulpicie, aussi ardemment que vous me seruirez auprès d'Horace. Comme Clelie acheuoit ses paroles, Horace s'approcha de ces deux belles filles ; & prenant la parole, en regardant Plotine, & bien ma chere sœur, luy dit-il, ne m'aidez vous pas à vaincre l'opiniastre fermeté de Clelie ; non mon frere, luy dit-elle, mais pour vous donner vn

conseil d'une bonne sœur, ie vous
conseilleray d'essayer de vous vain-
cre vous mesme. Elle en eust dit
dauantage, mais Amilcar s'imagi-
nant bien qu'il feroit plaisir à Cle-
lie, & à Plotine, de se mesler à la
conuersation d'Horace, s'approcha,
& Anacreon aussi, pendant que
Clelius acheuoit d'éclaircir à Ce-
sonie, à Berelise, & à Clidamire,
l'auanture qu'il venoit de dire. De
forte que Plotine n'ayant pas chan-
gé d'humeur, en changeant de con-
dirion, s'urrit après auoir resué vn
moment, & prenant la parole, en
regardant Clelie; ie uous assure,
luy dit-elle, que i'aquiers aujour-
d'huy vn auantage sur vous, que
ie crains fort qui ne me soit defa-
uantageux auprès d'Amilcar; car
enfin dans le mesme temps que ie
sçay que ie suis vostre sœur aînée,
puis que ie suis d'un premier maria-

ge, i'apprens aussi que i'ay pour le moins quatre ou cinq ans plus que ie ne pensois auoir. En effet mon miroir m'assuroit, & il ne s'en falloit guerre que ie ne le creusse, que ie n'auois pas plus de dix-neuf ans, cependant ie conçois par ce que vient de dire Clelius, que i'en ay vingt quatre. Ha aimable Plotine! reprit Amilcar, vous n'en aurez iamais pour moy que dix-sept, car tant qu'une femme me plaist ie la trouue ieune. Et au contraire, ie connois des filles de quinze ans, qui selon mes sentimens, ont plus d'un siecle, parce qu'elles ne me plaisent pas. Et puis à dire les choses comme elles sont, vingt quatre ans est bien souuent l'âge de la beauté parfaite, & où l'on peut le plus ordinairement trouuer la beauté & la raison ensemble, car pour l'ordinaire quand la raison vient,

la beauté s'en va. Cependant il est certain que ces deux choses là sont tout à fait bien ensemble. Mais après tout, il n'y a point de regle generale, car il y a des femmes qui sont plus belles au milieu de leur vie, qu'en leur premiere ieunesse; il y en a aussi qui sont plus folles à la fin de leurs iours, qu'au commencement de leur vie; & il y en a d'autres en qui la raison se trouue dès l'enfance. Pour moy, dit Plotine en riant, ie suis de celles là, & ie ne me souuiens point de m'estre veuë sans raison; car dès ma plus tendre ieunesse i'ay connu que quelque iour ie ne ferois plus ieune. Je connois plus de cent femmes, dit Amilcar, qui n'en font pas autant que vous. Vous avez raison, reprit-elle, mais ie m'estonne que toutes les belles ne preuoyent pas la fin de leur beauté. Cependant i'en con-

nois aussi bien que vous qui croyent qu'elles n'auront toute leur vie que dix-huit ans; il est neantmoins assez aise de iuger que le temps passe bien vilte. En effet il me semble qu'il n'y a qu'un moment que i'estois enfant; de sorte que si ie veux regarder l'auenir de la mesme maniere que ie regarde le passé, ie verray que dans peu de temps ie ne seray plus ieune. Croyez moy, aimable Plotine, dit Amilcar, le passé & l'auenir ne se regardent pas également. Mais comment ce que vous dites se peut-il faire, repliqua Plotine? Cela vient, reprit Amilcar, de ce que l'on voit clairement les choses passées, & qu'il y a vne si grande obscurité dans l'auenir, que l'imagination ne pouuant la percer, se trompe, & croit que ce qu'elle ne voit pas est fort éloigné, si bien que comme on aime toujours à se

tromper à son auantage, on voit la vieilleſſe ſi loin, & on ſe flatte ſi doucement, qu'on ne craint pas meſme les choſes qui doiuent indubitablement arriuer. Ce qui m'a encore perſuadée, reprit Plotine, que i'ay eu de la raiſon de bonne heure, c'eſt que dès ma premiere ieuneſſe ie haiſſois fort la douleur, & i'aimois fort tout ce qui me pouoit plaire. Ce ſentiment là eſt ſi naturel, reprit Clelie, que ie ne croy pas que vous en deuiiez tirer vanité, & ie penſe au contraire que l'vſage de la raiſon eſt bien ſouuent de ſ'accouſtumer à la douleur, & de refuſer les choſes agreables. Si ce que vous dites eſt vray, repliqua Plotine, ie ne ſeray de ma vie ſage, car ie ne puis guere refuſer ce qui me plaiſt, ni m'accouſtumer à ce qui me fache. Après cela Clelius appellat Clelie, il luy dit qu'elle

allast disposer Sulpicie à receuoir
sa sœur, l'assurant qu'il luy auoit
dit la chose deuant que de venir.
Après quoy il pria Cesonie de vou-
loir mener Plotine chez luy; & en
effet cette aimable femme, accom-
pagnée de Berelise, de Clidamire,
& de Plotine, & conduite par Cle-
lius, fut chez Sulpicie, auprès de
qui Clelie estoit desia arriuée. Mais
quoy que Sulpicie respectast fort
son mary, qu'elle estimast infini-
ment Plotine, & que Clelie luy eust
dit la generosité de cette belle fille, il
estoit aisé de connoistre que dans le
fonds de son cœur, elle auoit vn
secret dépit de voir que Clelius a-
uoit autrefois épousé vne personne
qu'elle auoit haïe, & qu'il en auoit
vne fille. Elle receut pourtant fort
ciuilement tout ce que Plotine luy
dit en arriuant chez elle, & cette
entreueuë se passa comme elle se

deuoit passer, entre des personnes d'esprit raisonnable. Cependant celuy qui auoit seruy à la reconnoissance de Plotine demeura aussi chez Clelius, qui pour témoigner plus d'amitié à Horace, prit Plotine par la main, & regardant Clelie, avec vn air d'autorité, c'est à vous presentement, dit-il à Plotine, à travailler au bonheur de vostre frere, & à faire que vostre sœur m'obeisse de bonne grace, dès que la paix sera concludë. Après quoy il laissa ces deux belles filles sans leur donner loisir de répondre. Le lendemain le peuple ayant esté assemblé, il confirma avec mille acclamations la deliberation du Senat. De sorte que Lucilius & Telane, eurent toute la satisfaction qu'ils pouuoient desirer; le peuple ne voulut pas mesme consentir qu'ils retournassent tous deux vers Porfenna. Ainsi

il fut resolu que Lucilius iroit au Camp, & que Telane demeureroit à Rome, pour assister au choix que le sort feroit des ostages. En effet le peuple qui souffroit, ayant impatience de voir selon l'exécution du traité les passages ouuerts, & le Ianicule remis en la puissance des Romains, on fut contraint de se hastier, de peur de quelque sedition. Les Consuls firent auertir tout ce qu'il y auoit de femmes de qualité de conduire leurs filles dans le Temple de Ianus. Les choses estant en cét estat, Horace emporté par sa passion, oubliant tout ce qu'il auoit dit vn iour à Clelie, fut trouuer Clelius, & prenant la parole, Seigneur, luy dit-il, ie viens vous faire vne proposition que ie connois bien qui a quelque chose qui pourra vous déplaire, mais s'agissant de vostre interest, & de celuy

du repos de toute ma vie, vous me devez pardonner. Vous sçavez, adiousta-t'il, que vous m'auez promis Clelie à la fin de la guerre, & que l'on doit tirer au sort pour auoir les ostages que Porfenna demande. Cependant s'il plaist à la fortune de choisir Clelie, elle ne fera de long-temps en vostre puissance, puis qu'on ne restituera pas si tost ce petit pays qu'on doit rendre au Roy d'Etrurie; car outre que semblablables articles ne s'excutent iamais promptement, la politique ne veut pas qu'on fortifie le party de Porfenna, que Tarquin ne soit entierement détaché de luy, c'est pourquoy, Seigneur, pour empescher Clelie d'aller en vn lieu où vous seriez bien marry qu'elle alast, faites qu'elle change de condition, car si ie l'épousois aujour-d'huy, elle ne seroit plus demain exposée

exposée à la rigueur du sort, puis qu'il ne doit y auoir que des filles, & que les femmes n'y seront pas exposées. Je voudrois de tout mon cœur pouuoir faire ce que vous voulez, reprit Clelius, mais ie ne le puis avec honneur, car il paroistroit clairement que ie precipiterois la chose pour n'exposer pas ma fille à pouuoir estre donnée pour ostage, ce qui seroit indigne d'un veritable Romain. Mais comme i'espere que ie ne seray pas assez malheureux pour me voir obligé de la laisser aller entre les mains de Porsenna, ie vous promets de vous la faire espouser dès que le traité de paix sera executé. Mais du reste n'en parlons plus, car ie ne veux pas qu'on puisse me reprocher d'auoir voulu me faire vn priuilege particulier, pour exépter ma fille d'une facheuse auanture où toutes cel-

les de sa condition sont exposées. En effet la chose s'executa exactement le lendemain, & quelques Dames Romaines voulant par generosité tesmoigner qu'elles vouloient tout sacrifier pour leur Patrie, menerent mesme leurs filles à demy malades au Temple de Janus, de peur d'estre soupçonnées de les vouloir dispenser de cette ceremonie. La genereuse Racilia y mena mesme la belle Hermilie sa niece, qui portoit sur le visage toute la douleur qu'elle auoit de la mort de son illustre frere, & de son Amât, & sa douleur se renouuellant encore en cette occasion, parut en ce lieu là d'une maniere si touchante, qu'elle attendrit le cœur de tous ceux qui la virent. Il est vray qu'elle ne fut pas seule qui parut triste, car comme il n'y en auoit pas vne sur qui le sort ne pust tomber, il n'y en auoit aussi pas vne qui n'appre-

hendaſt d'en eſtre, & qui ne trou-
uaſt quelque choſe de dur d'aller
dans vn Camp. Clelie en ſon par-
ticulier apprehendoit aſſez d'eſtre
ſous le pouuoir de Porſenna, Va-
lerie craignoit de s'eſloigner d'Her-
minius, Plotine de quitter Rome
& ſes Amies, & toutes en general
d'aller ſeules entre les mains d'un
Prince ennemy. Mais enfin toutes
ces belles victimes eſtant rangées
au milieu du Temple de Ianus, qui
eſtoit éclairé de cent lampes ma-
gnifiques, la grande Veſtale ſuiuie
de trois de ſes compagnes, vint
pour rendre la ceremonie plus ce-
lebre, & vint avec tant de maieſté,
& de ſi bonne grace, qu'elle atti-
ra les yeux de toute l'aſſemblée. Les
Conſuls ſe mirent au deſſous d'elle
en ce lieu là. Cependant Clelie en-
tre tant de belles perſonnes empor-
ta l'auantage de la beauté; Valerie

quoy que moins belle, ne parut pourtant guere moins aimable; Hermilie malgré son chagrin acheua de gagner le cœur d'Octaue; Colatine parut aussi tres-belle à tous ceux qui la virent, & Plotine avec son air libre, naturel & agreable, & cette aimable fraicheur qu'elle auoit sur le visage, augmenta l'amour d'Amilcar, de Telane, d'Acrife, de Sicinius, & mesme de Damon qui commençoit de sortir. Valerie augmenta aussi la passion d'Herminius, d'Emile, de Spurius, & de Mutius, mais enfin le Sacrificateur ayant pris tous les noms de toutes ces filles de qualité, dont le nombre estoit fort grand, il les mit dans vne grande Urne, & après les auoir meslez, il posa cette Urne au pied de l'Autel; après quoy offrant vn sacrifice d'encens, & de fleurs seulement, la grande Vestale

au nom de toutes ces belles filles, offrit leur bonne volonté aux Dieux, afin que se soumettant toutes aux ordres du sort, toutes eussent part au mérite de cette action, & à la liberté de Rome. Octavie fit cela d'un air si noble qu'elle attira l'admiration de tout le monde. En suite un ieune enfant s'estant approché de cette Urne, où tous ces noms estoient meslez confusement, il en tira vingt l'un après l'autre; le premier fut celuy de Plotine, qui sembla n'estre reconnuë pour Romaine que pour estre donnée en ostage à l'heure mesme. Le second fut celuy d'une sœur de Flauie, le troisieme d'une niece de Spurius qui estoit fort belle; le quatrieme d'Hermilie, qui ne put s'entendre nommer sans auoir les larmes aux yeux; le cinquiesme de Valerie, qui rougit lors qu'elle entendit son

nom; le sixiesme d'une fille du second Consul; le septiesme de Colatine; le huitiesme d'une parente de Salonine, & le neuviemesme d'une niece de Clelius. Après quoy on en tira encore dix. De sorte que n'y en ayant plus qu'un, on croyoit que Clelie n'en seroit pas. Mais enfin le vingtiesme billet ayant esté tiré & ouvert, le nom de Clelie s'y trouua. Clelius en fut tres-faché, mais il cacha pourtant son déplaisir; Horace n'en put pas faire autant, & il parut assez dans ses yeux qu'il estoit au desespoir que Clelie allast au Camp de Porfenna, parce qu'il craignit que sa vertu ne flechist le cœur de ce Roy, ou que si elle ne le flechissoit pas, elle ne fust pas bien traitée. Octaue eut le cœur touché de voir Hermilie aussi affligée qu'elle estoit, aller dans une armée victorieuse, qui luy remet-

troit tousiours dans la memoire la mort de son frere & celle de son Amant. Pour Mutius il ne fut pas trop marry que Valerie allast auprès de Porfenna, de qui il espera d'estre protegé, quoy qu'il eust voulu attenter à sa vie, mais Herminius & Emile en furent si affligez, que leur affliction consola Spurius de la douleur qu'il en eust eue, s'il eust pû ignorer qu'ils en estoient bien marris. Pour Amilcar ne voyant pas dans les yeux de Plotine vne douleur bien forte, & pouvant la voir dans le Camp de Porfenna, aussi bien qu'à Rome, il luy sembla que ce changement de vie luy donneroit vne nouvelle amour, sans estre obligé à changer de Maistresse. Telane fut fort aise de cette auanture, mais pour Acrise, Sincinius & Damon, ils en furent tres-affligez. Pour Clelie elle ne scauoit

au vray quels sentimens elle deuoit auoir, sa modestie naturelle faisoit tousiours qu'elle ne pouuoit pas n'auoir point de douleur d'aller au Camp de Porfenna, mais d'ailleurs ses interests estoient si meslez qu'elle ne pouuoit les bien demesler. Elle n'estoit pas marrie de s'éloigner d'Horace, & elle estoit bien aise de penser qu'elle verroit Aronce; mais elle quittoit Sulpicie, & elle alloit sous la puissance de Porfenna, avec qui elle iugeoit bien que Tarquin ni Sextus n'estoient pas en estat de pouuoir rompre entiere-ment, & qu'elle sçauoit bien n'approuver pas l'amour qu'Aronce auoit pour elle. Ce luy estoit pourtant vne consolation d'auoir pour compagnes, Valerie, Plotine, Hermilie, & Colatine, mais après tout elle estoit fort triste aussi bien que ses Amies; & l'interest public ne put

obtenir autre chose de ces belles filles, que de se contraindre autant qu'elles purent, pour ne paroistre pas fort affligées d'une chose qui seruoit à confirmer la paix. Dès que leurs noms furent tirez, on leur mit vne couronne de fleurs sur la teste, & on les obligea de remercier les Dieux de les auoir choisies pour affermir la liberté de Rome. On tira aussi au fort les noms de ces vingt ieunes enfans de qualité; en suite de quoy chacun s'en retourna chez soy, après qu'on eut resolu d'enuoyer les ostages dès que Lucilius seroit reuenu, & que Porfenna auroit confirmé les articles de paix qu'on luy auoit portez. Cependant toutes ces belles filles se preparerent à partir, & receurent les adieux de leurs Amans, de leurs Amis, ou de leurs Amies. Horace dit à Clelie tout ce que l'amour la

plus forte peut inspirer, & tout ce que la ialousie la plus delicate peut faire penser. Mutius parla à Valérie avec plus de fierté qu'à l'ordinaire, & comme vn homme qui croyoit qu'on ne luy pourroit rien refuser, après auoir donné la paix à Rome. Je sçay bien cruelle Valérie, luy dit-il, que vous regardez ce que i'ay fait pour Rome, comme si ie l'auois fait contre vous, mais peut-estre changerez vous de sentimens durant vostre absence; & cependant vous me permettrez d'esperer que Publicola qui prend plus d'interest que vous au bien de la Republique, me sçaura gré de ce que i'ay fait pour elle, & ne voudra pas que vous me rendiez mal-heureux. Si mon pere vous pouuoit rendre heureux, repliqua-t'elle, sans manquer à sa parole, & sans forcer ma volonté, il le feroit

sans doute, & si ie pouuois moy-
mesme vous empescher d'estre mal-
heureux sans me rendre malheu-
reuse, ie le ferois aussi par recon-
noissance. Mais Mutius vous de-
mandez vne chose absolument im-
possible; ne conseruez donc point
d'esperance mal fondée dans vostre
cœur; Herminius est le seul hom-
me du monde que ie puis aimer, &
si ie pouuois n'estre pas à luy, il
faudroit encore que ie fusse à Emi-
le, & non pas à vous. Ha cruelle
Valerie! s'escria Mutius, voyez de
quoy est capable l'Amant que vous
méprisez, & apprehendez qu'il ne
fasse contre ses propres ennemis,
ce qu'il a fait contre les ennemis
de Rome. Comme vous pretendez
auoir fait vne belle action, reprit-
elle, il y a lieu de croire que vous
ne voudrez pas la ternir par vne
mauuaise, & puis à n'en mentir

pas, les menaces ne me font iamais de peur. Vous pretendez donc, adiousta-t'il, que ie meure desesperé, & que ie brusle eternellement sans esperer vn moment de relasche dans mes tourmens. Vous sçauiez supporter le feu si constamment, repliqua-t'elle avec vne raillerie vn peu trop piquante, que vous estes moins à pleindre qu'vn autre. Mais enfin, Mutius, adiousta-t'elle, contentez vous de la gloire que vous avez acquise, ne la ternissez pas par des menaces iniustes, songez plustost à l'ambition qu'à l'amour, & me laissez en repos. Je vous obeïray, Madame, luy dit il, & si ie ne puis vous laisser en repos comme vous le desirez, i'employeray contre moy la mesme main qui vient de donner la paix à Rome. Comme ie suis tousiours également équitable, reprit Valerie, ie m'oppose à ce

que vous voulez faire contre vous, comme ie m'opposerois à ce que vous voudriez entreprendre contre vn autre. Non, non, Madame, luy dit-il, ie n'ay que faire de vostre equité, & quand la fantaisie m'en prendra, ie sçauray bien me faire rendre iustice. Voila de quelle sorte Mutius se separa de Valerie. Emile luy dit adieu comme vn Amant malheureux, qui n'osoit rien esperer, & Spurius comme vn homme qui ne desesperoit iamais de rien, & qui croyoit tousiours que ce qu'on ne pouuoit obtenir par merite, ou par force, on pouuoit l'auoir par artifice. Pour Octaue son adieu avec Hermilie fut vne declaration d'amour si respectueuse, que cette belle fille toute triste qu'elle estoit ne put s'en offencer. Sici-nius suiuant son humeur dit adieu à Plotine en deux mots; Acri-

se au contraire employa mille paroles pour ne luy dire presque rien; Damon qui auoit sceu le Dialogue qu'Amilcar auoit fait pendant qu'il estoit malade, luy parla plus contre son Riual, qu'il ne luy parla de sa passion, & pour Amilcar il luy dit qu'il la conduiroit au Camp, & qu'il aideroit à Telane à l'escorter. Colatine n'auoit point d'Amant à Rome qu'elle regretast; ainsi elle n'eut peine à dire adieu qu'à ses Amis, & à ses Amies. Berelise & Clidamire furent bien affligées de voir partir toutes ces belles personnes, & Anacreon le fut autant qu'elles. Il est vray que le mal d'Artemidore les occupoit fort, elles l'alloient voir tres-souuent, tantost avec Sulpicie, Racilia, ou Cefonie, mais avec cét auantage pour Berelise, qu'Artemidore malgré son mal, remarquoit bien que

cette belle fille auoit plus d'inquiétude de ses blessures, que Clidamire. Il la voyoit plus triste & plus negligée, & voyoit en l'autre plus d'artifice que de veritable douleur. Cependant Lucilius estant reuenu, & ayant rapporté la confirmation de la paix, malgré tout ce que Tarquin & Tullie auoient negocié pour la rompre, on se prepara à enuoyer les ostages. En effet le lendemain au matin tous ces ieunes enfans qui deuoient estre donnez en ostages, furent conduits au pied du Ianicule, & ces vingt belles filles conduites par leurs parents, furent remises entre les mains des Consuls, qui leur ayant fait preparer des chariots magnifiques, les firent escorter par Horace, Octaue, & Herminius, avec des troupes qui les accompagnerent iusques au pied du Ianicule. Mais en y al

lant tout le peuple fit mille vœux pour leur conseruation. En ce lieu là Lucilius & Telane enuoyerent les ordres de Porfenna pour faire ouurir les passages, & firent la mesme chose à ceux qui gardoiēt le Ianicule. Après quoy les troupes qui gardoient ce poste commencerent de filer vers le Camp du Roy d'Etrurie, dans le mesme temps que celles qui suiuoient Horace, Octaue, & Herminius, s'emparoiēt du poste que les autres abandonnoient. Ce fut alors que ces vingt ieunes enfans, & ces vingt belles filles, estant mises sous la puissance de Lucilius & de Telane, commencerent de marcher iusques à vn endroit où les troupes de Porfenna qui sortoient du Ianicule faisoient ferme, iusques à ce que ces ostages fussent arriuez. En se separant des Troupes Romaines, Horace s'approcha du chariot où estoit Clelie;

Clelie ; Herminius du mesme où estoit Valerie ; Octaue de celuy où estoit Hermilie, & les autres Amants qui auoient fuiuy, de ceux où estoient celles qu'ils aimoient. Mais pour Amilcar il suiuit Lucilius & Telane, & fut tousiours auprès du chariot de Clelie où estoit Plotine. Cependant comme il falloit assez de temps deuant que les troupes de Porfenna eussent decampé, & que celles de Rome se fussent emparées du poste que les autres quitoient, tous ces chariots où estoient ces filles, estoient arrestez dans vne grande prairie, à la teste de ces troupes, qui se mettoient en bataille à mesure qu'elles descendoient. Ainsi ces belles filles s'entretenoient entr'elles, ou parloient avec Amilcar, qui alloit tantost vers l'vne, & tantost vers l'autre. Elles auoient eu dessein d'estre

assez negligées, mais on leur auoit ordonné au contraire de se parer, afin d'attirer plus de respect, & d'estre plus dignes d'estre presentées au Roy d'Etrurie, auprès de qui on ne doutoit pas que Galerite & la Princesse des Leontins ne fussent quand on les luy presenteroit; de sorte qu'elles n'auoient iamais paru plus belles. Clelie, Valerie, & Plotine estoient dans vn mesme chariot, Hermilie & Colatine dans vn autre, chacune ayant suiuy son inclination. Amilcar estant donc auprès de Clelie, de Valerie, & de Plotine, leur disoit qu'il auoit vn grand auantage d'estre Africain en cette occasion, car enfin leur disoit-il, ie puis vous accompagner par tout, au lieu que si i'estois Romain ie n'oserois vous suiure au iourd'huy, parce que la grauité Romaine ne voudroit pas que i'allasse

dans le Camp ennemy, que les choses ne fussent tout à fait pacifiées. Mais comme ie me fais des priuileges particuliers par tout où ie suis, ie vay hardiment trouuer Porsenna, comme si i'estois ostage. Tout de bon, reprit Plotine, vous l'estes plus que vous ne croyez, car à parler sincerement, toutes les fois que vous donnez vostre cœur à quelque belle, c'est tousiours à condition qu'elle vous le rendra. Ha malicieuse Plotine, s'escria-t'il, si vous estiez aussi long-temps entre les mains de Porsenna, que mon cœur sera entre les vostres, vous ne rentreriez iamais dans Rome. Ie vous assure, luy dit-elle, que quoy que i'espere bien qu'on rendra bien tost à Porsenna ce petit coin de terre qu'on a autrefois vsurpé sur luy, & que par consequent le Traité estant accompli, il nous renuoyera bien

toft à Rome, ie ne voudrois pas iurer que vofre cœur ne fortift de mon pouuoir, deuant que ie forte de celuy de Porfenna. Mais quoy qu'il en foit, dit-elle, ce n'est pas prefentement dequoy il s'agit, & dites moy feulement fi vous connoiffez vn homme à cheual que ie voy qui vient icy, qui a ce me femble l'air fort eftourdy, & qui eft fuiuy de cinq ou fix autres qui ne paroiffent guere plus fages. Clelie & Valerie ayant tourné la tefte de ce costé là, virent que c'estoit l'infame Sextus, qui pouffé par fon inclination, qui l'attiroit tousiours où il y auoit des femmes, venoit insolemment de fon quartier voir qui estoient celles que le fort auoit choisies. Car encore que Tarquin fust fort mécontent de Porfenna, il ne le témoignoit pas, & ne rompoit point tout à fait avec luy, es-

perant tousiours qu'il arriueroit quelque chose qui romproit la paix. Dés que Clelie & Valerie eurent reconnu Sextus, elles firent vn grand cry, & destournerent les yeux. Telle lane qui estoit à la teste des trou- pes, pendant que Lucilius donnoit les ordres par tout, les rassura pour- tant vn peu, iugeant bien que Sex- tus n'estoit pas en pouuoir de rien entreprendre contre elles. De sorte qu'elles se remirent, & se conten- terent de le salüer d'vn air fier, & froid, qui faisoit assez connoistre que s'il n'eust pas esté fils de Roy, elles ne luy auroient pas rendu cet- te ciuilité. Cependant Sextus qui ne confideroit iamais rien que son plaisir, trouua Clelie si belle en ce moment là, que son ancienne passion se reueilla dans son cœur, pour cette belle personne. Il la re- garda avec esmotion, & s'appro-

chant de son chariot avec empressement, il adressa la parole à Amilcar, avec le mesme enioüement qu'il eust pû faire du temps qu'il estoit dans Rome. Je le confesse, Amilcar, luy dit-il, i'auois tort autrefois de soustenir les beautez brunes, contre les beautez blondes, puis qu'il est certain que ie n'ay iamais rien veu, & que ie ne verray iamais rien de si beau que Clelie. Le discours de Sextus faisant souuenir Clelie & Valerie de la pitoyable mort de Lucrece, parce que ç'auoit esté pour soutenir la beauté de cette vertueuse femme, qu'il auoit parlé contre les blondes, elles en rougirent de colere, & Clelie prenant la parole, non, non, Seigneur, luy dit-elle, ne vous donnez pas la peine de me louer, & sçachez qu'il n'y auroit pas vne voye plus seure pour m'obliger à me de-

plaire à moy mesme , que de me faire connoistre que ie vous plairois. C'est pourquoy si vous m'en croyez , esloignez vous d'icy , aussi bien , adiousta-t'elle , ne croy- ie pas que ce soit vn fort grand plaisir pour vous , de voir rendre le Ianicule aux Romains. Quand on vous voit , reprit Sextus , on ne songe guere à ses malheurs. Mais, Seigneur , interrompit Amilcar , ie ne scay si ce n'est point vn nouveau malheur pour vous , que de voir Clelie en l'estat où sont les choses , c'est pourquoy ie pense qu'il seroit bon que vous voulussiez bien la contenter. Allez , Seigneur , allez (interrompit Valerie , qui ne put se retenir) allez cacher vos crimes en quelque lieu si esloigné de Rome , que vous n'y puissiez iamais rencontrer pas vne Amie de Lucrece. Mais en quelque lieu que vous puissiez

aller, souuenez vous qu'il n'y a point de moment, où cent mille personnes ne vous haïssent. Ie me moquerois bien de leur haine, reprit-il sans s'emporter, si i'estois aimé d'une seule. Si vous voulez l'estre de quelqu'un, repliqua Valerie, allez en quelque lieu où l'on ne vous connoisse pas, & où vous changiez toutes vos inclinations, car si vous ne le faites, vous serez chassé de par tout, comme vous l'estes de Rome, & souuenez vous que c'est la plus fidele Amie de Lucrece, qui vous predit aujourd'huy que vous serez toujours aussi malheureux que vous estes criminel. Comme il y a des plaisirs par tout, reprit-il, ie conte l'exil pour rien. Les plaisirs, reprit Plotine, ne sont pas trop pour les exilez. Non pas pour les auares, & les ambitieux, repliqua-t'il, mais

il y en a par tout pour ceux qui les cherchent, & qui les preferent à toutes choses. Pendant que Sextus parloit ainsi, Amilcar fit signe à Telane de l'inquietude que donnoit la presence de ce Prince à ces belles filles; de sorte que pour les en deliurer, il commanda qu'on fist auancer les chariots; car aussi bien precisement dans ce temps là, toutes les troupes du Ianicule estoient arriüées. Ainsi Telane faisant mettre les chariots au milieu d'elles, il fallut que Sextus s'en retournast à son quartier. Mais deuant que de s'esloigner du chariot où estoit Clelie; sçachez, luy dit-il avec vne audace sans égale, que ie ne perds pas l'esperance d'estre heureux, & qu'après auoir perdu Rome pour Lucrece, ie serois encore tout prest de perdre cent Royaumes pour vous si ie les auois. Après cela Lucilius

ayant ioint Telane, tout marcha vers le quartier de Porfenna. Lors que ces belles filles y furent arri- uées, Lucilius fut prendre l'ordre de ce Prince, pour les luy presen- ter; mais Porfenna ayant sceu que Clelie estoit parmy elles, il ne les voulut pas voir, & enuoya cher- cher le Prince son fils, afin qu'il ne les pust entretenir, donnant ordre qu'on les mist dans des Tentés, qu'on les y seruist bien, & qu'on les gardast soigneusement. Cependant Aronce qui auoit esté auerty par Telane, que Clelie estoit parmy les ostages, auoit fait agir la Princesse des Leontins, pour obliger Galeri- te de venir ce iour là au Camp; & il auoit si bien fait prendre garde quand ces chariots arriueroyent, qu'il se trouua iustement à l'endroit où ils firent alte, pendant que Lu- cilius alloit receuoir les ordres de

Porfenna. Il s'estoit paré ce iour là plus qu'à l'ordinaire, quoy qu'il fust en habillement de guerre. Son cheual estoit noir à crins blans, ses plumes estoient blanches, isabelles, noires & bleuës; il auoit vne écharpe des mesmes couleurs, ratachée sur l'espaule avec vn musle de Lion d'or, enrichy de grands diamans. La garde de son espée estoit de mesme, & Aronce enfin estoit de si bonne mine en cét estat là, qu'il attiroit les regards de tout le monde. Aussi fut-il regardé tres-faiblement de Clelie, qui fit bien voir que la veuë de la personne aimée embellit dans le premier instant qu'on la voit après vne absence, car dès que Clelie apperceut Aronce ses yeux en deuinrent plus brillans, son teint en parut plus incarnat, la ioye augmenta la grace de sa bouche, & tous les charmes

de son visage en deuinrent plus inéuitables. Aronce de son costé ne put dans ce moment songer à toutes les suites que pouuoit auoir cette entreueuë, & s'abandonna de telle sorte à la ioye que descendant de cheual, il fut droit à Clelie, qui descendit de son chariot aussi bien que ses compagnes, car elle estoit heureusement en vn endroit où elle le pouuoit commodement, parce qu'il y auoit vn grand & bel arbre fort touffu à dix pas de son chariot. Eh! Madame, luy dit-il, après l'auoir saluée & celles qui la suiuoient, m'est-il permis d'auoir de la ioye de vous voir, en vn lieu où ie ne suis pas le maistre? Cependant en vain me deffendriez vous d'en auoir, car il m'est impossible de vous regarder sans sentir vn plaisir que ie ne vous scaurois exprimer. Celuy que i'ay de

vous reuoir , Seigneur , repliqua Clelie , m'apprend assez qu'on ne dispose pas des premiers sentimens de son cœur, selon que l'estat de sa fortune le voudroit , car bien que ie sois tousiours fort malheureuse, ie suis rauie de vous pouuoir dire que ie suis tousiours la mesme , pourueu que vous ne foyez pas changé. Ha! Madame, ce que vous me dites n'est pas obligant , s'escria Aronce , & vous ne m'estimez pas assez si vous ne vous en repentez point. Après cela Clelie dit à Aronce que Plotine estoit sa sœur, & qu'encore qu'Horace fust son frere, elle estoit tousiours son Amie; de sorte qu'il se fit vne conuersation fort tendre & fort pleine d'esprit entre ces aimables personnes. Comme ils en estoient là, Lucilius vint apporter les ordres de Porfenna; mais si precis,

que par amitié il conseilla au Prince de ne s'y opposer pas, & de n'irriter point le Roy. Cét ordre affligea sensiblement Aronce, Clelie, ses compagnes, & Amilcar qui s'en estoit approché; mais il fallut pourtant obeïr; ainsi Clelie, Valerie & Plotine, rentrèrent dans leur chariot, après qu'Aronce accompagné d'Amilcar, eut dit à l'admirable personne qu'il aimoit, qu'elle ne craignist rien, & qu'il mourroit plustost que de luy manquer de fidélité. Aronce estant monté à cheual, & les chariots commençant de marcher pour conduire ces belles filles aux Tentés qui leur estoient destinées, elles virent paroistre vne troupe de Dames à cheual, qui estoit la plus galante du monde, & qui suiuoit vn magnifique chariot qui alloit fort lentement, dans lequel estoit la Reyne d'Etrurie,

n'ayant auprès d'elle que Melinthe & vne tres-belle & tres-aimable personne nommée Hersilie. Celle qui estoit à la teste de ces Dames, estoit la Princesse des Leontins, son cheual estoit blanc avec vne estoille noire au frond, son habillement estoit d'une estoffe volante argent & bleu, la forme en estoit agreable & auantageuse, elle portoit pendu à vne belle escharpe, qui estoit rattachée avec vn nœud de diamans, vn petit arc d'ebene garny d'or, & vn carquois de mesme orné de pierreries. Ses cheueux frisez à boucles negligées, estoient non-chalamment espars sur ses épaules. Si bien qu'ayant sur la teste vn grand nombre de plumes, dont les couleurs estoient douces & bien assorties, & dont l'ordre irregulier, s'il est permis de parler ainsi, faisoit vne agreable confusion, on

pouuoit dire que iamais cette Princesse n'auoit paru plus belle qu'elle le parut ce iour là. Elle estoit suiuite d'Aurelise, de Terentia, d'Amiclée, & de plusieurs autres Dames bien faites, & galamment habillées. Dés qu'Aronce vit cette belle troupe, après auoir quitté Clelie, il fut au deuant de la Reyne d'Etrurie, & de la Princesse des Leontins, pour leur demander leur protection pour cette belle fille. Cependant les chariots de ces vingt belles Romaines, que le sort auoit choisies pour ostages, ayant pris à droit en tirant vers le Tibre, n'estoient pas si esloignez que Clelie ne pust discerner le magnifique habillement de la Princesse des Leontins, & qu'elle ne vist de quel air respectueux Aronce l'auoit abordée, car il estoit vray que dans l'enuie que ce Prince auoit qu'elle protegeast

protegeast Clelie, il s'approcha
 d'elle avec vn respect extraordinai-
 re. De sorte que Clelie ayant le
 cœur rempli d'une nouvelle ten-
 dresse pour Aronce, qu'elle venoit
 de voir; & touché de la douleur
 que l'ordre rigoureux de Porfenna,
 auoit mis dans son ame, eut l'es-
 prit si troublé, qu'elle ne put s'em-
 pescher de donner des marques de
 son inquietude. Elle changea de
 couleur plusieurs fois, elle eut tou-
 jours la teste tournée du costé qu'e-
 stoit la Princesse des Leontins, tant
 qu'elle la put voir; & elle soupira
 mesme fort tristement. Mais ce qui
 acheua de l'inquieter, fut qu'en a-
 uançant la teste, elle entendit vn
 de ceux qui l'escortoient, qui par-
 lant à vn autre à demy haut, luy
 dit en montrant Aronce, voila
 nostre Prince bien occupé avec sa
 nouvelle Maistresse. Ces paroles fu-

rent à peine entendus par Clelie, que malgré qu'elle en eust, la ialousie s'empara aussi subitement de son cœur, que l'amour s'estoit emparé vne heure auparauant de celui de Sextus. Mais pendant que ce trouble secret s'excitoit dans son ame, Plotine & Valerie raiso- noient sur cét ordre de Porfenna. Elles ne laisserent pourtant pas de s'appercevoir du changement qui estoit arriué dans les beaux yeux de Clelie. Si bien que prenant la parole, d'où vient cette nouvelle tristesse, dit Valerie à cette belle per- sonne, & quel sentiment peut-il vous auoir passé dans l'esprit? Car enfin bien que l'ordre de Porfenna ait quelque chose de rude, apres tout nous sommes deliurées d'une ceremonie assez facheuse, puis que nous ne ferons point presentées à ce Prince. De sorte que ne croyant

pas qu'il ose violer le droit des gens, ni nous maltraiter, ie ne voy pas bien la cause de cette excessiue melancholie qui paroist dans vos yeux. Pour moy, adiousta Plotine, ie suis du sentiment de Valerie, c'est pourquoy si vous m'en croyez ma chere sœur, ne vous abandonnez point au chagrin. Quand on abandonne son cœur à la ialousie, reprit-elle en rougissant, il n'est pas possible de ne l'abandonner point à la douleur. Mais comment pourriez vous estre deuenüe ialouse en si peu de temps, repliqua Plotine? Clelie se voyant pressée par ses Amies, leur dit ce qu'elle auoit entendu, & ce qu'elle auoit remarqué. Mais ne sçauiez vous pas, dit Valerie, qu'Aronce laisse croire qu'il est amoureux de la Princesse des Leontins, afin que Porfenna ne luy parle point d'espouser la fille du

Prince de Cere. Je sçay ce que vous dites, repliqua Clelie, mais ie sçay que la Princesse des Leontins est infiniment charmante, que ie suis malheureuse, & qu'il n'est pas impossible qu'Aronce croyant qu'il ne peut m'espouser, n'ait laissé toucher son cœur à la beauté de cette Princesse; car pour moy ie sens bien que si i'estois homme ie ne pourrois m'empescher de l'aimer. Ha! ma chere sœur, s'escria Plotine, vous ne croyez que vous aimeriez cette Princesse si vous estiez homme, que parce que presentement vous auez vne grande disposition à ne l'aimer pas. Cela veut dire en vn mot, que la ialousie qui veut vous la faire haïr, vous la fait paroistre encore plus aimable qu'elle n'est, quoy qu'elle le soit beaucoup. Mais enfin vous estes iniuste, car après tout ce qu'Aronce a fait

pour vous, vous le soupçonnez trop legerement. Non, non, reprit Valerie, ne blasmez pas tant Clelie, car quand on aime ardemment, & que l'on est malheureuse, il est bien aisé que la ialousie naisse sans sujet, & il n'y a assurement que ceux qui ne sçauent point aimer, qui ne sont pas ialoux legerement. Ces belles filles dirent encore plusieurs choses de cette nature, iusques à ce qu'elles furent arriuées aux Tentes qui leur estoient preparées, où on les receut avec magnificence, & avec respect. En effet Lucilius & Telane firent seruir ces vingt belles filles qui estoient données pour ostages, avec tous les soins imaginables, & n'oublierent rien de tout ce qui leur pouuoit témoigner qu'ils estoient les plus honnestes gens du monde. Mais en mesme temps n'osant pas desobeir

à Porfenna, ils les firent garder soigneusement. Cependant ce Prince s'imaginant qu'il y auoit eu de la fourbe au choix des ostages, & qu'on auoit exprés enuoyé Clelie dans son Camp, dans l'esperance de le flechir, & d'augmenter par sa presence l'amour qu'Aronce auoit pour elle, en auoit l'esprit fort irrité, & contre les Romains, & contre Aronce, qu'il soupçonna d'auoir eu part à la chose. Neantmoins le voyant arriuer avec la Princesse des Leontins, il ne sceut plus qu'en penser. Comme Galerite & cette Princesse auoient l'esprit disposé à seruir Aronce, dès qu'elles furent auprès de Porfenna, elles luy parlerent de la ioye qu'elles auoient de voir la paix si auancée, & luy demanderent pourquoy il n'auoit pas veu les ostages. C'est parce, reprit-il, qu'on a enuoyé par-

my elles la personne du monde qui me hait sans doute le plus. Cependant, adiousta-t'il en regardant Aronce, ie vous deffens absolument de la voir, ni d'auoir nul commerce avec elle. Seigneur, reprit ce Prince affligé, l'ordre que vous auez donné pour faire garder ces belles Romaines, est si precis, que ie n'auray nul merite de vous obeir, mais s'il m'est permis de répondre quelque chose qui soit opposé à vos sentimens, ie vous suppliray de considerer qu'il n'y a rien qui doiuue estre plus sacré que des ostages. I'en tombe d'accord, reprit Porfenna, & c'est pour cela que ie veux qu'on les garde si soigneusement. Aronce iugeant alors que Galerite, & la Princesse des Leontins luy rendroient plus d'office s'il n'y estoit pas, que s'il estoit present, se retira & leur laissa en effet

la liberté de le protéger en protégeant Clelie. Elles n'osèrent pourtant parler à Porfenna de cette belle fille en particulier, mais seulement de toutes ses compagnes & d'elle en general. D'abord le Roy d'Etrurie vouloit que personne ne les vist, mais ces Princesses luy représenterent si fortement que cela feroit vn mauvais bruit dans Rome, & qu'on les croyroit prisonnières, qu'il ceda à leur avis, se contentant seulement d'oster au Prince son fils la liberté de les voir; ainsi il leur dōna à elles mesme la permission de les visiter. Cependant le Prince Titus qui aimoit tousiours passionnement Colatine, fut du quartier de Tarquin à celuy de Porfenna, pour tascher d'auoir la liberté de la voir; Sextus qui estoit redeuenu esperdument amoureux de Clelie, y fut aussi avec le mesme dessein;

& la fiere Tullie qui auoit tousiours dans l'esprit le dessein de nuire à quelqu'un, & de faire seruir toutes choses ou à sa vangeance, ou à son ambition, cherchoit dans son esprit si fertile en inuentions de mechanceté, ce qu'elle pourroit faire pour empescher l'execution de la paix, ou pour tourmenter du moins Clelie. Tarquin en son particulier au milieu de ses malheurs, pensoit encore à Clelie, & aprit avec quelque consolation, qu'Aronce n'auoit pas la liberté de la visiter. Le lendemain que ces belles Romaines furent au Camp de Porfenna, la Reyne d'Etrurie & la Princesse des Leontins les furent voir, mais comme en y allant elles rencontrerent Sextus, elles ne purent l'empescher de les y accompagner, quoy qu'elles luy dissent tout ce qu'elles purent pour cela. Pour le Prince Ti-

tus, il estoit si aimé dans tous les deux partis, qu'elles souffrirent sans peine qu'il fust de cette visite, & comme la curiosité estoit grande de voir ces vingt belles Romaines, ces Princesses furent accompagnées de la genereuse Melinthe, de l'aimable Herfilie, d'Amiclée, d'Aurelise, de Terentia, & de beaucoup d'hommes de qualité. Comme ces belles Romaines auoient esté auerties par Lucilius & par Telane, de la visite qu'elles deuoient receuoir, elles s'estoient parées ce iour là, & Clelie par vn sentiment ialoux, & pour plaire à la Reyne d'Etrurie, n'auoit rien oublié de tout ce qui la pouuoit faire paroistre aimable. Ainsi la seule Hermilie auoit vne negligence qui tesmoignoit bien qu'elle n'auoit pas songé à plaire. Mais comme elle estoit belle, ieune, & propre, elle ne laissoit pas

d'estre fort bien. Aussi peut-on dire qu'on n'a jamais rien veu de plus beau que de voir ces vingt belles filles, aller receuoir à l'entrée de leurs Tentes la Reyne d'Etrurie. Car le sort les auoit si heureusement choisies, qu'il n'y en auoit pas vne qui ne fust du moins tres-agreable. Valerie, Clelie, & Plotine, estant à la teste de cette belle troupe, la premiere comme estant fille du premier Consul, parla au nom de toutes ses compagnes lors qu'elle salua Galerite. Si mes compagnes & moy auions eu la liberté de faire nostre deuoir, Madame, luy dit-elle de fort bonne grace, nous aurions eu l'honneur d'aller saluer vostre Majesté, dés que nous la vismes arriuer au Camp; mais, Madame, comme nous ne disposons pas de nous, vous estes sans doute assez equitable pour ne nous accu-

fer pas de manquer au respect que nous vous deuons. La Reyne d'Etrurie receut fort ciuilement ce que luy dit Valerie, & y répondit de mesme; mais ce fut pourtant presque sans y penser, car la Princesse des Leontins luy ayant d'abord fait remarquer Clelie, elle la regarda avec tant d'admiration, qu'elle ne put s'empescher de donner des marques auantageuses de ce qu'elle en pésoit. En effet dés qu'elle eut acheué de répondre à Valerie, elle se tourna vers la Princesse des Leontins, & prenant la parole, on fait tort à la beauté de Clelie, luy dit-elle, car assurement elle surpasse toutes les loüanges qu'on luy donne, & ie ne croy pas qu'on la puisse iamais assez loüer. A peine Galerite eut-elle dit cela, que tous ceux qui l'accompagnoient voyant qu'il leur estoit permis de dire ce qu'ils pen-

soient ; louèrent si hautement Cle-
lie, qu'elle en rougit, si bien que
la modestie l'embellissant encore,
elle confirma tout le bien qu'on
disoit d'elle. En suite Galerite vou-
lant luy parler, après auoir loué
toutes ces belles filles en general,
la separa des autres, & l'entretint
quelque temps, pendant que la
Princesse des Leontins, Melinthe,
Hersilie, & les autres Dames par-
loient à Valerie, à Plotine, & à ses
compagnes. Pour le Prince Titus il
entretenoit Colatine, qu'il n'auoit
point veüe depuis qu'il estoit sorty
de Rome, & pour Sextus il ne par-
loit à personne, & regardoit Cle-
lie avec tant d'attention, qu'il e-
stoit aisé de voir qu'il n'auoit pas
plus aimé la mal-heureuse Lucrece,
qu'il aimoit alors cette belle fille.
Amilcar qui auoit suiui la Reyne
d'Etrurie, se mesloit à la conuersa-

tion de la Princesse des Leontins, & de Plotine; Telane faisoit la mesme chose; Aurelise & Terentia admiroient ces belles Romaines, & Valerie & ses compagnes leur rendant loüanges pour loüanges, cette premiere conuersation se passa en ciuilitéz reciproques. Cependant Clelie parla si à propos à Galerite, qu'elle fut aussi charmée de son esprit que de sa beauté; elle ne voulut pourtant pas luy parler d'Aronce, mais elle l'assura en general qu'elle la protegeroit en toutes choses, & qu'elle auroit tousiours sujet de se loüier d'elle. Après quoy se tournant vers les autres Romaines, la Princesse des Leontins s'approcha de Clelie, avec l'intention de l'assurer qu'elle la seruiroit de tout son cœur, & de luy rendre conte des sentimens qu'Aronce auoit pour elle. Mais dans ce moment là Sex-

tus s'estant approché d'elle, il luy fut impossible d'executer son dessein; ioint que Clelie luy parut si froide, que cela l'embarassa assez. Elle pensa pourtant vn moment après, que la presence de Sextus cau- soit sa froideur, de sorte qu'espe- rant bien la voir souuent, elle ne s'empressa pas dauantage à l'entre- tenir en particulier. Au contraire croyant qu'elle luy feroit plaisir d'é- loigner Sextus, elle feignit d'auoir quelque chose à dire à ce Prince, & se mit en effet à luy parler bas, & vn moment après la Reyne d'E- trurie s'estant retirée, elle ne put faire autre chose que dire à Clelie qu'elle la reuerroit bien tost. Mais quoy qu'elle dist cela d'vn air fort obligeant, la secreta ialousie que cette belle fille auoit dans l'ame, fit qu'elle luy répondit avec quelque froideur, mais pourtant avec af-

sez de ciuilité. Cependant la Reyne d'Etrurie en s'en retournant ne parla que de la beauté de Clelie, & des charmes de son esprit. Sextus en paroissoit si transporté, qu'il ne pouuoit s'empescher de dire des choses qui faisoient voir qu'il en estoit fort amoureux, & tous ceux qui auoient accompagné Galerite en estoient si satisfaits, que tout le monde la louoit avec empressement. On loua aussi fort ses compagnes, & quoy que les belles n'aient pas trop à louer celles qui portent cette auantageuse qualité, Aurelise, Terentia, & toutes les autres, auoüerent qu'on ne pouuoit rien voir de si beau que Clelie, & qu'après elle, Valerie, Plotine, Hermilie, & Colatine, estoient les plus charmantes personnes du monde. Lors que Galerite arriua à sa Tente, elle aprit que la cruelle Tullie estoit

estoit en conference particuliere avec Porfenna, & elle l'aprit par Aronce qui en auoit de l'inquietude. Elle en eut aussi bien que luy, car elle connoissoit assez de combien d'artifices d'angereux cette personne estoit capable. Mais pour le consoler elle luy parla si auantageusement de Clelie, qu'il en fut en effet en quelque sorte consolé. Vous avez raison Aronce, luy dit Galerite, de preferer Clelie à tout le reste du monde, car ayant de la naissance, de la vertu, de l'esprit, la plus grande beauté qui fut iamais, & de l'inclination pour vous, ie ne trouue rien à desirer pour vostre bonheur, que le consentement de Porfenna. Ha ! Madame, s'escria Aronce, que ce consentement est difficile à obtenir ! Je l'aduouë, reprit Galerite, mais ie suis pourtant persuadée que si le Roy voyoit

Clelie, il seroit plus aisé de le flechir, & c'est pour essayer de l'y faire refoudre, que i'ay dessein de demeurer durant quelques iours au Camp. Aronce remercia Galerite du dessein qu'elle auoit, & pria en suite la Princesse des Leontins de luy aider à tascher de faire en sorte que Porfenna vist Clelie. Au sortir de chez la Reyne, il vit ce Prince qui luy parut assez resueur, il aprit par quelques Officiers du Roy qui luy estoient fideles, que lors que Tullie l'auoit quitté, Porfenna luy auoit dit que pourueu qu'elle luy tint sa parole, il luy tiendroit la sienne, & que cette Princesse s'en estoit allée avec vn visage assez content. Cependant le malheureux Aronce ne pouuant voir Clelie, luy escriuit de la maniere du monde la plus passionnée, & obligea Titus, Telane, & Amil-

car, de luy dire tous les iours cent choses de sa part. En ce mesme temps, la liberté d'aller de Rome au Camp, estant establie, excepté pour les Romains qui auoient fuiuy Tarquin, la Princesse des Leontins fut voir le Prince son frere, qui estoit vn peu mieux, & Herminius, Horace, Octaue, Emile, Zenocrate, Anacreon, & beaucoup d'autres, se firent presenter à Porfenna, afin d'auoir la liberté de visiter ces vingt belles filles, qui auoient esté données en ostages. De sorte que la conuersation fut alors tres agreable, & chez la Reyne d'Etrurie, & chez la Princesse des Leontins, & dans les Tentes où estoient ces belles Romaines. Pour Mutius, il auoit l'esprit si irrité de la derniere conuersation qu'il auoit eüe avec Valerie, qu'il n'y voulut pas aller, & on le voyoit mesme

fuyr le monde, estre inquiet & refuseur, quoy que la gloire qu'il auoit acquise, deust luy donner beaucoup de satisfaction. En ce temps là, le Prince de Messene se vit reduit à l'extremité, mais en mourant il fit aduertir Themiste qu'il pouuoit aller receuoir la recompense de sa fidelité, & que quelques iours auparauant il auoit arresté vn homme qui auoit ordre de luy porter vne lettre du Prince de Syracuse, & vne de la Princesse Lindamire, qui luy apprenoient qu'il pouuoit s'en retourner. Et en effet Themiste apprenant cette agreable nouvelle, & voyant la guerre finie, se disposa à partir dès qu'il seroit guery de la blessure qu'il auoit receuë au bras. La mort du Prince de Messene, & le bonheur de son Riual, seruant alors à la conuersation de tout le monde, il arriua que Clelie & Plo-

Plotine voyant Zenocrate assez chagrin, la dernière luy demanda s'il prenoit quelque interest particulier à cette auanture. Helas ! Madame, luy dit-il en soupirant, ie n'en prens qu'à mes propres malheurs, dont la felicité & les infortunes d'autruy, me remettent esgalemment le souuenir dans l'esprit. Il faut pourtant, reprit Clelie, qu'il vous soit arriué quelque chose de facheux depuis peu, car le simple souuenir de malheurs esloignez, ne donne pas la melancholie que ie voy dans vos yeux. Quand on en apprehende encore de plus grands à l'aduenir, repliqua Zenocrate, il est aisé de paroistre triste. En suite de cela Valerie ayant interrompu cette conuersation pour dire quelque chose en particulier à Clelie, Plotine la continua, & pressa tant Zenocrate de luy dire ce qu'il auoit,

qu'il luy aduoüa qu'il estoit effroyablement ialoux, sans luy aduoüer pourtant qui estoit la personne qu'il aimoit. En suite de quoy Plotine dit à Clelie ce que Zenocrate luy auoit aduoüé. Vne heure après la Princesse des Leontins estant arriüée, Clelie entendit qu'Amiclée dit en passant à Zenocrate, vous auez tort, & plus de tort que vous ne pouuez vous l'imaginer. Elle remarqua mesme que la Princesse des Leontins rougit en regardant Zenocrate, & que la melancholie de Zenocrate augmenta, en voyant la Princesse des Leontins. Si bien que rapportant toutes ces choses, elle deuina que Zenocrate aimoit cette Princesse, & qu'Aronce luy donnoit de la ialousie. Cette pensée augmenta de telle sorte celle qu'elle auoit desia, qu'elle fut contrainte de feindre de se trouuer vn

peu mal, de peur qu'on ne remar-
quast le changement de son hu-
meur. Cependant elle eut vne si
grande curiosité de sçauoir au vray
les auantures de la Princesse des
Leontins, qu'elle pria Plotine &
Valerie, de l'engager à les leur di-
re; & en effet ces deux belles filles
agirent avec tant d'adresse, après
que Zenocrate s'en fut allé, qu'el-
les la porterent à ce que Clelie de-
siroit. Ce que vous souhaitez de
moy, leur dit cette charmante Prin-
cesse, est plus difficile à vous ac-
corder que vous ne pensez, mais
le moyen de refuser vne chose pos-
sible à trois personnes aussi ai-
mables que vous; & puis à n'en
mentir pas, ie preuoy bien qu'en
peu de iours on sçaura ce que
i'ay si soigneusement caché. Ce-
pendant, adiousta-t'elle, il faut
que ce soit Amiclée qui vous ra-

conte ce que vous voulez sçauoir, car ie vous aduoüe que ie n'aurois pas la force de vous dire beaucoup de choses dont le simple souuenir me fait rougir, quoy qu'elles ne soient pas criminelles. Clelie, Valerie, & Plotine ayant consenty à ce qu'elle vouloit, elle s'en alla, & laissa Amiclée avec ces trois belles filles, qui estant alors seules dans leur Tente, la coniuèrent de vouloir leur apprendre bien au long, tout ce qui regardoit la Princesse des Leontins, & en effet, suiuant l'ordre qu'elle en auoit receu, elle commença de parler de cette sorte.



HISTOIRE

DE LA PRINCESSE

LYSIMENE.



Si vous ne connoissiez pas la Princesse des Leontins, ie commencerois sans doute son histoire par son eloge, afin de vous interesser dans ses malheurs, mais comme vous n'ignorez pas qu'elle est tres-belle, & tres-aimable, qu'elle a infiniment de l'esprit & du merite, & que sa vertu surpasse encore tous ses charmes, il ne me reste qu'à vous apprendre ses malheurs, afin de luy attirer vostre compas-

sion; & qu'à vous conter ses auantures, pour vous la faire dauantage admirer. Je ne m'amuseray pas mesme trop à vous descrire quelle estoit la Cour de Leonte quand nous y estions, & ie vous diray seulement en passant, qu'il n'y en auoit point de plus agreable en toute la Sicile, quoy que comme vous le sçauiez il y en ait vn grand nombre, & que ce soit auiourd'huy vn des lieux du monde où il y a le plus de politesse. Comme le pays est beau & tres-fertile, que l'air y est agreable, & que la liberté y est assez grande, on y mene assurement vne vie assez douce. Mais il faut auoüer que durant les premieres années de la vie de la Princesse Lysimene, la Cour de Leonte estoit encore plus agreable qu'elle ne le peut estre auiourd'huy. Car enfin lors que les principales personnes d'une

Cour ont l'esprit bien fait , leur exemple rend tous ceux qui sont au dessous d'eux plus polis & plus honnestes gens. Le feu Prince de Leonte estoit assurement vn Prince fort accompli ; & la Princesse de Leonte sa femme , auoit toutes les qualitez qui peuuent faire admirer vne personne de sa qualité. Aussi peut-on assurer que la Princesse Lysimene luy ressemble autant , qu'Artemidore ressemble au feu Prince de Leonte son Pere. Celuy qui regne aujourdhuy a sans doute quelques qualitez qu'on doit louer, car il a de l'esprit, & du cœur, mais il est naturellement deffiant, ialoux avec excez de son autorité quand il ne le faut pas estre, & a mesme quelque inclination à estre cruel. Mais pour en reuenir à la Princesse Lysimene , vous sçaurez que dès son enfance, elle fut tres-aimable,

& qu'à douze ans elle fut le plus grand ornement de la Cour. On croyoit alors qu'elle n'auoit qu'un frere, car il faut que vous sçachiez qu'Artemidore à l'âge de dix ans, auoit esté pris par des Pirates, comme le Prince de Leonte l'enuoyoit en Grece, sous la conduite d'un sage Gouverneur appellé Cleanthe, pour y estre esleué iusques à l'âge de dix-huit ans; & que depuis cela on n'en auoit point entendu parler. De sorte que lors que le Prince son pere mourut, Lysimene demeura sous l'authorité du Prince de Leonte son frere, qui regne aujourd'huy. Il est vray que la Princesse sa mere viuant encore, elle ne fut pas sans consolation, ioint que n'ayant alors que seize ans, la douleur s'effaça plus facilement de son esprit, & elle se trouua capable de toute la ioye que peut trou-

uer dans vne aimable Cour, vne
personne qui y tient le premier rang
en toutes choses, & qui se voit au-
tant au dessus de tout ce qui l'en-
uironne par sa beauté, & par son
esprit, que par sa condition. La
Princesse Lyfimene a mesme tou-
jours eu l'auantage de n'auoir pas
vn des deffauts qui sont assez ordi-
naires à celles de sa qualité, car el-
le n'a iamais eu de cét orgueil in-
supportable, qui persuade à celles
qui en sont capables, qu'elles font
trop d'honneur à ceux qui les ser-
uent, de s'appercevoir seulement
du respect qu'on leur porte; qui
meprisent ceux qui ne sont pas d'un
rang fort considerable; qui s'offen-
cent facilement; qui ne s'obligent
de quoy que ce soit; qui veulent
estre aimées sans aimer; qui se mo-
quent de la reconnoissance; qui
veulent qu'on leur cede tout; qui

ne connoissent pas la liberalité; & qui n'ont pas seulement l'art de bien choisir leurs plaisirs. Au contraire je puis vous assurer qu'elle a toujours fort bien sceu discerner la verité de toutes choses; qu'elle a bien mieux aimé ceux qui aimoient sa personne, que ceux qui respectoient sa condition, & qu'elle a autant songé à se rendre aimable, que si sa naissance & sa beauté ne luy eussent donné nul avantage. Mais à dire la verité les soins qu'elle en a eus ont admirablement reussi. J'auois sans doute quelques années plus que la Princesse, mais comme elle a eu l'esprit sage de fort bonne heure, elle aimoit beaucoup mieux parler à celles qui estoient vn peu plus âgées qu'elle, qu'à celles qui estoient plus ieunes; si bien que ma mere estant fort aimée de la feu Princesse de

Leonte, i'allois tres-souuent au Palais, où i'eus le bonheur d'estre choisie entre cent filles plus aimables que moy, pour estre favorite de la Princesse. En ce temps là, vn parent fort proche du Prince de Syracuse, qui demouroit à Leonte, deuint fort amoureux de Lysimene; il se nomme Meleonte, & a assurément du cœur, de l'esprit, & de la magnificence, mais il est naturellement deffiant, & quoy qu'il soit tres-braue, il est si peu maistre de luy, quand il est en colere, qu'il peut alors estre capable de beaucoup de choses, qu'il voudroit n'auoir pas faites quand sa colere est passée. Meleonte est mesme tres-bien fait, & a ie ne scay quelle noble audace dans l'air du visage, qui conuient esgalemment à sa condition & à son humeur. Comme il estoit ordinairement de tous les

plaisirs du Prince, il auoit la liberté de voir la Princesse Lyfimene tres-souuent; de sorte qu'il ne faut pas s'estonner si voyant tous les iours vne tres-aimable personne, il ne put s'empescher de l'aimer. Ioint qu'à n'en mentir pas, c'estoit tellement la mode d'aimer Lyfimene, qu'on disoit à la Cour qu'elle n'auoit mesme pas vn esclau qui ne fust amoureux d'elle. En effet on descouurit qu'il y eut vn Peintre qui en faisant sa peinture, deuint son Amant; & qu'un des Iardiniers du Palais à qui elle auoit parlé assez souuent, parce qu'elle aime fort les fleurs, perdit la raison par l'excez de l'amour qu'il eut pour elle. Aussi fut-ce pour cela qu'on l'appella comme on l'appelle encore auiourd'huy, car quelqu'un dit vn iour en riant pour la distinguer de la Princesse sa mere, qu'on appelloit

loit la Princesse de Leonte, qu'il falloit la nommer la Princesse des Leontins, puis qu'il estoit vray qu'elle regnoit dans le cœur de tous les sujets du Prince son frere. De sorte qu'insensiblement on s'accoustuma à la nommer ainsi. Cette amour vniuerselle la fit pourtant hair & enuier de plusieurs belles. Clidamire que vous connoissez, en eut assurément vn peu d'enuie; mais entre les autres il y eut vne femme de qualité, qui croyoit estre plus belle que Lyfimene, qui vint à luy vouloir autant de mal, que si cette Princesse eust destruit toute sa fortune, quoy qu'elle n'eust fait autre chose que d'estre aussi aimable que vous la voyez. Cette femme qui s'appelle Amerinthe, est assurément tres-belle, & d'vn caractere d'esprit fort particulier, comme vous le sçaurez dans la sui-

te de mon discours. Si bien que Meleonte l'ayant servie quelque temps, & l'ayant en suite quittée pour seruir Lyfimene, elle vint, comme ie l'ay desia dit, à hair cette Princesse, quoy qu'elle le dissimulast autant qu'elle le pouuoit. Cependant Meleonte n'oublioit rien de tout ce qu'il croyoit pouuoir seruir à faire connoistre sa passion à Lyfimene, qui n'auoit nulle inclination pour luy. Mais comme le Prince son frere ne desaprouoit pas cette affection, elle n'osoit le maltraiter; son inclination mesme l'esloignoit si fort de toute galanterie, qu'elle parloit tousiours contre l'amour à l'auantage de l'amitié; soustenant en toutes rencontres, qu'il n'y auoit rien de plus agreable que d'auoir des Amis, & rien plus incommode que d'auoir des Amants, soit qu'on les aimast,

ou qu'on ne les aimast pas. Et en effet elle estoit fort seueres aux premiers, & fort douce aux seconds. Zenocrate en ce temps là estoit à Leonte, où après auoir esté fort amoureux d'une tres-aimable femme qui se nomme Andromire, son amour estoit deuenue amitié. Encore estoit-ce vne de ces amitez sans chaleur, qui ne diuertissent guere; de sorte qu'il disoit quelquefois en riant, qu'il y auoit bien plus de plaisir d'auoir vne Amie, qui eust tousiours esté amie, que d'en auoir vne qu'on auroit regardée comme sa Maistresse, & dont on n'estoit plus qu'Amy. Comme Andromire estoit vn peu ma parente, ie faisois assez souuent la guerre à Zenocrate de son changement, & cela fournissoit assez à la conuersation. Si vous ne le connoissiez pas, ie vous parlerois de sa

bonne mine, de son esprit, & de toutes les bonnes qualitez qu'il a, mais ce fera assez que ie vous die qu'il est d'une naissance fort noble, qu'il est Grec d'origine, quoy qu'il soit né à vne Ville qui s'appelle Herbese, qui estoit à son pere, & qui n'est pas fort loin de Leonte; & i'adiousteray encore qu'il estoit alors fort considéré dans cette Cour. Comme ce qui luy estoit arriué avec Andromire, estoit sans doute assez particulier, tout le monde en parloit, & Lysimene en tirant auantage pour les sentimens qu'elle auoit, disoit qu'il estoit aisé de voir qu'il en falloit reuenir à l'amitié. Pour moy, luy disois-je vn iour en presence de Meleonte, & de Zenocrate, ie ne conçooy point comment on peut estre capable d'auoir de l'amitié pour vne personne pour qui on a eu de l'amour; car

enfin si i'en auois eu pour vn homme, ie sens bien que ie ne pourrois cesser d'en auoir sans le hair, ou du moins sans auoir pour luy vne indifference qui ne pourroit iamais deuenir amitié. Je suis du sentiment d'Amiclée, dit Meleonte, & ie ne conçois point que ie puisse iamais estre l'Amy de ma Maistresse. Pour moy, dit Lyfime-ne, l'amitié est si fort à mon usage, que ie la croy bonne en tout temps. Mais comment est-il possible, reprit Meleonte, que de l'amour puisse deuenir amitié? Que deuiennent les desirs, les impatiences, les chagrins, les craintes, les transports, les petits & les grands plaisirs, les soupçons, l'esperance, la ialousie, & toutes les autres choses qui sont inseparables de l'amour? En verité, dit Zenocrate, ie ne puis vous dire ce que tout cela est de-

uenu, mais ie sçay bien que presentement ie suis avec la plus grande tranquillité du monde auprès d'Andromire, & qu'elle ne me peut plus donner ni grande douleur, ni grand plaisir. Je la voy sans desirs & sans esperance, ie la seruirois si ie le pouuois, ie l'estime, ie l'aime, & ie la voy encore assez souuent; mais pour l'ordinaire nostre conuersation est assez tiede, & nostre amitié enfin n'a rien qui nous donne ni grande inquietude, ni grande satisfaction. Mais auez vous bien aimé cette personne, reprit Meleonte? Plus que vous ne pouuez vous l'imaginer, repliqua Zenocrate. Toujours sçay-ie bien, repris-ie, qu'il a fait des vers fort galands, & fort amoureux pour elle, & en mon particulier ie l'ay veu inquiet, ie l'ay veu ialoux, & fort empresseé auprès d'elle. Mais ce que i'admire

le plus, dit Lyfimene, c'est qu'Andromire se soit trouuée capable de reuenir à l'amitié aussi bien que luy. Ha! Madame, dit Meleonte, qu'il faut que Zenocrate aime foiblement lors qu'il est amoureux, puis qu'il peut deuenir Amy après auoir esté Amant, du moins suis ie fort assuré, luy dit-il en abaissant la voix, que ie sens bien que ie n'auray iamais d'amitié pour l'admirable Lyfimene. Ce que vous me dites est si desobligeant, reprit la Princesse, que vous meriteriez que ie vous respondisse fort aigrement. Ce que ie vous dis est si vray, & si passionné, Madame, repliqua-t'il, que ie ne puis croire que vous puissiez estre assez iniuste pour m'en hair. Après cela estant arriué des Dames, la conuersation changea. Cependant depuis ce iour là, Meleonte deuint plus hardy à parler

de son amour à Lyfimene, quoy qu'elle le luy deffendist tousiours; & Zenocrate deuint son Amy si particulier, qu'il n'y auoit pas vn homme à la Cour qui fust si bien dans son esprit, ni qui eust autant de liberté de la voir. Car Zenocrate s'aquit en ce temps là vne si grande reputation d'estre inconstant, que n'apprehendant pas qu'il deuint son Amant, elle fut bien aise qu'il fust son Amy. Nous luy faisons alors assez souuent la guerre qu'il n'auoit que des commencemens d'amour, & il entendoit si bien raillerie là dessus, que cela rendoit la conuersation plus agreable. Meleonte vint aussi à l'aimer autant qu'il pouuoit, car à parler veritablement, il est plus capable d'amour que d'amitié. Mais enfin ils estoient souuent ensemble, & paroissoient auoir vne confidence as-

sez grande, quoy que dans la verité ils ne se dissent rien d'important, car Zenocrate n'aime pas à dire ses secrets, & Meleonte est si deffiant, qu'il n'auoit garde de se confier à luy, principalement pour ce qui regardoit Lyfimene. Il est vray qu'il n'auoit pas grands secrets à dire de ce costé là, car quoy qu'il eust pour la Princesse la plus violente amour qui fut iamais, elle y respondoit si peu, qu'elle ne luy donnoit nulle matiere de confiance. Il ne se rebutoit pourtant point, car encore que la Princesse de Leon-te n'approuuast pas trop, qu'il pretendist à la Princesse sa fille, le Prince son fils appuyoit si hautement ses pretentions, qu'il ne pouuoit pas perdre l'esperance. Cependant ce n'estoit que festes continuelles, dont Zenocrate, comme Amy de Lyfimene, estoit tousiours.

Cette qualité luy estoit sans doute tres-avantageuse, & luy donnoit mille occasions de l'entretenir, qu'il n'eust pas eues, s'il n'eust pas esté reconnu pour tel, & si l'inconstance dont on luy faisoit la guerre, ne l'eust pas empesché de pouuoir estre apprehendé par Lysimene, comme vn homme qui eust eu de l'amour pour elle. De sorte qu'insensiblement elle vint à auoir vne amitié fort tendre pour Zenocrate. Pour luy il l'aimoit sans doute autant qu'il pouuoit aimer, & il luy disoit souuent qu'il l'aimoit plus que quatre de ses Maistresses. Ainsi Lysimene trouuant beaucoup de douceur en l'amitié d'vn si agreable Amy, & si i'ose dire en la mienne, se confirmoit tousiours dauantage dans l'opinion qu'elle auoit alors, que l'amour estoit moins douce que l'amitié. Cependant Ze-

nocrate comme son Amy estoit bien mieux traité, que ne l'estoit Meleonte comme son Amant. Andromire se trouuoit quelquefois dans leurs conuersations, & mesme vn iour la Princesse luy demanda si Zenocrate estoit plus agreable Amy, qu'agreable Amant. En verité, Madame, reprit Andromire en souriant, ie ne puis bien decider ce que vous me demandez, & tout ce que ie vous puis dire, est que quand nostre affection estoit vn peu plus tendre que l'amitié, nous auions plus de peine & plus de plaisir, & qu'aujourd'huy qu'elle a changé de nature, nous ne nous diuertissons guere à nous entretenir. Ce qu'Andromire dit alors à Lysimene, luy sembla si singulier, qu'estant seule le lendemain dans son cabinet, elle fit la peinture des sentimens de cette personne; elle la

dépeignit mesme telle qu'elle estoit, & me fit la grace de me montrer ce qu'elle auoit escrit sur ce suiet là, qui estoit tout à fait ioly. Car enfin sans pinceau, & sans couleurs, elle auoit fait vn portrait d'Andromire si iuste, qu'il n'y auoit personne qui ne la connust. D'abord la Princesse voulut cacher ce portrait, mais l'ayant dit à Zenocrate, & Zenocrate ne pouuant cacher vne chose qui faisoit honneur à l'esprit de la Princesse, le dit au Prince, le Prince à Meleonte, & Meleonte à toute la Cour. De sorte que comme tout le monde est plein d'imitateurs, bons ou mauvais, en peu de iours tous les hommes de la Cour deuinrent Peintres, & toutes les femmes firent leur portrait, sans considerer qu'il est tres-difficile de parler biẽ à propos de soy mesme; car si l'on se louë, on se rend

insupportable, si l'on se blasme equitablement, on feroit mieux de corriger ses deffauts, que de les publier; & si l'on n'en dit ni bien ni mal, on est assez ennuyeux. Mais enfin vne constellation plus forte que la raison, fit que tout le monde se peignit. Les plus excusables pourtant furent ceux qui se loüerent trop, car enfin ils se dépeignirent tels qu'ils croyoient estre; & les plus criminels furent ceux qui firent des portraits satiriques, contre des personnes dont la bonté & la vertu, les deuoient mettre au dessus de l'enuie. Il est vray que ceux qui les firent se noircirent eux-mesmes, en se décriant parmy tous les honnestes gens, & ne firent aucun tort à ceux à qui ils vouloient nuire. Cependant dans toutes les conuersations on ne parloit que de portraits, tout le monde en

auoit dans sa poche, & l'on ne faisoit que s'en donner des copies les vns aux autres. Vn iour donc qu'on estoit chez la Princesse de Leonte, auprès de qui estoit alors Lyfimene, on vint à parler de ces portraits à la mode. Pour moy, disoit Meleonte, ie n'aime point cét empressement qu'on a de vouloir tousiours faire ce que les autres font; & que parce que quelque personne aura bien fait vn portrait, tout le monde en veuille faire de mauuais. En effet, adioustay-ie, ie croy qu'il n'y a pas vne personne à Leonte qui ait vn miroir, qui n'ait fait sa peinture, excepté moy, qui n'ay iamais pû me refoudre à dire ni bien ni mal de moy mesme. Après cela Lyfimene demanda s'il y auoit quelque portrait nouveau, & Zenocrate luy dit qu'on en auoit fait deux d'une mesme personne, & d'une inuen-

tion particuliere; de sorte que cette Princesse les ayant voulu voir, Zenocrate, qui les auoit, les donna à lire à la Princesse, après luy auoir dit que le premier portrait estoit celuy qui sembloit estre fait par quelque Amant, ou par quelque Amy d'Amerinthe. Je croy aisement, reprit Lyfimene, qu'il peut estre fait par vn Amant, mais par vn Amy i'en doute, car Amerinthe n'aime pas à auoir des Amis, & ie suis persuadée que c'est vne chose dont on n'a guere malgré foy. Après cela, Lyfimene commença de lire ce qui suit.



PORTRAIT D'AMERINTHE.

A Merinthe est grande, de belle taille, & de bonne mine, elle a tout l'éclat de la grande beauté; ses yeux sont brillans & doux, ils donnent de l'amour, de la crainte, & de l'esperance tout à la fois. Ils sont du plus beau bleu du monde, & ses cheveux du plus beau blond qui fut iamais. Elle a la bouche petite, incarnate, & souriante, & milles charmes dans l'air du visage. Elle a le teint admirablement blanc, & elle a de cete esprit agreable, où il paroist de la douceur & de la hardiesse tout ensemble, de la modestie & de la galanterie, de l'enioüement, & quelquefois de la langueur. Elle est caressante & civile, elle parle bien, elle a bonne grace, elle plaist à tous ceux qui la voyent, & quiconque n'a point d'amour la premiere fois qu'il la voit, est

est incapable d'en auoir iamais. Son cœur est assez hardy pour entreprendre sans peine des choses difficiles, rien ne l'embarasse, ni ne l'estonne, elle se fie tousiours à sa beauté, ou à son adresse. Et en effet elle a raison de s'y confier, puis que iusques à cette heure, elle a presque tousiours fait tout ce qu'elle a voulu faire, sans que rien luy ait pû resister, & ie croy mesme qu'elle fera tousiours sa volonté.

Il faut auoüer, dit Lysimene après auoir acheué de lire, qu'Amerinthe a tout ce que ce portrait luy donne. Je l'aduouë, reprit Meleonte, mais elle a bien des choses qui n'y sont pas. Cependant, adioustay-ie, il n'y a personne qui ne la reconnoisse à cette peinture. Si cela est, dit Zenocrate, vous ne trouverez donc pas l'autre portrait qu'on a fait d'elle bien ressemblant. Il y

a quelquefois des portraits qui ne se ressemblent point, repliqua Lyfimene, qui ne laissent pas de ressembler fort à la personne pour qui ils sont faits; mais pour iuger s'il en est de mesme de celuy cy, voyons le, après cela elle commença de lire le second portrait.



PORTRAIT D'AMERINTHE.

A Merinthe est une personne, vous pensez peut-estre, que i'aille dire merueilleuse, mais il est plus iuste de dire incomprehensible, & vous en tomberez sans doute d'accord, dès que ie vous auray fait sa peinture. Sa beauté a de l'éclat, elle a le teint pasle, ses yeux sont assez redoutables, & ses paroles passent par une des plus belles bouches du monde. Ses cheueux sont blonds, & l'air de toute sa personne est assez noble, mais

ses mains ne sont point faites pour prendre des cœurs, car elle les a si laides qu'elle les cache tousiours dans un coin d'un grand voile qu'elle porte, de peur de les montrer à ses Amants, & de se les montrer à elle mesme. Elle n'a pas les bras plus beaux, elle a mesme la gorge assez mal taillée, & pour moy ie vous auouë que mon imagination me persuade que tout ce que ie ne voy point, ressemble plus à ce qui me déplaist, qu'à ce qui me paroist agreable. Mais ce qu'il y a d'estrange, c'est que ce que cette personne a de beau, ne luy sert que pour luy nuire; puis qu'elle n'attire des Amants que pour se faire des ennemis, & l'on peut mesme dire qu'elle ne se fait iamais aimer que pour se mieux faire hair. En effet ceux qui ne l'aiment point, l'admirent bien plus que ceux qui l'aiment, car dés qu'on s'est donné le temps de la bien connoistre, on connoist qu'elle n'aime rien qu'elle, que son cœur est dissimulé, qu'elle n'a une

certaine fausse bonté que pour pouuoir mieux tromper ceux qu'elle veut perdre; que son esprit ne luy sert qu'à faire des intrigues, & qu'à embarrasser tous ceux qu'elle appelle ses Amis; que sa hardiesse n'est guere employée qu'à faire des actions dignes de repentir, qu'elle ne sert iamais que ceux dont elle sçait qu'elle sera seruite, qu'elle employe la finesse à tout, & qu'elle ne connoist pas la veritable prudence. En effet elle sçait assez bien déguiser la verité, quoy qu'en quelques occasions on l'ait pû conuaincre de mensonge, elle aime la liberalité en autruy, & ne la pratique iamais, elle veut qu'on croye qu'elle sçait aimer, quoy qu'elle n'ait iamais rien aimé. Cependant elle a fait cent choses que l'amour toute seule semble auoir droit de faire faire à ceux qu'elle possède le plus absolument. Mais enfin ce que l'on en peut dire de plus vray, c'est que iamais nulle autre personne n'a tant inspiré d'amour,

Et de haine, ni tant attiré de loüanges
 Et d'iniures; mais ce qu'il y a de fa-
 cheux pour elle, c'est que l'on commence
 tousiours par l'admiration, Et que l'on
 finit tousiours par le mespris.

Ha Zenocrate! dit Lysimene, s'il
 y auoit quelque personne estrange-
 re icy, ie dirois que cela ne ressem-
 ble point à Amerinthe, mais com-
 me à mon auis il n'y a personne
 qui soit capable de redire ce que
 l'on y dit, i'aduouë que ce second
 portrait ressemble autant à Ame-
 rinthe que le premier, car enfin
 quoy que l'un la louë, & l'autre la
 blasme, ils luy ressemblent tous
 deux. Le premier semblera admira-
 blement bien à vn homme qui ne
 l'aura veuë que huit iours, & le der-
 nier semblera merueilleux à ceux
 qui l'auront aimée long-temps. Ce-
 luy qui a fait cette peinture, reprit

Zenocrate, appelle ces sortes de portraits là des portraits partagez, parce qu'en l'un il dit tout le bien, & en l'autre tout le mal. Cette malicieuse inuention a sans doute quelque esprit, reprit Lysimene, mais comme elle pourroit nuire à des gens de vertu, ie ne la veux pas louer. Ce n'est pas qu'Amerinthe ne merite qu'on fasse son portrait de maniere, qu'il n'y ait personne à qui il puisse plaire; mais après tout il vaut toujours mieux cacher les deffauts d'autrui, que les decouvrir, quelque esprit qu'on montre en les decouvrant. Ce que vous dites est fort genereux, Madame, repris-ie, mais sur toutes choses il ne faut iamais reprocher à personne ni le peu de beauté, ni la mauuaise fortune, si on ne veut passer pour lasche, ou pour mauuais plaisant, & s'il est permis de dire des

veritez desavantageuses, ce doit estre contre ceux qui sont mechants, medifants, calomniateurs, fourbes, enuieux de la gloire d'autruy, parce que quelquefois en faisant bien la peinture d'un mechant homme, on peut faire hair le vice. Mais après tout ces peintures doivent estre generales, & ne marquer jamais personne en particulier, si ce n'est qu'il soit necessaire de faire connoistre les gens perfides, de peur qu'ils ne trompent ceux qui ne le sont pas. Car comme on fait des marques en certains endroits dans les grands fleuves, pour avertir ceux qui y passent qu'il y a des rochers cachez sous l'eau, où l'on pourroit faire naufrage, on peut aussi quelquefois faire connoistre les gens dangereux, afin que les gens de vertu les éuitent plus facilement. Ce que vous dites est tout

à fait bien dit, repliqua Zenocrate, & puis qu'on se mesle de faire tant de portraits inutiles, ie voudrois que l'on en fist qui pussent seruir. Ie voudrois donc que l'on dépeignist vn enuieux, afin de faire hair l'enuie; vn medisant, afin de faire detester la medifance; vn fourbe, pour rendre la perfidie odieuse, & ainsi de beaucoup d'autres mauuaises choses; mais pour vn inconstant, interrompit Lysimene en souriant, vous n'en dites rien. Quoy que ie le sois peut-estre moins qu'on ne pense, reprit-il, ie n'entreprens pas presentement de dire que ie ne le suis point; mais seulement que pour l'ordinaire on met plustost les inconstans au rang des euaporez, qu'au rang des mechans, & qu'ainsi ie n'ay pas songé à parler d'eux en cette rencontre. Cependant comme ce portrait

partagé d'Amerinthe auoit esté fait par vn homme qui n'en vouloit pas faire vn secret, toute la Cour le vit, & en suite on ne vit que des portraits partagez. La Princesse tesmoigna pourtant si ouuertement qu'elle estoit ennemie declarée de tous ceux qui faisoient de ces sortes de choses, qu'en fort peu de iours on n'osa plus rien escrire de cette nature, & cela fit bien voir qu'il importe extremement que ceux qui tiennent les premiers rangs dans des Cours, n'approuuent iamais ceux qui déchirent la reputation d'autrui. Ils y ont mesme assez d'interest, car lors qu'ils ne permettent pas qu'on ternisse la gloire de ceux qui sont au deffous de leur condition, ils conseruent la leur, & mettent des barrieres entre les medisans & eux. Cependant ce que dit Lysimene n'empescha pas qu'

Amerinthe ayant sceu par Andromire, qui le dit sans y penser, que son portrait auoit esté leu chez cette Princesse, n'en eust vn dépit estrange, & qu'elle ne fist dessein de luy faire quelque malice, quoy que dans la verité elle n'eust nul sujet de se pleindre de Lysimene. Mais comme la dissimulation est nécessaire à tous ceux qui veulent nuire à quelqu'un, elle ne tesmoigna point estre mecontente; au contraire elle vit plus souuent Lysimene, elle chercha son amitié, & s'aquit absolument celle d'une fille qui estoit alors à la Princesse des Leontins. Cependant Meleonte estoit tousiours infiniment amoureux de Lysimene, & Zenocrate croyant encore estre son Amy, estoit son Amant. Il est vray qu'il s'apperceut bien tost qu'il se trompoit. Pour la Princesse elle n'y

pensoit pas, & estoit si satisfaite de son amitié, qu'elle s'en louoit à tout le monde. Mais comme elle voulut vn iour luy en parler à luy mesme, il se trouua assez embarrassé. En effet il faut que vous sçachiez que Zenocrate ayant abandonné toutes ces Maistresses depuis quelque temps, paroissoit n'auoir plus rien autre chose à faire que de rendre ses devoirs à Lysimene. Si bien que cette Princesse ne voulant pas que son amitié le contraignist, luy dit vn iour en riant, qu'elle ne pretendoit nullement le contraindre, & qu'encore qu'elle luy eust fait quelquefois la guerre de son inconstance, elle ne vouloit pas l'empescher d'auoir de ces demies Maistresse, qui sans posseder son cœur tout entier, le diuertissoient, & luy faisoient escrire de iolis billets, & d'agreables vers. Zeno-

crate rougit du discours de Lyfime, & se trouua bien embarrasfé à luy répondre; car dans les sentimens où il estoit alors, il trouuoit la permission que la Princesse luy vouloit donner la plus dure du monde. Il n'osoit pourtant luy donner nulle marque d'une passion dont il voyoit bien qu'elle n'auoit aucun soupçon; il ne vouloit pas non plus luy dire des choses tout à fait opposées à ses sentimens. Si bien que répondant ambiguëment à ce qu'elle luy auoit dit, il faut assurément que l'amitié dont vous m'honorez, Madame, luy dit il, soit bien foible, puis qu'au lieu de me corriger de mes deffauts, vous me conseillez de m'y abandonner. Car enfin vous m'avez cent fois fait la guerre de mes commencemens d'amour, & ie voy presentement que vous voudriez que i'eusse trois

ou quatre Maistresses à la fois. Est-ce, Madame, adiousta-t'il, que mon assiduité vous importune? Nullement, reprit-elle en souriant, mais c'est que ie meurs de peur que l'amitié ne vous ennuye. Comme Zenocrate alloit répondre, Meleonte entra, si bien que ne pouuant cacher son chagrin, il se retira assez refueur. Meleonte auoit si peu souuent occasion de parler en particulier à la Princesse, qu'il ne la perdit pas cette fois là; de sorte que dés que Zenocrate fut sorty, il luy parla de sa passion. Je sçay bien, Madame, luy dit-il, que ie vay vous desplaire, mais ie sçay bien aussi que si ie ne vous parle point de mon amour, il faut que ie perde ou la vie, ou la raison, ce n'est pas (adiousta-t'il sans luy donner loisir de l'interrompre) que ie ne sois persuadé que vous sçauiez bien

que ie vous aime, autant que ie puis aimer. Tous mes regards, toutes mes paroles, & toutes mes actions vous le disent, le Prince mesme estant mon protecteur, vous parle à mon auantage, & vostre propre merite m'estant fauorable en cette rencontre, ne vous permet pas de douter de ma passion. Oüy, Madame, il n'est pas iusques à vostre miroir, qui ne vous die que ie vous adore, mais après tout ie veux vous le dire à vous mesme, au hazard de voir autant de colere dans vos yeux, qu'il y a d'amour dans mon cœur. le sçay bien, Meleonte, reprit Lyfimene, que le Prince mon frere me parlant pour vous, & approuuant vostre affection pour moy, ie ne dois pas vous répondre aigrement, & que ie ne puis m'offencer de ce que vous me dites, sans l'offencer luy

mesme. Aussi veux-je vous répondre comme vne bonne Amie, plustost que comme vne Maistresse irritée. Je vous dis donc avec beaucoup de sincerité, que ie ne sens nulle disposition dans mon cœur à auoir iamais de l'amour pour personne, & que quand i'en pourrois auoir pour quelqu'un, ce ne seroit pas pour vous. Ce n'est pas que si le Prince mon frere entreprendroit de me contraindre à vous espouser, ie ne pusse estre capable de luy obeir, plustost que de faire vn grand éclat dans le monde; mais Meleonte vous en feriez plus malheureux, & i'en serois aussi plus miserable, car assurément l'amour que vous auez pour moy se changeroit bien tost en auersion, lors que vous verriez que l'indifference que i'ay pour vous se changeroit en haine. En effet, si après ce que

ie vous dis, vous obligiez le Prince mon frere à vouloir forcer ma volonté, ie croyrois auoir sujet de vous hair. Ha! Madame, s'escria Meleonte, que ce que vous me dites est dur à entendre, & qu'il est capable de me porter au dessein de m'en venger, en vous espoufant malgré vous. Car enfin, Madame, quand ie vous deurois hair après vous auoir espoufée, ie serois bien plus heureux que ie ne le suis en vous aimant sans estre aimé, & sans esperer de l'estre. La haine a ses plaisirs aussi bien que l'amour; on méprise, on se venge, au lieu que quand on aime encore, on ne peut s'empescher quelque mal-traité qu'on soit, d'adorer la personne dont on reçoit le mauuais traitement. Mais, Madame, n'en venons point à de si dures extremitez, rendez iustice à mon amour, laissez

VOUS

vous toucher à ma constance, & ie vous assure que dés que vous aurez seulement resolu d'auoir pitié de mon malheur, vous me trouuerez moins haïssable que vous ne me trouuez, & vous vous trouuerez moins malheureuse. Lysimene alloit répondre, lors que le Prince de Leonte entra, qui voyant bien sur le visage de Meleonte qu'il n'estoit pas content, tira la Princesse à part, & luy dit si fortement qu'elle le desobligeroit si elle ne regardoit pas Meleonte comme vn homme qui pouuoit pretendre à l'espouser, qu'elle en fut fort affligée. Elle ne s'engagea pourtant à rien, mais aussi ne dit-elle pas absolument au Prince, qu'elle estoit incapable de luy obeir. Cependant la belle & dangereuse Amerinthe, ayant l'esprit irrité contre Lysimene, & parce qu'elle luy auoit osté Meleonte,

& parce qu'elle croyoit qu'elle auoit veu avec plaisir ce portrait partagé qu'on auoit leu chez elle, songea soigneusement à l'observer. De sorte que comme elle a infiniment de l'esprit, elle vint à connoistre qu'elle auoit vne tres-forte auersion pour Meleonte, & vne tres-violente inclination pour Zenocrate. Ainsi voulant alors esgalement employer ces deux choses à sa vengeance, elle entreprit de faire espouser Meleonte à Lysimene, & de se faire aimer de Zenocrate, afin seulement d'empescher cette Princesse d'en estre aimée. Il est vray qu'en ce temps là sa vengeance deuint plus facile, parce que le Prince deuint amoureux d'elle; si bien qu'abandonnant le dessein d'estre aimée de Zenocrate, elle ne songea qu'à augmenter la passion du Prince, afin de

pouuoir en suite arriuer plus facilement à la fin qu'elle s'estoit proposée. Cependant quoy qu'elle hait Meleonte, aussi bien que Lysimene, par vn sentiment plein de malice, elle agit comme voulant le rendre heureux, avec vne secrette intention de le rendre miserable. Car estant persuadée que Lysimene le haïssoit, & qu'elle auoit vne affection fort tendre pour Zenocrate, elle voyoit bien qu'elle ne pouuoit rien faire de plus desauantageux ni pour luy, ni pour elle, que d'obliger le Prince à forcer Lysimene, d'espouser Meleonte, quoy que la passion qu'il auoit dans l'ame, luy persuadast alors qu'il ne pouuoit luy arriuer de plus grand bonheur. Aussi se fit-il vne grande reconciliation entre Meleonte & Amerinthe, qui se promirent de se seruir en toutes choses. Pendant cela Ze-

nocrate estoit fort amoureux de Lyfimene, sans oser pourtant luy en donner nulle marque, & après auoir éprouué en aimant Andromire, que son amour estoit deuenü amitié, il éprouua en aimant Lyfimene, que son amitié estoit deuenü amour. Pour la Princesse; elle croyoit tousiours n'auoir que de l'amitié pour Zenocrate; de sorte qu'elle luy confioit tous ses deplaisirs aussi bien qu'à moy: ainsi il auoit la satisfaction de sçauoir que Lyfimene auoit de l'auersion pour son Riual; mais il auoit aussi la douleur d'apprendre que le Prince le protegeoit hautement, & de remarquer la liaison qui s'estoit faite entre Meleonte & Amerinthe, que le Prince aimoit alors éperduement. Cependat comme Amerinthe ne cherchoit qu'à tourmenter Meleonte, elle luy dit qu'elle croyoit

que Zenocrate estoit amoureux de Lyfimene , & que Lyfimene ne s'apperceuoit pas de son audace. Mais , adiousta - t'elle avec beaucoup de malice , toute la Cour en parle , & ie ne doute pas qu'il ne soit tres à propos de l'en auertir. Neantmoins comme elle receuroit fort mal cét auis si ie luy donnois, ie ne m'en mesleray pas. A peine Amerinthe eut-elle dit cela , que Meleonte s'estonna de n'auoir pas soupçonné Zenocrate d'aimer Lyfimene ; & comme la ialousie fait toujours prendre les choses à l'extrémité , il creut en mesme temps que Lyfimene aussi pouuoit bien aimer Zenocrate. Cette pensée ne s'affermissant pas toutefois dans son esprit , il prit la resolution de s'en esclaircir , & remercia fort Amerinthe de l'auis qu'elle luy auoit donné , quoy que ce qu'elle luy

auoit dit le rendist encore plus malheureux. Il fut donc vn iour chez la Princesse, qu'il trouua seule; ie ne sçay, Madame, luy dit-il, de quel air vous receurez vne chose que i'ay à vous dire, mais ie sçay bien que le seul interest que ie prens à vostre gloire, me porte à vous auertir que Zenocrate agit d'vne certaine maniere, qu'on croit qu'il est fort amoureux de vous, & que vous ne pouuez pas ne vous en apperceuoir point. Comme vous croyez que la ialousie est vne preuve indubitable d'amour, reprit Lyfimene d'vn air assez froid, vous voulez sans doute vous faire vn Riual exprés, pour auoir vn pre-
texte d'agir en Amant ialoux. Mais Meleonte ne cherchez point vne si bizarre inuention, car enfin ie ne croy que trop que vous m'aimez; mais pour mon malheur la con-

noissance que i'ay de vostre affection ne m'en peut donner vne semblable; puis qu'à vous parler sincerement, adiousta-t'elle, i'ay fait inutilement ce que i'ay pû pour vous aimer. Cependant pour ce qui regarde Zenocrate, ie vous répons qu'il n'a que de l'amitié pour moy, & que tant qu'il agira comme mon Amy, ie ne m'aduiferay pas de le vouloir mal traiter comme vn Amant. A peine la Princesse eut-elle acheué ces paroles, que Zenocrate entra, dés qu'il parut Lyfimene rougit; si bien que Zenocrate ne sçachant à quoy attribuer le changement de son visage, & en ayant de l'inquietude, chagea de couleur aussi bien qu'elle. Il se remit pourtant vn moment après, & aduertit Meleonte que le Prince le demandoit. De sorte que ce fauory fut contraint de laisser son Riual avec sa Mai-

stresse. Dés qu'il fut party, Zenocrate voyant quelque chagrin dans les beaux yeux de Lyfimene, la coniura de luy vouloir dire ce qu'elle auoit dans l'esprit. En verité, Zenocrate, luy dit-elle, ie voudrois bien que vous le sceussiez, mais après tout ie ne pense pas que i'aye la force de vous le dire. il faut donc que ce soit vne estrange chose, reprit-il; & ie crains bien, adiousta cét Amant caché, que ce ne soit quelque artifice d'Amerinthe. Je n'en doute pas, repliqua Lyfimene, mais encore, Madame, reprit Zenocrate, qui est naturellement fort curieux, dites moy si i'ay interest à ce que vous voudriez que ie sceusse. Vous y en auez autant que i'y en ay, répondit Lyfimene. C'est donc quelque horrible méchanceté dont on m'accuse, reprit-il; mais si cela est, Madame, croyez bien ie vous

en coniuere que ie suis fort innocent. Je le croy ainsi, repliqua t'elle, & pour vous le tesmoigner, poursuiuit Lysimene en rougissant, ie veux bien me determiner tout d'un coup à vous dire ce que Meleonte m'a dit. Eh! Madame, que ie vous en seray obligé, repliqua Zenocrate, parlez donc ie vous en coniuere, & dites moy bien precisement tout ce que Meleonte vous a dit contre moy. Il m'a dit (reprit Lysimene, sans croire effectiuement que Zenocrate fust amoureux d'elle) que toute la Cour croit que vous auez de l'amour pour moy, & que ie m'en apperçoy sans que ie le trouue mauuais. Je vous laisse à penser, adiousta-t'elle, si cela est agreable à entendre. Ha! Madame, s'escria-t'il, que ie suis malheureux. Non, non, Zenocrate, reprit Lysimene, ne craignez pas que cette

auanture vous oste mon amitié, car encore que ie sois bien fachée de ce bruit là, ie ne veux pas vous punir d'un crime que vous n'avez pas commis. Helas! Madame, reprit-il, que vous expliquez mal mes paroles, car enfin (adioustant'il par vn transport d'amour) ce qui fait que ie me trouue malheureux, c'est que toute la Cour connoisse que ie meurs d'amour pour vous, & que vous seule ne le connoissiez pas. Oüy diuine Princesse, poursuiuit Zenocrate, avec des regards les plus passionnez du monde, ie ne puis auoir la force de vous dire que ie ne vous aime pas. I'auouë que sans cette occasion ie ne vous eusse peut-estre iamais dit que ie vous aime, & i'auois en effet resolu de mourir sans vous donner nulles marques de mon amour, mais me voyant dans la necessité de

m'expliquer précisément, ie suis trop sincere, Madame, pour vouloir me iustifier d'un crime que ie fais gloire de commettre. Car enfin, Madame, ce Zenocrate inconstant en apparence, est le plus fidele Amant qui sera iamais. Aussi avez vous pû remarquer que depuis quelque temps, i'ay changé ma façon d'agir. Mais Zenocrate, reprit Lysimene toute surprise, vous ne pensez pas à ce que vous dites, car si vous me persuadez que vous avez de l'amour pour moy, vous vous exposez à perdre mon amitié. Quand vous m'osteriez vostre amitié, reprit-il, vous ne m'osteriez rien qui me puisse rendre heureux. Non, Madame, cette amitié toute precieuse qu'elle est, ne me peut plus contenter. Ie suis vn temeraire, qui ay bien des desirs plus ambitieux. Cependant ie vous promets de vous

en faire vn secret, de peur de vous irriter. Mais est-il possible, Zenocrate, interrompit Lysimene, qu'il y ait quelque verité en vos paroles, & que vous veuilliez me forcer de vous bannir. Je vous permets encore de vous desdire, adiousta-t'elle, car enfin i'ay vne amitié si tendre pour vous, que ie veux faire toutes choses pour vous conseruer. Quand ie serois assuré de mourir dans vn moment, reprit Zenocrate, ie ne pourrois me refoudre à me desdire de la plus constante verité du monde. Mais, Madame, au nom de cette amitié dont vous m'auiez honoré, ayez pitié d'un malheureux Amy qui vous a aimée malgré luy; qui a receu l'amour dans son cœur, sous les apparences de l'amitié, & ne le perdez pas legerement, car peut-estre le regretteriez vous, si vous l'auiez per-

du, adiousta-t'il en soupirant. Mais Zenocrate, reprit Lyfimene, que puis-ie faire pour vous en cette rencontre, sans agir contre moy. N'est-il pas vray, Madame, reprit-il, que si vous auiez descouuert que ie fusse amoureux de la Princesse de Syracuse, ou de quelque autre personne qui ne pust apparemment me rendre heureux, vous me pleindriez, vous me consolerez, & que vous me donneriez des conseils. Je l'aduouë, reprit Lyfimene; puis que cela est ainsi, adiousta-t'il, pleignez moy, consolez moy, & conseillez le malheureux Zenocrate. Il ne vous demande autre chose, il a veritablement cessé d'estre vostre Amy, pour deuenir vostre Amant, mais puis qu'il en est plus malheureux, ne merite-t'il pas vostre compassion. Je sçay bien que ie vous ay dit que vostre ami-

tié ne pouuoit plus me rendre heureux, mais après tout dans le pitoyable estat où ie suis, deuenez du moins mon Amie, quoy que ie ne fois plus vostre Amy. Je vous promets, Madame, de faire positiuement tout ce que vous voudrez, vous ferez maistresse de toutes mes actions, de tous mes regards, & de toutes mes paroles. Souffrez donc que ie vous aime comme ie puis vous aimer, & aimez moy aussi comme vous..... Mais que dis-ie, adiousta-t'il, non, non, Madame, ie ne sçay ce que ie veux dire, & quand ie l'aurois dit, ie m'en repentirois vn moment après. Haïssez moy donc, & me bannissez, car enfin ie ne voy que trop que ie ne puis iamais estre heureux. Vous meriteriez sans doute de ne l'estre iamais, reprit Lyfimene, mais l'interest de ma gloire veut que ie ne fasse pas vn

éclat dans le monde qui pourroit estre à mon desauantage ; c'est pourquoy Zenocrate, puis que vous voulez bien que i'agisse encore en Amie, ie vous conseille de vous guerir, de redeuenir inconstant, & d'auoir dès demain vne nouvelle Maistresse, à qui vous rendiez tant de soins, que ce facheux bruit dont Meleonte m'a tant parlé, cesse entierement. Cependant ie vous defends de me parler iamais de vostre amour ; si vous voulez que ie vous laisse la liberté de me voir. Mais encore vne fois Zenocrate, reprenez vostre ancienne façon d'agir, soyez Amant de toutes les belles, les vnes après les autres, iusques à ce que vous vous sentiez entierement guery. Zenocrate s'opposa d'abord à ce que luy disoit Lysimene, mais cette Princesse s'estant mise en colere, & luy ayant parlé

d'un air qui luy fit connoistre qu'il n'auoit point d'autre party à prendre que l'obeissance; il luy demanda pardon de luy auoir resisté, il se soumit absolument à sa volonté, & il s'engagea de ne luy parler iamais de sa passion, d'essayer d'enguerir, & de paroistre Amant de quelque belle de la Cour. Et en effet peu de iours après Zenocrate s'assuiettit assez à voir vne parente de Clidamire, qui est assurément assez belle. Mais comme il ne vouloit pas que la Princesse pust le soupçonner de deuenir amoureux de cette fille, il la quitta bien tost pour vne autre, & cette autre pour vne troisieme. Ainsi il parut inconstant aux yeux de toute la Cour, parce qu'il vouloit paroistre constant à ceux de Lyfime-ne, à qui il faisoit assez connoistre par ses regards, que son cœur n'auoit

uoit pas changé pour elle, & qu'elle luy deuoit tenir conte de son inconstance. Cependant il souffroit plus qu'on ne pouuoit s'imaginer, car il parloit eternellement d'amour à des femmes qu'il n'aimoit pas, & n'en parloit iamais à la seule personne qu'il pouuoit aimer. Au reste lors qu'il faisoit des vers, il se gardoit bien d'y rien mettre qui conuinft en particulier à celle pour qui il disoit les auoir faits, parce qu'il vouloit que la Princesse se les attribuaft tous. Et en effet il les faisoit si ingenieusement, que sans qu'on y prift garde, il parloit toujours à la Princesse, qui ayant autant d'esprit qu'elle en auoit, remarquoit bien ce que Zenocrate vouloit qu'elle remarquaft. Mais comme elle a beaucoup de prudence, elle ne luy en tesmoignoit rien. Cependant Amerinthe faisant tous.

s. Partie. X

jours du venin de toutes choses, voyant qu'elle n'auoit plus suiet de dire à Meleonte que Zenocrate estoit amoureux de Lyfimene, fit plusieurs railleries sur ce qu'elle croyoit que Zenocrate eust cessé de l'aimer comme ses autres Maistresses. Il est vray que tout le monde auoit tant de respect pour Lyfimene, & tant d'estime pour Zenocrate, que ses railleries furent mal receuës, & ne seruirent qu'à faire paroistre sa malice. Pour Meleonte il ne sçauoit plus qui accuser des mauuais traitemens de Lyfimene, & continuoit de la seruir avec beaucoup d'assiduité, n'oubliant rien pour luy plaire. En effet sa magnificence paroissoit en toutes choses, elle auoit plus de diuertissement qu'elle n'en vouloit, & il la voyoit continuellement: mais comme il est violent, & vn peu inégal, il luy parloit tantost, avec beaucoup de

soumission & tantost imperieusement, se confiant à la protection du Prince, qui continuoit toujours sa galanterie avec Amerinthe, bien qu'elle ne luy estoit guere plus fidele qu'à vn autre; car enfin vne femme coquette ne peut iamais l'estre à personne quelque interessée qu'elle soit. Comme la Princesse me faisoit desia l'honneur de m'aimer fort tendrement, elle me faisoit confidence de tout ce qui luy arriuoit; ainsi elle m'auoit parlé de son auersion pour Meleonte, de l'amour que Zenocrate auoit pour elle, & de la nouvelle cause de son inconstance. En ce temps là Zenocrate ne trouuant presque plus de femme dans la Cour à qui il n'eust dit quelques douceurs, fut vn peu plus long temps à seruir vne parente d'Andromire, qu'il n'auoit esté à toutes les autres. Si bien

que Lysimene l'ayant remarqué, m'en parla vn iour d'une maniere qui me fit bien connoistre qu'elle auoit plus de tendresse pour luy qu'elle ne croyoit. Mais auant que de vous dire ce qu'elle m'en dit, il faut que ie vous despeigne le lieu où elle m'en parla, parce que cela sert en quelque sorte à mon discours, & parce que naturellement i'aime si fort les iardins, que ie ne puis iamais me resoudre d'en parler simplement en passant. De sorte que comme ie m'arreste volontiers en trauersant vn parterre, mon esprit s'arreste aussi facilement à descrire vn beau lieu, quand i'ay occasion d'en dire quelque chose. Sçachez donc qu'il y a vn homme à Leonte qui s'appelle Adimante, qu'on confidere comme vn homme tres-heureux. En effet sa naissance est bonne, quand il a esté

ieune il a esté beau, & bien fait, adroit à toutes choses, & fort habile dans toutes les affaires dont il s'est melle, & presentement qu'il est fort auancé en âge, il est encore de fort belle taille, de tres bonne mine, & tres propre. Il a de la richesse iusques à l'abondance, autant de santé qu'un ieune homme; les inclinations à aimer les plaisirs, & de quoy en iouyr; vne femme belle & sage; beaucoup d'enfans, beaux, bien-faits, & de beaucoup d'esprit; & entre les autres vn fils aîné qui est connu & estimé de tout le monde de la Cour. Il a aussi vne fille que ie trouue plus belle qu'Amerinthe, quoy qu'Amerinthe soit vne des plus belles personnes du monde; mais avec cette difference que celle dont ie parle a autant de sagesse que de beauté, & que l'autre cede presque en vertu à celles

qui en ont le moins. Enfin Adimante est mesme heureux iusques aux femmes de ses enfans, & i'en connois vne, qui a vn air fin, agreable, & delicat, qui la rend infiniment aimable. Cependant comme Adimante a esté prudent dans ses plaisirs, il a songé dès le commencement de sa vie, à en choisir qui pussent luy durer iusques à la mort. De sorte qu'au delà d'vn des faux-bourgs de Leonte, il a vn iardin qui est vn des plus beaux, & des plus agreables du monde, aussi sert-il à la promenade de tout ce qu'il y a d'honestes gens à Leonte, de l'vn & de l'autre sexe, car Adimante qui a l'inclination magnifique, en permet l'entrée libre à toutes les personnes de qualité. Le chemin en est vny, & n'en est pas long; il y a quelques allées deuant la porte,

dont l'architecture est simple, mais assez belle. D'abord on entre dans vne belle cour, qui a en face vne grande balustrade de fer, au delà de laquelle on voit vn grand & magnifique parterre avec vn beau Jet d'eau au milieu, & au delà vne longue allée qui aboutit à vne grande arcade où il y a vne porte grillée. Par là on voit l'allée qui continuë iusques à vne petite terrasse, d'où l'on découure toute la veuë de la campagne, & vne partie de Leonte en esloignement. Mais pour mieux descrire ce beau lieu, il faut sçauoir qu'on voit à droit & à gauche de la porte par où l'on entre dans la cour, deux autres portes grillées, qui donnent dans deux cours separées de la premiere. De chaque costé sont deux pavillons esgaux, de belle structure, & dont les appartemens sont

esgalement propres & commodes. Quand on a passé la premiere balustrade, dont i'ay desia parlé, & trauersé deux petits parterres de gazon, environnez de balustres de marbre, sur lesquels on voit plusieurs vases avec des reliefs & bassetailles, on entre dans vn grand parterre bordé de cypres en pyramides, avec vn iet d'eau au milieu, & quand on l'a trauersé, & qu'on est assez auant dans l'allée qui est au dela, on se trouue au milieu de huit grandes allées tres-agreables, & il y en a aussi vne qui regne à la gauche tout du long de ce iardin qui est admirablement belle. Mais afin qu'Adimante ne contraigne point ceux qui se promenant chez luy, & qu'il ne soit pas contraint luy mesme, il faut que vous scachiez qu'il a diuerses promenades qui ne sont que pour luy. En effet au delà de cette

porte grillée qui est au bout de la grande allée, on trouue la terrasse dont i'ay desia parlé, des vignes tres-agreables, & vn verger tres-delicieux. Il y a mesme d'vn autre costé vn autre grád verger qui n'est encore que pour luy; il y a aussi vn iardin particulier pour les orangers, & où l'on voit des fleurs & des plantes les plus rares du monde. De sorte qu'en toutes saisons, on trouue des fruits & des fleurs admirables en celieu charmant: on y trouue mesme bien souuent de la musique, & presque tousiours tres-bonne compagnie. Mais pour venir à l'endroit dont i'ay besoin pour mon recit; vous sçaurez qu'à la descente de ce beau iardin, il y a vne longue allée fermée de palissades, qui a deux pauillons aux deux bouts, où l'on trouue d'vn costé le long de la muraille, & de l'autre le long de la pa-

liffade, des arbres fruitiers les plus beaux qu'il est possible. Le pavillon qui est du costé de la terrasse, ne sert qu'à se mettre à couuert du Soleil & de la pluye, ou qu'à se reposer sur des sieges qui y sont, aussi bien qu'aux deux autres pavillōs qui sont sur la mesme ligne. Mais pour ce-luy qui est du costé par où l'on entre, c'est le plus aimable cabinet que ie vy iamais. Car imaginez vous, Madame, qu'il est quarré, qu'il est en dôme, qu'il est pavé de marbre, qu'il a vne tribune tout à l'entour, avec vne balustrade, vne fontaine ialiffante au milieu, qui retombe dans vne cuue de iaspe; & que la face opposée à la porte qui donne au bout de l'allée, a vn grand miroir qui augmente le renfondrement, multiplie la fontaine, & fait voir l'allée de quelque costé qu'on puisse estre. Si bien qu'estant assis

en ce lieu là on peut refuer fort agreablement, au bruit & à la fraicheur de l'eau, qui fait mefme quand on veut diuerfes figures agreables & diuertiffantes. Auffi fust-ce en cét endroit que la Princeffe Lyfimene s'estant allée affeoir vn iour, me commanda de la fuiure, pendant que toutes celles qui l'auoient fuiue, estoient dans l'allée. Comme la Princeffe auoit assez marché, elle estoit vn peu lasse, & ne songea d'abord qu'à s'affeoir en entrant dans ce cabinet. Pour moy ie me mis à ses pieds, sur vn quarreau que i'y trouuay par hazard. Dés qu'elle fut là, elle se mit à me parler de Zenocrate, & me demanda si ie ne croyois pas qu'il fust deuenu constant, & qu'il aimast tout de bon la parente d'Andromire. Mais, Madame, luy dis-ie, vous n'y songez pas en parlant comme vous faites, car si Ze-

nocrate estoit deuenu constant pour celle que vous dites, il faudroit qu'il fust deuenu inconstant pour vous. Ha! Amiclée, reprit elle en rougissant, quand on change de sentimens pour vne personne qui ne veut point estre aimée, on ne peut pas nommer cela inconstance. Pour moy, luy dis-je en riant, ie croy que quand on cesse d'aimer vne personne qui ne veut point estre haye, on peut tousiours estre appellé inconstant. Si vostre opinion est veritable, repliqua-t'elle en rougissant vne seconde fois, Zenocrate est donc vn veritable inconstant, car i'auouë que ie ne voudrois pas qu'il me haïst. Vous voulez donc, Madame, repris-je, qu'il vous aime, car à ne se point flatter, il ne faut pas pretendre d'estre eternellement aimée sans qu'on y consente, & peut-estre sans aimer.

Mais Amiclée, reprit Lyfimene, ce que ie sens pour Zenocrate n'est assurément que de l'amitié. Pour moy, Madame, repris-je en souriant, ie suis persuadée il y long-temps, que quand on a de l'amitié pour vn agreable Amant, il ne s'en faut guere que ce ne soit de l'amour. Car enfin, Madame, aduoüez la verité, vous ne voudriez pas que Zenocrate eust vne violente amour pour vne autre. Je l'aduouë ingenuement, reprit la Princesse, mais c'est parce que ie croy que l'on ne peut auoir vne violente amitié, dans le mesme temps que l'on a vne violente amour. Mais, Madame, repliquay-je, ce que vous dites ne conuient pas bien à ce que Zenocrate sent pour vous, car vous sçauéz bien qu'il a de l'amour. Tout de bon, reprit Lyfimene, en détournant vn

peu la teste, ie ne veux point nommer son affection ainsi, & puis à n'en mentir pas, s'il continuë d'estre aussi assidu auprès de la parente d'Andromire, ie croiray qu'il n'aura plus ni amour ni amitié pour personne, & qu'elle possedera son cœur tout entier. Ce n'est pas, adiousta-t'elle, que cela me doiue fort irriter, car enfin ie ne voudrois pas auoir donné la moindre esperance à Zenocrate; mais par vne bisarrierie dont ie ne suis pas la maistresse, ie voudrois pourtant bien qu'il me considerast tousiours plus que tout le reste du monde. Comme la Princesse acheuoit de dire cela, elle leua la teste, parce qu'il luy sembla auoir oüy quelque bruit sur la tribune qui regnoit à l'entour de ce cabinet. Et en effet elle vit Zenocrate appuyé sur la balustrade, qui s'y estant trouué lors que nous

estions entrées dans ce cabinet, n'avoit osé se montrer, parce que d'abord la Princesse avoit parlé de luy. De sorte que Lysimene l'apperceuant, fit vn grand cry, qui m'ayant fait regarder du costé qu'elle avoit les yeux tournez, me fit appercevoir Zenocrate, presque aussi embarrassé que Lysimene. Il se détermina pourtant en vn moment; si bien que descendant avec vne diligence extreme, il vint se mettre à genoux deuant la Princesse, deuant qu'elle pust auoir resolu ce qu'elle deuoit faire. De grace, Madame, luy dit il, pardonnez moy vn crime que le hazard & l'amour m'ont fait commettre, ie ne vous parlerois pas en ces termes deuant Amiclée, si ie ne venois d'apprendre de vostre bouche & de la sienne, que vous luy auez dit quelque chose de la

passion que j'ay pour vous, & de l'indifference que vous avez pour moy. Ha! Zenocrate, reprit brusquement Lyfimene, vous ne mettes pas indifferent, car j'auois de l'amitié pour vous il n'y a qu'un quart d'heure, & ie sens bien que presentement ie m'en vay vous haïr horriblement. En effet, poursuiuit-elle, fut-il iamais vne audace esgale à la vostre, d'oser escouter ce que ie dis en secret à Amiclée. Helas! Madame, reprit Zenocrate, si vous scauiez comment cela s'est fait, vous verriez bien que ie suis innocent. Il me semble, Madame, dis-ie à la Princesse, qu'il ne faut iamais condamner personne sans l'entendre, & qu'ainsi vous deuez escouter Zenocrate. Si ie pensois qu'il se pust iustifier, reprit Lyfimene, ie luy deffendrois de parler, mais comme ie suis persuadée que
plus

plus il parlera, plus il me paroistra criminel, ie consens qu'il die ce qu'il voudra. Je diray donc, Madame, luy dit-il, que ie suis vn mal heureux; ce n'est pas ce que ie veux que vous me disiez, repliqua t'elle, mais seulement ce que vous estes venu faire en ce lieu là, i'y suis venu penser à vous, Madame, repliqua Zenocrate, dans vn temps où ie ne pouuois estre auprès de vous avec la liberté de vous pouuoir entretenir en particulier, Mais pour penser à moy, repliqua la Princesse, il n'estoit pas necessaire d'estre seul. Je l'aduouë, Madame, repliqua-t'il, mais ayant pris le dessein de vous escrire quelque chose dans mes Tablettes, avec l'intention de vous le faire lire, i'ay choisi le lieu le plus solitaire; & si vous voulez voir si ie dis vray, donnez vous la peine de lire ce que

i'escrivois quand vous estes arriué. D'abord la Princesse ne vouloit pas lire ce que Zenocrate auoit escrit, mais à la fin elle prit ces Tablettes & y trouua ces paroles.

N'aurez vous iamais que de l'amitié incomparable Lysimene, & ces beaux yeux qui m'ont tant donné d'amour ne me regarderont-ils iamais avec quelque compassion. Je vous ay promis, Madame, de ne vous parler point d'amour, mais ie ne vous ay pas promis de ne vous en escrire point; & puis quand ie vous l'aurois iuré, les maux que ie souffre me dispenseroient de mes sermens. Pensez donc bien serieusement, Madame, à ce que vous voulez que ie deuienne, car.....

La Princesse rougit en lisant ce que ie viens de vous dire, après quoy prenant la parole, si vous pen-

sez vous iustifier par là, dit-elle à Zenocrate, vous vous trompez fort. Je pretens seulement, repliqua-t'il, vous prouuer que ie ne suis venu icy que pour penser à vous. Mais quand vous m'auez veuë, reprit-elle, que n'estes vous descendu, que n'estes vous forty, ou du moins que ne vous estes vous montré. Quand ie vous ay veuë, Madame, répondit il, ie n'ay d'abord songé qu'à vous voir; vn moment après ie me suis entendu nommer; de sorte que l'amour m'ayant donné d'abord de la curiosité, i'ay escouté ce que vous disiez de moy, & après auoir entendu ce que vous en auez dit, le respect m'a fait demeurer où i'estois, & la crainte de vous déplaire m'a contraint de ne changer point de place: Voila, Madame, tout ce que i'ay fait, cependant ie suis assez puny de ma temeraire cu-

riosité, car enfin ie n'ay rien entendu dont ie puisse tirer auantage. Ha! Zenocrate, repliqua-t'elle, vous estes plus content de moy que vous ne le tesmoignez, mais ie suis si mécontente de moy & de vous, que ie veux nous punir esgalemment; c'est pourquoy ie veux me priuer d'un Amy, & vous oster vne Maistresse. Quittez donc Leonte pour quelque temps, luy dit-elle, allez vous en à Herbese où vos affaires vous appellent, & s'il est vray que la parente d'Andromire ne vous ait pas donné des chaines trop fortes, vous vous consolerez par tout. Ah! Madame, que vous estes cruelle, s'escria-t'il, non, non, adiousta cét Amant affligé, vous ne m'exilerez pas si aisement, & pour les reproches que vous me faites, Madame, ie les feray bien tost cesser. Ie ne verray iamais la personne

dont vous parlez, & si vous continuez de vouloir que ie fasse l'Amant pour cacher l'amour que i'ay pour vous, ie vous promets de ne seruir iamais plus de huit iours vne mesme personne, & de paroistre si inconstant à l'aduenir, que vous ne pourrez plus douter de ma constance. Zenocrate eut pourtant beau parler, il ne put faire sa paix de tout le iour. Lysimene sortit sans vouloir luy pardonner, & nous laissasmes Zenocrate en ce lieu là si triste, si triste, & si affligé, que ie fus touchée de son deplaisir. Lysimene le sentit aussi bien que moy, & mesme encore plus, mais elle me le voulut cacher, & contrefit la gaye le reste du iour. Cependant Zenocrate tint sa parole, il cessa de voir la parente d'Andromire, & parut si changé qu'il fut contraint de dire qu'il estoit malade. Mais

enfin que ne peut point la constance d'un honneste homme, quand il sçait bien profiter de toutes les occasions que la fortune fait naistre, & de l'auerfion que sa Maistresse a pour son Riual? Lysimene connut enfin qu'elle aimoit plus Zenocrate, qu'elle ne le pensoit aimer, elle luy permit de l'adorer, & elle luy aduoüa que si sa fortune le luy eust permis, elle se fust tenuë heureuse de le pouuoir rendre heureux. Elle auoit mesme cét auantage que la Princesse sa mere fauorisoit Zenocrate. Elle luy osta pourtant toute esperance d'estre heureux, & luy promit seulement de resister toujours autant qu'elle le pourroit au Prince son frere, quand il luy parleroit pour Meleonte. Depuis cela la vie de Zenocrate fut assez douce, car encore qu'on ne luy eust pas permis l'esperance il ne laissoit

pas d'en auoir. Mais afin de ne donner pas lieu ni à Meleonte, ni à Amerinthe, de troubler leur innocente affection, il parut tousiurs le plus inconstant de tous les hommes, & cela parut en effet si naturel, que les deux personnes du monde qui auoient le plus de cét esprit fin, & propre à s'appercevoir des artifices les plus ingenieux, furent trompées en cette occasion. Mais ce qu'il y eut de particulier en cette auanture, fut que la Princesse elle mesme pensa s'y tromper plusieurs fois, en croyant que Zenocrate estoit veritablement inconstant. Il est vray qu'il luy fut aisé de se iustifier, car il offrit tousiours à Lysimene de ne voir qu'elle, de ne parler qu'à elle, & de renoncer à tout le reste du monde, à toute sorte d'intérest, & à toute consideration quand

elle le voudroit. Si bien qu'alors malgré l'importunité que luy donnoit l'amour de Meleonte, Lysimene auoit d'agreables momens. La Princesse sa mere haïssoit Meleonte, & aimoit Zenocrate. Elle trouuoit en cét aimable Amant de la soumission, du respect, de l'esprit, & de la constance, & pour rendre tout cela plus doux, leur affection estoit alors si secrette, que personne ne croyoit plus du tout qu'il y eust rien que de l'amitié toute simple entre eux. Ils auoient pourtant souuent de petites querelles, non seulement parce que Lysimene le soupçonnoit de prendre plaisir à estre inconstant, & de feindre trop bien, mais encore parce que Zenocrate de son costé estant naturellement vn peu suiet à la defiance, craignoit de temps en temps sans raison que Lysimene ne se

laiffast à la fin toucher à la passion de Meleonte. Mais après tout, ces petits demeslez seruant à rendre leur affection plus tendre, ils n'estoient pas trop à plaindre. La Princesse ne disoit pourtant pas à Zenocrate qu'elle l'aimoit, mais elle souffroit si agreablement qu'il l'aimast, qu'il se le disoit luy mesme. Meleonte de son costé faisoit des festes tres-magnifiques; mais Zenocrate avec moins de bruit faisoit des galanteries qui touchoient plus le cœur de Lysimene. Je me souuiens d'un iour entre les autres, que Zenocrate s'auisa d'une chose assez galante, que ie vous diray tantost; mais auant que de vous la dire, il faut que ie vous apprenne qu'il y auoit alors à Leonte un homme de qualité de Syracuse, qui est fort des Amis de la Princesse, & qui merite en effet d'en estre, car

il a vn merite qui n'est pas ordinaire.

Eh de grace! dit alors Plotine, aimable Amiclée, faites nous connoistre vn homme que vous croyez digne d'estre Amy de Lysimene, car pour moy i'aime fort à iuger des gens par leurs Amis. Je suis assez de l'humeur de Plotine en cela, reprit Valerie, & ie sçay que Clelie est de ce sentiment là.

Puis que cela est, dit Amiclée, il me sera aisé de vous satisfaire, aussi bien suis-ie contrainte de vous aduoüer que i'auois assez de peine à me resoudre de vous parler de cét illustre Amy de Lysimene, sans le louer. Sçachez donc que Theandre est vn homme de qualité, dont le caractere est si particulier, qu'il n'est pas aisé de le bien dépeindre. Il est grand, de belle taille, & de bonne mine, sa phisionomie est

heureuse, & il y a vn certain air en toute sa personne, qui marque vne partie de son humeur, & qui promet de l'esprit, de la sincerité, & de la bonté. Il a le nez grand, vn peu esleué vers le milieu, le visage vn peu long, les yeux assez petits, mais si fins, & si sourians, qu'on voit aisement que son cœur est sensible à aux plaisirs. Il a l'action assez negligée; les cheueux assez longs; & il a quelquefois vn silence si spirituel, qu'on voit qu'il n'escoute rien qu'il n'entende tres-finement, & dont il ne püst souuent mieux parler que ceux qu'il escoute. En effet Theandre a vn grand esprit naturel, & il l'a cultiué si soigneusement, qu'il n'y a presque point de connoissances en toute la nature dont il ne soit capable. Et quand il est avec quelques-vns des Disciples du sage Thales, de Democri-

te, d'Hipocrate, ou de Pythagore, il fait bien connoistre qu'il est parfaitement instruit de tous les secrets de la nature, & que la Philosophie n'a rien qui luy soit caché. S'il se trouue avec des gens qui aiment les belles lettres, & particulièrement la Poësie, il est aussi fort aisé de iuger, à ce que i'ay oüy dire à de fort habiles gens, qu'il connoist parfaitement toutes les beautez & & tous les deffauts d'Homere & d'Hesiodé, & que s'il entreprenoit de disposer vn Poëme heroïque, il le feroit selon toutes les regles que le bon sens peut donner de ces sortes d'ouurages. Il est tres-sensible à toutes les beautez de la Poësie, aussi est il fort delicat pour les deffauts qu'on trouue en la pluspart des vers, mais sa critique est pourtant sans inhumanité; au contraire il excuse les petites fautes dans les

beaux ouvrages, & ne condamne jamais rien iniustement. Il parle facilement & iuste, il escrit mesme fort bien, & fait quand il le veut des lettres qui ont vn certain tour diuertissant qui luy est particulier. Theandre a sans doute de la gravité, & mesme vn peu de melancholie, mais c'est d'une melancholie tranquile, qui se laisse aisement aller à la ioye. En effet il aime les plaisirs, & les cherche, mais il les cherche sans esclat, il aime à les choisir à sa mode, & non pas à se diuertir avec la multitude. Il a le cœur droit & sincere, l'ame ferme & genereuse, il regarde l'ambition comme vne passion qu'il a surmontée, & dont la victoire a estably le repos de sa vie. Aussi est-il deliuré de tous les soins qu'ont ceux qui veulent agrandir leur fortune; il est content de la sienne, qui en

effet est assez bonne, & il en iouït paisiblement au milieu du tumulte d'une grande Cour où il ne prend nul interest qui puisse troubler ses plaisirs. Au reste, Theandre est né avec un courage heroïque, dont il a donné des preuues tres-esclatantes en plusieurs occasions; on l'a veu trauffer une armée ennemie pour s'aller ietter dans une place assiégée; & en une autre rencontre passer presque seul dans un pays ennemy, pour aller se ietter dans une armée, & se trouuer en une occasion tres-dangereuse. Mais la valeur de Theandre a tousiours esté sans vanité, & il a plus songé à s'assurer luy mesme de son propre cœur, qu'à s'attirer des loüanges dont il ne se soucie pas. L'indifference qu'il a pour cette espeece de gloire est d'autant plus loüable qu'il n'a pas le cœur indifferent.

En effet il aime fort tendrement & fort genereusement ses Amis, & en est fort aimé, & ce qui luy est fort glorieux, c'est qu'il en a vn fort grand nombre de fort illustres. Au reste Theandre a l'esprit le plus commode du monde, & comme il n'est pas capable de regler ses sentimens par ceux des autres, il n'oblige pas aussi les autres à suiure les siens. Ainsi il a des Amis dont les maximes sont absolument opposées aux siennes, avec qui il ne laisse pas de viure bien. Son ame a de la douceur, de l'equité, de la tendresse, & de l'humanité. Il est fort touché du merite & de la vertu; il aime la liberté plus que toutes choses, & met le souuerain bien au repos. Aussi pour ne s'exposer iamais à le perdre, a-t'il osté à l'amour tout ce qu'il a de facheux & de penible. Il aime les beaux ob-

jets en general, sans qu'il y en ait aucun en particulier qui puisse auoir la force de l'attacher iusques à le rendre malheureux ; de sorte que l'amour est plustost vn simple plaisir dans son cœur qu'une passion. Vne ieune bergere luy plaira plus avec vne simplicité pleine de graces, qu'une Princesse avec vne magnificence excessiue. La nouveauté mesme a tousiours quelque charme pour luy ! & la variété en certaines choses plaist autant à ses yeux, qu'elle plaist à tout le monde dans les fleurs d'une prairie. Il aime encore fort à estre pleinement informé de certaines foibleesses dont les plus sages sont quelquefois capables, & il se fait souuent des plaisirs de curiosité qui ne sont pas propres à tout le monde. En effet la fameuse Rhodope n'a rien eu de si particulier en sa vie qu'il ne sçache,

che, & se faisant vn diuertissement des folies d'autruy, il préd beaucoup de plaisir à les sçauoir. Pour les femmes en cas d'amitié, il en trouue peu dignes de la sienne, mais quand il en trouue quelqu'une qui a dans l'esprit de la solidité & de l'agrement, & dans le cœur de la fermeté & de la franchise, il l'a met au rang de ses Amis, & n'a pas l'iniustice de ces gens qui croyent qu'il est impossible qu'il y ait des femmes avec qui l'on puisse auoir vne société raisonnable. Pour la grandeur, elle n'a iamais esbloüy Theandre, & il sçait si bien deueloper les choses qu'il voit tout ce qui leur est estranger, ainsi rien ne le peut iamais tromper. Il a mesme vne facilité qui luy est particuliere, car souuent on le voit contraint de se promener seul, parce qu'il a presté tout son équipage. Il ne preste

pourtant pas ces sortes de choses avec la pensée qu'on luy rendra la pareille, car souuent c'est à des personnes qui ne peuuent pas luy rendre vn semblable office. Au reste il a vne petite galiote sur vne riuiere, qui passe au pied d'une maison qu'il a sur les bords d'Himere, qui sert bien moins à sa commodité, qu'à celle des autres, car il n'y a pas mesmes d'estrangeres qui la luy demandent, pourueu qu'elles soient belles, à qui il ne la preste facilement; ainsi elle va & vient continuellement sans estre presque iamais employée à son seruice. Il n'importe pas mesme si ces estrange-res sont de qualité ou non. La beauté leur suffit, & quand mesme elles ne seroient que ieunes, la galiote ne leur seroit pas refusée. Enfin Theandre a vne vertu commode pour luy & pour les autres, qui le

rend tres-agreable, & qui assure-
ment est fort propre à rendre sa vie
heureuse, car s'estant separé de tout
l'embarras du monde, & des pas-
sions, il n'en prend que ce qui
conuient à son temperament, & se
trouue par consequent bien moins
exposé que tous les autres hommes
à tous les malheurs de la vie, puis
que sa seule vertu suffit à le rendre
heureux, & que ne cherchant ia-
mais que le bien qu'il peut trouuer,
il n'employe iamais de temps inu-
tilement pour luy. Voila donc quel
est cét illustre Amy de Lyfimene,
qui estoit à Leonte lors que les
choses estoient au point que ie vous
ay dit. En ce temps là Lyfimene
fit vne promenade à vne maison
qui est au pere d'un Amy particulier
de Theandre, dont le merite est sans
doute fort extraordinaire. Amerin-
the estoit de cette partie, Andro-

mire en estoit aussi, Meleonte & Zenocrate n'auoient garde d'y manquer, & l'on peut dire que rien ne rendoit cette partie peu agreable pour Lyfimene, que la trop bonne compagnie. Car Amerinthe avec tous ses charmes, & Meleonte avec tout son merite, l'importunoient. Comme le lieu où l'on alloit est admirablement beau, on eut d'abord assez de plaisir. En effet sans parler d'une auant cour qui est belle & magnifique, des arcades qui sont à la droite en entrant, & qui laissent voir vne estenduë de pays à perte de veuë, qui fait vn obiet admirable; de deux gros pauillons qui sont aux deux coins de la cour, des statuës qui sont dans des niches en diuers endroits, de la face du bastiment, dont la simetrie est iuste, magnifique & agreable tout ensemble; du superbe dôme qui

s'esleue au milieu; de la magnificence du vestibule, du nombre de ses pilastres, & de ses colonnes; de la beauté de l'escalier, & des diuers appartemens; d'un cabinet où il y a plusieurs veuës différentes toutes belles; des peintures excellentes qu'on voit par tout; il suffit de dire qu'il y a vn salon dans cette magnifique maison, qui par sa grandeur, sa forme, ses basse-tailles, ses peintures, & tous les ornemens qu'on y voit, surprend d'abord tous ceux qui le voyent, quoy qu'ils ayent eu lieu de s'attendre à ne voir rien que de beau, par tout ce qu'ils ont desia veu; & l'on a enfin lieu de s'imaginer que ce salon a esté basti par quelqu'un de ces Roys d'Egypte, qu'on dit qui ont fait esleuer de si belles Piramides, tant il est vray que ce beau lieu donne vne grande idée de ma-

gnificence. Après cela il y a encore vne chose admirable en ce lieu là, car il y a vn parterre qui est vn des plus grands qu'on vit iamais, qui est pourtant en terrasse, au milieu est vn Iet d'eau admirable, quoy que ce parterre soit sur vn lieu fort esleué, & d'où l'on descouure vne si grande estenduë de pays, que la veuë en estant diuertie, & agreablement occupée, on ne s'aperçoit pas qu'on ne voit point de riuere de là, quoy que pour l'ordinaire cela serue fort à rendre les païssages agreables. Au delà de ce parterre on voit au dessous de soy vne prairie & vn Rondeau, & comme le parc est fort grand, & que les routes en sont inegales, les veuës en sont aussi fort differentes; de sorte qu'on s'y promene fort agreablement en chariot. Ce fut en ce lieu là, qui s'ap-

pelle Ericine , à cause que cela a quelque rapport par sa situation esleuée , au Temple qu'on voit sur le mont Erice , que Lyfimene voulut aller ; mais comme Meleonte estoit celuy qui auoit proposé cette promenade , ce fut luy qui donna vne colation magnifique. Ce qu'il y auoit de cruel pour luy , c'est que Lyfimene estoit plus irritée quand il faisoit bien les choses , que quand il les faisoit mal , de sorte que ce iour là elle auoit l'esprit fort aigri , car il est certain que tout ce que l'on seruit fut admirable , que la Musique fut fort bonne , & que Meleonte ne fit & ne dit rien de tout le iour qu'avec beaucoup d'esprit En effet comme on estoit assis dans ce magnifique vestibule où il faisoit plus frais que par tout ailleurs , il se tira fort bien d'une conuersation assez difficile , parce qu'il y auoit interest ;

car après plusieurs choses dont on auoit parlé sans s'y arrester, on vint à demander si les bien-faits faisoient plustost naistre l'amitié, que l'amitié mesme, ou que le grand merite sans bien-faits. le vous assure, dit alors Lysimene, que les bien-faits tous seuls ne font pas naistre vne grande tendresse dans le cœur de la pluspart des gens; car enfin pour l'ordinaire le souuenir des bien faits s'efface dans leur esprit, comme la douleur dans le cœur des personnes affligées, où chaque moment en dérobe vne partie. De sorte que le temps affoiblit & diminuë la reconnoissance, aussi bien que l'affliction. Oüy bien dans des cœurs ingrats, Madame, reprit Meleonte, mais non pas dans des cœurs genereux, qui sont toujours reconnoissans. Pour moy, reprit Zenocrate, quoy que ie ne sois

pas ingrat, & que ie ne veuille iamais l'estre, ie sens pourtant bien que si ie receuois des bien-faits d'une personne sans merite, l'amitié que i'aurois pour elle seroit plus en ma volonté, qu'en mon cœur. Mais si les bien-faits sans merite, reprit Amerinthe, ne peuuent faire naistre l'amitié, croyez vous aussi que l'amitié sans merite puisse en produire vne bien tendre? & pensez vous aussi que le merite tout seul sans amitié & sans bien-faits, puisse faire aimer tendrement? En verité, dit Andromire, si l'amitié ne se ioint au merite, & aux bien-faits, les bien-faits & le merite ne font pas vn grand effet. Mais le moyen, dit Meleonte, de n'aimer pas ceux qui nous seruent en toutes occasions, & qui nous font du bien en toutes rencontres? & le moyen encore de n'aimer pas, dit Amerin-

the, ceux qui nous aiment fort tendrement. Bien souuent ceux qui seruent, reprit Zenocrate, le font par vanité, quand ils ne sont pas honnestes gens; ainsi pourueu qu'on public leurs bien-faits, & qu'on soit prest à les seruir s'ils en ont besoin, ie croy qu'on peut ne les aimer pas sans estre ingrat. Car enfin l'amitié & la reconnoissance sont deux choses differentes, ainsi ie suis persuadé que l'on doit auoir de la reconnoissance pour tous ceux de qui on reçoit des bien-faits, & de l'amitié seulement pour ceux qui touchent nostre cœur, ou par leur merite, ou par leur amitié ou par nostre inclination. Mais aimerez vous des gens sans merite, reprit Andromire, encore qu'ils vous aiment, & ne seroit il pas plus iuste d'aimer ceux qui vous seruent. Pour moy, dit Lyfimene, si i'auois à aimer des gens de

peu de merite, ie penserois estre plus obligée d'aimer ceux qui m'aime- roient, que ceux qui me seruiroient; mais à n'en mentir pas, comme l'amitié n'est pas volontaire, on dispute en vain sur vne chose dont on n'est pas le maistre, & tout ce que l'on peut dire de raisonnable sur cela, c'est que le merite tout seul ne doit faire naistre que de l'e- stime, qui est tousiours vne grande disposition à l'amitié; que les bien- faits doiuent indispensablement at- tacher ceux qui les reçoient, aux interests de ceux de qui ils les ont receus; & mettre mesme du moins dans leur esprit vne espece de re- connoissance dont les effets ressem- blent fort à ceux de l'amitié; mais pour l'amitié toute seule sans me- rite & sans bien-faits, ie pense qu'il suffit d'auoir de la complaisance, & de la pitié pour ceux qui l'ont, car

de s'engager à aimer tous les gens sans merite, dont on pourroit estre aimée, ce seroit faire iniure à ses vrays Amis. Tout ce que vous dites est plein de beaucoup d'esprit, Madame, reprit Meleonte, mais enfin, ie connois bien que les seruices & le merite sont contez pour rien auprès de vous, si vostre inclination ne leur donne du prix. Ainsi, Madame, pour estre aimé de vous, il faut plustost chercher à vous plaire, qu'à vous seruir; mais le mal est qu'il est plus difficile de vous estre agreable, que de vous rendre quelque seruice. Je l'auouë, répondit-elle en se leuant, mais à mon auis tout le monde est de mon humeur, & ie n'en dois pas estre blasmée. Meleonte eut sans doute du chagrin de l'air dont la Princesse luy auoit répondu, mais il le dissimula, quoy qu'il fust tres-vio-

lent. Si bien que la Princesse malgré l'auersion qu'elle auoit pour luy, ne pouuoit s'empescher de trouuer qu'il agissoit comme vn honneste homme. De sorte qu'en ayant du dépit, & voyant que Zenocrate n'y prenoit pas garde, & ne s'auisoit pas ce iour là d'en auoir du chagrin aussi bien qu'elle, comme elle a l'esprit delicat, la bonne humeur de Zenocrate la facha. C'est pourquoy comme il voulut s'approcher d'elle pendant la promenade pour luy dire vn mot en particulier, elle l'en gronda; & luy dit qu'il l'aimoit si peu, qu'il n'auoit aucun dépit de voir que Meleonte ne faisoit rien qui ne fust tres bien. Je l'auouë, Madame, reprit Zenocrate tout surpris, que ie ne me suis pas auisé d'estre faché de ce que la Musique estoit bonne, & la colation magnifique, mais ie le suis presente-

ment des loüanges que vous donnez à mon Rival. Ha! Zenocrate, luy dit-elle en le quittant, ie ne vous sçay guere de gré d'une colere que ie fais naistre par force dans vostre cœur. Après cela elle appella Amerinthe plustost que d'estre seule avec luy; si bien que la cōuersation redeuint generale pour tout le reste du iour, sans que iamais Zenocrate püst luy dire vn mot en particulier. Au contraire Lyfimene pour éuiter cela, voulut qu'on examinast s'il estoit plus doux d'estre fort aimable, sans estre fort aimée, que d'estre fort aimée sans estre fort aimable. Mais après que chacun eut dit ses raisons, on conclut qu'il valloit mieux meriter d'estre aimée, & ne l'estre point, que d'estre aimée sans merite; mais on auoüa pourtant que comme pour l'ordinaire on souhaite principale-

ment d'estre aimable, pour estre aimée, il y a plus de plaisir à estre aimée, qu'à estre simplement aimable, puis qu'au lieu d'en auoir quelque satisfaction, on a du chagrin de viure avec des gens qui ne sçauent pas rendre iustice au merite. Mais enfin le soir approchant on se disposa à retourner à Leon-te. Il est vray que ce retour fut assez melancholique, Lysimene res-uoit, Meleonte estoit chagrin, Zenocrate estoit triste, Amerinthe s'ennuyoit, & l'on marchoit assez tristement, lors que le hazard ayant fait sortir vn ieune cerf d'entre des buissons, vn chien de chasse qui auoit suiuy l'Escuyer de Meleonte, se mit à chasser le cerf dans la plaine. De sorte que cette chasse inopinée ayant fait faire vn grand cry à toutes les Dames, qui estoient du costé que ce cerf estoit party, Ame-

rinthe voulut obliger Lysimene, qui estoit de l'autre costé, à tourner la teste pour voir ce ieune cerf qui couroit dans la plaine avec tant de vitesse. Mais la Princesse resuoit si profondement, que ne voulant pas interrompre sa resuerie, elle dit negligeamment à Amerinthe qu'elle ne verroit point la chasse, si la chasse ne passoit de son costé, sans qu'elle eust la peine de se tourner. A peine eut elle dit cela, que le hazard fit que ce ieune cerf pour suiuy par ce chien, ayant veu des gens qui venoient vers luy dans la plaine, tournant tout court, fut passer deuant la teste des chevaux du chariot de Lysimene, & fut enfin si prés d'elle, que cela parut vn enchantement à ceux qui auoient entendu ce qu'elle venoit de dire. De forte que Lysimene estant agreablement surprise

prise par cette auanture , ne put s'empescher de prendre plaisir à voir cette chasse , que le cas fortuit auoit faite. Elle ne dura sans doute pas long-temps , car comme il estoit desia assez tard , on perdit bien tost le Cerf de veuë , & le chien aussi. Mais enfin la nuit sauua la vie au ieune Cerf , & le chien fidele à son maistre , vint le reioindre deuant que nous fussions à Leonte. Cependant comme Zenocrate sçait assez bien profiter des occasions , il se souuint qu'il auoit veu chez vn de ses Amis particuliers vn ieune Cerf apriuoisé. Il fut donc le luy demander , & le lendemain à midy , après luy auoir fait mettre vn colier d'argent où il fit grauer les chiffres de la Princesse , il le luy enuoya avec des vers les plus iolis du monde. Il feignoit que ce ieune cerf parlant à Lysimene , luy

disoit plusieurs choses ingenieuses, qui ayant vn double sens, auoient du rapport à l'auanture de Zenocrate, & au malheur qu'il auoit eu de facher la Princesse ce iour là.

Mais ne vous souuient-il point des vers de ce ieune Cerf, interrompit Plotine, si ie m'en fusse souuenuë, reprit Amiclée, ie vous les aurois recitez, & tout ce que ie vous en puis dire, c'est qu'ils commençoient ainsi,

*Comme vn ieune Acteon, temeraire &
profane,*

*Ie vous suy pas à pas trop charmante
Diane,*

& qu'après auoir dit plusieurs choses ingenieuses ils finissoient ainsi,

*Mais si ie meurs enfin pour auoir veu
vos charmes,*

*Ie mourray sans regret, sans douleur &
sans larmes.*

Ie suis bien marrie de ne pouuoir vous en reciter dauantage, mais il faut que ie me contente de vous dire que comme cette galanterie plut fort à Lysimene, elle accepta le Cerf avec plaisir, elle pardonna à Zenocrate, & répondit mesme d'une maniere obligeante aux vers qu'il auoit faits au nom du ieune Cerf, qui fut bien tost vn des plus chers diuertissemens de la Princesse. En effet elle le mit dans les iardins du Palais, où il se rendit si familier & si aimable, qu'il estoit fort aisé de se resoudre à le flatter, pour plaire à Lysimene. Il fut mesme si glorieux des caresses qu'on luy faisoit, que contre la nature des Cerfs, il

deuint vaillant, & on la veu plusieurs fois non seulement attendre des chiens, mais aller vers eux, & les forcer à fuir. Quelques iours après cette galanterie, Zenocrate en fit encore vne autre; la Princesse estant partie de grand matin pour aller offrir vn Sacrifice dans vn Temple qui est assez esloigné de Leonte, elle ne voulut estre suiuite que de ses gens seulement. De sorte que Zenocrate ne pouuant souffrir que la Princesse fust depuis le matin iusques au soir sans entendre parler de luy, gagna vne de ses filles, & luy donna trois billets pour les luy faire rendre à diuerses heures de ce iour là. Et en effet n'y ayant que cette fille & moy dans son chariot, dès que nous fumes hors de la ville cette personne qui est d'humeur assez enioüée, & que la Princesse aimoit assez, luy

donna le premier billet, luy disant qu'elle l'auoit receu vn peu deuant que de partir. Comme Zenocrate luy escriuoit assez souuent elle ne fut pas surprise de ce premier billet; elle le prit donc, & l'ayant ouuert, elle voulut que ie le leusse en mesme temps qu'elle; de sorte que nous y trouuasmes à peu près ces paroles.



Z E N O C R A T E

A

L Y S I M E N E.

VOus pretendez donc, Madame, estre vn iour tout entier sans penser aux gens qui ne pensent qu'à vous, & vous croyez qu'on ne scauroit vous con-

traindre d'y penser malgré que vous en ayez. Mais vous verrez deuant que le iour se passe, que quand on sçait aimer, on trouue des inuentions dont les indifferens ne s'auissent iamais.

Après auoir leu ce billet, Lyfime ne s'imagina que Zenocrate croyoit qu'il suffiroit pour l'obliger à penser à luy tout le iour, mais elle fut bien surprise quatre heures après, de voir vn de ses esclaves, que cette fille de la Princesse auoit instruit, luy donner vn second billet de Zenocrate. Elle l'ouurit alors avec plus de precipitation que le premier, & y trouua ce que ie m'en vay vous dire.



ZENOCRATE

A

LYSIMENE.



Vous croyez peut-estre, Madame, qu'il n'y a que quatre heures que vous estes partie, mais ie vous iure que ie croy qu'il y a quatre siecles. En effet un moment d'ennuy, & d'ennuy causé par l'absence, paroist si long quand on aime, qu'il doit estre permis de le conter pour plus d'une année. Cependant vous contez les momens pour des momens, & les heures pour des heures. Encore si vous les employiez à penser à la constance de l'inconstant Zenocrate, ce seroit quelque chose, mais vous auez


Aa iiij

bien la mine, de ne songer qu'aux arbres, aux prez, & aux montagnes que vous voyez, pendant que ie ne songe qu'à vos charmes, qu'à vostre esprit, & qu'à mon malheur.

Et bien, Madame, dis-je à Lysimene, que dites vous de la galanterie de Zenocrate. Je dis, repliqua-t'elle, qu'il se diuertit à mes despens, car ie luy auois dit hier que ie ne me souuiendrois point de luy de tout le iour, & que ie ne voulois penser qu'au Sacrifice que j'allois offrir. Cependant il vient à bout de me forcer à penser à luy. En suite Lysimene voulut gronder cette fille qui estoit à elle, mais elle le fit si foiblement, qu'on vit bien qu'elle n'estoit pas trop marrie d'estre trompée. Bien tost après nous arriuasmes au Temple, le sacrifice fut offert, & après cela estant

allées chez le Sacrificateur; où la Princesse deuoit manger, vn inconnu, que cette mesme fille de la Princesse trouua en ce lieu là, donna vn troisieme billet à Lysimene, qui estant alors toute accoustumée, à en receuoir, le prit en riant, & me tirant à part, il faut auoüer, me dit-elle, que Zenocrate n'est pas trop sage. Vous feriez mieux, luy dis ie, de dire que Zenocrate, a bien de l'esprit, & de l'inuention. Après cela elle ouurit ce troisieme billet, qui estoit si ie ne me trompe de cette sorte.





ZENOCRATE


A

LYSIMENE.

PEut estre croyez vous, Madame, estre si loin de moy, que ie ne puis vous importuner; mais sçachez que quand vous iriez à l'extremité de la terre, mon amour vous suiuroit par tout, & qu'en quelque lieu du monde que vous fussiez ie trouuerois l'inuention de vous faire sçauoir que ie suis le plus amoureux de tous les hommes.

Du moins, dit la Princesse, après auoir leu ce billet, Zenocrate est-il le plus heureux, de trouuer vne personne qui ne se fache point de

ses folies. En suite nous parlames vn quart d'heure de luy fort obligemment, & nous rismes assez de cette galanterie, qui estoit d'autant plus ingenieuse, que Lysimene n'osoit refuser les billets qu'on luy presentoit, de peur de donner du soupçon à ses gens, ioint que leur innocente affection estant au point qu'elle estoit, il n'y auoit pas lieu de le pouuoir faire. Mais enfin nous partismes du Temple, & nous reprimes le chemin de Leonte. Mais comme nous fumes à moitié chemin, vn homme à cheual s'approchant du chariot de Lysimene luy donna vn quatriesme billet, après quoy il se retira, & la Princesse l'ayant ouuert y trouua ces paroles.



ZENOCRATE

A

LYSIMENE.



I vous croyez, que l'absence soit un remede à l'amour, vous vous trompez fort, Madame, car depuis que vous estes partie, il me semble que ie vous aime encore la moitié dauantage. Ie vous aimois pourtant hier plus que personne n'a iamais aimé, & ie suis assuré que ie n'ay surpassé que moy seul en vous aimant plus que ie ne faisois. Vous voyez, Madame, que malgré vous vous auez esté contrainte de penser quatre fois aujourdhuy au malheureux Zenocrate. De grace ne le forcez plus à

avoir recours à de semblables artifices; pensez y quelquefois volontairement afin qu'il vous en soit obligé; & s'il est possible faites vous un plaisir de la plus constante & de la plus respectueuse passion qui fut iamais; car enfin, Madame, quoy que ie puisse vous forcer de penser à moy, ie sens bien que ie ne puis vous contraindre de m'aimer, & que sans vous ie seray tousiours le plus miserable du monde.

Ce quatriesme billet estant leu, on peut dire que Zenocrate arriua à la fin qu'il s'estoit propofée. Car tant que le reste du chemin dura, nous ne parlâmes que de luy, & lors que nous approchâmes de Leonte, nous le vîmes qui ayant fait vne partie de promenade, exprés pour pouuoir rencontrer la Princesse, vint au deuant d'elle sur vn des plus beaux cheuaux du mon-

de. Il est vray qu'il ne put que luy faire la reuerence, & luy dire quatre ou cinq mots seulement, parce que le Prince & Meleonte reuenant de la chasse, parurent & vinrent à nous. Voila donc l'estat où estoient alors les choses; le Prince de Leon-te aimoit Amerinthe, qui le souffroit par interest, Amerinthe seruoit Meleonte autant qu'elle le pouuoit par la mesme raison; & parce qu'elle sçauoit bien qu'elle nuisoit à Lyfimene. Meleonte aimoit sans estre aimé, Zenocrate paroissoit inconstant, pour estre fidele à Lyfimene, & la Princesse aimant beaucoup plus Zenocrate qu'elle ne croyoit, souffroit fort impatiemment l'amour que Meleonte auoit pour elle, & enduroit agreablement celle de Zenocrate, quoy qu'elle ne fist rien du tout pour luy, que souffrir seulement d'en estre aimée en

Secret. En ce temps là, la Princesse de Leonte mere de Lysimene, fut passer vn mois à vne assez belle maison de campagne qui estoit à elle, où le Prince alloit quelquefois la visiter; mais où personne n'osoit aller sans luy, parce que la Princesse de Leonte auoit tesmoigné qu'elle y vouloit estre en solitude. Si bien que Meleonte & Zenocrate ne voyoient alors Lysimene que quand le Prince alloit voir la Princesse sa mere. Pour moy i'eus le bonheur de suiure Lysimene à ce petit voyage que ie trouuois fort agreable, parce que i'auois plus de temps à l'entretenir qu'à Leonte, & que sc̄achant tout le secret de son cœur, i'estois sa consolation dans ses chagrins. Comme elle connoissoit bien la malice d'Amerinthe, elle deffendit à Zenocrate de luy escrire aussi souuent qu'il

l'eust souhaité, de peur que quelqu'une de ses lettres ne fust perdue. & que cela n'acheuast de les rendre malheureux. Cependant comme l'oyfiueté de la campagne fait inuenter des plaisirs dont on ne s'auiseroit point en vn autre temps, la Princesse s'auisa vn soir de s'aller promener à cheual, suiuite de deux de ses filles, & de moy seulement, dans vne grande prairie qui a vne riuiere d'vn costé, & vn bois de l'autre, sans auoir auprès d'elle que quatre ou cinq esclaves seulement. Mais à peine fusmes nous en cét endroit que nous vismes sortir du bois six hommes à cheual, qui vinrent vers nous, & qui auoient apparemment dessein de voler les pierreries dont la Princesse estoit parée ce iour là, ou de l'enleuer, car ils vinrent à nous d'vn air qui nous fit comprendre que leur dessein n'estoit pas bon.

bon. Cét obiet surprenant estonna fort la Princesse, car ne se voyant que des esclaves auprès d'elle, qui n'ayât point d'armes s'enfuirent, elle eut grand peur qu'il ne luy arriuaft quelque facheuse auanture. Mais dans ce mesme instant nous vismes paroistre par vn autre endroit du bois, vn homme à cheual, ieune & admirablement bien fait, suiuy de trois autres qui sembloient estre à luy, qui voyant la mine, & l'action de ces voleurs, & l'air & l'équipage de la Princesse, ne hesita pas vn moment sur ce qu'il deuoit faire, & mettant l'espée à la main, il se ietta courageusement entre Lyfimene & les voleurs. Cette action de courage surprit sans doute ceux qui nous vouloient attaquer; mais cela ne les fit pourtant pas fuir. Au contraire en estans plus irritez, ils voulurent l'enveloper,

& le tuer, mais il leur apprit bien tost à leur despens, que sa valeur estoit plus redoutable que la leur. D'abord ils luy tuerent vn des siens, mais vn moment après il en tua deux des leurs, en bleffa trois, & les mena battant iusques dans le bois, où ils furent contrains de se retirer. Après quoy venant retrouver Lysimene de fort bonne grace, il luy offrit de l'accompagner où il luy plairoit. Vous pouuez iuger de quel air obligeant la Princesse receut cét aimable inconnu. Qui que vous soyez, luy dit-elle, ie vous promets mon amitié pour toute ma vie, car le service que vous m'avez rendu est si considerable, que ie ne veux pas attendre que ie sois obligée de vous l'accorder par la connoissance que j'auray de vostre merite. Ce que vous me dites est si obligeant, re-

prit ce vaillant inconnu, que ie
me tiens trop recompensé. Ie vous
assure pourtant, adiousta t'il, que
i'ay lieu d'esperer que vous ne vous
repentirez pas de me l'auoir dit,
quand vous me connoistrez plus
particulierement, & ie vous assure
en mesme temps, que vous sçaurez
bien tost qu'il n'y a point de vani-
té à parler comme ie fais. Après
cela Lysimene reprit le chemin du
chasteau, où la Princesse de Leon-
te après auoir esté instruite de ce
qui s'estoit passé, receut cet incon-
nu avec beaucoup de ciuilité. Dés
que cette Princesse le vit, elle sen-
tit vne émotion extraordinaire, &
elle le regarda avec plaisir & avec
attention. Il luy sembla mesme
qu'elle auoit veu autrefois quelque
chose qui luy ressembloit, & ne
pouuant s'empescher de soupirer
en le regardant, de grace, luy dit,

elle, genereux inconnu, apprenez moy d'où vous venez. Je viens presentement de Phenicie, Madame, luy dit-il. Mais estes vous né en ce pays là, repliqua-t'elle, & qui vous a appris à parler si bien le langage de celuy cy. C'est vn secret, Madame luy répondit-il, que ie ne puis vous dire qu'en particulier, & que ie meurs pourtant d'enuie de vous apprendre. Après cela cette Princeesse le mena dans son cabinet, pendant que Lysimene estoit allée dans sa chambre pour se remettre vn moment de la frayeur qu'elle auoit eüe. A peine y fut-il, que ce vaillant inconnu prenant la parole, & la regardant avec respect, quoy, Madame, luy dit-il, vous pouuez ne connoistre pas le malheureux Artemidore, à qui vous auez donné la vie. Je n'estois sans doute qu'un enfant lors que les Pi-

rates m'enleuerent, mais ie me sou-
uiens si precisement de tout ce que
i'ay veu icy, que quelque change-
ment que le temps ait apporté à
mon visage, il me semble qu'il vous
est aisé de remarquer que i'ay l'hon-
neur d'estre vostre fils. Ha! Arte-
midore, luy dit-elle en l'embras-
fant, mon cœur vous a plustost
connu que moy, & depuis vn mo-
ment que ie vous considere mieux,
ie voy dans vos yeux vne preuue
indubitable de la verité de vos pa-
roles. Si vous en doutez, Madame,
luy dit il, ie vous rediray les mes-
mes mots que vous me dites en
particulier dans vostre cabinet lors
que ie partis avec Cleanthe pour
aller en Grece. Allez mon fils, me
dites vous, allez apprendre en vn
pays estrangier à vous faire estimer
dans le vostre quand vous y reuien-
drez, & s'il est possible n'y reuenez

point que vous ne puissiez effacer par vostre merite celuy des plus honnestes gens que vous y trouuez. Si i'auois pû, Madame, reprit-il, vous donner vne marque plus precise de ce que ie suis, ie pense que ie ne vous aurois pas fait souuenir de ce genereux commandement que vous me fistes, parce que i'auoüe à ma confusion, que ie n'ay pû deuenir tel que vous m'auiez commandé d'estre. Cependant ie puis vous assurer, que ce n'est pas la faute du sage Cleanthe, car il n'a rien oublié pour me rendre digne d'estre vostre fils. Mais où est Cleanthe, reprit la Princesse de Leonte, & en quels lieux auez vous passé vostre vie. Pour Cleanthe, reprit-il, i'espere qu'il fera bien tost icy, & pour nostre auanture ie vous la diray en peu de mots. Vous scauez, Madame, que nous nous em-

barquasmes pour aller en Grece, & vous n'avez sans doute pas ignoré que des Pirates nous prirent. Mais vous n'avez pas sceu qu'ils nous vendirent à d'autres, qui nous menerent en Phenicie. Comme ie n'estois pas defagreable en mon enfance, on m'acheta pour me donner à la Reine de ce pays là. Mais pour Cleanthe, il fut vendu à vn Sacrificateur du Temple de Neptune à Tyr, qui ayant bien tost remarqué sa sagesse & sa capacité, propofa au Roy de Phenicie de le mettre auprès des ieunes Princes ses enfans, qui font affurement deux des Princes du monde les mieux faits, & les plus accomplis. L'aîné regne presentement avec toute la gloire imaginable, & le plus ieune est l'ornement & les delices de cette Cour là. D'abord Cleanthe n'osant dire qui i'estois, dit que i'estois son fils; de

forte que me remettant alors sous sa conduite, il eut autant de soin de moy que des ieunes Princes, auprès de qui il fut mis pour leur enseigner diuerses choses. Quelque temps après pensant auoir donné assez de preuues de sa probité, & rendu assez de seruice pour obtenir ce qu'il desiroit, il se confia au Roy, luy dit ma naissance, & luy demanda la liberté de me ramener icy. Mais en cette occasion, la vertu & le merite de Cleanthe, furent vn obstacle inuincible à son dessein, car le Roy de Phenicie crut qu'il estoit si necessaire à l'education des deux ieunes Princes, qu'encore qu'il ne doutast pas de ses paroles, il feignit d'en douter, & luy dit à la fin que quoy qu'il en fust, il ne luy donneroit pas la liberté de partir de sa Cour, que les Princes ses fils ne fussent en âge

de n'auoir plus besoin de ses enseignemens. Le Roy de Phenicie enuoya les Princes ses fils, Cleanthe & moy dans vne tres-belle maison, où nous auons esté long-temps. En suite nous reuinmes à la Cour, mais sans aucune liberté, & nous y auons vescu de cette sorte, iusques à la mort du Roy de Phenicie. Après quoy le Prince son fils qui regne aujourd'huy, pour recompenser Cleanthe des seruices qu'il luy a rendus, luy a permis de me ramener icy, à condition qu'il retournera le trouuer. Cependant comme il nous auoit donné vn vaisseau pour reuenir, nous nous en sommes seruis pour aller en Grece, afin de suiure l'intention que vous auiez euë, que ie visse ce pays là. En suite de quoy nous estant rembarquez à Corinthe, & nostre vaisseau s'estant ioint à vn

vaisseau marchand, qui deuoit tenir la mesme route que nous, il arriua malheureusement vn iour que Cleanthe estant vn matin passé dans ce vaisseau pour visiter celui qui le commandoit, qui estoit tombé malade, vne tempeste qui s'esleua tout d'un coup, nous separa de telle sorte, que n'ayant pû nous reioindre, ni seulement nous reuoir, ie suis abordé au port le plus proche d'icy, où ie veux esperer que Cleanthe reuiendra bien tost. Artemidore ayant acheué de parler, la Princesse de Leonte luy fit mille caresses, mais après cela elle luy dit qu'il estoit à propos d'attendre à le faire connoistre au Prince son frere, que Cleanthe fust arriué. Car enfin, adiousta-t'elle, comme nous auons des sentimens differens en plusieurs choses, ie feray bien aise que vostre reconnois-

fance ne porte pas sur mon rapport
seulement, & que Cleanthe qui est
reconnu pour vn homme de la
plus grande probité, confirme tout
ce que ie diray. Nous en vserons
comme il vous plaira, reprit Ar-
temidore, mais ie me souuiens
de tant de choses particulieres que
le Prince mon frere m'a dites du-
rant mon enfance, que ie ne croy
pas qu'il puisse les auoir toutes ou-
bliées. Croyez moy, Artemidore,
reprit cette Princesse, ne vous fiez
point à sa memoire, & attendons
Cleanthe. Mais, Madame, reprit
Artemidore, si Cleanthe auoit fait
naufrage, il faudroit bien se pas-
ser de luy. Quand ce malheur là
seroit arriué, repliqua-t'elle, nous
ferions alors tout ce que nous pour-
rions faire aujourd'huy. En suite
de cela, Artemidore demanda du
moins permission à la Princesse de

Leonte, de se faire connoistre à Lysimene; & en effet sans differer davantage, cette Princesse escriuit trois ou quatre lignes dans ses Tablettes, qu'elle donna à Artemidore, pour les luy donner. Artemidore fut donc trouuer Lysimene, & l'ayant suppliée qu'il pust luy parler sans estre entendu que d'elle, & cette Princesse s'estant retirée dans son cabinet, il luy donna les Tablettes de la Princesse de Leonte, où elle ne trouua que ces paroles.

Celuy que vous voyez est Artemidore, que vous m'auiez tant veu regretter; aimez le comme vne bonne sœur doit aimer vn frere, & ne dites rien à personne de ce grand secret.

D'abord Lysimene ne scauoit si elle deuoit croire ce qu'elle lisoit, mais Artemidore luy parla d'une

maniere si pleine de tendresse, que se laissant persuader tout d'un coup, elle embrassa le Prince son frere avec tous les tesmoignages de ioye, & d'amitié imaginable, & elle le fit d'autant plus tendrement, que dans cét instant elle regarda Artemidore comme vn Protecteur qui pourroit s'opposer à la violence que le Prince luy vouloit faire pour la contraindre d'espouser Meleonte. Comme la porte de son cabinet estoit ouverte, vne fille qui estoit à la Princesse, & que Meleonte auoit gagnée, vit les caresses que Lysimene fit à Artemidore, qu'elle attribua pourtant alors au seruire qu'elle en auoit receu. Cependant Artemidore deffendit aux siens de dire son nom à personne, & vescu comme vn estrangier inconnu dans ce Chasteau. Il est vray que comme Lysimene me faisoit l'honneur

de n'auoir point de secret pour moy, elle me dit ce qui s'estoit passé, & me demanda conseil si elle deuoit l'escire à Zenocrate. Mais comme ie sçauois que les lettres sont exposées à mille accidens, ie luy dis que non seulement ie ne luy conseillois pas de l'escire, mais que ie trouuois encore qu'il y auoit de la prudence à ne luy en dire rien, quand mesme il viendrait avec le Prince, & qu'il valloit mieux qu'il ne le sceust qu'avec les autres, de peur que ne pouuant s'empescher d'en dire quelque chose, cela ne pust nuire à la reconnoissance d'Artemidore. Et en effet la Princesse me creut. Cependant le bruit de l'accident qui luy estoit arriué, & du secours qu'un inconnu luy auoit rendu, fut bien tost sceu de tout le monde. Le Prince de Leonte s'estant vn peu blessé à la chasse, ne

put pas faire vne visite à la Prin-
cesse sa sœur en cette occasion,
mais pour fauoriser Meleonte il
l'y enuoya. Ainsi Zenocrate eut la
douleur de voir aller son Riual vi-
siter Lysimene, sans l'y oser suiure.
Comme Artemidore est admirable-
ment bien fait, Meleonte ne le vit
pas plustost qu'il fut faché, que Ly-
simene eust eu vn protecteur de si
bonne mine. Ce premier sentiment
ne fut pourtant rien d'abord, &
ne fit que passer dans son esprit.
Au contraire il loüa Artemidore,
il le remercia mesme au nom du
Prince, & en suite au sien, du se-
cours qu'il auoit donné à la Prin-
cesse. Artemidore répondit à tout
ce que luy dit Meleonte, d'vn air
si noble & si galant, que cét A-
mant de Lysimene en fut surpris,
mais il le fut bien dauantage lors
qu'ayant adroitement entretenu vn

demy quart d'heure dans vne allée du iardin, cette fille de Lyfimene qui estoit dans ses interests, il apprit par elle que depuis quatre iours que cét inconnu estoit dans ce Chasteau, il auoit presque tousiours esté en conuersation particuliere avec Lyfimene, ou avec moy. Elle luy conta mesme comme elle auoit veu cette Princesse l'embrasser avec tendresse, & elle luy dit en suite qu'elle n'auoit iamais veu vne si forte inclination en personne. Que dés que la Princesse estoit éueillée, elle enuoyoit scauoir des nouvelles de cét inconnu, qu'il la voyoit habiller, & qu'il estoit dans sa chambre iusques à ce qu'elle fust presté de se mettre au lit. Et en effet quoy que ie trouuasse qu'il falloit mieux feindre que cela, Lyfimene ne m'auoit pas voulu croire, se fiant sur ce qu'il n'y auoit que ses gens, &

ceux

ceux de la Princesse de Leonte dans ce Chasteau. Cependant le discours de cette fille mit d'estranges sentimens dans l'esprit de Meleonte, qui ne scauoit que penser. Il s'auisa donc pour esloigner cét inconnu de Lysimene, de proposer à la Princesse de Leonte de le mener au Prince, mais elle luy dit qu'elle l'y meneroit elle mesme, quand elle retourneroit à Leonte, & que cependant cét inconnu attendroit son équipage en ce Chasteau. Meleonte insista quelque temps, mais voyant que c'estoit inutilement, il cessa de s'opiniastrer, & s'en retourna avec vne grande disposition à estre jaloux. A son retour il dit ce qu'il auoit dans le cœur à Amerinthe, qui luy promit de venir où nous estions, & d'observer si bien toutes les actions de Lysimene, & celles de cét inconnu, qu'elle découueroit la

verité. Amerinthe vint donc visiter la Princesse de Leonte sur le pretexte de l'accident arriué à Lysimene, mais comme elle vouloit auoir du temps pour s'esclaircir, elle feignit de se trouuer mal dés qu'elle fut arriuée, & fut quatre iours avec nous. De sorte qu'ayant l'esprit fin & malicieux comme elle là, elle remarqua bien tost qu'il y auoit vne grande amitié entre Artemidore & Lysimene. Elle y vit de la familiarité & de l'intelligence, & ie ne scay quoy de plus libre & de plus esgal entre eux, que ce qui deuoit estre entre vn inconnu & la Princesse. Cependant comme Artemidore luy plut fort, & qu'elle ne vouloit pas que rien eschapast à sa beauté, elle fit ce qu'elle put pour luy donner de l'amour; mais le cœur d'Artemidore n'estoit pas disposé à estre blessé

par ses beaux yeux. Joint que ce Prince ayant sceu par Lyfimene, que le Prince de Leonte estoit fort amoureux d'Amerinthe, songea à se deffendre de ses charmes. Amerinthe reconnoissant donc bien que ses attraits ne faisoient pas l'effet qu'elle vouloit, crut que c'estoit qu'il estoit desia amoureux de Lyfimene. De sorte qu'ayant l'esprit aigri de ne pouuoir conquerir le cœur de cét inconnu, elle observa la Princesse avec plus de soin, elle expliqua en mal tout ce qu'elle vit, elle crut mesme voir ce qu'elle ne voyoit pas, & elle fit mesme dessein de dire encore bien des choses qu'elle ne croyoit pas auoir veuës. Elle dit donc à son retour à Meleonte, qu'elle trouuoit que cét inconnu estoit vn homme tres-beau, & tres bien fait, qui auoit de l'amour pour Lyfimene, adiou-

stant qu'elle craignoit fort que Ly-
simene n'en eust aussi pour luy. El-
le luy dit encore qu'elle auoit sceu
qu'ils estoient tres-souuent en par-
ticulier, que dès le matin il auoit
la liberté d'entrer dans sa chambre,
qu'il y estoit fort tard le soir, qu'ils
se regardoient souuent avec intel-
ligence, qu'ils auoient cent petits
secrets à se dire, & elle inuenta que
se promenant dans le iardin avec
eux, elle auoit veu au destour d'v-
ne palissade, cét inconnu baiser la
main de Lyfimene, sans qu'elle s'en
fust offencée. Vous pouuez iuger
quel effet fit ce rapport dans le
cœur de Meleonte. Il fut tel que
la ialousie s'emparant de son esprit,
& son humeur violente estant fort
propre à luy faire entreprendre les
choses les plus importantes avec
precipitation, il obligea Amerin-
the à dire au Prince tout ce qu'el-

le luy auoit dit, luy promettant de faire en suite tout ce qu'il pourroit pour la faire Princesse de Leonte. Amerinthe qui auoit de l'ambition, de l'enuie & de la haine, se laissa persuader aisement, & dit au Prince de Leonte tout ce qu'elle auoit dit à son fauory. Il ne le sceut pas plustost qu'il eut vne colere horrible contre Lysimene, & sans approfondir les choses, il fit dessein d'aller promptement au Chasteau où estoit la Princesse sa mere, afin d'en faire partir cet inconnu. Et en effet après auoir consulté avec Meleonte, ils partirent à la pointe du iour, car ce Prince estoit alors entierement guery. Il mena ses gardes seulement, & huit ou dix hommes de qualité, entre lesquels Zenocrate estoit, qui de son costé auoit quelque inquietude, car la bonne mine, l'esprit, & la valeur

de l'inconnu, faisoient alors grand bruit dans la Cour. Mais comme le hazard fait des choses fort extraordinaires, lors que le destin a resolu de faire arriuer quelque accident surprenant, la Princesse de Leonte estoit partie ce matin là, pour aller offrir vn Sacrifice à Diane, dans vn Temple qui estoit à cinq ou six mille de ce Chasteau. Lysimene s'estant trouuée vn peu mal la nuit, ne l'auoit pas accompagnée; Artemidore n'y estoit point allé non plus, & i'estois aussi demeurée pour tenir compagnie à Lysimene. Mais du reste presque tout le monde auoit suiuy la Princesse, ainsi il y auoit alors tres-peu de gens dans cette belle maison. Dés que la Princesse fut hors du lit, ses femmes commencerent de la coiffer, mais les tresses de ses beaux cheueux furent à peine defaites,

qu'Artemidore estant entré dans sa chambre, voulut luy montrer vne lettre du sage Cleanthe, qu'il venoit de receuoir, qui luy apprenoit qu'il arriueroit bien tost, & peut-estre le mesme iour. De sorte que ne voulant pas la lire deuant ses femmes, cette Princesse sans continuer de se coiffer, passa dans son cabinet avec Artemidore. Cependant se mettant insensiblement à parler de plusieurs choses, la Princesse oubliâ qu'elle n'estoit pas coiffée, & s'entretint assez longtemps avec le Prince son frere. Si bien que cette fille, qui estoit d'intelligence avec Meleonte, s'ennuyant, laissa ses compagnes attendre que la Princesse sortist de son cabinet, & s'alla promener au delà de la premiere cour du Chasteau, où il y a vne des plus belles routes qu'on puisse voir. Pour

moy i'estois alors dans ma chambre, appuyée sur vne fenestre qui donnoit sur vne des plus belles cours du monde, car elle est grande & quarrée, toute pavée de marbre blanc, environnée de batimens magnifiques, & ayant vn piedestal au milieu, sur lequel sont les trois Graces representées, s'entretenant par les mains comme de ieunes Bergeres en dançant. Mais cela avec tant d'art, que ces trois figures font vn obiet admirable au milieu de cette belle cour. Après auoir donc resué quelque temps, à vne fenestre de ma chambre, comme ie vous l'ay desia dit, ie m'en retiray & me mis à lire. Cependant cette fille que ie vous ay dit qui s'estoit allée promener au delà de cette superbe cour, n'y fut pas plustost qu'elle vit arriuer le Prince & Meleonte, qui fut droit à elle, pour

ſçauoir ce que faisoit la Princesse, & pour l'empescher de l'aller aduertir que le Prince venoit. De sorte que cette fille luy disant la verité, luy apprit que la Princesse de Leonte estoit partie dès le matin, & que la Princesse Lyſimene qui ne l'auoit pas voulu ſuiure, dès qu'elle auoit esté hors du lit, estoit entrée à moitié decoiffée dans son cabinet avec Artemidore, où elle croyoit qu'ils estoient encore en grande familiarité & en grande conference. Meleonte n'eut pas pluſtoſt appris cela, que retournant au Prince, & luy disant ce qu'il venoit d'apprendre, & l'animant contre la Princesse sa ſœur, ſans conſiderer l'eſclat qu'il alloit faire, ni les ſuites de ce qu'il alloit entreprendre, il commanda à ſes Gardes de ſ'assurer de toutes les portes de la premiere cour. Après quoy le

Prince de Leonte entra dans cette cour magnifique, & fut droit vers le perron du Chasteau. Mais comme cela ne se put faire sans faire quelque bruit, la Princesse estant aduertie de son arriuee, dit à Artemidore qu'il sortist de son cabinet, & qu'il allast au deuant du Prince à qui Meleonte qui l'auoit desia veu le presenteroit. Car enfin, luy dit elle, puis que Cleanthe doit bien tost arriuer, il ne faut pas encore songer à vous faire connoistre, principalement la Princesse ma mere n'estant pas icy. En effet Artemidore passant par vne porte desrobée, sortit dans la cour, mais comme ce lieu par où il sortit, fit connoistre au Prince que la fille de la Princesse n'auoit pas menty, & que de plus il auoit veu par les fenestres du cabinet de Lyfimene (car l'appartement de la Princesse estoit

en bas) avec quelle precipitation elle auoit fait fortir cét homme de bonne mine, il ne douta pas qu'elle ne fust tres-coupable, & que l'affection qu'elle auoit pour luy ne fust criminelle. Si bien que sans considerer rien que le desir de punir la Princesse, & de satisfaire Meleonte, dés qu'Artemidore fut dans la cour, il regarda le violent Meleonte, qui transporté de colere, de ialousie & de fureur, Ha! Seigneur, dit-il au Prince, permettez moy de punir l'audace de cét inconnu, qui vient insolemment vous faire vn outrage. Si vous me connoissiez bien, reprit Artemidore sans s'emouuoir, vous verriez que ce seroit à moy à demander iustice au Prince, de l'insolence que vous auez. Le Prince de Leon-te s'irritant alors tout d'vn coup, & croyant que cét inconnu vouloit

faire l'homme de qualité, pour sau-
uer sa vie, commanda brusque-
ment à ses Gardes de se saisir de luy,
après quoy il s'en alla vers le per-
ron, suiuy de Meleonte, de Zeno-
crate, & de plusieurs autres. Arte-
midore voulut alors luy parler, mais
il ne fut point entendu, si bien
que voyant plusieurs des Gardes
du Prince l'espée à la main à l'en-
tour de luy, il ne fut pas maistre
de sa colere, & ne put s'empescher
de tirer aussi son espée, & de les
escarter si brusquement, qu'un de
ses Gardes s'estant enferré de luy-
mesme dans l'espée d'Artemidore,
tomba mort en vn instant. De for-
te que ces compagnons ayant fait
vn grand cry, & l'ayant tous en-
semble pressé fort viuement, il ga-
gna ce pied destal, sur lequel es-
toient les trois Graces, afin de n'e-
stre pas enuélépé, & de n'estre at-

taqué que par deuant. Ces Gardes firent encore vn grãd cry, auquel ayãt quitté ma lecture, ie mis la teste à la fenestre, & ie vy vn obiet le plus funeste du monde, car ce paué de marbre blanc estoit marqué de sang en plusieurs endroits; Artemidore auoit encore tué deux autres Gardes, dont les corps estoient espars à l'entour de ce vaillant Prince, qui se deffendoit comme vn Lyon. Cependant tous les Gardes qu'on auoit laissez aux portes, les quitterent pour venir vanger la mort de leurs compagnons. Meleonte, Zenocrate, & tous les autres, & mesme le Prince retournerent sur leurs pas, surpris de la valeur de cét homme, qui se deffendoit si bien, & qui d'abord tua vn frere de Meleonte qui s'auança vers luy, mais il faut dire à la loüange de Zenocrate, que

quoy que la ialousie s'emparast alors
fortement de son esprit, il desfa-
prouua hautement cette violence,
& en dit ses sentimens au Prince,
qui ne les voulut pas écouter. Ce-
pendant tout ce qu'Artemidore di-
soit pour se faire connoistre n'e-
stant pas entendu, il n'auoit nul
recours qu'à sa valeur. Il est vray
qu'elle estoit telle, que pas vn n'o-
soit l'approcher, aussi quelques-
vns des Gardes sans ordre du Prin-
ce, luy tiroient des fleches, & les
autres luy lançoient des iauelots,
quoy que le Prince & Zenocrate
les en voulussent empescher; car
pour Meleonte, dans la fureur où
il estoit alors, il ne souhaitoit que
la mort d'Artemidore, qu'il croyoit
estre son Riual, & son Riual fauo-
risé. Pour moy ie l'auouë à ma con-
fusion, i'estois dans vn estonne-
ment si grand, & ie fus faisie d'v-

ne frayeur si excessiue, que ie ne pouuois ni parler, ni changer de place. Pour la Princesse elle fut plus vaillante que moy, car lors qu'elle vit tant d'espées tournées contre Artemidore, qui estoit legerement blessé à la main gauche, tant de fleches tirées sur luy, & que personne n'entendoit ce qu'il disoit, voyant, dis-je, qu'encore que par son adresse, son courage, & son agilité, il fist reculer ceux qui l'attaquoient, & qui n'osoient approcher plus près que iusques aux corps de ceux qu'il auoit tuez, il seroit impossible qu'il ne succombast, elle sortit en diligence après qu'elle fut reuenüe de son premier estonnement, & sans considerer qu'elle n'auoit qu'une simple robe volante d'une estoffe blanche, & fort legere; qu'elle auoit la gorge à demy nuë, les cheueux espars, &

les bras découverts, elle sort du perron, traaverse tous ces gens armez, s'expose aux coups de fleches & de iauelots, & faisant honte par sa rare beauté aux Graces au pied desquelles Artemidore deffendoit si vaillamment sa vie, elle se mit entre ce vaillant Prince, & ceux qui l'attaquoient, voulant par cette action genereuse faire cesser le combat, & faire connoistre Artemidore au Prince son frere. En effet tous ces fiers assaillans suspendirent d'abord leur fureur à son aspect, mais comme cette action fut prise par le Prince, par Meleonte, & par Zenocrate, pour vn grand tesmoignage d'amour pour Artemidore, cela produisit des effets bien differens. Car le Prince redoublant sa fureur, ha! infame sœur, s'escria-t'il, qui viens deffendre ton indigne Amant à mes yeux, il faut que

te te punisse de ta lascheté. A ces mots il s'auança vers elle l'espée à la main, & l'eust tuée infailliblement, si l'amoureux Zenocrate tout irrité, & tout ialoux qu'il estoit, ne se fust eslançé par vn excez d'amour, entre le Prince & Lysimene. Artemidore de son costé voulut faire la mesme chose, mais dans ce moment là, Meleonte à qui la genereuse action de la Princesse auoit redoublé la ialousie, & la fureur, prit vn arc des mains d'vn Archer, qu'il tira avec precipitation, mais au lieu de tuer Artemidore, comme il en auoit le dessein, il blessa dangereusement Lysimene à la gorge, & la mesme fleche après l'auoir blessée en passant, alla malheureusement s'enfoncer dans le corps de Zenocrate, car Meleonte auoit tiré du costé droit au costé gauche, de forte que tombant tous

deux de ce coup, on peut dire que Lyfimene sentit la plus aigre douleur qui fut iamais, car elle ne se vit pas en estat d'empescher Artemidore de perir par les mains de son frere. Elle vit son cher Zenocrate blessé pour l'amour d'elle, & elle connut par quelques paroles qu'il dit en tombant, qu'il la soupçonnoit d'estre infidele. D'autre part Artemidore estant transporté de douleur de voir Lyfimene blessée, sans plus songer à se deffendre, voulut releuer cette Princesse, mais le ialoux Meleonte desesperé d'auoir frappé sa Maistresse, & de n'auoir pas blessé Artemidore plustost que Zenocrate, qu'il ne regardoit plus comme son Riual il y auoit long-temps, voulut tuer ce vaillant Prince. Mais dans cét instant la Princesse de Leonte reuenant du Temple de Diane d'vn costé avec

tout son train, & le sage Cleanthe arriuant de l'autre, retint la fureur de tant de gens irritez. Vous pouuez iuger quelle surprise fut celle de la Princesse de Leonte de trouuer le Prince & Meleonte les armes à la main; tant de gens tuez; Artemidore blessé, & Zenocrate & Lysimene prests de mourir, car la perte du sang osta la parole à tous les deux. Pour Cleanthe dès qu'il parut, & qu'il vit cét estrange spectacle, il fut droit au Prince, & luy parlant avec l'authorité d'un homme qui l'auoit instruit dans sa ieunesse, quoy, Seigneur, luy dit-il, ie vous trouue les armes à la main contre le Prince Artemidore vostre frere. Ces paroles firent rougir le Prince, & passer Meleonte, qui s'estoit approché, pendant qu'Artemidore après auoir trauersé la foule estoit allé rendre conte à la

Princesse sa mere, de ce qui venoit d'arriuer. Le discours de Cleanthe, que le Prince reconnut fort bien, l'estonna estrangement, car il scauoit qu'il n'y auoit pas moyen de douter de sa probité. Neantmoins ne pouuant se resoudre tout d'un coup à croire ce qu'il luy disoit; quoy, luy dit-il, celui que ie voy est mon frere, & ce frere est Amant de ma sœur. Non, Seigneur, dit alors Artemidore qui conduisoit la Princesse sa mere, & si vous m'eussiez voulu escouter, vous n'aurez rien fait de tout ce que vous venez de faire, & vous ne m'aurez pas contraint de tuer des malheureux que ie ne connoissois pas. Ha! mon fils, s'escria la Princesse de Leonte, en parlant au Prince, que vous estes coupable, & que ie suis malheureuse. Cependant, adioustelle, laissez moy en paix dans ce

desert, essayez de sauuer la vie de ma fille, & soyez fortement persuadé qu'Artemidore est vostre frere. Il s'est fait connoistre à moy d'abord; vostre sœur a sceu de ma bouche ce qu'il luy est, & si ce n'eust esté que ie voulois attendre l'arriuée de Cleanthe, vous eussiez esté instruit de la verité. Cleanthe ayant adiousté beaucoup de choses pour faire reconnoistre Artemidore, & le Prince l'ayant mieux regardé, le reconnut pour son frere par ses propres yeux; de sorte qu'estant fort honteux de son action, il luy en demanda pardon. Seigneur, reprit Artemidore, ie suis tout prest d'oublier l'iniure que vous m'avez faite, mais ie vous supplie que celuy qui a blessé la Princesse ma sœur, ne paroisse plus deuant mes yeux, car tout le respect que ie vous porte, ne pour-

roit m'empescher de le punir d'une si estrange action. Durant cela comme i'estois descenduë, dès que i'auois veu la Princesse, i'estois à genoux auprès d'elle, pour tacher de la faire reuenir. Meleonte desesperé de ce qu'il auoit fait, vint mesme pour m'aider à la soustenir, mais comme i'allois le repousser, il entendit ce que disoit Artemidore. De forte que sa fureur redoublant, vous auez raison, Seigneur, luy dit-il, vous auez raison, & pour vous tesmoigner que ie me trouue aussi coupable que malheureux, iugez de quoy vn genereux repentir est capable. En disant cela il se voulut donner d'un poignard dans le cœur, mais le Prince qui l'aimoit fort retenant vne partie de son impetuosité en luy saisissant le bras, le poignard n'enfonça pas autant qu'il

vouloit, mais ce fut tousiours af-
 fez pour donner quelque pitié à ce-
 luy mesme qu'il auoit voulu tuer.
 Cependant la Princesse ayant fait
 porter Lysimene sur son lit, &
 donné ordre qu'on eust soin de
 Zenocrate, & qu'on ostant les morts
 qui estoient dans la cour, le Prin-
 ce donna Meleonte en garde à trois
 ou quatre des siens, & le fit con-
 duire dans vn pauillon, qui estoit
 à vn bout du iardin, où on le me-
 na malgré qu'il en eust, car il vou-
 loit mourir, & ne pouuoit souffrir
 qu'on voulust le faire viure. Ce-
 pendant Cleanthe entretenant le
 Prince, & employant toute sa pru-
 dence à luy persuader qu'Artemi-
 dore ne se souuiendrait point de
 ce qui s'estoit passé, luy mit l'e-
 prit en assez bon estat, & luy con-
 seilla de s'en retourner le soir à
 Leonte, & d'y remener celuy qui

auoit blessé Lyfimene, en pensant tuer Artemidore, iusques à ce que ce premier trouble fust appaisé, & que l'on vist ce qui arriueroit de la blessure de Lyfimene, & de celle de Zenocrate, car pour le Prince Artemidore, celle qu'il auoit receuë à la main gauche estoit fort legere. Et en effet ce Prince suiuant les conseils du sage Cleanthe, pour qui il auoit conserué du respect, s'en alla dés qu'il sceut que Lyfimene estoit reuenue de son éuanouïissement, & fit mettre Meleonte dans vn chariot, après qu'il l'eut fait penser par force, laissant ordre à Cleanthe de dire à la Princesse sa mere, au Prince Artemidore, & à Lyfimene, tout ce qu'il iugeroit à propos de leur dire pour leur adoucir l'esprit, quoy qu'à parler sincerement ce Prince ne creust pas estre coupable d'autre chose que

de precipitation. Et pour l'action de Meleonte, il la regardoit comme vne violence que l'amour & la ialousie pouuoient faire excuser. Mais pour Meleonte, il estoit plus equitable que luy, car il s'accusoit luy mesme de bonne foy. Que ie suis malheureux, disoit-il en s'en retournant, à vn de mes Amis, & des siens, qui me la reedit, & que ie suis criminel; car enfin i'ay commis tous les crimes imaginables, i'ay soupçonné legerement la plus vertueuse Princesse qui fut iamais, ie l'ay accusée, i'ay irrité l'esprit du Prince contre elle, ie luy ay mis la fureur dans l'ame, & les armes à la main contre le Prince son frere, & contre la Princesse sa sœur; & lasche que ie suis, après auoir veu faire les plus grandes actions du monde à Artemidore, ie l'ay voulu tuer d'vn coup de fleche. Mais

aussi les Dieux pour m'en punir, ont permis que cette fleche malheureuse ait frappé vn innocent Amy, & ait blessé mortellement la seule personne pour qui la vie me pouuoit estre agreable; & cependant on ne veut pas que ie meure, on me force de viure, on me garde comme si ie meritois encore qu'on eust quelque soin de ma vie. Mais c'est en vain, adioustoit-il, qu'on m'observe, & qu'on m'oste tout ce qui pourroit seruir à me donner la mort, ie n'ay que faire de fer ni de poison, ma seule douleur suffira pour me faire mourir. Car enfin quand ie songe que c'est moy qui ay mis ma Princesse en danger, & qu'en voulant tuer vn homme que ie croyois mon Riual, i'ay peut-estre tué ma Maistresse, ie sens quelque chose mille fois plus cruel que la mort; quelque chose

qu'on ne ſçauroit conceuoir, & que ie ne conçoÿ pas moy-mefme, puis que i'ay tout à la fois de la honte, du repentir, de la douleur, de l'horreur contre moy-mefme; autant d'amour qu'il en faut pour ne me pardonner iamais la faute que i'ay faite, & autant de dépit qu'il eſt neceſſaire d'en auoir pour ſouhaiter la mort à tous les momens. Auffi bien qu'ay-ie plus affaire au monde; la Princeſſe ne m'aimoit pas lors que ie n'auois iamais rien fait que la ſeruir, iugez après cela quels ſeront ſes ſentimens ſi elle eſchappe, pour vn homme qui a voulu ternir ſa gloire, oſter laſchement la vie au Prince Artemidore, & qui a mis la ſienne au hazard. Encore ſi i'auois voulu tuer ce Prince comme vn homme de cœur peut tuer vn ennemy, ce ſeroit quelque choſe; mais la ialouſie m'a tellement

transporté, lors que i'ay veu Lysimene exposer sa vie pour sauuer celle d'un homme que ie croyois mon Riual, que i'ay en ce malheureux instant oublié que i'auois du cœur; i'ay renoncé à tous sentimens de vertu, pour ne songer qu'à vne prompte vengeance. Mais hélas! les Dieux ont desia vangé Lysimene; car ie me hais si horriblement que ie n'ay iamais eu plus d'amour pour elle, que i'ay presentement de haine pour moy. Voila de quelle sorte raisonnoit le malheureux Meleonte, durant que le sage Cleanthe taschoit d'adoucir les choses au chasteau où il estoit demeuré.

Ha! Amiclée, interrompit Plotine, que Cleanthe m'a fait de plaisir d'arriuer, & que i'aurois d'enuie de connoistre vn homme qui a si bien instruit le Prince Artemidore.

Pour moy, dit Clelie, ie me l'ima-
gine comme vn de ces Sages dont
on a tant parlé. Car i'ay tant oüy
vanter à Merigene, le ieune Roy
de Phenicie, & le Prince son frere
qu'il a enseignez, que ie me le fi-
gure comme vn tres-excellent hom-
me.

Pour vous tesmoigner que ie veux
tout ce que vous voulez, reprit A-
miclee, ie veux bien vous le repre-
senter, car de l'humeur dont ie
suis, i'ay assez de peine à ne m'ar-
rester pas vn peu à louer mes Amis
quand i'en parle à des personnes
qui ne les connoissent pas, & ie
suis mesme persuadée que la gene-
rosité veut que l'on en vse ainsi, &
qu'il y a quelque plaisir lors qu'on
est seul, à se souuenir qu'on a ren-
du iustice à ses Amis, quand on
a parlé d'eux. De grace, dit Ploti-
ne, parlons de Cleanthe, & laissons

là les plaisirs qu'on trouue en soy
mesme, car pour moy ie suis per-
suadée que ce sont les plus tristes
plaisirs du monde. Ils sont pour-
tant les plus solides, répondit Cle-
lie; croyez moy, adiousta agrea-
blement Plotine, ne cherchons
point la solidité aux plaisirs, con-
tentons nous qu'ils ayent quelque
chose de brillant, qui esbloüÿsse
la raison, qu'ils se suiuent les vns
les autres, qu'ils se varient, qu'ils
nous trompent, & nous amusent
agreablement, sans vouloir leur
rien demander dauantage, & pour
mettre la chose en vsage, après
auoir eu le plaisir de me delasser
d'un assez long silence par ce que
ie viens de dire, dites nous aimable
Amiclée comment est fait le sa-
ge Cleanthe.

Sçachez donc, reprit Amiclée,
que celuy que vous voulez con-

noistre, est vn homme dont le me-
rite est digne de veneration, & qui
par sa grande vertu, s'est mis au
dessus de l'enuie, & des enuieux.
Sa naissance est fort bonne, & il
seroit aisé de trouuer à le louer par
plusieurs choses qui luy sont estran-
geres ; mais pour ne vous parler
que de luy, ie me contenteray de
vous dire que quoy que Cleanthe
soit desia arriué à cét âge où le
temps a accoustumé d'effacer vne
partie des traits qui rendent la phi-
sionomie agreable, il a pourtant
sur le visage vne serenité pleine
d'esprit & de douceur, qui plaist
infiniment. Ses yeux montrent
mesme vne partie de sa sagesse &
de sa bonté, & quoy qu'il ne soit
pas grand, il a bonne mine, & a
tout l'air d'vn Philosophe, qui pra-
tique encore plus de vertu qu'il n'en
enseigne. Il paroist vne ioye si mo-

deste dans son entretien, vne complaisance si sage en tous ses discours, & vne bonté si veritable en toutes ses actions, qu'il inspire par son entretien l'amour de la vertu, à tous ceux qui en sont capables. Aussi a-t'il esté choisi, comme ie vous l'ay desia dit, pour instruire en diuerses choses considerables, deux des plus grands Princes du monde, sans conter le Prince de Leonte, ni Artemidore. Il a toute sa vie si passionnement aimé l'estude, qu'on peut dire qu'il n'a iamais passé de iour sans apprendre quelque chose; aussi a-t'il composé vn nombre infiny de beaux ouvrages, qui sont des tesmoins irreprochables de son sçauoir, & de sa vertu. En effet il n'y a presque rien dont il n'ait escrit avec gloire, & avec l'intention de profiter au public, & de rendre ceux qui liroient

lieroient ses ouurages, ou meilleurs, ou plus sçauans, ce qui à mon auis est vne tres grande loüange. Mais quoy que Cleanthe soit tres-sçauant, & que ses ouurages meritent de viure tousiours, i'admire encore plus sa vertu que son sçauoir, principalement l'ayant conseruée toute pure au milieu d'une grande Cour, où d'ordinaire les plus vertueux ont quelque peine à demeurer exactement dans la pureté de leurs sentimens. Mais pour Cleanthe, rien ne le change, ni ne le peut changer, tant il est solidement vertueux, mais d'une vertu sociable qui n'a rien de sauuage, qui persuade plus par la douceur que par l'impetuosité, & qui par la tranquillité de son esprit, fait assez connoistre qu'il a fait vne longue & heureuse estude de la sagesse; car il n'est pas de ces gens qui connoissent la vertu sans

la suiure, & qui enseignent des vertus qu'ils ne pratiquent iamais. Au contraire Cleanthe parle encore plus de morale par ses actions, que par ses discours, & n'instruit pas moins par ses mœurs, que par ses ouvrages. Voila donc quel est le sage Cleanthe, dont la presence calma vn si grand orage. Cependant dès que la Princesse fut reuenüe de son éuanoüissement, elle pensa à Artemidore, & à Zenocrate, & me voyant dans sa chambre les larmes aux yeux, elle m'appella toute foible qu'elle estoit, & quoy que sa blessure luy causast assez de douleur, elle me tendit la main, & me la ferrant doucement, de grace ma chere Amiclée, me dit-elle en me regardant fixement, dites moy si les larmes que vous répandez sont pour Artemidore, ou pour le malheureux Zenocrate. Le Prince

Artemidore , repris-ie , est si peu blessé , qu'il ne sent que vostre blessure , & pour Zenocrate , ie ne scay pas encore ce que les Chirurgiens en disent , c'est pourquoy , Madame , mes larmes ne font que pour vous. Puis que ma vie vous est si chere , reprit elle en abaissant la voix , prenez quelque soin de celle de Zenocrate , & faites que ie sache l'estat où il est. En effet ie sceus bien tost après que sa blessure estoit dangereuse , mais qu'il n'estoit pourtant pas desesperé. Pour la Princesse elle fut en fort grand danger , parce que la fièvre luy prit. Ce qu'il y auoit de cruel pour Zenocrate , c'est que personne , excepté moy , ne scachant l'amour qu'il auoit pour Lysimene , ne luy cachoit le danger où elle estoit. Si bien que son mal fut beaucoup plus grand qu'il n'eust esté , s'il eust ignoré la gran-

deur de celuy de Lysimene. Quant à Artemidore il auoit vne amitié si tendre pour elle, qu'il n'eust guerre esté plus affligé s'il eust esté son Amant, & comme on se porte aisement à aimer ceux qui ont voulu seruir ceux qu'on aime, ce Prince eut aussi bien tost vne violente amitié pour Zenocrate, qui s'estoit si genereusement opposé à la violence du Prince de Leonte, & qui auoit esté frappé du mesme coup qui auoit blessé la Princesse. Comme Zenocrate sçauoit que ie n'ignorois pas son amour, quand ie l'allois voir de la part de Lysimene, il me disoit les choses du monde les plus touchantes. Mais pour la Princesse, ie vous assure que i'admiray sa vertu en cette rencontre, car bien qu'elle creust mourir, elle se seruit tousiours de sa prudence esgalemment, & elle ne dit pas vne

parole qu'elle püst se repentir d'auoir dite. Elle me parloit tousiours de Zenocrate fort tendrement, mais après tout c'estoit avec tant de retenue, que ce qu'elle m'en disoit pouuoit aussi bien conuenir à vn aimable Amy, qu'à vn fidele Amant. Mais enfin la ieunesse de Lysimene resistant à la grandeur de son mal, ses Medecins assurerent vn iour qu'elle ne mourroit pas; de sorte qu'Artemidore transporté de ioye fut le dire à Zenocrate, qui receut cette bonne nouvelle avec tant de plaisir, que ce Prince connut qu'il estoit amoureux de Lysimene. Mais au lieu d'en estre fâché, il en fut bien aise, car il haïssoit Meleonte, & scachant que Zenocrate estoit sorty des anciens Princes d'Herbese, quoy qu'il ne tint pas alors ce rang là, il n'estoit pas marry qu'un aussi honne-

ste homme aimast la Princesse sa
sœur, luy semblant que cela pour-
roit l'empescher plustost de par-
donner à Meleonte. En effet ce
Prince s'estant mis dans l'esprit de
s'éclaircir tout à fait des sentimens
de Lysimene, vn iour qu'elle se
portoit assez bien pour pouuoir
souffrir sa conuersation, il se mit
à luy faire la guerre de Zenocrate,
qu'il disoit qu'elle auoit pensé faire
mourir. La Princesse rougit lors
qu'Artemidore luy parla ainsi, de
forte que craignant de luy auoir
déplu; de grace, luy dit-il, ne pen-
sez pas que ie vous parle comme
vous pourroit parler le Prince mon
frere, c'est à dire avec le dessein de
vous persecuter, non ma chere
sœur, adiousta-t'il, i'ay des senti-
mens plus équitables, ie vous par-
le comme vn Amy fidele, qui ne
veut sçauoir vos sentimens que pour

s'y conformer, car enfin ie sçay que vous aimez la gloire, & que vous ne pouuez rien aimer sans elle. Seigneur, luy dit alors la Princesse en se remettant, pour vous tesmoigner que ie vous considere encore plus comme vn Amy fidele, que comme vn frere genereux, ie veux bien vous confier l'vnique secret de ma vie, & vous confesser que si ie ne songeois à regler les sentimens de mon cœur, i'aurois autant d'inclination pour Zenocrate, que i'ay d'auersion pour Meleonte. Mais comme ie ne preuoy pas que la fortune nous puisse permettre de viure ensemble, ie luy parle toujours comme à vn agreable Amy, & ie luy deffends d'esperer rien de tout ce que peut pretendre vn Amant, si ce n'est vne certaine tendresse desinteressée, & détachée de toutes choses, que ie ne puis luy

refuser. Voila, Seigneur, tout le secret de ma vie, vſez en comme il vous plaira, & ſi vous me trouuez criminelle, vous me ferez plaisir de me le dire, afin que i'effaye de m'en corriger. Cette franchise plut ſi fort à Artemidore, qu'il luy en rendit mille graces. il approuua tous ſes ſentimens, & il ſe lia entr'eux vne amitié pleine de confiance, qui durera toute leur vie. En ſuite Artemidore du conſentement de la Princesſe, fit connoiſtre à Zenocrate qu'il ſçauoit ſon affection; de forte qu'il y eut entreſ-peu de iours vne liaiſon tres-eſtroite entre ces trois perſonnes, qui m'eſtimerent aſſez pour me confier tous leurs ſentimens. Cependant Cleanthe trouua beaucoup de difficulté à pacifier les choſes, car le Prince aimant chèrement Meleonte, vouloit que Lyſimene

& Artemidore luy pardonassent; ces deux personnes au contraire ne pouuoient pas se refoudre de voir vn homme qui auoit fait vne action qui leur auoit pensé estre si funeste. La Princesse leur mere ne pouuoit non plus consentir de retourner à Leonte tant qu'il y seroit ; elle vouloit mesme que le Prince le bannist pour tousiours; mais comme Amerinthe dont le Prince estoit tousiours amoureux, protegeoit Meleonte, on n'auoit garde d'obtenir ce que l'on demandoit. Ainsi Cleanthe alloit & venoit inutilement du Chasteau où nous estions à Leonte, & de Leonte à ce Chasteau. Pendant cela Meleonte estoit tousiours gardé, il est vray que c'estoit bien plus pour l'empescher d'attenter à sa vie, que pour satisfaire Lysimene & Artemidore. Cependant la Princesse re-

uenant assez promptement de son mal, fut en estat de se pouuoir promener dans les iardins du Chasteau qui sont assurement tres-beaux. Dés qu'elle put voir du monde, toutes les Dames principales de Leonte vinrent la visiter; & Clidamire que vous connoissez y vint comme les autres, avec vne de ses parentes. Cependant Artemidore la trouua si aimable ce iour là, qu'il commença d'auoir pour elle cette grande passion qui a causé toutes les auantures que ie sçay que vous auez sceuës. Aussi ne vous en diray-ie presque rien, mais seulement qu'un iour qu'elle estoit venuë avec Andromire, & plusieurs autres Dames qui estoient demeurées à coucher, comme on fut vers le soir à la promenade, elle fit si bien qu'elle parla à Artemidore, qu'Andromire entretint Zenocrate, quoy

qu'il n'en eust guere d'enuie, qu'une autre Dame se mit à me conter cent choses dont ie n'auois que faire, & que pendant cela vne de ses Amies, & qui est vne des plus adroites personnes du monde, mena insensiblement la Princesse dans vne allée, au bout de laquelle il y a vn pauillon, qui a vne porte qui donne dans la campagne. Le bas de ce pauillon n'est qu'un grand lieu vouté, enuironné de sieges, où l'on peut se reposer sans estre incommodé du Soleil, & mesme sans estre veu de ceux qui se promenant, quoy qu'il soit entierement ouuert de la face qui répond au bout de l'allée, parce qu'il y a de grands rideaux que l'on peut tirer quand on veut. La Princesse s'estant donc laissée conduire sans y penser dans ce cabinet, elle en vit les rideaux à moitié tirez, & re-

marqua mesme que la porte qui donnoit dans la campagne, estoit entr'ouuerte, mais ne tirant nulle consequence de ces deux choses, qui pouuoient estre par des causes differentes, elle entra dans ce cabinet, sans prendre garde que cette Dame ne l'y suiuiroit pas, & retournoit dans l'allée. Mais à peine eut elle fait trois pas, qu'elle vit Meleonte à ses pieds, qui la rete- nant par la robe malgré qu'elle en eust, la força de l'écouter, car com- me elle estoit encore tres-foible de son mal, l'estonnement redoublant sa foiblesse, elle fut contrainte de s'asseoir de peur de tomber. Dans cet instant elle craignit que Me- leonte ne la voulust enleuer, aussi fit-elle d'abord vn grand cry, qui ne fut entendu de personne, parce que la compagnie estoit dans vne autre allée, où celle qui seruoit

Meleonte ſçauoit bien que ſes Amies la retiendroient avec adreſſe. Cependant Meleonte pour ne perdre pas vne occaſion qu'il iugeoit bien qu'il ne pourroit retrouveraiſement, eſtant à genoux deuant la Princeſſe, qui ſ'aſſit, prit la parole avec vn faiſſement de cœur eſtrange. De grace, Madame, luy dit-il avec vne ſoumiſſion extreme, eſcoutez le malheureux Meleonte pour la derniere fois, vous le deuez ſans doute, Madame, puis qu'il ne pretend pas meſme obtenir le pardon qu'il vous demande les larmes aux yeux. Le malheureux Meleonte, reprit la Princeſſe, eſt ſi criminel, qu'il n'y a point de malheurs dont il ne ſoit digne. Je l'auouë, Madame, reprit-il avec precipitation, & ce n'eſt que pour vous l'auouër que i'ay pris la liberté de venir icy. Quoy Meleonte,

repliqua la Princesse, vous avez encore l'audace de vous presenter à moy, après m'auoir cru capable d'un crime, car en comparaison de cela, ie conte presque pour rien que vous m'ayez blessée mortellement. Mais à n'en mentir pas ie conte pour beaucoup que vous ayez voulu tuer le Prince mon frere, de la plus lasche maniere du monde. Ha! Madame, reprit Meleonte, quand ie vous vy si belle, & si charmante, passer à trauers des espées & des traits, en méprisant le peril, pour sauuer la vie d'un homme que ie croyois mon Riual, & que ie pensois estre aimé de vous, ie sentis ce que ie ne scaurois vous faire comprendre; & il eust fallu estre sans amour, pour conseruer du respect & de la generosité. Ainsi ie le confesse, ie ne songay qu'à tuer celuy que ie croyois vostre Amant,

& si Zenocrate eust encore esté amoureux de vous, il eust assurément fait ce que ie fis. Quoy qu'il en soit, dit-elle, ie suis contente de Zenocrate, & ie ne le suis pas de vous. Helas ! Madame, reprit Meleonte, comment le pourriez vous estre, puis que ie ne le suis pas moy mesme, & qu'au contraire ie suis mon plus mortel ennemy. Oüy, Madame, ie me hay plus que vous ne me haysez, & i'ay presentement tant de repentir de ma violence, & tant de respect pour vous, que ie n'ose pas mesme mourir à vos yeux, de peur que le Prince qui m'aime ne vous reproche ma mort. Scachez donc, Madame, que voyant la diuision que ie cause entre le Prince de Leonte, le Prince Artemidore & vous, ie me suis resolu de finir cette contestation par ma fuite. I'ay donc suborné mes

Gardes durant que le Prince est à la chasse, & par des voyes que ie ne veux point vous dire, ie suis entré dans ce iardin, & ie vous y parle pour vous assurer que ie m'en iray chercher la mort en quelque lieu si esloigné de Leonte, qu'on n'entende iamais parler de moy. Ie quitteray mesme le nom que ie porte, afin qu'il ne puisse plus vous importuner, & conseruant toute entiere l'amour que i'ay pour vous, ie viuray le plus malheureux de tous les hommes, en quelque lieu que ie viue, s'il est vray que i'aye assez de force pour viure encore quelque temps, afin de vous adorer seulement. Meleonte dit cela d'un air si touchant, que la Princesse me dit que malgré sa haine & sa colere, elle eut quelque compassion de luy. Elle la luy cacha pourtant, de peur qu'il ne changeast

geast de dessein, c'est pourquoy prenant la parole en le regardant d'un air irrité, quand on a fait de mauuaises actions, luy dit-elle, ce n'est pas assez que de dire de belles choses, il faut vn long repentir, vne longue absence, & mille seruices, pour oser esperer avec raison d'estre souffert parmy les gens d'honneur. Cependant comme ie suis équitable, ie louë le dessein que vous prenez, comme le seul que vous deuiiez prendre. Allez donc, Meleonte, allez, poursuivit-elle en se leuant, allez demander pardon aux Dieux, car pour moy ie vous trahirois si ie vous disois que ie vous pardonne. Ie vous ay desia dit, Madame, reprit l'affligé Meleonte, que ie n'esperois point d'obtenir le pardon que ie vous demandois, mais du moins accordez moy la grace de croire

que l'excez de mon amour est la cause de tous mes crimes, & que si ie vous auois moins aimée, i'aurois tousiours esté innocent. C'est la seule, & la derniere faueur que ie vous demanderay iamais, n'osant pas mesme vous demander vn peu de compassion, quand vous vous imaginerez que ie seray mort en exil seulement pour l'amour de vous. Comme la Princesse alloit luy dire quelque chose, Meleonte vit paroistre de loin toute la compagnie, qui malgré toute l'adresse de la Dame qui estoit retournée sur ses pas pour l'amuser adroitement, cherchoit la Princesse; & ne pouuoit en estre priuée plus long temps. De sorte que Meleonte estant contraint de s'en aller, se leua, sans que la Princesse, qui le quitta brusquement, luy eust rien dit, & sortant par la porte de ce pauillon qui donnoit

dans la campagne, il monta sur vn cheual qu'un esclaué luy tenoit en ce lieu là, & se perdit dans vn bois qui n'estoit pas fort esloigné. Cependant cela ne se put faire que Zenocrate ne reconnust Meleonte. Pour Artemidore il n'y prit pas garde, parce qu'il parloit attentivement à Clidamire, & il n'y eut que Zenocrate & moy, qui vismes Meleonte. Il ne l'eut pas plustost veu, que changeant de couleur, il s'en vint à moy, & me regardant d'un air assez interdit, qu'ay-ie veu Amiclée, mes yeux ne m'ont-ils point trompé, Meleonte peut-il estre où i'ay creu le voir, la Princesse luy aura-t'elle pardonné, & que pensez vous de ce que ie voy bien que vous avez veu aussi bien que moy. En verité, luy dis-je, ie ne sçay ce que i'en dois penser, mais ie sçay bien que la Princesse ne peut

iamais auoir tort, & que son visage me dit qu'elle est aussi surprise que nous. De grace genereuse Amiclée, repliqua Zenocrate, sçachez quelle est cette auanture, car le respect que ie porte à la Princesse, m'empesche de le luy demander. Et en effet, m'estant approchée de Lysimene, elle me tira à part, & me fit lhonneur de me dire ce qui luy venoit d'arriuer. Après cela ayant appellé Artemidore & Zenocrate, elle leur conta ce qu'elle m'auoit desia dit. D'abord le depart de Meleonte parut fort auantageux, mais après iugeant bien que le Prince en seroit affligé, on craignit que son chagrin ne tombast sur Lysimene, ou sur Artemidore, ou sur Zenocrate. Cependant on iugea à propos d'auertir la Princesse de Leonte & Cleanthe, de ce qui venoit d'arriuer, & en effet

Lysimene finissant sa promenade plustost qu'elle n'eust fait, s'en retourna au Chasteau. A peine y fut elle, qu'il arriua vn Amy de Zenocrate, qui venoit auertir la Princesse que Meleonte estoit sorty du lieu où il estoit gardé, sans qu'on sceust quelle route il auoit prise; que le Prince en estoit fort affligé, que ce fauory auoit laisse vne lettre pour luy, qui estoit la plus touchante du monde; & qu'Amerinthe estoit fort occupée à le consoler. Il fallut donc alors auoir recours à la prudence de Cleanthe, qui fut à Leonte, afin d'adoucir l'esprit du Prince, qu'il trouua fort triste de l'éloignement de Meleonte. Il le trouua mesme irrité contre Lysimene, dont la rigueur estoit la cause innocente de tous ces desordres; mais à la fin Cleanthe luy ayant dit que le moyen de faire re-

uenir Meleonte, estoit de bien traiter Lyfimene, & de tâcher de la gagner, les choses se pacifierent à la fin, malgré les artifices d'Amerinthe: mais comme cette diuision affligea fort la Princesse de Leonte, elle tomba malade en ce temps là, & mourut en peu de iours. Cette perte fut tres-sensible à Lyfimene & à Artemidore, mais pour le Prince de Leonte il n'en fut guere affligé, parce qu'il crut que Lyfimene seroit encore plus absolument sous son pouuoir. Cependant Lyfimene retourna loger au Palais du Prince, & mena durant quelques iours vne vie assez douce. Artemidore deuint alors tout à fait amoureux de Clidamire, ce qui irrita estrangement Amerinthe, qui n'auoit pû toucher son cœur. Aussi obligea-t'elle le Prince à desapprouuer hautement l'affection qu'il auoit

pour cette fille, & ce fut elle qui le porta à la faire mettre parmy les Vierges voilées, comme on vous l'aura sans doute dit, en vous racontant l'histoire d'Artemidore Car elle pretendit par là nuire à vn Prince qu'elle n'aimoit pas, & seruir à Meleonte, avec qui on croit qu'elle a tousiours eu quelque intelligence secrette. En effet il luy estoit aisé de iuger qu'Artemidore ne pourroit manquer de se broüiller tout à fait avec le Prince après cette violence, & qu'ainsi Lysimene perdrait vn puissant protecteur. L'euuenement fit bien voir qu'elle ne se trompoit point, car vous scauez qu'Artemidore pour deliurer Clidamire, s'exila luy-mesme volontairement. Mais comme ce n'est pas son histoire que ie vous raconte, & que vous n'ignorez rien de ce qui luy est arriué, ie ne vous

parleray point de son depart, de son naufrage, de la resolution qu'il prit d'aller à la guerre, & de quelle maniere il deuint prisonnier du Prince d'Agrigente, ni comment il deuint amoureux de Berelise, mais seulement de ce qui regarde Lysimene & Zenocrate. Vous sçaurez donc que depuis le depart d'Artemidore, Zenocrate pour continuer d'agir selon sa coustume, fit semblant d'estre amoureux de Clidamire, dès qu'elle fut sortie des Vierges voilées, qu'en suite il s'attacha encore quelques iours auprès d'une autre, mais à la fin croyant puis que Meleonte estoit absent, qu'il pouuoit se dispenser de cette contrainte, il fut quelque temps sans Maistresse. De sorte que l'on disoit en luy faisant la guerre, que d'inconstant, il estoit deuenu indifférent, & ie me souuiens qu'un

jour Clidamire estant chez Lyfime-
ne, entreprit de soustenir qu'il e-
stoit beaucoup plus honneste d'e-
stre inconstant, que d'estre indiffe-
rent. Car enfin, disoit-elle pour
soustenir son opinion, ie ne sça-
che rien de plus haïssable que ces
gens qui n'aiment ni ne haïssent;
qui ne s'attachent à quoy que ce
soit, & qui ne sont pas mesme for-
tement de leur party, tant ils ont
vne ame tiede. Demandez leur s'ils
veulent se promener, ils ne sçauent;
informez vous s'ils veulent qu'on
les aime, ils en doutent; rendez
leur quelque seruice, ils n'en sen-
tent rien, veillez leur deplaire, à
peine s'en apperçoient-ils, tant ils
ont de peur de troubler leur bien-
heureuse indifference; mais pour
les inconstans, adiousta t'elle, ils
ont tousiours quelque chose à fai-
re, ils vont, ils viennent, ils agif-

sent, & quoy qu'ils ne veulent rien
fortement, & qu'ils renoncent à
l'opiniaftreté, ils font pourtant tou-
jours attachez à quelque chose. Ils
tiennent quelque place dans le mon-
de, & font du moins parler d'eux,
soit en bien soit en mal. Il est vray,
reprit Lyfimene, mais si vous y pre-
nez garde, les indifferens & les in-
constans ne sont pas trop opposez.
Car enfin vn inconstant aime in-
differemment toutes les belles d'v-
ne ville, & ce n'est que parce qu'il
a quelque sorte d'indifference dans
le cœur, qu'il aime plusieurs per-
sonnes. Et pour moy il me semble
que j'aimerois encore mieux vn in-
different qui ne se determine à rien,
qu'un inconstant qui se determine
à l'inconstance, qui fait gloire de
sa foiblesse, qui croit qu'on ne peut
estre galant sans estre coquet de
profession; & qui sans rien aimer

fortement, passe pourtant toute sa vie comme s'il aimoit. Car enfin on n'appelle point amour ces amours passageres, qui se succedent les vnes aux autres, qui embarrassent les cœurs sans les posseder, & qui ne produisent tout au plus que des chansons. La Princesse dit cela d'un certain air qui fit soupçonner quelque chose à Amerinthe qui estoit presente, car elle iugea bien que Zenocrate paroissant estre aussi bien avec elle qu'on l'y voyoit, eust deu trouver mauuais qu'elle eust parlé aussi fortement contre l'inconstance, si elle l'eust cru inconstant. Si bien qu'observant les choses, & s'informant soigneusement de cette mesme fille, qui auoit autrefois auerty Meleonte de tout ce que faisoit Lysimene, & que la Princesse auoit chassée, elle vint à descouurir enfin que Zenocrate

estoit tousiours fort amoureux d'elle, & que son inconstance estoit vne feinte. Et comme elle tournoit de la maniere qu'il luy plaisoit l'esprit du Prince, Lysimene fut fort surprise vn matin d'apprendre que le Prince auoit fait commander à Zenocrate de sortir de sa Cour à l'heure mesme, avec deffence de la voir auant son départ. Vous pouuez iuger combien cette nouuelle luy fut facheuse, principalement estant auertie que Meleonte auoit escrit au Prince deux iours auparauant. Cependant il fallut que Zenocrate sortist de Leonte sans voir la Princesse, il est vray qu'il y rentra le soir mesme, qu'il se cacha chez vn de ses Amis, & que trois iours après il trouua inuention de parler vn soir à Lysimene dans vn iardin. Leur conuersation fut la plus touchante du monde, car enfin ils ne voyoient

nul suiet d'esperer de pouuoir iamais viure heureux. le sçay bien, luy disoit Lyfimene, que vostre naissance est plus illustre que le rang que vous tenez presentement n'est esleué. le sçay mesme que vostre merite ne voit rien au dessus de luy, & ie veux croire que vostre affection ne peut estre surpassée par nulle autre; mais après tout le Prince mon frere est iniuste & violent. Il aime Meleonte que ie hais, & Artemidore n'est point icy; adioutez à cela que sa Maistresse nous hait, & qu'elle ne nous nuit guere moins que son fauory. Nous n'auons point d'azile en nulle part, & quand nous en pourrions trouuer, ie ne voudrois pas par vn sentiment de gloire, que nous y fussions ensemble. Mais, Madame, reprit Zenocrate, que voulez vous donc que ie deuienne? le veux, luy dit elle,

que vous taschiez de trouuer Artemidore, que vous soyez attaché à sa fortune, & que vous vous confiez à ma constance. Eh! Madame, reprit-il, vn malheureux absent peut-il s'assurer d'une chose qu'il desire ardemment? Oüy Zenocrate, repliqua Lysimene, quand celle qui la luy promet a de la generosité. Mais vous mesme, adiousta la Princesse, prenez garde que l'absence ne vous change, & que ie n'aye vn iour mille reproches à vous faire. Le temps me iustificera, Madame, luy dit-il, & vous me verrez toute ma vie ce que ie suis auourd'huy, c'est à dire le plus fidele Amant qui fut iamais. Helas! Zenocrate, repliqua-t'elle, il n'y a iamais eu d'Amant infidele au monde, qui vn moment auant son infidelité, n'eust iuré qu'il eust esté eternellement fidele; ainsi ne ré-

pondez de rien, & laissez moy craindre ce que ie ne puis m'empescher d'apprehender. Zenocrate fit alors des protestations de fidelité les plus fortes qu'on se puisse imaginer, après quoy il partit & s'en alla d'abord à Syracuse, & en suite à Agrigente, où vous sçavez qu'il trouua Artemidore, de qui il a esté depuis inseparable. Pendant cela il escriuoit fort soigneusement à Lysimene, mais comme il auoit fait vne longue habitude de paroistre inconstant, il estoit si accoustumé quand il se trouuoit auprès d'une belle personne, de luy dire des douceurs, qu'il ne changea pas tout à fait sa maniere. Et en effet lors que Clidamire fut à Agrigente, il fut quelques iours qu'elle ne luy déplaisoit pas. Car enfin Zenocrate est vn peu de l'humeur de ces gens qui croyent qu'un honneste hom-

me ne peut pas estre appellé infidele, encore qu'il aye quelques petites galanteries passageres, & que la veritable Maistresse doit estre contente, pourueu qu'elle soit la Dame principale, pour parler en leurs termes, & qu'on soit toujours prest de luy sacrifier les autres dés qu'elle le sçaura, & qu'elle le voudra. De sorte que sans estre scrupuleux dans sa passion, il fut quelques iours comme vous l'avez sceu, à auoir pour Clidamire ie ne sçay quoy qu'il sembloit qu'on pouuoit nommer amour. Et cette personne qui a tousiours aimé à troubler le repos d'autruy, quoy qu'elle aimast alors Artemidore qui ne l'aimoit plus, escriuit malicieusement à Leonte à vne Amie qu'elle auoit, que Zenocrate auoit esté fort amoureux d'elle, & qu'il l'eust encore esté si elle eust voulu l'escouter.

couter. Comme elle connoissoit bien que celle à qui elle escriuoit n'estoit pas secrette, son dessein reussit, car la Princesse sceut bien tost cette nouvelle, qui luy fut d'autant plus sensible, que depuis le depart d'Artemidore, elle auoit souffert cent persecutions du Prince, car il regrettoit tousiours Meleonte. Aussi se pleignit-elle à moy avec beaucoup de tendresse, ce n'est pas qu'elle ne creust que Zenocrate l'aimoit tousiours, mais elle ne pouuoit souffrir qu'il pust auoir nulle complaisance pour vne autre. Que les hommes sont iniustes, me disoit elle, car enfin ils veulent vn cœur tout entier, ils sont ialoux d'vn regard partagé, & cependant ils se partagent à la moindre occasion qui se presente, & ie suis mesme persuadée qu'ils sont ordinairement bien plus inconstans

lors qu'ils sont aimez, que lors qu'ils pensent seulement à se faire aimer, quoy qu'il n'y ait rien de plus deraisonnable, que d'estre moins fidele à vne personne qui vous aime, qu'à vne dont vous n'estes point aimé. Voila donc quels estoient les sentimens de Lysimene, qui estant auertie que Meleonte deuoit bien tost reuenir, tesmoigna estre ennuyée du monde, & se retira parmi des Vierges voilées qui sont auprès de Leonte, où ie la fuiuy. Le Prince en fut fort irrité, quoy qu'il n'en tesmoignast rien, & faisant haster le retour de Meleonte, ce fauory reuint enfin auprès de luy, esperant que pendant l'absence d'Artemidore, il pourroit obtenir son pardon de Lysimene. Mais comme en prenant congé de cette Princesse, il luy auoit parlé en homme qui alloit chercher la mort,

& qui ne deuoit iamais reuenir, il luy escriuit à son retour à peu près en ces termes.



LE MALHEUREUX
MELEONTE

A

LYSIMENE.



I vous sçauiez, Madame, tout ce que i'ay fait pour mourir de douleur, vous ne pourriez m'accuser de viure contre ma parole, car enfin ie me suis continuellement souuenu de vos rigueurs, de mes crimes, & de mon malheur. I'ay soupiré, i'ay pleuré, ie n'ay pas eu un moment de repos, ie me suis pleint de

Gg ij

vous, ie me suis pleint de moy, ie vous ay aimée, ie me suis haï, & i'ay enfin mené la plus miserable vie du monde. Mais après tout, Madame, ie n'ay pû mourir esloigné de vous; de sorte qu'estant persuadé que le destin vouloit que ie mourusse au mesme lieu où i'ay eu le malheur de vous deplaire, & de vous offencer, i'y reuiens pour vous satisfaire. Voila, Madame, quels sont les sentimens du malheureux Meleonte, qui vous aime plus qu'il ne vous a iamais aimée, quoy qu'il sache que vous le haïssez.

Comme cette lettre estoit fort touchante, ie vous auoüe que quoy que ie fusse Amie de Zenocrate, ie dis à la Princesse que quelquefois il ne falloit pas trop s'opiniastrer contre la fortune, qu'il y auoit des malheurs que l'on ne pouuoit vaincre qu'en leur cedant, & que peut-estre ne feroit-elle pas trop mal de

pardonner à Meleonte, sans s'engager pourtant à rien qu'à luy pardonner. Quoy, reprit Lyfimene avec precipitation, ie pourrois perdre l'auersion naturelle que i'ay tousiours eüe pour Meleonte, ie pourrois oublier qu'il a eu l'injustice de me soupçonner d'une foiblesse, dont la seule pensée me fait horreur; qu'il a eu la lascheté de vouloir tuer vn homme qui estoit attaqué par plus de trente, & qu'il ne pouuoit blesser sans s'exposer à me tuer, comme en effet il me blessa de telle sorte que i'en ay pensé mourir. Que sçay-ic mesme s'il ne me vouloit point frapper aussi bien qu'Artemidore; ha! non, non, Amiclée, me dit-elle, Meleonte sera tousiours haï de Lyfimene, quand mesme Zenocrate seroit infidele. Depuis cela ie n'osay plus resister à la Princesse. Cependant le Prince

de Leonte estant poussé par Amerinthe, se resolut absolument de forcer Lyfimene à espouser Meleonte, & fit dessein de venir la prendre d'autorité parmy ces Vierges voilées, entre lesquelles estoit vne parente du Prince de Perouse, qu'on deuoit bien tost renuoyer au Pays de ce Prince, pour y establir vn Temple & des Vierges comme celles là. De sorte que cette Princesse quoy qu'elle eust alors l'esprit irrité contre Zenocrate, se voyant exposée ou à espouser Meleonte, ou à vne prison eternelle (car on l'auertit que c'estoit le dessein du Prince) prit l'occasion que la fortune luy presenta, & se resolut de passer la mer avec ces Vierges, pour aller à Perouse, laissant ordre à celle qui commandoit celles qui demeuroient, de ne dire point où elle estoit allée. Et en effet la chose

s'executa, quoy que ses filles vou-
 lussent s'y opposer. Ainsi Lysime-
 ne croyant Zenocrate trop peu fi-
 delle, & craignant d'estre forcée
 d'espouser Meleonte, s'en alla, com-
 me ie l'ay desia dit, à Perouse, avec
 l'intention de faire ce qu'elle pour-
 roit pour se refoudre à passer sa vie
 parmy ces Vierges voilées qu'on y
 alloit establir. Comme ie l'aimois
 chèrement, & que ie n'auois point
 de mere, ie suiuis sa fortune sans
 peine, resoluë pourtant de l'em-
 pescher d'executer son deffains
 Mais à n'en mentir pas ie croy
 que l'affection qu'elle a toujourns
 eue pour Zenocrate, l'en a plu-
 tost empeschée que moy. Ce-
 pendant le Prince a tousiours laif-
 sé croire en Sicile, que la Princesse
 Lysimene estoit parmy d'autres Vier-
 ges où elle s'estoit renfermée, ayant
 esté tres-long-temps sans pouuoir

découvrir où elle estoit. Pour Me-
leonte il est demeuré fauory du
Prince, & fort affligé de l'absence
de la Princesse, mais comme il a
bien veu que sa fuite estoit vn pur
effet de sa haine, ie croy qu'il ne
l'aime plus tant, & qu'il ne songe
qu'à empescher Artemidore & Ly-
simene de retourner à Leonte. Pour
la Princesse elle trouua vn azile in-
uiolable auprès de Mezence Prince
de Perouse, & vous n'ignorez pas
que s'estant trouuée dans ces grands
desordres qui estoient entre Por-
fenna & luy, elle seruit utilement
Aronce, lors qu'il vint pour deli-
vrer le Prince son pere, & qu'ayant
en suite trouué encore plus de pro-
tection auprès de Porfenna & de
Galerite, qu'auprès de Mezence, el-
le est demeurée dans leur Cour, où
elle a acquis beaucoup de credit, &
où Artemidore & Zenocrate ayant

sceu qu'elle estoit, passerent à Syracuse où estoit Amilcar, & vinrent en Italie ensemble, où ils virent Lyfimene plusieurs fois. Ainsi Zenocrate a pû se iustifier, ou du moins luy demander pardon de ses inconstances d'habitude, où il iure pourtant que son cœur n'a iamais eu aucune part. Mais pour la punition, il est deuenu ialoux depuis quelques iours, sans que nous puissions imaginer qui luy donne de la ialousie. Cependant nous auons sceu vne chose qui à mon auis decidera les interests de Berelise & de Clidamire auprès d'Artemidore, car vous sçaurez que nous auons decouvert, par vn ancien Amant de Lyfimene, qui est venu de Leonte depuis quelque temps, & qui en a eu des nouvelles depuis deux iours, que Clidamire a vn grand credit dans cette Cour là, & si grand, qu'

Artemidore & Lysimene n'y peuvent retourner que par sa negociation. Ce qui luy donne cette authorité, c'est qu'elle a vne demie amour liée avec Meleonte, qui ne sçait pas qu'elle aime encore Artemidore. Si bien que cét homme ayant apporté vne lettre de Clidamire à Meleonte, que ce fauory a perduë, & qu'vne de mes Amies m'enuoye, la Princesse a dessein de la donner à Artemidore, dès que sa santé sera meilleure, afin de luy faire acheuer de connoistre la legereté de cette agreable infidele, dont ils ont pourtant grand besoin, car comme le Prince de Leonte est foible & obsédé par Amerinthe, & par son fauory, la raison ne peut rien auprès de luy. Voila, Madame, dit Amiclée à Clelie, ce que vous avez voulu sçauoir, aussi bien que vos aimables Amies, à qui ie

demande pardon aussi bien qu'à vous, du peu d'art que j'ay apporté à faire ce recit.

Amiclée s'estant tuë, toutes ces belles filles la remercierent, mais Clelie vn peu plus froidement que les autres, ayant l'esprit si occupé de la ialousie de Zenocrate, dont elle pensoit sçauoir la cause, qu'à peine sçauoit-elle ni ce qu'elle auoit entendu, ni ce qu'elle entendoit. Il est vray qu'il n'y eut que Plotine qui remarqua le changement de son visage, car Amilcar, Anacreon, & Merigene estant entrez, la conuersation changea. D'abord on parla de la guerre passée, de la tréve, & de la paix; en suite de l'amour, & puis de Themiste, & de Merigene, qui deuoient bien tost partir. Pour moy, dit Plotine, ie porte enuie à ceux qui vont à Syracuse, car en-

fin ie vous l'auouë, i'ay ouïy parler d'une certaine Amalthée, dont le merite me charme. Dites moy donc ie vous en coniuire, dit-elle à Merigene, si ceux qui ont apporté des nouvelles de Lindamire à Themiste, ne vous ont rien dit de cette admirable femme. Tout ce que ie vous puis dire, reprit Merigene, c'est qu'Amalthée est toujours plus genereuse, que sa vertu ne se lasse iamais d'obliger les malheureux, & de les obliger de bonne grace, c'est à dire sans esclat & sans interest, & que la ieune & charmante Clariste sa niece, est presentement vne des plus aimables filles du monde. En effet en auançant en âge elle est deuenue encore plus belle qu'elle n'estoit, elle a plus tenu qu'elle n'a promis, quoy qu'on eust beaucoup attendu, & son esprit s'estant embelly aussi

bien que son visage, il contribuë à luy rendre encore les yeux plus brillans, la phisionomie plus agreable, & la mine plus haute; enfin elle a si bien profité de l'auantage qu'elle a d'estre auprès d'une des plus excellentes femmes du monde, qu'on trouue en cette aimable fille tous les charmes de la ieunesse, sans y trouuer pas vn des deffauts qui l'accompagnent d'ordinaire. Elle a de la discretion & du discernement, de l'enioüement & de la modestie, de la delicateffe dans le cœur & dans l'esprit, de l'amitié & de la constance, & l'on peut dire à sa gloire, qu'on peut aisement deuiner lors qu'on la connoist, auprès de qui elle a esté esleuée. De grace, dit alors Plotine, quand vous serez à Syracuse, dites bien à la genereuse Amalthée, & à la charmante Clariste, qu'elles ont vne Amie à

Rome dont l'amitié leur coûtera aussi peu à conseruer qu'elle leur a peu cousté à aquerir. Je vous promets de leur dire tout ce qu'il vous plaira, reprit Merigene, & de leur dire mesme dans vn des plus agreables lieux du monde. Car on m'a dit que depuis mon depart le genereux Artaxandre, & la vertueuse Amalthée, ont acheué de faire accommoder vn appartement bas, qui regne tout le long d'vn beau iardin, & qui occupe toute la longueur de leur superbe Palais. Vous me ferez plaisir de parler de moy dans vn si beau lieu, & en si bonne compagnie, reprit Plotine, mais ie ne serois pas trop marrie que vous fissiez du moins aller mon imagination, où selon les apparences ie n'iray iamais. Je le veux bien, dit Merigene, ie ne veux pourtant pas m'embarquer à vous

faire vne exacte description de ce magnifique Palais, car ie craindrois de renuerfer vn peu l'ordre de l'Architecture. Vous estes tout à fait sage, dit Amilcar, de ne vous embarrasser point legerement entre des pilastres, des colonnes, des frises, & des corniches, car ie sçay bien que i'ay veu vne fois vn homme qui se piquoit de bel esprit, qui voulant descrire vne belle maison, mit le chapiteau à la place de la base, la base sur le chapiteau, le pilastre sur la colonne, & si ie ne me trompe le vestibule au troisieme estage. Mais enfin il eut l'auantage d'employer tous les beaux mots de la plus fine Architecture, depuis vases fumans, iusques à Astragales. Veritablement il ne les mit pas à leur place, mais comme il croyoit s'entendre, il creut aussi estre entendu, & fut fort satisfait

de luy. Pour éviter donc vn pareil inconuenient, reprit Merigene, après auoir ry aussi bien que le reste de la compagnie de ce qu'auoit dit Amilcar, ie me contenteray de vous dire en general, que le Palais d'Artaxandre & d'Amalthée a de la grandeur & de la magnificence, & que s'il estoit acheué, ce seroit vn des plus beaux du monde. Ce qui le rend plus agreable, c'est qu'il est basty sur le port de Syracuse, qu'il a vn grand & beau iardin, que la cour en est belle, que l'escalier en est fort beau, qu'il a de grands & beaux appartemens, qu'il y en a aussi de petits, qui ont leur agrément & leur commodité, & qu'en quelque lieu que l'on soit dans ce Palais, l'on n'y voit rien que de propre, de magnifique, & de bien entendu. Mais enfin pour vous parler de l'appartement bas où i'ay
dessein

dessein de parler de vous, i'ay à vous dire qu'il est disposé de telle sorte, que tout ce que l'on peut souhaiter s'y trouue, car il y a tout de suite tant de pieces de plein pied, que la memoire a peine à les retenir. Car enfin il y a des anti-chambres, des chambres, vne galerie, des cabinets aux deux bouts, & tout cela est si bien disposé, que toutes les portes de ces diuers lieux, qui sont sur vne mesme ligne, se rapportent iuste les vnes aux autres; de sorte que quand on est en vn bout, on voit ce qui se fait à l'autre, & la veuë passant par tous ces diuers lieux, y trouue assurement vne perspectiue tres agreable, mais sur toutes choses la galerie plaist infiniment. Imaginez vous donc qu'elle est disposée de façon, qu'elle sert de cabinet & de galerie tout ensemble; car l'Architecte a pris

dans l'épaisseur du mur, de distance en distance, de quoy mettre plusieurs tablettes remplies de livres. L'on a aussi menagé la mesme chose à costé des croisées, & pour la seureté & la propreté des livres, il y a des rideaux qui les couurent, & de grands chassis à iour qui les enferment. Cette galerie est voutée, ce qui la rend agreable & fraiche. Elle a plusieurs croisées qui donnent sur le iardin, où l'on voit plusieurs orangers, & de chaque costé & aux deux bouts, on voit en distances esgales, vingt grands miroirs enchassez dans le lambris, qui est entierement de Cedre. Mais pour rendre encore cét obiet plus agreable, à costé de chacun de ces grands miroirs, il y en a d'autres petits, avec des bras d'argent au pied, qui soustiennent chacun deux lampes magnifiques. De

forte que lors que ces soixante ou quatre vingt lampes sont allumées, la reflection qu'elles font dans cette multitude de miroirs, fait vn effet si admirable, qu'on ne peut le représenter. Et pour rendre ce lieu là aussi commode que beau, le cabinet qui est au bout opposé au port de Syracuse, a quelque chose de si melancholique, & de si solitaire qu'on n'y peut estre sans resuer. On descend deux marches pour y entrer, il est assez petit, la veuë en est bornée, & il a vn renfondrement si propre à s'entretenir soy-mesme, qu'il ne fut iamais vn lieu si commode pour resuer agreablement, ni mieux disposé pour dire vn secret à quelqu'un. Mais en échange l'autre cabinet qui est opposé à celuy-là, à l'autre bout de cet appartement, estant à la veuë du port diuertit les yeux par mille beaux ob-

iets, & par vne continuelle diuersité de gens qui vont & viennent. Si bien qu'on est tousiours en choix du monde ou de la solitude; & ce qu'il y a de particulier, c'est que cét appartement là sans grands ornemens, & sans dorure, a pourtant vn air de magnificence, qu'on ne scauroit exprimer.

Aprés ce que vous venez de dire, reprit Plotine, ie vous demande encore plus qu'auparauant l'amitié de la genereuse Amalthée, & de la charmante Clariste. Ie ne manqueray pas, reprit Merigene, de la leur demander pour vous, & ie vous promets hardiment de l'obtenir, dés que ie leur auray dit ce que vous estes. Mais ne voudriez vous point aussi, reprit Merigene, estre Amie de quelqu'un de mes Amis de ce Pays là. Ie le veux bien, répondit Plotine en souriant, car

aussi bien en l'humeur où ie suis ne suis- ie pas trop satisfaite de tous ceux que i'ay icy. Tout de bon, adiousta- t'elle, quand on y veut bien penser, tout le monde n'est que feinte, ceux en qui on se fie le plus, sont ceux dont on est le plus trompé, & ie pense que pour estre sage, il faut tousiours se desier des autres, & de soy mesme. Car enfin tout le monde est peuple vne fois en sa vie, tout le monde fait des fautes, & tout le monde a tort en quelque rencontre. Ceux qui ne paroissent pas tiedes, sont fourbes; ceux qui ne sont pas fourbes, sont foibles; ceux qui sont trop prudents, n'aiment point; & ceux qui aiment beaucoup sont si rares, qu'on ne les doit quasi pas conter. Ne me dites donc iamais, adiousta Plotine, en parlant de quelques Amis, c'est vn homme sage & ge-

nerveux, incapable de faillir, car à parler sincèrement, tous les hommes sont capables de manquer. Oüy, poursuit-elle avec vn aimable chagrin, tout le monde peut estre preoccupé, tout le monde est fin, tout le monde est enuieux, tout le monde est medisant, tout le monde est menteur, tout le monde est foible, & il n'y a presque point de Heros qui en quelque moment de sa vie, ne puisse trouuer dans son cœur quelque petit sentiment bas & populaire, tant il est vray que les hommes sont imparfaits. En effet, dit Anacreon, l'aimable Plotine a raison de dire ce qu'elle dit, car il n'y a presque point de gens qui puissent se vanter d'auoir vn veritable Amy. Je suis donc plus heureux que les autres, dit Merigene, car ie croy en auoir plusieurs. Je l'auois creu aussi

bien que vous, reprit Anaereon, mais en vne occasion assez importante, lors que i'estois à la Cour de Polycrate, ie trouuay que i'auois vn nombre infiny de faux ou de foibles Amis, & que i'en auois tres-peu que ie pusse conter pour bons. Cela est ainsi en tous lieux, reprit Amilcar, mais pour agir prudemment, il faut ne se fier à leur amitié, qu'autant que leur interest, ou leur plaisir, ou leur gloire, les attache à vous, & pour agir équitablement, il les faut aimer comme ils aiment, & ne leur donner iamais que de cette amitié qui croist & descroist selon l'occasion. Aussi bien l'amitié heroïque, n'est-elle guere moins difficile à entretenir que l'amour constante; & pour moy rarement ay-ie entrepris d'auoir de celle là, parce que l'autre est plus commode. Il est vray qu'

elle n'est ni si noble, ni si belle, ni si solide; mais aussi n'embarasse-t'elle pas beaucoup; on ne se charge iamais des malheurs, ni des chagrins de ses Amis; on ne s'interesse point aux iniures qu'on leur fait, & prenant simplement les fleurs de l'amitié, s'il est permis de parler ainsi, on en laisse les espines à ces Amis de bonne foy, qui sentent toutes les douleurs de ceux qu'ils aiment, qui entrent dans tous leurs interests sans exception, qui les soutiennent courageusement contre tout le monde, qui n'ont point de biens separez, de qui la gloire mesme est en commun, qui ne peuvent iamais estre pauvres quand il y en a vn riche, & qui ne croyent pas mesme se porter bien, quand leurs Amis sont malades. Croyez moy, adiousta Amilcar, cette espece d'amitié là n'est pas propre à

toutes sortes de gens, & ie connois plusieurs personnes qui n'ont pû y paruenir, quoy qu'ils en eussent enuie. C'est pourquoy de peur de faire comme eux, ie me contente d'aimer à la mode, c'est à dire fort commodement pour moy; & quoy que Merigene veuille dire, il ne connoist pas vn grand nombre de ces Heros d'amitié. En mon particulier, dit Plotine, ie luy demande le portrait d'vn seulement, Car à mon auis, il doit estre fort agreable, n'estant presque pas possible d'estre parfaitement bon Amy, sans estre parfaitement honneste homme. I'en tombe d'accord, dit Merigene, & ie m'assure que dés que i'auray nommé Lysimante, Amilcar auoüera que c'est vn excellent homme, & vn fidele Amy. Ie l'auoüie, reprit Amilcar, & ce qui rend son amitié plus solide, c'est

qu'il a vne probité que rien ne ſçau-
roit changer; & pour la conſtance,
il en a donné mille preuues eſcla-
tantes, & a aimé l'illuſtre Merian-
dre iuſques à la mort. Puis que Ly-
ſimante eſtoit Amy de Meriandre,
& qu'il l'eſt de Merigene, dit Va-
lerie, il n'y a pas moyen de ne le
connoiſtre point, & ie me ioints
à Plotine pour demander ſa pein-
ture. I'en fais autant que vous, dit
Clelie, & ie m'assure que Merigene
ne nous refuſera pas. Il ſeroit aſſez
difficile de le faire, reprit-il, c'eſt
pourquoy ſçachez pour vous obeir,
que Lyſimante eſt vn homme d'il-
luſtre naiſſance, dont les peres ont
eu les employes les plus conſidera-
bles dans leur pays. Mais à n'en
mentir pas, il eſt ſi digne d'eſtre
loué par luy meſme, qu'il n'eſt nul-
lement neceſſaire d'aller chercher
les vertus de ſes predeceſſeurs pour

le louer, & il suffit de vous parler seulement de ce qui est véritablement à luy. Il est grand & de bonne mine, le temps a vn peu grossi sa taille, il a le teint vif & frais, les yeux beaux & pleins d'esprit, le nez vn peu grand, la Phisionomie heureuse, l'air d'vn homme sage, & l'accueil fort obligeant, principalement pour ses Amis. La nature luy a donné vn grand esprit, mais vn esprit solide & ferme, avec vn discernement fort iuste de toutes les grandes choses. Ce n'est pas qu'il n'ait vn esprit accommodant, qui l'oblige à ne mépriser pas les petites, car il parle tres-bien des moindres bagatelles quand il s'en veut donner la peine, mais il est certain que son esprit est naturellement propre aux choses serieuses. Il a vne connoissance vniuerselle du monde qui ne le trompe presque

iamais, il connoist la plus saine politique, & la plus solide morale. Sa prudence luy fait preuoir les euenemens les plus esloignez, & les moins vray-semblables. Et sa fermeté luy fait suporter constamment les malheurs les plus impreueus. En effet il sçait changer de fortune, sans changer de visage; l'exil & la prison n'esbranlent point la fermeté de son cœur; & ne songeant iamais qu'à faire ce qu'il doit, il laisse les euenemens au pouuoir de la fortune, & se prepare toujours aux plus malheureux, afin de n'en estre pas surpris. Il a de l'honneur, de la probité, de l'exatitute, du secret, & de l'amitié autant qu'on en peut auoir. Ses mœurs sont tres-innocentes, mais sa vertu n'a pourtant rien d'austere pour les autres, au contraire il est persuadé que plus on est sage,

plus on est obligé d'excuser les le-
geres folies de ses Amis. Il est na-
turellement né pour l'ambition, &
pour agir, mais sa vertu le rend si
absolument maistre de son esprit,
qu'il s'accommode admirablement
bien de la moderation & du repos.
Il est vray que ce repos luy est as-
sez glorieux, car comme sa vertu
est generalement connuë de tout le
monde, & qu'on sçait qu'il aime
souuerainement la iustice & la ve-
rité, il est la consolation de ses A-
mis malheureux, l'arbitre de plu-
sieurs grands differens, & le dépo-
sitaire des dernieres volontez de
plusieurs personnes importantes qui
veulent en mourant estre bien as-
surées que leurs intentions seront
suiuies. En effet Lysimante est in-
capable de flechir pour quoy que
ce soit, lors qu'il voit que la vertu
ne veut pas qu'il flechisse, & toute

la grandeur du monde, ni mesme la mort, ne le feront pas hesiter vn moment à faire son deuoir. Il croit qu'vn homme n'est pas obligé d'estre heureux, & qu'il est obligé d'estre homme d'honneur; & il pense mesme qu'il feroit bien plus miserable, s'il pouuoit se reprocher vne action de foiblesse, qu'il ne le pourroit estre quand mesme il seroit exposé à la plus cruelle persecution qui fut iamais. Aussi s'attache-t'il si scrupuleusement à faire ce qu'il doit, qu'il n'y peut iamais manquer; & l'amitié toute puissante qu'elle est dans son cœur, n'a iamais eu la force de le faire dementir de la moindre chose de ce qu'il a creu estre obligé de faire avec honneur, quoy qu'il se soit trouué en des occasions tres-delicates & tres difficiles. Il aime pourtant fort tendrement ses Amis, car

comme l'amour en general n'a jamais guere touché son cœur, quoy qu'il püst estre capable d'une grande passion, son amitié en est plus ardente, & plus tendre. Mais quelque forte qu'elle soit, l'amour de la gloire & de la vertu l'emportent tousiours. Il est vray qu'il ne se flatte pas en ces occasions là, qu'il ne se fait pas vn pretexte de la iustice au desauantage de l'amitié, & qu'il sçait si bien les iustes bornes de la generosité, de la iustice, & de l'amitié, qu'il ne s'y trompe jamais. Il y a pourtant vne vertu à qui il a peine de donner des bornes dans son cœur. En effet il croit que la bonté n'en doit presque jamais auoir; aussi fait-il profession particuliere d'estre bon, & cela est d'autant plus beau, qu'ayant l'ame fort esleuée, sa bonté n'a rien que de noble, & ne peut iamais estre

soupçonné de foiblesse. Je pour-
rois si ie le voulois, vous rappor-
ter cent actions esclatantes de cét
homme illustre, qui vous prouue-
roient ce que ie dis; mais comme
ie sçay qu'il n'aime pas qu'on pu-
blie ses bonnes actions, ie me con-
forme à son humeur, & ie vous
priue d'un fort grand plaisir, en le
priuant d'une grande gloire. Mais
puis que ie ne vous dis rien de sa
vie, ie vous diray du moins qu'il a
esté cherement aimé de l'illustre
Meriandre, dont vous auez tant
entendu parler, & qu'il l'est encore
infiniment du genereux Theandre,
du prudent Cleodamas, de l'agreable
Terame, de l'ingenieux Amilcar, de
l'illustre Herminius, qui l'a veu en
passant à Syracuse, & d'un homme
de beaucoup de merite, qui s'ap-
pelle Clidamante, qui a le cœur
fort haut & fort tendre, l'esprit
fort

fort grand, toutes les inclinations nobles, qui est tres sensible à l'amour & à l'amitié, qui a de l'honneur, de la generosité, qui escrit bien en vers, & en prose, qui ne peut se soumettre qu'à la raison, qui veut fortement ce qu'il veut, qui est propre & magnifique, & qui par mille bonnes & grandes qualitez a merité l'amitié de Lyfimante. Tout ce que vous me dites de vostre illustre Amy, reprit Plotine, me charme mais de grace dites moy si Meriandre l'a aimé esgalement iusques à la mort. Il l'a si tendrement aimé repliqua Merigene, qu'il luy a laissé son portrait, & l'a choisi pour faire executer ses dernieres intentions. Cependant ils auoient eu vne auanture digne de vous estre racontée, qui eust pû les broüiller s'ils n'eussent pas eu tous deux l'es-

prit bien fait, & où l'honneur & l'amitié auoient fait vn grand combat dans le cœur de Lyfimante. Eh de grace! reprit Clelie, dites nous cette auanture. Je le veux bien, reprit Merigene, à condition que la compagnie dira en suite ses sentimens sur l'action de mon Amy. Je m'engage à cela sans peine, repondit Clelie, car ie voy dans les yeux de tous ceux qui m'écoutent, qu'ils feront ce que vous souhaitez. Sçachez donc, repliqua Merigene, qu'il n'y a iamais eu vne amitié plus étroite que celle qui estoit entre Lyfimante & Meriandre, car ils s'aimoient & s'estimoient également, & n'auoient point d'interests separez. Estant en cét estat la fortune les attacha à suiure vn grand Prince dans vn pays estrangier, où après auoir esté assez long temps, il arriua que les affaires de ce Prin-

ce ayant changé de face, il prit la resolution de partir secrettement du pays où il s'estoit retiré, & qu'il découurit son dessein à Lyfimante, & à quelque autre encore, avec ordre de n'en rien dire à personne sans exception, & de se dérober la nuit prochaine avec luy sans en donner nulle connoissance à qui que ce soit. Lyfimante se trouua alors dans vn embarras extreme; car d'un costé l'honneur vouloit qu'il fust fidele à son maistre, & de l'autre l'amitié ne vouloit pas qu'il abandonnast son Amy en vn pays estranger, où il pourroit estre maltraité, ou du moins arresté après le depart du Prince. Cependant quoy que Lyfimante aimast Meriandre plus que sa vie, croyant qu'il ne pouvoit sans perfidie reueler le secret de son maistre, il n'en dit rien à Meriandre, & se resolut d'aller avec

le Prince iusques à ce qu'il l'eust conduit en lieu de seureté, & de retourner après trouuer son Amy, pour partager sa fortune avec luy, quelque mauuaise qu'elle pust estre. En effet la chose se fit ainsi, Lysimante suiuit le Prince, & Meriandre demeura, & fut bien estonné lors qu'il sceut leur depart. Mais comme il auoit tres-bonne opinion du cœur de son Amy, il se pleignit de son malheur sans se pleindre de luy, & ne trouua point mauuais que l'honneur eust esté plus fort dans son esprit que l'amitié, & que ne pouuant satisfaire l'un sans blesser l'autre, il eust préféré le deuoir à toutes choses. Aussi ayant trouué moyen de s'eschapper, & ayant esté retrouver ce Prince, sur la frontiere, d'où son Amy estoit prest de partir pour l'aller retrouver, il eut la generosité de ne

luy faire pas le moindre reproche. Au contraire il l'embrassa avec tendresse, & lors que Lyfimante voulut luy dire la douleur qu'il auoit eüe d'auoir esté contraint par son deuoir, à ne luy reueler pas le secret qui luy auoit esté confié. De grace, luy dit il, n'ayez pas assez mauuaise opinion de moy, pour me soupçonner de me pleindre de vous, car si ie m'en pleignois, ce seroit auoüer que ie pourrois estre capable d'une trahison. Ne me traitez donc pas de cette sorte, ie vous en coniuire, & croyez que si i'eusse esté en vostre place, i'eusse fait ce que vous venez de faire; ainsi s'il est arriué quelque changement en mon cœur, c'est que ie vous estime encore plus que ie ne faisois. Ha! Meriandre, s'escria Lyfimante, ce que vous faites est bien plus beau que ce que i'ay fait, & si vous

avez augmenté vostre estime pour moy, ie suis obligé si ie le puis, d'augmenter mon amitié pour vous. Ha! Merigene, s'escria Plotine, ce que vous me contez là me paroist si beau, si grand, & si heroïque, que ma raison en est esbloüie. Tout de bon, adiousta-t'elle, ie ne sçay qui merite le plus d'admiration de Lyfimante ou de Meriandre. Pour moy, dit Clelie, ie trouue que Meriandre fit fort bien d'en vser de cette sorte, mais comme il n'y auoit que cela de raisonnable à faire, & que ce que Lyfimante fit estoit plus difficile à resoudre, ie trouue qu'il y a encore plus de loüanges à donner à Lyfimante, qu'à Meriandre. Si vous y pensez bien, dit Anacreon, vous trouuez qu'il y a plus de difficulté à ne se laisser point preoccuper par ses interests, & à iuger equitablement

en faueur d'un Amy, lors que nous sommes nous mesmes iuges & parties. Mais enfin, dit Valerie, la chose n'estoit pas trop douteuse, car on ne doit iamais trahir son maistre pour un Amy; cela est vray, dit Amilcar, mais il y a tant de gens qui trahissent leur maistre pour des raisons moins nobles, qu'on ne peut trop louer un homme qui a fait ce qu'il a deu, lors qu'il ne le pouuoit sans exposer son Amy à estre arresté dans un pays estrange. Mais, dit Plotine, encore voudrois-je bien sçauoir quand c'est qu'on peut abandonner ses Amis. Il n'est iamais permis, reprit Valerie, d'abandonner ses Amis; mais comme il est deffendu d'estre perfide à son maistre, on peut en quelques occasions, se trouuer forcé de ne les seruir pas comme on voudroit. Mais à n'en mentir point, il y a

peu de ces malheureuses occasions, car il faut que ce soient des devoirs indispensables; il faut que ce soit ou par ce que l'on doit à son Roy, à son Pere, ou à sa Patrie; mais il faut en mesme temps estre capable de se declarer ouvertement contre tous les ennemis de ses Amis; il faut estre sensible à tout ce qui les touche sans exception; il faut que leur gloire soit confondue avec la nostre, & que nous puissions mesme plustost pardonner les iniures qu'on nous fait, que celles qu'on fait à nos Amis. Enfin il faut faire positivement pour son Amy, plus qu'on ne feroit pour soy mesme. En effet, reprit Clelie, Lysimante, par ce que dit Merigene, monstra bien qu'il croyoit estre obligé à perir, mesme avec son Amy, puis qu'il auoit resolu de retourner où il l'auoit laissé; & il est

aisé de iuger ce qu'il estoit capable de faire pour luy, contre tout le monde, par ce qu'il vouloit faire contre luy mesme, de peur que son Amy ne le pust soupçonner de peu d'amitié. Mais ce que ie trouue digne de beaucoup de loüanges à Meriandre, adiousta Valerie, c'est qu'il creut son Amy lors qu'il luy dit qu'il vouloit l'aller retrouver, & qu'il le creut sans luy en demander de preuues. En effet, c'est vn des plus indispensables deuoirs de l'amitié, entre des gens d'honneur, que de ne douter pas de ce qu'un Amy vous dit affirmatiuement. Car si vous le croyez capable de dissimulation, il faut luy oster vostre amitié; & pour moy ie ne sçache rien qui me donnast plus de colere, que de voir vn de mes Amis particuliers qui voudroit que ie luy prouuasse vne chose que ie

luy aurois assuré de ſçauoir poſitiuement. Car ſ'il ne me croit pas, comment croira-t'il ceux que ie luy donneray pour teſmoins, qu'il ne connoiſtra peut-eſtre point? Valérie a ſans doute raiſon, reprit Amilcar, & il n'y a rien de plus offençant que de mettre en doute ce qu'un Amy vous aſſure; & rien auſſi qui faſſe plus voir la foibleſſe de l'amitié, que celui qui doute, car ſ'il croit ſon Amy homme d'honneur, que ne le croit-il, & ſ'il le croit fourbe, que ne rompt il avec luy; & c'eſt aſſurement le moindre priuilege que l'amitié puiſſe donner, que de faire qu'on ne puiſſe recuſer le teſmoignage d'un Amy. Auſſi Meriandre qui eſtoit la vertu meſme, crut-il Lyſimante ſur ſa parole, & l'on peut dire enfin ſans déterminer preciſement lequel des deux a le plus mérité d'eſtre loué

en cette occasion, qu'ils firent l'un & l'autre tout ce qu'ils deuoient faire pour meriter de s'entr'estimer dauantage. En verité, dit alors Plotine, ie croy qu'on ne trouue guere d'Amis tels que Lyfimante & Meriandre, & qu'il est assez à propos de ne croire pas facilement d'en auoir trouué quelqu'un, de peur d'y estre trompé. Pour ce qui me regarde, dit Amilcar, ie suis persuadé que le monde en general, a tousiours esté semblable, qu'il y a tousiours eu du vice & de la vertu, que ce qui n'est point en vn lieu est en vn autre; & pour moy, dit Plotine, ie trouue que Merigene a fait vn chef-d'œuure de nous attacher si agreablement l'esprit, par le recit qu'il nous a fait, car pour l'ordinaire les recits vn peu longs ne diuertissent guere, & il se faut bien garder de s'accoustumer à re-

citer continuellement comme i'en connois, qui ne parlent iamais que du passé, & racontant tousiours ce qu'ils ont veu, ne disent rien de ce qu'ils voyent. Il est vray, reprit Amilcar, que les reciteurs eternels font quelquefois fort à craindre. Il y en a qui sont confus, les autres trop longs, quelques-vns sont si chagrins qu'ils ne veulent iamais estre interrompus, les autres au contraire s'interrompent eux mesme, & ne sçauent à la fin ni ce qu'ils ont dit, ni ce qu'ils veulent dire. Ceux qui content des choses dont on ne se soucie point, & qui d'elles mesmes ne sont point agreables, sont les plus importuns de tous les faiseurs de recits. I'ay pourtant eu vn iour assez de plaisir, dit Plotine, à faire vne malice vne fois en ma vie, dans vne compagnie où i'estois, car après

qu'on se fut diuertiy à cent choses différentes, on s'auisa de se remettre à moy du diuertissement du reste du iour. Si bien que comme on s'estoit promené, qu'on auoit dancé, & qu'on auoit fait vne excellente colation, ie creus qu'il valloit mieux trouuer quelque amusement dans la conuersation. Mais comme il y auoit quelques gens de peu d'esprit dans la compagnie, i'auoüe que ne iugeant pas qu'ils fussent propres à diuertir serieusement, ie leur fis vne méchanceté qui fut d'engager tout le monde à m'obeir, & à parler de ce que ie voudrois. Si bien que choisissant iustement pour ces gens là, les choses qu'ils scauoient le moins, ie leur en fis dire de fort plaisantes. Pour moy, dit Valerie, on m'embarrasseroit fort si on m'obligeoit à parler de plusieurs choses où ie n'entens rien.

En mon particulier, dit Clelie, ie ne parle guere bien que de ce qui touche mon cœur. Pour moy, dit Amiclée, ie dis passablement ce que i'ay veu, & moy ce que ie sens, adiousta Merigene. Ie suis donc bien plus habile que tout ce que vous estes, reprit Amilcar en riant, car il me semble que ie parle assez esgalemment bien de tout. Du moins parlez vous quelquefois fort plaisamment d'autruy, reprit Plotine, mais quoy que vous croyiez faire tousiours des merueilles, adiousta-t'elle, ie suis assurée que vous ne ferez pas aussi bien la description d'un beau lieu qu'Amiclée. Ie veux croire, reprit-il, que ie ne la feray pas aussi bien qu'elle, mais ie me vante de la faire mieux que ie ne fais toute autre chose, excepté de vous aimer, car pour cela non seulement ie surpasse les autres, mais

de iour en iour ie me surpasse moy
mesme. De grace, repliqua-t'elle en
riant, ne confondez point vos des-
criptions, laissez celle de vostre af-
fection à vne autre fois, & conten-
tez vous de nous descrire quelque
belle maison, ou quelque beau iar-
din, pour voir comment vous le
sçauiez faire. Mais s'il nous descriit
quelque lieu que nous n'ayons point
veu, dit Valerie, nous ne sçaurons
pas s'il le descriit bien. Si vous vou-
lez vous en rapporter à Merigene,
reprit Amilcar, ie vous en descri-
ray vn, où vostre imagination se
promenera avec vn plaisir incroya-
ble, car il n'y en a pas vn plus
beau au monde. On dit qu'il fait si
sec en Afrique, reprit Amiclée, que
i'ay peine à comprendre que vous
fassiez vne si belle description si
vous choisissiez vn lieu de vostre
pays. Non, non, repliqua Amil-

car, ne craignez rien de mon iugement, car i'en ay pour le moins autant que d'esprit. C'est pourquoy ie vous descriray vn tres beau lieu qui est en Asie, que ie sçay que Merigene a veu, & qui est auprès de Babilone. C'est donc la belle maison de Telaste, & de Melifante, reprit Merigene; c'est celle là mesme, reprit Amilcar. Vostre choix est admirable, repliqua Merigene, & vous ne pouuez vous esgarer au coin d'une allée, que ie ne m'apperçoie de vostre erreur. Mais il y a bien loin d'icy en Asie, reprit Amiclée. Pour les voyages d'imagination, repliqua Plotine, on les fait si facilement, que ie ne m'embarasse pas d'aller iusques à Babilone en vn moment. Mais comment reconnoistrez vous, répondit Valerie, si Amilcar represente bien vn lieu que vous n'avez iamais veu,

&

& que vous ne verrez iamais. Il suffit, reprit-elle, que ie voye s'il sçait donner vne belle idée d'un beau lieu, luy qui se moque tant de ceux qui mettent les bases sur les chapiteaux; car pour moy ie l'auouë à ma confusion, quand i'ay esté en vn beau iardin, ie n'en sçay dire autre chose, sinon qu'il est admirablement beau, qu'il est agreable, qu'il est merueilleux. Je diray donc mieux que vous, reprit Amilcar, & pour vous le tesmoigner, écoutez moy paisiblement, & vous donnez vn peu de patience. Si ie voulois faire vn simple plan, i'aurois bien tost fait, mais voulant vous faire vne peinture fidele, il faut me donner vn peu de temps. l'auouë pourtant ingenuement que le lieu dont ie veux vous parler, qui s'appelle le Mont Euphrate, a de si grandes beautez, que

ie ne tiens pas possible qu'on les puisse bien depeindre. Il est si proche de Babilone, qu'il ne faut qu'un quart d'heure pour y aller. Il est vray que la montagne sur laquelle il est situé, est vn peu droite du costé de la Ville, mais le chemin n'en a pourtant rien de difficile; ioint que quand on veut en prendre vn plus long, il y en a vn dont la pente est presque imperceptible. Pour le bastiment il n'a rien de fort magnifique par le dehors, mais il est tres-commode par le dedans. En effet les appartemens en sont beaux, il y a des sales, des chambres, des galeries, & vn cabinet si ioly, si propre, & si agreable; qu'on n'y peut rien desirer. Car après auoir passé par vne grande sale, & vne belle chambre, on y entre par vne porte à iour faite à compartimens dorez. La forme de ce cabinet est quarrée, il est

peint & doré par tout, & à trois de ses faces où il y a des miroirs à bordures dorées, qui reçoivent par reflection tous les objets du plus beau païsage qui fut iamais, & d'un des plus beaux iardins du monde; de sorte qu'estant assis sur de riches carreaux qui sont tout à l'entour, ou sur un petit lit de repos, qui est à la face opposée à la porte, on voit de tous costez un objet esgalement agreable. Car non seulement ces diuers miroirs multiplient un tres-beau païsage, un parterre, & des quarrez d'eau, aussi bien que la compagnie qui est dedans, mais ils se multiplient eux mesmes, & par la diuersité de leurs reflections, ils trōpent agreablement les yeux, & amusent doucement l'imagination. Et pour acheuer de vous depeindre cēt aimable cabinet, ie vous diray qu'il y a vne es-

pece de tablete en forme de corniche, qui regne tout à l'entour au dessus des miroirs. Cette tablette est peinte & dorée, comme tout le reste du cabinet, & l'on y voit plusieurs vases curieux & magnifiques. Mais ce qui rend principalement ce cabinet admirable, c'est qu'il a vne grande croisée, d'où l'on voit tout ce que ie m'en vay vous descrire. Mais pour le bien faire, il faut retourner sur nos pas, afin de vous représenter tout ce que l'on apperçoit en vn instant, lors qu'après auoir passé par vne assez belle auenuë, & trauersé vne grande cour, on arriue au vestibule, & qu'on s'auance sur le perron. Imaginez vous donc que l'on n'est pas plustost arriué à l'endroit que ie dis, que l'on découvre le plus bel objet qui fut iamais; car sans vous parler d'abord d'vne grande allée

en terrasse qui s'estend à la droite, le long d'une vigne, & à la gauche entre deux agreables bois, ie vous diray seulement qu'elle a vn perron magnifique, au delà duquel on voit vn grand parterre à compartimens, avec des plates bandes de fleurs tout à l'entour, & trois allées aux deux costez du parterre, comme pour conduire la veuë vers vn beau Jet d'eau qui est d'autant plus admirable, qu'il est sur le haut d'une montagne. Au delà de cette fontaine qui a vn tres-beau bassin, est vn autre parterre de gazon en terrasse, avec trois perrons magnifiques, & deux grands quarrez d'eau, à droit & à gauche, qui font presque croire que la Nature ayant renuersé son ordre, a mis les estangs sur les montagnes, tant ils sont grands & beaux. Il est vray qu'en s'en approchant, on voit bien que

l'art a aidé à la Nature, car ils sont reuestus de pierre, le bord en est gazonné, ils ont des allées basses où l'on se promene tout à l'entour, & dont les murailles sont couuertes d'une verdure eternelle. Si bien que ces quarrez d'eau ayant chacun cinq jets d'eau qui s'esleuent en aigrette, font vn obiet tres-agreable, avec le Jet d'eau du milieu dont ie vous ay desia parlé. Au deffous de cela est encore vn troisieme parterre en terrasse, plus rustique que le second, dont estant descendu par vn autre perron, on voit au deffous de soy vn rond d'eau avec plusieurs jets, des rochers d'eau, des bouillons d'eau, des napes d'eau, & tout ce que l'industrie des hommes peut adiouster à la Nature. Mais pour remener vostre imagination au vestibule, s'il est permis de parler ainsi, & vous bien faire

comprendre ce que l'on voit de là, sçachez qu'outre le premier & le second parterre, le Jet d'eau du milieu, & les deux quarrez d'eau, la veuë s'estend à plus de vingt mille loin, quoy qu'elle soit agreablement arrestée par vne diuersité tres charmante. En effet au delà de l'enceinte du Parc, on voit vne coline cultiuée à la gauche, qui au lieu d'empescher la veuë, la conduit vers le plus bel obiet du monde, car on découure dans vne plaine vne Maison Royale, où il y a plusieurs Tours magnifiques, basties à l'antique; vn superbe bastiment moderne qu'vn des premiers hommes du monde y a fait faire, pour rendre ce beau lieu là plus propre au diuertissement d'vn grand Prince. Ce Chasteau est accompagné d'vn grand bois, que l'on découure encore, & qui orne merueilleusement ce païs.

sage. On y voit aussi plus à droit vne autre belle maison, qui appartient à vn homme tres-illustre, & par ses grands emplois, & par ses grâdes qualitez. On voit plus proche vn Temple où il y a des Vierges consacrées à Diane, & l'on découvre encore plusieurs maisons de gens de qualité, qui varient ce paisage, & le rendent plus agreable. Au delà de ces beaux obiets, qui semblent n'estre là que pour rendre la veuë du Mont Euphrate plus diuertissante, on voit vn lointain admirable, qui semble s'vnir avec le Ciel; & à la droite on voit le haut d'un Temple rustique, des plaines solitaires, des colines, des peloufes, des bruyeres, des lieux qu'on ne fait qu'entrevoir, & des montagnes esloignées, qui s'esleuant insensiblement les vnes sur les autres, se derobent à la veuë par leur esloi-

gnement. Enfin cét obiet est si surprenant & si beau, qu'on ne peut s'empescher d'en estre tousiours surpris, & tousiours charmé. Il faut pourtant vous faire changer d'obiet, & vous conduire à la gauche au sortir du vestibule, dans vne grande allée, dont ie vous ay parlé, qui trauerse vn costé du bois, qui a deux contr'allées fort solitaires, & vne fontaine ialissante au milieu. En allant vers cette fontaine, on trouue à sa droite vn petit bout d'allée, qui laissant échapper la veuë entre des arbres, qui vont iusques dans le Ciel, découure en esloignement cette Maison Royale dont ie vous ay parlé, & dont l'obiet est si agreable. Mais lors qu'au doux murmure de mille oyseaux, qui sont les hostes eternels de cét aimable bois, vous estes arriué à la fontaine, vous

vous trouuez au milieu de plusieurs allées, & en vn endroit merueilleux. Celle qui continuë l'allée qui vient de la maison, s'esleue sur vn Tertre, & a vn bois taillis du costé gauche, & vn grand pré du costé droit. Si l'on regarde du costé de la belle veuë, cette allée est admirable; on voit le mesme paisage dont ie vous ay fait la description, mais on le voit pourtant changé, parce qu'en changeant de place, on voit tous les obiets d'une autre maniere. Mais si après cela, on se tourne du costé opposé, on voit le renfondrement du bois, & l'on va par vne allée, où l'on voit à sa gauche vn pré entre deux bois, qui est la plus agreable chose du monde; & à la droite vn autre pré, & vn peu plus loin vn bois taillis. Au bout de cette allée, on entre dans la grande allée du bois, que le Soleil

ne sçauroit penetrer, tant les arbres en sont touffus. De ce lieu là on a encore vne tres-belle veuë, car cette allée finit d'un bout par vne perspectiue, & s'esleuant par l'autre entre deux agreables bois taillis, on monte sur vn Tertre, au haut duquel est vne grande esplanade, où l'on trouue quatre allées, & où la veuë est si libre, qu'on croit qu'on est maistre du monde. D'un costé on voit le mesme paysage qu'on a veu du vestibule; on apperçoit mesme vn des quarrez d'eau, & l'on voit à sa main gauche plusieurs maisons agreables, qu'on n'auoit pas veuës, & vn lointain beaucoup plus estendu. D'un autre costé, on voit vn coin de Babilone, & le renfondrement du bois; & de l'autre, vn Temple rustique, toute l'Assirie, les superbes Tombeaux des anciens Roys de ce

païs là, des villages, des hameaux, des cabanes, des vallées, des montagnes en esloignement ; & vne si grande estenduë de pais, que la veuë ne pouuant plus rien discerner, l'imagination supplée à son deffaut, & fait qu'on croit voir ce que l'on ne voit pas, parce qu'on sçait seulement que les choses y doiuent estre. Après cela on reuient par le mesme chemin, & tournant au bas du Terre, dans l'epaisseur du bois, on monte par de petites allées rustiques & solitaires, qui persuadent que l'on est dans vn desert esloigné du monde, & qu'on est seul en ce lieu là. Tout y est champestre & negligé, on n'y voit que des arbres & de l'ombre, & on n'y entend que des oyseaux. On trouue en son chemin vn petit lieu à se mettre à couuert, mais il est simplement fait pour se reposer,

ou pour éviter la pluye. De sorte qu'en cét endroit, l'imagination ne peut estre remplie que d'objets simples & solitaires. Mais enfin après avoir marché quelque temps par ces petites allées tournoyantes, on arriue dans vne allée haute du bois, qui est en mesme ligne que la plus basse. Du costé du Terre elle s'élève, & est plus découuerte, mais en allant vers l'autre bout, elle est tres-agreable par son ombrage. On trouue à la gauche plusieurs allées de traueses, qui vont en descendant, & dont la veuë est sombre & fauage. Du mesme costé vn peu plus auant il y a vn lieu dont la veuë est si charmante qu'vn Peintre ne pourroit rien inuenter de si beau. Il y en a mesme dont les objets quoy que beaux, ont quelque chose de solitaire qui plaist infiniment. Mais sans m'arrester à

tant de choses, il faut que ie die qu'après auoir marché quelque temps dans cette allée haute, on voit au bout ie ne sçay quoy de clair, qui d'abord est si confus, qu'on ne le discerne point; en auançant on croit qu'on voit vne grande riuere, & des masts de Nauire; en suite on se persuade que c'est vne admirable perspectiue en peinture; & en s'approchant davantage, on voit des Tours & des Piramides; & l'on voit que c'est le plus grand, le plus beau, & le plus magnifique obiet qui sera iamais. Car enfin par trois grandes croisées qui tiennent toute la face d'un cabinet fait en dome, on voit deuant soy dans la plaine, la grande & magnifique ville de Babilone, qui par les Tours de ses Temples, par ses Palais, par ses Iardins suspendus, fait vne confusion de

beaux obiets, qui esbloüit & qui estonne l'imagination, principalement quand le Soleil l'éclaire le matin. En effet on sent ie ne scay quelle admiration qui oste la parole aux vns, & qui fait faire mille cris aux autres; & l'on ne peut s'imaginer ce que l'on voit de là sans l'auoir veu. Ce grand & merueilleux obiet le paroist encore dauantage parce qu'on voit du mesme endroit plusieurs choses, qui par leur opposition seruent à le faire paroistre plus bleau. En effet sur des tertres à droit, on voit plusieurs petites cabanes rustiques, vn Temple champestre plus proche, vn petit boquet, des vignes à la gauche, des bleds & des prez dans le milieu, & dans le lointain le plus esloigné, des montagnes couronnées de superbes Palais. Et ce qu'il y a encore de magnifique, c'est qu'il y a en cét en-

droit vne allée en terrasse de six cens pas de long, où l'on a toujours la mesme veüe, qui est assurément la plus belle du monde. Je ne vous dis point qu'au deuant de ce cabinet ouuert de trois faces, où est cette admirable veüe, il y a plusieurs allées qui se croisent, dont les veüs sont toutes differentes, & toutes admirables, car cela seroit trop long, mais seulement qu'une allée par où l'on va en descendant regagner l'allée basse du bois, a encore vne veüe merueilleuse par sa diuersité, & d'où l'on voit mesme le mesme quarré d'eau qu'on a veu du Terre qui luy est directement opposé. Mais enfin quand on a regagné l'allée basse, on en sort par vn grand perron, on traaverse la cour, & on se retrouue dans le vestibule, dont la belle veüe vous console encore agreablement de tous les autres beaux
obiets

objets qu'on n'a plus. Mais ce qu'il y a de particulier, c'est que ceux à qui appartient cette belle maison, qui sont des gens de qualité de Babilone, en sont si dignes, que tout le monde se réjouit de la voir en leur puissance. En effet Telaar & Melifante sa femme, ont vne vertu qui est vniuersellement reconnuë, & qui les fait considerer de tout ce qu'il y a de gens de haute qualité, & de grand merite. Telaar est bien fait de sa personne, il est brun, de taille auantageuse, il a l'air noble, le sourire agreable, & la ciuilité du monde. Il a l'esprit fort droit, la conuersation d'un honneste homme, le iugement solide, & beaucoup de capacité pour les employes les plus considerables. Sa fortune est sans doute tres-auantageusement establie, mais il en vse si noblement,

que personne ne porte enuie à son abondance. Tout ce que la magnificence conduite par le bon sens peut faire auoir, se trouue chez luy. Ses maisons sont belles, sa table est magnifique, delicate, & polie; il aime les honnestes gens, & pour acheuer son bonheur, les Dieux luy ont donné vne femme dont les inclinations toutes nobles seconduisant les siennes, ne laissent rien à desirer pour sa felicité que d'auoir des enfans qui leur succedent, & qui leur ressemblent. En effet Melisante a tout ce qui peut rendre vne honneste femme considerable. Elle n'est pas grande, mais elle est fort bien faite, & a la taille tres-agreable. Elle a les cheueux bruns, le teint blanc & vif, les yeux bleux, fins, enioüez, & pleins d'esprit. Le tour du visage agreable, le sourire fort aimable, la gorge bien

taillée, les bras beaux, les mains belles, & l'air fort libre. Pour de l'esprit elle en a infiniment, mais de cét esprit animé qui paroist toujours à la conuersation, qui ne la laisse iamais languir, & qui inspire de la ioye. Elle a l'imagination viue & prompte; elle parle fort iuste, & fort facilement de toutes choses; elle fait vn recit diuertissant de la plus agreable maniere qu'il est possible; & sa memoire la sert si fidelement, que ie luy ay oüy redire vne fois vn discours qu'auoit fait le plus éloquent des Mages de Babilone, sans y changer presque rien. Pour son iugement, il ne faut que considerer la conduite de toute sa vie pour en iuger à son auantage, n'estant pas possible de trouuer vne personne plus solidement vertueuse qu'elle. Au reste rien ne l'embarasse, &

sans paroistre iamais empresse'e, elle satisfait à toutes sortes de devoirs. Il n'y a pas vne femme à Babilone plus exacte à obseruer toutes les choses de sa Religion; elle rend à tous ses parens tous les soins qu'elle leur doit, elle n'en fait pas moins à ses Amies, & ne manquant à pas vne des occasions differentes où la bien-seance ou la ciuilité l'engagent, elle a encore du temps de reste pour donner à des promenades & à des choses indifferentes. Pour sa politesse, on peut dire qu'elle est à tout ce qu'elle fait, ses habillemens sont bien choisis, ses meubles sont bien entendus, & quand elle donne quelque colation à ses Amies, à sa belle maison de la campagne, on n'y peut rien desirer. Ses esclaves la seruent avec ordre, avec propreté, & avec respect, & elle sçait

mesme l'art de donner de la plus galante maniere du monde. En effet elle a vne Amie à qui elle fit vn iour vn present tres - ingenieusement ; car luy ayant veu vne boette de portrait assez belle , qu'elle portoit pendue à vn simple cordon , & cette Amie l'estant allée voir , elle la luy prit avec plus d'adresse qu'une Lacedemonienne ne l'eust pû faire ; de sorte que cette fille croyant l'auoir perduë , regretta quatre iours sa perte. Mais à la fin Melisante luy renuoya la boette qu'elle regrettoit, luy faisant dire qu'on l'auoit retirée des mains des voleurs , & que comme ils y auoient mis vne chaine , elle croyoit qu'elle la pouuoit garder sans scrupule , parce qu'on ne sçauoit à qui la rendre , & que personne ne la redemandoit. Mais dans la verité cette chaine , qui

estoit tres bien faite, & qui auoit vne agraphe tres-iolie, auoit esté mise à cette boette par Melifante, qui par cette ingenieuse liberalité, voulut faire vn present à la faueur d'vn larcin. Il vous est aisé de iuger par ce que ie dis de l'esprit de Melifante, qui outre tout ce que ie viens de dire, a encore vn talent admirable, car elle a la voix tres-belle & tres-charmante. Aussi chante-t'elle aussi bien qu'on peut chanter, & il n'y a personne qui ne creust à l'entendre qu'elle a l'ame tres passionnée. On luy reproche pourtant quelquesfois de n'estre pas assez sensible à l'amitié, & ie pense qu'on peut fans luy faire iniustice dire hardiment, que la sienne est pour l'ordinaire plus genereuse que tendre, bien que ie ne croye pas impossible qu'elle ne puisse aimer fort tendrement. Quoy

qu'il en soit sa façon d'aimer est tres commode pour ses Amies, & tres-glorieuse pour elle, car elle est tres-soigneuse des personnes qu'elle aime, elle est officieuse, douce, & agreable, & elle n'a point d'Amie qui ne luy doiue mille plaisirs, & mille soins; & l'on peut dire enfin que si Melisante estoit aussi aimante qu'elle est aimable, l'amitié qu'on auroit pour elle seroit si excessiue, que l'on en seroit aussi tourmenté que si c'estoit de l'amour. Ha! Amilcar, dit alors Plotine, que j'ayme cette Melisante, & que j'aurois bien mieux estre avec elle au mont Euphrate, que d'estre au Camp de Porsenna. Cependant comme ie suis sincere, ie confesse que vous estes vn aussi grand Peintre en paisages qu'en portraits, mais auant que de vous louer autant que j'en ay enuie, il faut que Merigene

me die, si Telaste, Melifante, & le mont Euphrate, sont comme vous les representez. Ils sont si semblables, reprit Merigene, qu'il n'y a rien de plus iuste. Tout ce qu'Amilcar a dit m'a fort diuertie, reprit Valerie, mais à moins que de sçauoir aussi bien narrer que luy, ie ne conseillerois pas à vn autre de faire vn aussi long recit. Ce que i'admire, repliqua Amiclée, c'est qu'Amilcar ait si precisement retenu toutes les particularitez d'vn si beau lieu. Ha pour cela ! reprit-il, ne vous en estonnez pas, car il faut que vous sçachiez que tous les beaux obiets font vne si forte impression dans mon esprit, qu'ils ne s'en effacent iamais. Cependant ie vous declare franchement qu'en vne conuersation ordinaire, ie n'aurois pas fait mon recit si long, car enfin il n'est pas iuste d'imposer silence à toute

vne compagnie, pour montrer seulement qu'on sçait parler. Après cela Amiclée s'estant retirée le reste de la compagnie s'en alla, si bien que Clelie, Plotine & Valerie estant demeurées seules, les deux dernieres s'apperceurent que la melancholie de Clelie estoit encore augmentée. Qu'avez vous ma chere sœur, luy dit Plotine, & quelle nouvelle cause peut avoir vostre chagrin. Clelie rougit à ce discours, où elle eust bien voulu ne répondre pas, mais Valerie l'en ayant pressée, est-il possible, leur dit elle, que vous n'avez pas compris par la fin du récit d'Amiclée, que Zenocrate est jaloux d'Aronce & de Lysimene, & que vous ne connoissiez pas que cela estant ioint à toutes les autres coniectures que j'ay de mon malheur, j'ay lieu de croire qu'Aronce est infidele, & que durant que ie reiette

opiniairement l'affection d'Horace, il est infidele à la mienne. Pour vous montrer, reprit Plotine, que ie suis sincere, encore que ie sois sœur d'Horace, & que ie sois persuadée qu'il est digne d'estre aimé de vous, ie ne laisse pas de vous assurer qu'Aronce est innocent, & que vostre ialousie est aussi mal fondée que celle de Zenocrate. Mais qui sçait, reprit Clelie, si Aronce ne consent pas à l'ordre qu'il a receu de ne me voir point, car par ce moyen on nous renuoyera à Rome sans qu'il me voye, & quand i'y seray retournée, il m'escrira peut-estre qu'enfin il n'a pû desobeir au Roy son pere; ainsi sans estre mesme exposé à mes reproches, il oubliera tous ses sermens, & ne m'aimera peut-estre plus. Mais si ce malheur m'arriuoit, adioustant-elle en rougissant de dépit, ie sens bien que ie haïrois autant Aronce,

que ie l'aurois aimé, & dans le simple soupçon que i'en ay, ie sens vn si grand trouble dans mon cœur, que ie ne puis discerner quels sont les sentimens que i'ay dans l'ame. Comme Clelie parloit de cette sorte, Lucilius entra, qui leur parut fort triste. De sorte qu'estant en peine de la cause de sa tristesse, Plotine luy demanda avec precipitation ce qu'il auoit. Helas! Madame, luy dit-il en soupirant, ie voudrois bien ne vous l'apprendre point; Clelie & Valerie rougirent, & regardant Lucilius, seroit-ce, reprit Valerie, que la paix seroit troublée par les artifices de Tarquin? & ne seroit-ce point, adiousta Clelie, que Porfenna au lieu de nous garder pour ostages, nous voudroit traiter en prisonnières? Nullement, Madame, repliqua-t'il, mais c'est qu'il a fait arrester le Prince, sans qu'on en sçache le suiet, & qu'il

paroisst fort irrité contre luy. Quoy
(reprit alors Clelie, malgré la ialousie qu'elle auoit) Aronce est arresté par l'ordre de Porfenna! Oüy, Madame, repliqua-t'il, & le Camp en est si esmeu, tout le monde en est si surpris, & la Reyne, & la Princesse des Leontins en sont si affligées, qu'il est impossible de vous l'exprimer. Clelie soupira à ces paroles, qui redoublerent tout à la fois ses déplaisirs & ses soupçons; mais ne s'imagine-ton point, dit-elle, par quelle raison on l'a arresté? Point du tout, répondit Lucilius, & tout ce que l'on sçait, c'est que depuis que la cruelle Tullie eut vne conference si particuliere avec Porfenna, il a tousiours esté assez resueur, & assez triste; que depuis hier il est venu plusieurs hommes de la part de cette Princesse, à qui Porfenna a parlé en particulier, & qu'en suite il a fait

arrester le Prince, & commandé absolument qu'on ne le laisse parler à personne. Ainsi, Madame, ie ne preuoy pas qu'il puisse seulement donner de ses nouvelles à ceux qu'il aime le plus. Porsenna a mesme ordonné qu'on vous garde avec plus de soin qu'à l'ordinaire, quoy qu'il ait encore commandé qu'on vous serue tousiours avec beaucoup de respect. Cependant la Reyne & la Princesse des Leontins ayant voulu parler du Prince à Porsenna, il leur a dit avec assez d'aigreur, que dés qu'elles scauront son crime, elles le haïront autant qu'elles l'aiment, & qu'en attendant qu'il puisse le leur apprendre, il les prie de ne luy en parler point du tout. Voila, Madame, adiousta Lucilius, ce que i'ay creu à propos de vous faire scauoir, afin que si vous scauez quelque chose qui puisse nuire ou seruir à Aronce, vous

puissiez en vser comme vous le iugerez à propos. Helas ! genereux Lucilius, reprit elle, ie ne sçay rien, sinon que ie suis malheureuse, & que si Aronce n'est pas plus criminel enuers moy, qu'il l'est enuers Porfenna, il est le plus innocent de tous les hommes. Vn moment après cela, Telane apporta vn billet d'Aronce à Clelie, où elle trouua ces paroles.



LE MALHEUREUX

ARONCE

A L'INCOMPARABLE

CLELIE.


LE ne sçay de quoy on m'accuse, Madame, mais ie sçay bien que ie n'ay rien fait que vous aimer, depuis que i'ay commencé d'estre à vous.

Cependant pleignez moy, ie vous en con-
iure, & quoy qu'il m'arrive, soyeZ aussi
fidele que ie le suis.

Clelie leut ce billet avec vne agi-
tation d'esprit estrange, & Telane
luy ayant promis de tascher de fai-
re tenir sa réponce à ce Prince, de-
uant qu'on eust eu loisir de bien
donner les ordres pour sa garde, elle
escruiuit & luy donna son billet, a-
prés quoy ne pouuant dissimuler sa
douleur, elle se retira iusques à ce
que Lucilius & Telane se fussent
retirez. Mais lors qu'ils furent for-
tis, qui vit iamais, dit-elle à Vale-
rie & à Plotine, vne personne plus
malheureuse que moy? car enfin ie
ne passe iamais vn iour sans quel-
que nonuelle infortune. Il n'y a
qu'un moment que i'auois de la ia-
lousie, iusques à vouloir haïr A-
ronce, & presentement i'ay de la

compassion de son malheur, iusques à souhaiter d'estre prisonniere au lieu de luy. Car si la chose estoit ainsi, il pourroit me deliurer, au lieu que ie ne puis faire autre chose que le pleindre, & que le pleindre inutilement. Mais après tout, si ie ne puis cesser d'estre malheureuse, ie pourray peut-estre a la fin cesser de viure, n'y ayant nulle apparence que ie puisse tousiours resister à la douleur. Valerie & Plotine firent alors tout ce qu'elles purent pour la consoler, mais il n'y eut pas moyen, & après auoir passé le reste du iour à se pleindre, Clelie passa toute la nuit à soupirer.

Fin du Premier Liure de la cinquiesme Partie de Clelie.





l.
re
vir
ca
ue
u.
ne
ic
de
ice
la
ent
r
pas
re-
pas-

LIBRARY
of the
University of
Cambridge





Faint, illegible text, possibly bleed-through from the reverse side of the page. The text is arranged in approximately 15 horizontal lines across the page.











CLELLI
TO 5

